



BIBLIOTECA NAZ.

Reale Vittorio Emanuele III

KLII

C

65

NAPOLI



Q. 15A. 12

XLI

(

65

ANTONII BORREMANSII


VARIA-
RUM
LECTIONUM
LIBER.

AMSTELÆDAMI.

Apud Henr. et Theod. Boom. 1696



1-u



ANTONII BORREMANSII
VARIARUM
LECTIONUM
LIBER. 76.

In quo

*Varia utriusque Linguae Auctorum loca emendantur,
explicantur atque illustrantur, ritus prisca eruun-
tur, & multa non ubique obvia docentur.*




AMSTELÆDAMI,
Apud HENRICUM & THEODORUM
BOOM. 1676.

ANTHONY DORRANCE

VARIARUM LECTIONUM LIBER

THESE VARIARUM LECTI-
ONUM LIBER PRIMI
VOLUMINIS



AMSTELÆDAMI
VIRI THEOLOGICI
1600

Clarissimo, Amplissimoque

V I R O,

D. JOANNI PESSERO,

C O N S U L A R I,

S. P. D.

ANTONIUS BORREMANSIUS.



Uave mari magno turbantibus aquora ven-
tis,

E terra magnum alterius spectare labo-
rem.

- Non quia vexari quemquam est jucunda voluptas ;
- Sed quibus ipse malis careas, quia cernere suave est.

Licet enim mihi versibus iisdem ad te
uti, P E S S E R E, quibus utitur ille,
qui pandit

Unde omneis natura creet res, auget alaque :

Quove eadem rursus perempta natura resolvat.

Nulla quippe in loco potius, quam in tur-
bulento mari illos versari dicendum est,
qui civitati sunt, aut Reipublicæ regen-
dæ admoti. Æstuat insana plebes, velut
mare vesaniente vento, & ita Reipubli-
cæ navem exagitat, ut ipse malus celeri

D E D I C A T I O.

Africo faucius, antennæque gemant.
 Sumus hoc satis in patria nostra experti,
 quam abhinc triennium interno tumultu
 non solum concussam vidimus; sed tan-
 tum non everfam atque penitus deletam.
 Horrescit animus, quoties cogito quantis
 in turbis ac procëllis omnes versati simus.
 Ea te tempestas clavo dejecit, quem sem-
 per in commune bonum summa cum vir-
 tute fideque rexeras. Vidisti te inermem
 trudi à plebe armatâ, vidisti te in carce-
 rem rapi ab iis, quibus imperare debebas,
 vidisti gladium à pessimo nebulone jugu-
 lo tuo intentatum, atque eo vidisti ani-
 mo, ut non senatorem te, non confu-
 lem; sed regem esse probaveris.

Rex est qui posuit metus,

Et diri mala pectoris:

Quem non ambitio impotens,

Et nunquam stabulis favor

Vulgi præcipitis movet.

Tantum potest animus, qui nullius culpæ
 conscius, & se ipse contentus in mediis
 calamitatibus se erigit. Hic à muneribus
 & regimine splendorem non mutuatur;
 sed, dum se regit, ipse muneribus splen-
 dorem

D E D I C A T I O.

dorem dignitatemque confert. Non ponit hic fasces arbitrio popularis auræ, dum virtus intemeratis honoribus fulget. Hunc majorem ostendit casus: & quanto magis deprimis, tanto altius assurgit. Sed quid ego in communem locum excurro? Te alloquor, *Pessere, Vir Clarissime*: Tu indignis modis à malis habitus, & Consulari fastigio deturbatus, jam privatam apud te tranquillamque vitam agis, id est, (ut ego interpretor) latissimum regnum possides. Jam securus vides quantis in periculis degant, quam nec plebi suæ satisfaciant, qui tibi ac tui similibus in regimine successerunt. Frueris isthoc solatio, quod tacitis votis isti te vicissim Consulem exoptant, qui ut diu Consul-esses non siverunt. Nec tacite tantum hoc vovent. Audivi nuper, cum aliquis, qui & ipse non minimus fuerat turbator, palam profiteretur malam gratiam vulgus tibi retulisse, optimo Consuli, quem pristino honori restitutum nunc omnes cuperent. Sed quicquid hujus aliquando futurum sit, *ἥτις ἐν γένεσι καίται*: neque tam propter te, ut fiat, quam propter ipsos

D E D I C A T I O.

cives, est optandum. Tu interim magnum aliorum laborem tutus spectas, ac vere de te dicere potes, quod Scipionem Africanum dicere solitum accepimus, numquam te minus otiosum esse, quam cum otiosus, nec minus solum esse, quam cum solus fies. Quid enim? Illi ne soli aliquid agere censendi sunt, qui in senatu sententiam dicunt? qui consules civitatem regunt? Est istud quidem magnum & in luce positum: sed qui temporum iniquitate vetantur studia sua ad rempublicam conferre, etiam cum laude sibi & scientiis honestis vacant. Frequens es in musco cum summis maximisque viris, Julianis, Papinianis, Scævolis, Paulis, Ulpianis, & aliis magno numero; quin & cum ipsis Imperatoribus, dum jurisprudentiam colis, scientiarum humanarum longe præclarissimam. Cum hac semper conjunxisti divinam Theologiam, quæ tibi magnum inspiravit religionis amorem, quem non verbis solum quotidie ostendis, sed etiam factis. Hinc tuæ illæ virtutes, quas multis verbis prædicare non desinam, ubi de te apud
alios

D E D I C A T I O.

alios erit dicendum : apud te autem ut
 prædicem non patitur modestia tua, quæ
 est cæterarum virtutum quasi quoddam
 condimentum. Ab istis rebus graviori-
 bus quicquid tibi otii superest, nullibi
 libentius, quam in studiis literariis collo-
 cas. His omnibus dum occuparis, *Pes-
 sere Amplissime*, sine, quæso, ut te pa-
 rumper interpellem. Offero tibi libellum,
 ut mole ita & prætio exiguum: eo autem
 animo offero, à quo plerique homines
 sunt alienissimi. Putant nimirum se sat-
 gratos esse, ubi pro magnis benefactis
 verba bene multa, & vanam libelli alicu-
 jus nuncupationem rependerint. Quin &
 gratiæ sibi apponi postulant, quando ma-
 gnorum virorum laudes styli atque inge-
 nii vitio multum detriverunt. Horum
 factum bonis nunquam placuit. Tibi hoc
 opusculum inscribo, non ut tuis ergà me
 præclaris meritis dignas referam gratias;
 sed potius ut tibi me magis obstringam.
 Est illud vere juxta ac eleganter à Cicero-
 ne scriptum; Cui plurimum debes, ei
 quoque plurimum te velle debere. Pluri-
 mum tibi equidem debeo, quod amici-

DEDICATIO.

tiam, quæ semper Parentem meum complexus es, mihi filio non denegas. Unde factum est, ut ultro mihi omnes locupletissimæ tuæ bibliothecæ libros non tantum commodatò obtuleris, sed quosdam etiam commodaveris. Huic istud adjuuge, ut libellum tibi dicatum benevolò animo accipias, & adversus obtrectatores, si opus est, defendas: quod te facturum videor mihi posse spondere, postquam ejus specimen, antea tibi visum, calculo tuo approbare dedignatus non es. Vale, *Pessere Clarissime*, & diu sospes vive. *Gorinchemi ipsis Cal. Novemb. AN. M. DC. LXXV.*

Præfatio

Præfatio ad Lectorem.



Non ignoras, erudite Lector, *Publium Terentium*, quem familiarem suum vocat Cicero, recte olim scripsisse:

In medio omnibus

Palmam esse positam, qui tractant artem musicam.

Hanc nemo sibi ita propriam fecit, ut aliis ad eam adspirare non liceat. Commune istud stadium est, commune omnibus certamen. Neque quisquam sic feliciter hinc currit, quin alicubi cespiter aut impingat. Non rarò in quo peccavit doctissimus, melius se gerit, qui minus est doctus; sed alieno periculo magis cautus. Quid quod ipse conatus si nihil laudis, saltem nihil dedecoris adferre possit? Eumne pluris æstimabis, qui nihil faciens in supino otio degit, quam qui suo labore aliorum nititur parcere laboribus? Non equidem puto. Vivimus Mi Lector hoc seculo, quod nisi viri eruditi, quam possunt, corrigant, in barbariem præceps abit. Omnium rerum vicissitudinem esse, nulli magis, quam hinc apparet. Erat olim literis honos, ac Musis. Jam pene ad contemptum sufficit, literatum esse. Scilicet infra Batavam gravitatem sunt lepidulæ illæ Musæ, quibus olim fasces suos Romani Consules, quibus Reges sua submiserunt sceptræ. Hæc causa est, cur literæ intermortuæ jaceant, vel à Belgio nostro longe migrent. Accedit ferale bellum, quo triennium
jam

P R Æ F A T I O

jam premimur, omnium, quotquot unquam fueret, gravissimum. Verè dicam cum *Lucano* :

*Certatum totis concussi viribus orbis ;
In commune nefas.*

Quam parum autem Musis cum Marte conveniat, omnia ubique secula testantur. Otium illæ desiderant, & animum serenum : iste turbarum auctor est, & mentem non minus, quam corpus exagitat. Quin etiam facultates aufert ac prædatur, sine quibus studia literaria vix constant. Sed quin agimus, *Mi Lector*, & fortia pectora rebus adversis opponimus. In maximis belli atque fortunæ incommodis dulce solamen ex literis capimus. Neque desunt exempla, quæ animos nostros incitent ac inflamment. Vivunt vigentque *Gravius*, *Blancardus*, *Jac. Gronovius*, *Cuperus*, & alii, qui *Belgicæ* Juventuti docendo & scribendo prælucent. Hos inter merito suo nominandi sunt *Abrahamus Berkelius*, *Thomas Munckerus*, cujus elegantes in *Hyginum* notæ nuper adeò in lucem prodierunt, nec non *Samuel Tennulius*, quem communi *φιλομαθῶν* nomine rogo obtestorque, ut pergat promissa implendo demereri orbem literatum. Pauci anni sunt, ex quo *Jacobus Geusius* publice in novellis hebdomalibus promisit, multa tum de aliis scientiis, tum re literaria se daturum in lucem; verùm huc usque nihil ab eo vidi præter *Dialogum inter Annam & Cajapham ex orco fugitivos* : de quo quid eruditis sit sentiendum,

A D L E C T O R E M.

dum, hodie à me non dicetur. Mihi autem in hanc arenam descendentì prologo galeato utendum est. Multos enim fore præviedo, quorum vitilitigationes effugere non potero. Hisce quid respondendum putem, non celabo; ubi paucis de instituto meo exposuero, & qui factum sit, ut animum ad scribendum appulerim. Non hodie aut heri natum est istud commentandi genus, quo quicquid ad rem literariam illustrandam occurrit, neglecto ordine in certa quædam capita conjicitur.

Hinc tot libelli *Variarum Lectionum*, *Miscellaneorum*, *Συμπλοκαί*, *Schediasmatum*, *Adversariorum*, *Animadversorum*, *Antiquarum Lectionum*, & titulis horum similibus insigniti. Quæ de utilitate istiusmodi scriptionis pro se dixerunt pridem alii, eadem cum pro me quoque dicta sint, non est quod repetam. Vel vide *Præf. Angeli Politiani*, quam *Miscellaneis* suis præposuit, qui quidem *Politianus* inter primos fuit, qui scribendi hocce genus, veteribus valde usitatum, ab interitu vindicarunt. Multa in *Variis* traduntur, quæ priscis scriptoribus explicandis plurimum conducunt: quæ eadem non absque tædio ad singulos repetantur. Nam quis, quæso, tandem observandi seu commentandi finis, si quæ scriptoribus antiquis plerisque sunt communia, iis ad singulos repetendis lectorem obtundis ac enecas? Nihil esse utilius potest, quam habere, unde ad quemvis autorem quæ usui sint, depromas. Accedit grata quædam & amabilis varietas, sine qua nihil est tam nitidum, quod

quod non squalcat. Hac ipsa rerum natura vel imprimis gaudet, quæ in tam immensâ rerum turbâ nihil usquam reliquit, quod non admirabili quodam varietatis artificio depinxerit. Et sicuti oculi diversarum rerum adspectu magis detinentur: ita semper animus circumspectat, in quod se, veluti novum intendat. Cui si cuncta sui similia occurrant undique, tædio protinus avertitur. Istud in me sæpius expertus non dubito, quin & alii experiantur quam plurimi. Certe varietas, ut ait non nemo, fastidii expultrix, & lectionis est irritatrix. Quid me autem ad scribendum impulerit, brevi expediam. Cum primum incidissemus in luctuosissimum illud cum Gallis bellum, cumque hostis, multis potitus oppidis, urbi huic nostræ quotidie immineret, non me quidem, ut multos alios, Panicus terror invalit; sed animus anxia cura confectus, tandem in venternum prolapsus fuit. Non soleo facile de re quâpiam desperare, minime verò de re publica; sed quis neget eam tum fuisse Patriæ nostræ sortem, ut etiam prudentissimi quique, omni spe ademptâ, stuperent? Deus, Deus est, *Mi Lector*, cujus solo beneficio auxilioque & stamus adhuc, & avitâ libertate fruimur. Cum *Davide* propheta canimus:

*Te nostra semper carmina, te lyra
Sonabit, orbis conditor optime,
De faucibus lethi imminentis*

A D L E C T O R E M.

Incolumis tibi vota reddam.

Per te superbus nec lacrymis meis

Insultat hostis, nec fruitur malis. &c.

Ego itaque, cum late omnia hostiles copiae tenerent, nec nugis tempus volebam terere, nec ad seria satis animi habebam. Interim otio torpescibam, quod jure putatur esse omnium laboriosissimum. Aurea sunt *Ennii* verba *Iphigen. Trag.*

Otio qui nescit uti, plus negotii habet,

Quam cum est negotium in negotio.

Nam cui quod agat institutum est, nullo negotio

Id agit: studet ibi, mentem atque animum delectat suum.

Otioso initio animus nescit quid velit.

Hoc idem est, neque domi nos, neque militia sumus.

Imus huc, hinc illuc: quum illuc ventum est, ire illinc lubet.

Incerte errat animus: prater propter vitam vivitur.

Quare tandem ad me redibam, & studia intermissa repetebam. Sunt autem tria quibus homini liberali & ingenuo imprimis est studendum. Morum nempe scientia, quam nosmet ipsos actionesque nostras ad honestum & decorum exigamus: regiminis & rei publicae si non exacta, aliqua saltem notitia, quam doceamur ad clavam Reipublicae

P R Æ F A T I O

cæ admoti alios regere, vel degentes inter privatos ab aliis regi: denique cognitio literarum, quæ cum nobis ipsis jucunda est, tum aptissimos nos reddit, ad societatem humanam tuendam atque exhilarandam. Hæc causa est cur ii, qui verba Latina fecerunt, HUMANITATEM appellarunt id propemodum, quod Græci *παιδεία* vocant; nos (Agellium loquentem audis (Lib. XIII. Cap. 15.) eruditionem institutionemque in bonas artes dicimus: quas qui sinceriter cupiunt appetuntque, hi sunt vel maxime humanissimi. Hujus enim scientia cura & disciplina ex universis animantibus uni homini data est; idcircoque humanitas appellata est. Moribus tum meis, tum aliorum, quæ mea est provincia; corrigendis expoliendisque non omninò segniter incumbo: tam diu autem incumbere debebo, quoad me, quantum proficiam, non poenitebit. Politices tantum scio, quantum satis est, ut magistratui paream. Literas humaniores non penitus à me fuisse neglectas, *Varia* hæc mea ostendunt. De quibus sic ante omnia profiteor, non doctis me istæc aut exercitatis Viris scripsisse; sed adolescentibus, quibus ad studia manuductore opus est. Non dubito fore plerosque, quibus totum hoc leve admodum videatur, & ut nec scriptu, ita nec lectu satis dignum. Sed ut ut est, certe nimis leve videri non debet, sine quo ad graviora non pervenimus. Recte olim à Demosthene dictum est *Olynthiacâ* I. I.

Ὁς περ οὐκ ἄρα, δέμας, & πλόη, & τῷ ἄλλῳ ἢ τοιούτῳ τῷ κα-

A D L E C T O R E M.

πῶς ἰσχυρότατα εἶναι δεῖ, οὕτω & ᾧ ἀρχίζων τὰς ἀρχάς, & τὰς
 ὑποθέσεις ἀληθεῖς & δικαίας εἶναι προσήκει. *Sicut, meâ sen-*
tentiâ, domus, navigii, & aliorum hisce similium
infimas partes firmissimas esse oportet; ita etiam con-
venit ut operum initia ac fundamenta quam maxime
vera & iusta sint. Et Olynth. III. πρὶν δὲ τιτὼ ἀρχὴν ὀρθῶς
 ὑποθέσθαι, μάταιον ἡγέμευ περὶ τῆς τελυτῆς ὀντιῶν ποιεῖσθαι λόγον.
Nisi recte constituto principio, frustra, opinor, aliquid
nobis de fine promittimus. Nemo autem, nisi
 hospes in literis, ignorat, omnium artium & scien-
 tiarum fundamentum in literarum cognitione esse
 situm. Abeant igitur, qui queruntur ad omnem
 se minuciem demittere scriptionem nostram. Hoc
 mihi *Casaris, Varronis, Messalæ, Ciceronis, alio-*
rumque exemplo facere liceat. Horum æmulari
 exopto negligentiam potius, quam istorum ob-
 scuram diligentiam, qui cum me accusant, non
 illos tantum Romanos; sed etiam *Politianos,*
Turnebos, Pithæos, Muretos, Brodaeos, Junios, Fa-
bro; & alios magno numero accusant, quos ego
 omnes auctores habeo. Non desunt illustria no-
 mina, quibus me defenderem, si auctoritate ma-
 gis, quam rationibus agere statuissem. Gramma-
 ticum, istud omne est, fateor. Sed quid tum?
 Quod illi maledictum esse vehemens existimant,
 ego eam laudem puto maximam. Vetus est & ve-
 rum dictum: πρὸς τὸ ὀρθῶς διδάσκειν δεῖ πρῶτον ἐξετάζειν
 τὰ ὀνόματα. *Ut bene doceas, ante omnia inquirere de-*
bes in ipsa vocabula. Nos vero, inquit, *magnus*
Gronovius de Centes. Usu. Pag. 80. cum scribimus

* *

aut

P R Æ F A T I O

aut loquimur, si praesidiorum grammaticorum piget, quid experimur eum sermonem, quem non adsequimur sine Grammatica? cur non potius contenti sumus lingua, quam ante Grammaticam didicimus? Sed sic solent Sophistae: & ut Baleares victi pecudum in morem clamore sublato fugam petiverunt: sic illis postremus hic latratus, quod convellere nequeunt, id esse grammaticum. Hoc hominum genus, si quid frontis habet, tandem Grammaticæ oblatrare desinet, ubi intellexerit, quam late se illa extendat. Dicam quæ ad hanc rem faciant, non meis, sed Illustrissimæ Scaligeri verbis. Sic igitur ille Epist. Pag. 824. Tria genera Grammaticorum: alii *παιδαγωγοί* alii *σοφισταί*, tertium genus *κρητισταί* vocantur. *παιδαγωγοί* elementa & primores literas docent. Item partes orationis, structuram verborum & similia. Eos Græci *γραμματιστὰς* potius, quam *γραμματικὸς*: & Latini literatores, non literatos vocant. Ars autem non Grammatica, sed literatura. Historici in fluminum, montium, regionum nominibus occupati sunt: abstrusas historias, aut *μυθολογέματα*, aut *ποιητικὰς διηγήσεις* explicant: genealogias Deorum, ac priscorum Heroum diligenter rimantur. Nobiliores utrisque Critici: nam illi tanquam censores quidam & veterum librorum senatum legere possunt, & non probos tribu movere: quia *παρρησιασμένα*, *ἰμβολικὰ*, *νοθεύματα*, & similia deculpare, ut eorum verbo utar, solent, & nota culpæ apposita damnare: neque tantum quæ perperam ab autoribus dicta, scripta, pronunciata sunt, ἀδύνατον, ἰσχυρίζεσθαι; sed & aliorum Criticorum temere

A D L E C T O R E M.

mere scita notare ac castigare, quam, *κρίτων ἱκανὸς ἀδελ-
 τήτων* vocabant. Vide porro eundem Scaligerum
Iisd. Epist. Pag. 117. Vossium aliosque. Veteres
 certe late adeò Grammaticen extendunt, ut non
 una sit scientia; sed scientiarum cinnus. Adi. *Quin-
 tilianum Inst. Orat. Lib. I. Cap. 4.* Recte autem
 Scaliger, cum ait in numero Grammaticorum
 nobilissimos esse Criticos: quamquam sunt, qui
 putant Criticos differre à Grammaticis: & illos
 quidem esse similes architectis, Grammaticos ve-
 rò ministris; ut videre est apud *Sextum Empiricum
 adv. Mathem. Lib. I. Cap. 7. & Hieronymum Mer-
 curialem Var. Lect. Lib. VI. Cap. 19.* Eiusdem quo-
 que sententiæ est *Gas. Scioppius de Arte Criticâ*, quo
 quidem in libello plerosque tum Veteres, tum
 Recentiores recenset, qui ad suam usque ætatem
 Criticæ studuerunt. Sic enim apud eum legimus:
*Non nihil diversa vel priscis temporibus Critici &
 Grammatici munera fuisse videntur. Et Grammati-
 corum quorundam superbiâ, in Grammaticis, Rhetor-
 icis; & Criticis, simul aliis antistare cupientium,
 factum tandem existimo, ut Critica & ipsa pars
 Grammatices haberetur. Criticos autem Joan. San-
 genesius de Parnasso Lib. II. C. 4. describit hunc in
 modum: Magistratus genus est apud Parnassum, quo
 qui funguntur, plus ipsis Regibus possunt: atque in
 ipsos Reges habent potestatem. Leges constituunt, cau-
 sas controversiasque sine provocatione dijudicant; se-
 des assignant; honores decernunt; notas fama im-
 ponunt; in dicta factaque incredibili severitate inqui-*

P R Æ F A T I O

runt ; rerum prætia æstimant , quid ad unumquemque pertineat , pronuntiant ; donant aut adimunt unicuique quod libet. Critici nominantur. Quanta sit critica necessitas , sæpe est à Viris doctissimis ostensum. Cum omnis actio nostra , inquit Germanorum eruditissimus Th. Reinesius Epist. ad Nesteros Pag. 66. à scientia , felicitas ab actione pendeat , quo modo si eos auctores prave intelligamus , è quibus scientiam haurimus , (non autem recte intelligemus , si depravatos legimus & incorrectos) scientia nostra solida erit , quomodo actio iusta , laudabilis , felix ? Ut vero recte percipere possimus mentes praeceptorum nostrorum & fundamenta artis , ei rei est Critice , quæ loca à tot seculis depravata , nondumque restituta corrigit , genuinosque sensus , etiam ante obscurissimorum , aperit. Hoc Julianum non latuit , qui edicto vetuit filios Christianorum Grammaticis , (quos inter familiam ducunt Critici) Poëtis , vel Historicis attendere. Nec tantum sævissimorum Imperatorum persecutiones aut cruenta mandata affligerunt res pias , quam hoc Juliani iussu. Dicam fidenter , nihil esse neque in sacris , neque prophanis in rebus , quod absque critica rite sciri aut explicari possit. Lege quæso , Mi Lector , Prolegomena doct. Heinsii in Aristarchum sacrum. Nolim interim sic cogites , circa literas solum & syllabas Criticam occupari. Audiamus hunc ipsum Heinsium differt : ad Horatii Judicium de Plauto & Terentio , his verbis : Moxus veri Critici est , & censoris non literulam ejicere alibi , aut innocentem syllabam damnare ,
vocem

A D L E C T O R E M.

*vocem tollere alibi aut emendare ; sed sincere de aucto-
ribus & rebus judicare : quod & solida & absoluta
eruditionis est, Quo, ni fallor, omnes adspiramus,
neque ulla in re magis antiquitas praeivit nobis. Inte-
rim non nego, utilissimam operam poni in resti-
tuendis auctorum locis, quos librariorum negli-
gentia, aut temporis injuria depravavit. Sed ma-
gna est cautio, provisioque adhibenda, ut ne te-
mere hoc fiat aut inconsiderate. Sunt quidam au-
daculi, qui quidvis statim immutant, & optimum
quodque, quod non intelligunt, fædum in modum
corrumpunt. Quippe tantum sibi juris in autores
quosvis sumunt, quantum ab aliquibus in Cicero-
nem sumi Henr. Stephanus Praef. in Castig. Cicero-
nis his verbis testatur : Ciceronitribus quum sese Ci-
ceronis non familiares tantum, sed veluti domesticos
esse sibi persuasum habeant, tantum sibi juris in ejus
scripta postulant, vel arrogant potius, ut in iis qua-
cunque libet & quoties libet, figere ac refigere prorsus
sibi licere existiment. Adeo ut non jam Ciceronicola-
rum sermo ex Ciceroniano ; sed ex Cicronicolarum
sermone aestimandus illis Ciceronianus videatur. Mi-
nimum hîc ingenio, aut conjecturis est tribuen-
dum, nisi eæ claræ, liquidæ, certæ sint. Vide
quæ ex variis citant Scioppius de Arte Critica, &
Joan. Philip. Paræus Proleg. in Plautum, imprimis
elegantissimam Lipsii Satyram Menippæam. Insigne
temeritatis exemplum in Tanaquillo Fabro, no-
tatum habes dans le journal des Sçavans de l'An
1666. Pag. 250. & 395. Certò constat non*

P R Æ F A T I O

edax ævum, non barbarorum incursiones æque scriptoribus nocuisse, quam quorundam quidvis arrodentium, plus quam juvenilem audaciam. Sine melioribus libris ad emendationem auctorum accedere, hoc est, sine navigio mare magnum velle transmittere. Ridere libet, quotiescunque audio, qui clamore summo, cum labore inaximo figmenta sua pro veris correctionibus eructant. Si verbum inveniunt suo iudicio non satis sanum, aliud ei substituunt, sive sono, sive significato vicinū. Atque sic quidem multa verba perdidimus. Vellem ut isti homines ad animum revocarent monitum *Vincentii Contareni de frum. Romanorum Largit. P. 34.* Sic igitur, inquit, statuo, esse emendandi genus vetustis auctoribus admodum perniciosum, quo tollitur verbum cuius multæ esse notiones possunt, & supponitur alterum, cuius vis pertinet ad pauciora. Quod si id eo consilio fiat, ut unum tantum significet, ferendum non esse, ne si constet quidem, id ipsum scriptorem dicere. Est illud quoque nimis quam multis solemne, ut præ probis & usitatis verbis casca quædam, & jam inde ab Euandro petita eligant, substituuntque, in magnum operæ pretium fecisse rati, si se *ἀρχαίως* esse aliis probaverint. Hæc tamen eos non tangunt, qui perspecto cuiusque scriptoris genio, multa sæpe feliciter, etiam absque ope Manuscriptorum ex ingenio suo restituunt. Horum ego operam cum scriptoribus ipsis salutare, tum literas discantibus valde utilem esse iudico: id modo caveant, ne suas con-

jectu-

A D L E C T O R E M.

jecturas, tamquam *νοείας δόξας*, nobis obtrudant. Verum longe maxima pars studii Critici posita est in iis explicandis, quæ in priscis monumentis sunt obscuriora. Cum autem obscuritatis variæ causæ esse possint, eas omnes, quantum in se est, Criticus investigabit. Nimium quantum huic rei conducit tum aliarum rerum, tum rituum antiquorum exacta cognitio. Istam Criticæ partem qui utilissimam esse non videt, næ ille nihil videt. Interim opera danda est ne in nos conveniat hæc *Hermolai Barbari* querrela apud *Cunæum* *Satyra Menipp.* Pag. 76. *De cæteris*; inquit, *qui in literarum amantatibus animum habent, supervacuum est dicere. Magna enim hic diversitas insanientium, & mira occurrit dissimilitudo: cujus latentem causam scit Genius fortassis, qui astrum cujusque temperat; hominem quidem scire; arbitror neminem. Quidam arcem extruunt ex cloacâ, aut pistillum exornant. Alii lucem Soli scænerant, & observatiunculam unam item atque alteram ostentant notissimarum rerum, quas profecto nemo nesciverat, etiam priusquam Theognis nascere-
tur. Longe ego Augiæ stabulum purgare maluerim, quam omne stercus ex libris eorum everrere. Nec minus est illud inter eos, qui Critici audire cupiunt, vulgatum, sic suas tueri partes, ut alienas oppugnent, ac laudis occasionem plerumque de aliorum erratis petant. Tum sæpe a tenuioribus & gregariis, velutique postremæ notæ, qualis ego & Cluvienus, etiam procures & ante-signani (ut ita dixerim) literarum sugillantur. Qui post alios scri-*
bunt,

P R Æ F A T I O

bunt, id sibi negotii credunt solum dari, ut priores carpant, & ex aliorum incommodis sua ut comparent comoda. Quasi hoc demum sit Critici, vitia aliorum in lucem proferre: in quo quam non veritatis sæpe, sed partium studio ducantur, reipsa ostendunt. Facetum est quod fictum legimus apud ingeniosissimum *Trajanum Boccalium Relation: Parnasi Cap: C.* Narrat ibi, quo pacto Criticus aliquis, sive potius Sophista, ad Apollinem accesserit, ei offerens omnia vitia, quæ magnâ cum curâ ex quodam poemate excerpserat. Credebat se rem fecisse Apollini admodum gratam: quâ spe suâ non tantum excidit; sed supplicii loco hoc iussu à Deo accepit, ut sumpto à Columella frumenti modio, omnem inde pulverem colligeret manu suâ, absque ventilabro, aut incerniculo. Non in hunc sophistarum censum; sed in alium, non magis honestum locum referendi sunt, qui alienis plumis se vestiunt, & aliena pro suis venditant. Crede mihi; imo crede auribus, crede oculis tuis, *erudite Lector*: nullum seculum hocce nostro plagiariorum fuit feracius. Idem habes, centies repetitum, verbis tantum leviter immutatis. Atque ferendum id quidem esset, nisi desimularent autores, per quos profecissent. Contrariam plane viam insistebant multi Patres, in quorum numero est *Hieronymus*, qui cum plurima aliunde in scripta sua transferrent, nihil pro suo agnoscebant, quod ullibi apud alium exstaret. Transferebant autem non ex orthodoxis tantum

A D L E C T O R E M.

auctoribus, sed sæpe ex suspectis, infamiâque apud ecclesiam laborantibus, ac ita, nullo discrimine, suis intermiscebant, ut quis sit Patris cuiusque genuinus sensus, certò sciri omninò non possit. Si quid igitur, scribit Hieronymus quâdam ad Augustinum Epistolâ, reprehensione dignum putaveras in explanatione nostra, eruditionis tuæ fuerat querere utrum ea quæ scripsimus habeantur in Græcis, ut si illi non dixissent; tunc meam proprie sententiam condemnares. Vide Doct. Dallaum de vero usu Patrum. Cap. VI. Ad me quod attinet, non nego pleraque in hanc scriptionem meam aliunde esse translata; sed expressis semper nominibus eorum, unde mutuati sumus. Hoc satis à plagii suspicionem me vindicat. Fieri etiam potest, ut nihil hic nostrum sit; adeò parum sæpe distinguimus, quæ mentis ac memoriæ humanæ est inbecillitas, inter ea, quæ ipsi invenimus, quæque ab aliis legendo accepimus. Ita res ipsæ animo inhærent, elapsis modis, quibus ad illarum cognitionem perrenimus. Vel si quid nostrum est, idem tamen apud alios reperias, & elegantius forsitan, aut copiosius. Quippe nullum est jam dictum, quod non sit dictum prius. Sed roget aliquis, cur chartæ itaque non parcis? cur cramben totius re-coctam rursus apponis? Notum est, quid simili occasione responderit Augustinus, scilicet utile esse plures libros a pluribus fieri diverso stylo, non diversa fide, etiam de quæstionibus iisdem, ut ad plurimos res ipsa perveniat, ad alios sic, ad alios autem sic.

P R Æ F A T I O

*sic. Audi etiam, quæ Doct: Acontius Epist: ad
 Joan: Wolfium de rat: edend: Librorum scribit hunc
 in modum: In occasionibus etiam multum admodum
 est positum. Sit enim locus aliquis pertrectatus quidem
 jam optime: sed non sit ex iis, quos maxime oportebat,
 qui legat: sit autem spes novo aliquo scripto ad
 lectionem alliciendi: me authore etiam minus bono
 scripto id tentaveris, non modo sine reprehensione
 iusta, sed etiam cum laude aliqua: neque enim vere
 dici possis actum agere, Unde patet, hunc scriben-
 di modum non esse fraudi primis scriptoribus; sed
 pertinere potius ad eorum commendationem.
 Neque aliud mihi æque propositum fuit in opus-
 culo meo, quam docilem juventutem deducere
 ad optimos scriptores, quos neglectos jacere me-
 ritò semper ægre tulimus. Negligentiæ istius
 duplicem potissimum causam invenio: studioso-
 rum nempe incuriam atque socordiam, præceptorum
 autem invidiam ac odium, qui quò magis sa-
 pere videantur, optimos libros non rarò discipu-
 los celant. Verum quidem est refelli a nobis, quos
 communis literatorum consensus dudum locavit
 inter doctissimos. Sed paucis in locis, & nunquam,
 nisi veritas, cujus ratio ubique habenda est, id
 postularet. Ut ille, qui canino dente quævis erra-
 ta arrodit, ipsam rerum naturam accusare velle vi-
 detur, quæ neminem mortalium omni errore li-
 beravit: ita qui de industriâ errores desimulat,
 injurius est in veritatem. Quanto autem est majore
 auctoritate, qui labitur, tanto facilius alios
 eo-*

A D L E C T O R E M.

eòdem abstrahit. Interim magnorum Virorum lapsus leviter potius detegendi, quam multis verbis sunt exaggerandi. Si literarum Proceres graviter a nobis vapulant, quid nobis exspectandum, nisi ut flagellis cædamur usque ad necem? Hæc pæna est ferrorum, qui manibus pedibusque obnixè omnia nituntur, heris suis ut incommodent. Ne quid ejusmodi de me dici possit, sedulo, ni fallor, cavi, Dicam cum *Terentio*:

*Si quisquam est, qui placere se studeat bonis
Quam plurimis, & minime multos ledere;*

in his ego nomen profiteor meum. At videar fortasse scriptoribus nocuisse, quod excerpta ex iis dederim. Utrum illi, qui auctores in epitomas redegerunt, breviaria confecerunt, aut centones confarcinarunt: reipublicæ literariæ profuerint magis, an obfuerint, non uno loco à Viris eruditis est disputatum. Vide inter alios *Casaubonum Præf. in Polybium Pag. 17. nuperæ editionis in 8º. & initio Animad. ad Athenæum, Salmasium Præf. in Ampe-
lium, Reinesium Epist. ad Rupertum Pag. 410.* Facile adducor, ut credam vix ipsam barbariem majorem cladem intulisse rei literariæ, quam genus hoc hominum, qui præstantissimorum ingeniorum monumenta coegerunt in epitomas, ut suorum temporum inertię lenocinarentur. Verum hoc istos non tangit, qui utilia quædam & maxime laudabilia (*αὐτὰ & ἀγαθὰ* Græci Critici appellant)

P R Æ F A T I O

lant) vel in proprium usum describunt, vel studiosæ
juventutis commodo in publicum exire patiuntur ;
non ut illa pro ipsis auctoribus legantur , sed ut
hinc appareat , quanta sit in ipsis mōnumentis uti-
litas. Et ego quidem *Lectorem* meum rogo , ut
accedat ad fontes ipsos , unde quosdam rivulos de-
duximus. At facile , & cujuscvis est excerpta fa-
cere. Verum est , & fateor , ô boni : neque mi-
hi quicquam supra quemvis arrogo. Satis erit , si
pro laude mihi venia detur , quam ipsam vereor
ut a non nullis consequar. Nam multi nimio no-
vitatis studio ducti hæc nostra statim condemna-
bunt , in quibus videbunt non nova esse omnia,
quæ dicuntur. Scilicet falsa dixisse videri malunt,
ut ab aliis dissentiant. Alii his prorsus contrarii, si
quid invenient novi id omne statim rejicient, quasi
semper sint meliora , quæ sunt magis antiqua.
Isti velim ut *Quintilianum* audiant *Lib. x. C. 2.*
sic loquentem: *Cur igitur nefas est reperiri aliquid
a nobis , quod ante non fuerit ? An illi rudes sola men-
tis natura ducti sunt in hoc ut tam multa generarent,
nos ad quærendum non eo ipso concitemur , quod certe
scimus invenisse eos , qui quæserunt ? Et paucis in-
terjectis : Ac si omnia percenseas , nulla sit ars , qua-
lis inventa est , nec intra initium stetit : nisi forsitan
nostra potissimum tempora damnamus hujus infelicitat-
is , ut nunc demum nihil crescat. Nihil enim crescit
sola imitatione. Eleganter sane, ut solet, Ho-
rati*us :

AD LECTOREM.

*Si meliora dies, ut vina, poemata reddit,
Scire velim, pretium chartis quotus arroget an-
nus. &c.*

Hunc, quæso, vide Epist. I. Lib. II. nec non Plinium Lib. I. Epist. 16. Neque etiam deerunt, qui me prolixiorē fuisse contendunt; dum aliis videbor fuisse justo brevior. Utrisque, nisi pervicaces esse velit, unâ responsione satisfaciam. Dum in-
exercitatis adolescentulis scribo, quædam addenda fuerunt viris quidem eruditissimis; sed quæ illi noscere non poterant, maxime quod scriptoribus, unde ista hauriuntur, destituantur. Quare indicanda hæc mihi fuerunt; non tamen omninò absolvenda, quia qui penitus scire cupiunt, ad ipsos scriptores ablego. Atque hoc mihi compri-
mis propositum habui, ut per me nosceret studio-
siosa juvenus, quos potissimum auctores legere necesse habeat. Proin vitio mihi verti non potest, quod opusculum meum multis scatet citationibus, quæ huic scriptionis generi prope sunt necessariæ. Maxime mihi semper institutum eorum displicuit, qui nullam sententiam exire patiuntur, nisi aliorum autoritate munitam. Quæ per se sciunt pueri, & qui nondum ære lavantur, tamen fidem habitura non putant, nisi Doctorum Viro-
rum testimoniis probent. Vel si dicant virtutem rebus omnibus esse anteponendam, id nisi verbis alienis efferre non audent. Qui sic memoriæ aliquam laudem aucupantur, vereor ne omne judi-
cium

P R Æ F A T I O

cium amississe videri queant. Quamquam nec à memoria eos laudabit, qui ignarus non est, quibus ad istam rem subsidiis utantur. Fit tamen non raro ut aliorum testimonia verbaque nobis sint adducenda, maxime cum de rebus aut ritibus priscorum disputatio incidit. Quæ autem de eis quæri solent, duorum potissimum sunt generum. Inquirunt enim utrum ea fuerint, nec ne: tum etiam honestane fuerint, an turpia, & quid eorum honestius, utiliufve. Hoc cum in deliberationem cadit, solis rationibus est decidendum: illud aliunde, quam ex testimoniis ostendi non potest. Quoties igitur quid ad facti quæstionem pertinet, & de eo sermo instituitur, omnis probatio ex citationibus erit desumenda. Est porro, cum iis carere non possis; sæpe enim illis de rebus est dicendum, quibus fidem non habebunt, nisi a viris magni nominis ante nos dictas approbatasque esse constet. Adeò auctoritas plus apud multos valet, quam ipsa divina veritas. Servum esse pecus malumus, & in verba magistri jurare, quam propriis oculis rectum secernere

— — — Ubi inter
Curva subit, vel cum fallit pede regula raro.

Accidit etiam, ut quid ab aliis ita bene & eleganter dictum occurrat, ut melius a nobis elegantiusve non possit. Quin sæpe aliorum elegantiam & sermonis majestatem viribus nostris non adæqua-

qua-

A D L E C T O R E M.

quamus. Qua quidem occasione, illorum potius, quam nostris verbis uti, non erit indecorum. Verum enim vero illud imprimis est cavendum, ne ejusmodi auctores citemus, quos ipsi aut vidimus nunquam, aut certe non legimus. Magna mihi est copia memorandi scriptores, qui ipsa monumenta, quæ citant, inspicere nihil quicquam ad se putant pertinere. Quæ ab aliis vident allegata, ea itidem allegant; quam rem quæ incommoda sequantur, non est hic explicandi locus. Novi hominem, cætera non ineruditum, qui cum eum super auctore mihi incognito quem citaverat, rogasssem, post multas tergiversationes fateri necesse habuit, nescire se utrum ille fuisset albus, an ater homo. Clarissimi *Grotii* fidem interponere, satis magnum sibi præsidium putavit. Pejus est *Gallicus* cujusdam facinus, qui profitebatur se centones quosdam ex *Seneca* & *Tacito* confecisse, cum tamen nesciret, quo illi sermone, Græco an Latino scripsissent. *Voiez le Parnasse Reformé Pag. 51.* De me hoc habeo affirmare, nullum a me esse adductum auctorem, quem non prius ipse consuluerim. Nefas esse credidi alienis oculis fidere, cum mihi proprios ipsa natura dedisset. Bis terve tantum secus facere coactus fui, quando ipsa monumenta mihi perlustrare non licuit. Græcis, quæ aliquoties fuerunt citanda, versionem Latinam adjunxi: hoc pacto rudioribus consulendum esse ducens qui sine cortice non natant. Expertus sum non semel, quæ ex Græcis citantur

omnino

P R Æ F A T I O

omnino non legi, nisi sint in Linguam Latinam
 translata; imo ne legi quidem posse ab iis, qui uti-
 lissimam linguam turpiter negligunt. Uti au-
 tem sumus ea versione, quæ plerumque auctori
 cuique Græco addi solet. Si verò illa quandoque
 obscurior nobis esse videretur, aut minus fidelis,
 interpolare eam vel etiam immutare non dubita-
 vimus. Non nunquam proprio Marte quædam
 trastulimus, quorum ab aliis facta versio nobis ad
 manum non esset. Facerem jam præfandi finem,
 nisi scirem mihi negotium fore cum genere homi-
 num, qui esse primos se omnium rerum volunt,
 nec sunt tamen. Intelligis, *erudite Lector*, quos
 velim: nempe Theologastros quosdam, qui ægre
 ferent me hominem sacris initiatum hisce nugis,
 ut illi ajunt, tempus perdere. Ipsi quippe sapien-
 tiam velut aliquod artificium venale addiscunt, &
 jam semidocti cruda adhuc studia, propellunt in
 templa. Verè eruditi esse neque ipsi volunt, neque
 aliis, ut sint permittunt. Plurimum mihi semper
 placuerunt *Castellionis* verba, quæ exstant *Epist.*
Nuncupatoriâ, quam *Psalmorum* libro à se converso
 præposuit. Sic autem sese habent: *Ut enim nihil in*
sacris literis voluit esse Deus, quod non ad ipsum colen-
dum pertineat, sic nihil non esse quod pertineat: ne
forte credamus, eum qui sit perfectus, mutilâ nos
mancâque instruxisse disciplinâ. Neque tamen hac di-
 co, quo profanarum literarum usum antiquandum esse
 censeam: nam si quis ab illis rerum naturam, aut
 etiam populorum res gestas discit, ut inde eorum auc-
 torem

A D L E C T O R E M.

*torem rectoremque Deum prædicet atque colat : is, meo iudicio, rite facit, neque tam in profanis videtur, quam in sacris versari; quoniam sic illa tractet, ut his ancillentur, non imperent. Quæ ad fidem Christianam, & mores Christianis hominibus dignos pertinent, ea satis ex sacrorum librorum lectione omnes, quamquam indocti, discant hauriantque. Nihilominus tamen plurima apud sacros auctores occurrunt, quæ nisi ope linguarum Græcæ atque Hebrææ, & cognitione historiarum ac rituum priscorum bene intelligi vel explicari non possint. Testes mihi fuerint multæ Sacræ Scripturæ interpretationes perquam ineptæ, quæ aliunde originem non ducunt, quam ex merâ literarum humaniorum ignorantia. Ipse affirmare non dubitabo, nullum unquam magnum perfectumque Theologum extitisse, qui scientiis ac disciplinis honestis non fuerit excultus. Non ibo per omnia exempla, quod magni & infiniti esset operis: sed videant mihi, quæso, *Originem, Clementem, Alexandrinum, Lactantium, Augustinum*, videant ipsum gentium Apostolum, quem satis constat non tantum in patriis disciplinis; verum etiam in ethnicorum libris fuisse versatum. Quis neget nos tutius horum exemplum imitari, quam illorum superbinam ignorantiam, cum intolerabili quodam fastu conjunctam?*

Αἰθροπος καὶ ἡ εἰρήνη ὁ ἡμετέρος ἀκού.

* * *

110-

P R Æ F A T I O

Homines sicut utres vento, ita vanâ opinione inflati. Possemus hos secure contemnere, si propter ipsotum in sacras literas interpretando inscitiam, apud eruditos non male audirent conciones sacræ. Utinam scenicum in morem gesticulari, & aliorum homilias pro suis recitare contenti, sua assuendo omnia non corrumpèrent. Utinam otio & desidîâ suâ ad nequitiam non abuterentur! Utinam denique nobis ac bonis omnibus molesti, atque ordinis nostri vomicæ & carcinomata esse desinerent! Istud tunc demum sperare poterimus, cum ad saniores mentem redibit parvus ille doctiorum quidem, sed nihilo meliorum hominum cætus,

Qui pecori imperitat, quem tota armenta sequuntur.

Interim nemo bonus negabit, theologiam optime tractari ab iis, qui sacris studiis studia literaria intermiscunt. Ipse otium, quod à gravioribus & magis necessariis rebus mihi imperio, literis pergam impendere: tam diu autem pergere debebo, quoad me, quantum inde ad ipsam theologiam capiam ornamenti, non pœnitebit. Qui aliter statuunt, sibi sapiant, mihi molesti ne sint.

*Dehinc ut quiescant, porro moneo, & desinant
Maledicere, malefacta ne noscant sua.*

Habeo alia multa, quæ proferentur post, si pergent lædere ita, ut facere instituunt. Nam ita fere natura

A D L E C T O R E M.

turâ comparatum est, ut qui ingenuas artes negligunt, moribus etiam sint parum probatis. Plura de hujuscemodi hominibus dabit *Ecstasis* nostra, quam Satyrâ dudum animo conceptam causa non est, quia perituræ chartæ comittamus. Sunt alii, quos tormentum urget, quo Siculi tyranni majus non invenerunt. Hi cum literaturam in aliis piaculum esse ducant, sibi nimium in ea placent: nam pauca ejus, quæ sciunt, ubique ostentare, & verba eructare Latina vel apud vulgus, & in sermone quotidiano non desinunt. Sed tamen fatendum est, peccare eos qui cum sacris sint initiati, solummodo ad istæc leviora animum applicant. Hæc instar lusus esse debent, quem ego semper existimavi *ἀντίστροφον ἢ ἀντιπρὸς τὸν νοῦν, ὅτι ἀντιπρὸς τὸν νοῦν, nihil esse aliud, quam animi remissionem & curarum requiem*. Verum illi optime facere censendi sunt, qui aliquid daturi in lucem, a levioribus initium sumunt. Quare cum statuissem aliquid hoc tempore scribere, & non nulla posthac, ab eo exordiri volui maxime, quod & adolescentiæ meæ esset aptissimum, & minus in se periculi haberet. Priusquam ad theologica quædam tractanda accederem, visum est experiri in re profana, quam non lusissem operam in utriusque linguæ studium insumptam. Idem antè me factitarunt viri doctissimi, quos inter est *Erasmus*, qui cum animum induxisset vertendis Græcis auctoribus rem theologicam pro virili vel restituere vel adjuvare, ne statim, ut ipse ait, juxta Græcorum adagionem *ἐν τῷ πρῶτῳ τῶν νομίμων*

P R Æ F A T I O

periclitari videretur, & ad tantum munus illotis pedibus irrumpere, multa prius ex *Luciano*, *Euripide*, aliisque ethnicis scriptoribus transtulit. Notum est, *Georgium Pasorem*, cum meditaretur *Indicem in N. Testamentum*, quid in re simili posset periculum in *Hesiodo* facere voluisse *μεν δ' ἀΐαθαι τὸ ἱερὸν*, antequam sacra attingeret. Ad te redeo, *Mi Lector*, cui hæc mea forsitan non satis digna videbuntur, ut in lucem prodeant. Sed in memoriam te venire jubeo ejus, quod a *Plinio* dictum accepimus: Nullum esse librum tam malum, ut non aliqua parte prodesset. Ut nihil est in orbe terrarum omni ex parte beatum; ita quoque nihil est, in quo non aliquid appareat boni. Nam vel ipsa materies bona est, quando omnia, quæ de ea scribuntur, mala esse non possunt; vel si malam defendimus, necesse est ut ad eam defendendam quædam sint excogitata subtilius. Posses de libris dicere, quod de hominibus dictum est ab *Horatio Saty. III. Libr. I.*

— *Vitiis nemo sine nascitur, optimus ille est,
Qui minimis urgetur.*

Mihi certe accidit non semel, ut ex malo libro fructum retulerim nequaquam pœnitendum. Verum cuiquamodi sint hæc mea, si quid à me peccatum est, culpam non deprecor. Qui meliora monuerit, is erit mihi semper inter charissimos; modo ita moneat, ut se hominem esse, & posse

A D L E C T O R E M.

errare meminerit. Quin imo (ut elegantissima Politiani verba faciam mea) decernatur potius in nos, traducamur, vexemur, quam non literarum publica fraus, quarum nobis est honor publicis utilitatibus antiquior, etiam nostro aliquo, vel fama vel otii dispendio redimatur. Nam quo ista, quæso, studiorum communiam professio, si jam ventum ad hæc usque est, ut quod officium studiis universi debemus, cessare omne tamen suspitione degeneri patiamur? Quo pacto vel durare ultra, vel esse jam poterit honestarum artium sinceritas, soluta penitus censurâ, dum sic æque omnes invidiam perhorrescimus? Quamquam (quod ad me attinet) utinam labori meo non contemptus potius, quam invidia debeat. Bene Agamemnon Homericus, qui cum suam protulisset sententiam, hoc præclarum addidit, gratum sibi fore, si quis senex, aut juvenis meliora suavisset. Mihi autem veniam spero faciliorem, quod nondum iudicium ad magna maturuit. Usus sum Fabii consilio *Inst. Orat. Lib. XII. Cap. 6.* hoc pacto monentis: Nec rursus differendum est tyrocinium in juventutem. Nam quotidie metus crescit, majusque fit semper, quod ausuri sumus, & dum deliberamus quando incipiendum sit, incipere jam serum est. Quare fructum studiorum viridem & adhuc dulcem promi decet, dum & venia & spes est, & paratus favor, & audere non dedecet: & si quid desit operi, supplet ætas: & si qua sunt dicta juveniliter, pro indole accipiuntur. Hoc saltem multo est melius, quam ita semper in aliorum scriptis reprehendendis occupari, ut ne

P R Æ F A T I O

in senectute quidem aliquid evulgare ipse audeas. Utri melius de re literaria mereantur, de eo, *benevoli Lectores*, vestrum iudicium vestra existimatio valebit. Novi homines, quibus omnia aliena sordent, dum ipsi labantes disciplinas fulcire vel non possunt, vel certe non volunt. Hos nihil moror; nam ita assuefacti sunt, ut nihil bonum putant, nisi quod ipsi fecerint. Homines digni odio, in quos convenit illud Græcum:

Ἀλλοτρίων ἀντὶ τοῦ ἰατρικοῦ βρώσιν.

Aliorum medicus, ipse ulceribus scatens.

Nolim tamen hoc ita à me dictum quispiam interpretetur, quasi statim eorum, quæ conscripsimus editio sit præcipitanda. Quid *Horatius* & *Quintilianus* suaserint satis scio, quorum ille jubet editionem nonum premi in annum, hic statuit optimum esse emendandi genus, si scripta in aliquod tempus reponantur, ut ad ea post intervallum velut nova atque aliena redeamus, ne nobis scripta nostra tamquam recentes foetus blandiantur. Sed est interim de omnibus ingeniis non eodem modo iudicandum. Sunt quædam, quæ tardius & difficilius res apprehendunt; sed quia labori sunt assueta, magis sua expoliant. His auctoribus perfectissima opera edi, nullum esse dubium potest. Existunt rursus alia magis prompta, quæ quantumcunque possunt, id prima quaque scriptione assequuntur. Hæc quo magis expolire deinde opus conantur, eo

ru-

A D L E C T O R E M.

rudius reddunt: ut dicere possis horum limam opus
facere mallei, malleumque limæ. Ego me naturâ
posterioribus esse propiorem libens fateor, ideo-
que scriptionibus minus aptum. Sed quid facias?
ut homo est, ita morem geras. Dabitur tamen à
me opera, ut si quid inposterum à me est prodi-
turum, de re præsertim graviore, id limatum
magis sit atque correctum. Est quoque hic modus
quidam tenendus, de quo exstat sapiens *Acontii*
Ernst. ad Wolsium de rat. edend. librorum monitum:
Ut enim faciendum non est, inquit, ut edas, quæ sibi
limam adhibueris, politiora possis reddere: ita neque
premenda nimis diu sunt, quæ & aliis fructum, & tibi
laudem possint parere. Ac tametsi facilius multo eam
in partem peccatur, ut nimis facile ac repente sibi pla-
ceant: esse tamen in partem contrariam, si nunquam
tibi placeas, peccato locum, vel ex eo cognoscere licet;
quod si majores nostri nimium verecundi, cautique esse
voluissent, nulla nobis monumenta sua reliquissent in-
dustria. Itaque nos pro tam culto seculo, rude, agreste,
ac rerum omnium ignarum haberemus. Cum hoc be-
ne convenit illi, quem aliquoties citavimus. Pa-
bio Quintiliano, quem vide Inst. Orat. Lib. X:
Cap. 3. & 4. ubi inter alia hæc verba usurpat:
Sunt qui ad omnia scripta, tamquam vitiosa rodeant,
& quasi nihil fas sit rectum esse, quod primum est, me-
lius esse existiment quicquid est aliud: idque faciant
quoties librum in manus resumpserint, similes medicis
etiam integra secantibus. Accidit itaque ut cicatricosa
sint, & exanguia & curâ pejora. Sic tandem de me

habe,

P R Æ F A T I O

habe, ex illorum me esse numero, qui proficiendo scribunt, & scribendo proficiunt. De stylo autem, quo in scribendo usus sum, pauca habeo quæ dicam. Multi sunt tam rigidâ censurâ homines, ut nihil recte scriptum credant quod vel paululum à suo stylo est diversum. Quasi infinita non sint bene scribendi dicendique genera. Quod intelligi etiam ex ipsis oratoribus potest, qui tantum inter se distant, ut nemo sit alteri similis: quamvis plurimi se ad eorum, quos probabant, imitationem composuerint. Hic quisque maxime ingenii sui naturam, viresque perpendere debet, quod sæpe est à Cicerone præceptum. Nam quædam sunt inimitabilia, quibus aut infirmitas naturæ non sufficiat, aut diversitas repugnet. Quis igitur illos ferat, qui teretes suas aures tantum consulendas esse dicunt, & si qua sunt, quæ parum iudicio earum probentur, in iis non satis Ciceronianum esse ipsum Ciceronem clamitant. In aliis est, (ut H. Stephanus ait Præf. Castig. in quadam loca Ciceronis) huic diversum vitio vitium prope majus. Sunt enim tanta (ut ita dicam) superstitione, in colendo Ciceronis numine imbuti, ut quacumque apud eum reperiunt (quæ enim ex crasso ebrui librarii, aut dormitantis typographi errore sunt profecta, à sinceris, ut sunt acri præditi iudicio, discernere non possunt) tamquam vere Ciceroniana amplexentur, suspiciant & admirentur, revereantur & adorent. Imò verò sæpe accidit ut corruptissima quæque præ sincerissimis habeant, in iis usurpandis sibi maxime placeant, & se tum demum Ciceronis germanissimos

A D L E C T O R E M.

nissimos esse, magno cum fastu prædicent. Hoc idem est, quasi si ipsâ pulchritudine spreta, solos nævos diligas. Istorum nunquam mihi institutum placuit. Nimirum non intelligunt, quid sit, quibusve in rebus sit positum id, quod tantopere expetunt, Ciceronis more loqui. Sed ea de re non est hic agendi locus. Stylus in hoc opusculo meo occurrit varius, & scriptorum citationibus hians: dum

Ornari res ipsa negat, contenta doceri.

Neque illud vehemens dicendi genus, quod est oratoris proprium, neque hoc alterum æquabile, & temperatum, quo in dissertatione, aut narratione utimur, usurpare vel potui vel debui. Suffecerit vitasse barbara & solæca, quæ sunt in quavis scriptione fugienda. Postquam autem scribendi feceram finem, multa in mentem venerunt mihi; quæ adderentur fortasse non indigna; sed nolui ea in calce subjicere. Sciebam enim quanta cum molestia inde in ipsum opus transferantur: quæ causâ est cur multi ne legere quidem malint. Poterimus istorum mentionem facere, si quando & altera pars in lucem prodeat. Nihil jam amplius restat, *Erudite Lector*, nisi rogare te, ut hæc nostra æqui bonique consulas. Esto hoc Catone contentus, & his mecum utere, donec ipse meliora impartias. Tibi

*Τίτῳα θεὸς δέῃ, δῶτα φρεσὶ σῶσι μὲναι,
Ζῶντι τε ἔφειδ' ἔτι δὲ δαίμονιαι.*

*Omnia ista det Deus, quæ animo concupiscis tuo:
Vivo mortuoque summam felicitatem. Vale.*

SUMMA CAPITUM.

C A P. I.

DE Belisario, & Justiniano, Berneggerus notatus. Pag. 1

C A P. II.

Petavius notatus. Synesius ex Procopio explicatus. Consules alter Orientis, alter Occidentis. Consules honorarii. Seneca tentatus. pag. 6.

C A P. III.

Muretus Laudatus. De insigni Grotii, Vossii, Salmasii, Mirandulani, Pascalii, Guyeti, Roberti Constantini, Theodori Bezae, & Christi Longolii memoria. Adagium nulli notatum, quod contra Barthium explicatur. pag. 10.

C A P. IV.

De mancipio Peruano faceta Historiola. Purpuramentum sive encaustum, quo Imperatores subscribebant, deque ipsa subscriptione. Capita Legum, Librorum tituli, & errores in scribendo, minio notati. Erasmus & notatus simul & Laudatus. Minium in simulacris Deorum & triumphis nec non in sepulcris usurpatum. Canicularius. pag. 18

C A P. V.

Sex loca ex Herodiano enumerata, quibus meminit de pralatione ignis. Ille mos à Persis ortus. Sol idem qui Jupiter. Dii mares simul & feminae. Sol post Domitiani tempora præ ceteris Diis à Romanis cultus. Consecratio. Ab illa originem ducit canonizatio. Ex auctoritate Senatus Romani Dii vel colebantur vel

SUMMA CAPITUM.

*rejiciebantur. Gentilium in Diis colendis superstitiâ,
Persius illustratus.* pag. 33.

CAP. VI.

*De Berenicio quodam historiola, non illiterata,
Latinum ac Belgicum in Hæsum, Virum fortissimum;
Epigramma.* pag. 58

CAP. VII.

*Literæ prius extinctæ renascuntur. Magnus isto
tempore eruditorum numerus. Jam denuo literæ ad
interitum vergent. Libri in re literaria hoc tempore
plurimi. De auctoribus, qui cum notis Variorum pro-
dierunt, judicium.* pag. 66.

CAP. VIII.

*Canis nomen in convitiis usurpatum. Cicero emen-
datus. Diaboli sive mali damones pro perturbatoribus
& hominibus nequam. Evangelista Joannes illustra-
tus.* pag. 76

CAP. IX.

*Hyrcani mortuos canibus objicere solebant. Sepeli-
re. Ritus sepeliendi mortuos in bello apud Athenienses
usurpatus. Spartani mortuos in urbe sepeliebant, quod
secus factum à plerisque gentibus. Horatius explica-
tus. Canis ad fores catena alligatus. Apostolus Pau-
lus explicatus. Janua quomodo à Romanis & Græcis
aperta. Terentius illustratus.* pag. 80.

CAP. X.

*Pasiphae quare dicta concepisse ex tauro. Horatius
illustratus. Meretrices quomodo à Romanis & Arbeni-
ensibus divino honore cultæ; quales Laurentia &
Lea.*

SUMMA CAPITUM.

Leana. Flora non fuit meretrix. Rosinus notatus. Libericultus valde obscenus. Meretrices floridis vestibus indutæ. Artemidorus explicatus. Vestes meretricum pellucidæ. Ausonio lux. Martialis explicatus. Cestus. Ronsardus notatus. Plinius explicatus. pag. 90

CAP. XI.

Arabica lingua omnium locupletissima. Hebraica olim, quam hodie, multo copiosior. Chinensium lingua pauperrima. Vocis interpretis tres significationes maxime vulgares. Galli omnes antiquos scriptores sua lingua conversos legunt: nos Belgæ non item. De Belgica Taciti versione ab Hoofdio facta. Triplex interpretandi, id est, auctores convertendi genus. Interpretatio, quæ verbum verbo redditur. Interpretatio, quæ sensum potius appendit, quam verba adnumerat. Gronovius notatus. A verbis non temere recedendum. Horatius explicatus. Duo in interpretatione præcipue tenenda. De Herodiani versione a Politiano facta, de quæ ipso Politiano. Ruffinus qualis interpres. In sacris libris vertendis maxima etiam circa verba cautio adhibenda. Illi suâ eloquentiâ non carent. Impium Petri Bembi dictum. In versione Græca Veteris Testamenti & Septuaginta, & ipso Novo Testamento plurimi Hebraismi. Multi ex Philosophis Ethnicis & Judæis & Sacris Bibliis plurima edocti, & Plato ante omnes. Virgilius, Horatiusque explicati. Anglorum de versione Tremelli at Junii judicium. In sacris vertendis non nimis elegantius Linguae Latine studendum. Castellio notatus. De tertio genere Interpretationis, quæ paraphrasis dicitur. Interpretatio, quæ poëtarum orato-

SUMMA CAPITUM.

oratorumque propria. Theocritus ac Virgilius illustrati. Terentius explicatus. pag. 101

CAP. XII.

Quatuor in Gracia ludi. Præmia certaminis Pythii. Inter illa pomum. Jupiter Casius. Malum Punicum, seu malo-granatum. Caphtoræi. Propheta Moses explicatus. Septerium, Festum Apollinis. pag. 146

CAP. XIII.

In conviviiis suæ partes cuique attributæ. Euangelista Lucas illustratus. Epictetus in Enchiridio explicatus, nec non Apulejus. Sua cuique convivantium mensa assignari solita. Convivarum numerus. Seneca accusatus de luxu. Juvenali lux. Galli cuiusdam de Seneca iudicium, & non nihil de Plutarcho. pag. 153

CAP. XIV.

Servus in Dominum torqueri non poterat; nisi certis de causis. Cicero explicatus. Apud Romanos, salvâ libertate, soli servi torquebantur. Juvenalis illustratus. Athenis servis dabatur actio injuriarum, Romæ non item. Casaubonus notatus. Jura servorum apud Athenienses, quam Romanos longe solutiora. Servitus unde primum nata. Σάματα idest, corpora pro servis. Τὸ ἡγεμονικόν. Jus patronorum in liberos ingratos. De Samuele Petitio iudicia fere contraria. Servorum peculium. De sepultura servorum. pag. 164

CAP. XV.

Ars medicæ Romæ à servis maxime exerceri solita. Dempsterus notatus. Propheta Moses explicatus. Ἄσκα. Medicinâ inventa in Ægypto. Suetonius explicatus.

SUMMA CAPITUM.

plicatus. Ars medica in maximo honore apud Græcos, ut & apud Hebræos. De medicis feminis. Qui ingenui Roma medicinam fecerint. Dicta quedam in Medicos scoprica. Drelincurtius notatus. Suetonius expensus. Antonius Musa. Medici a Justiniano ad incitatus redacti. Medicina ars vulgaris. Virgilius explicatus. Medici nomen quam late apud Romanos patuerit. Gymnasia sive exercitationes. pag. 176

CAP. XVI.

Duo fœderum genera. Livius notatus. Fœderati quinam proprie dicti. Perperam unitas nostras Provincias fœderatas appellant. Fœdera columnis æneis inscripta, & apud multos olim sanguine humano sancta. Simile quid a Gentilibus olim Christianis obiectum; ut & hodie Judæis. Scordisci sanguinem humanum bibebant; Sarmata equinum. Hausto taurino sanguine aliqui obierent. Judæi & Muhammedani ex religione sua tenentur sanguine abstinere; Christiani non item. Lucas Evangelista in Actis explicatus. Virgilius correctus. pag. 194

CAP. XVII.

Persii vulgata lectio contra Salmasium asserta. Terentius illustratus & contra eundem Salmasium defensus. Juno Lucina eadem cum Luna sive Diana, neque alia ab Astarte & Urania. Quare Lucina dicta. Hæc Græcis Εὐμένης. Etymon & Εὐμένης. Lilith Adami ante Evam uxor, ac non nihil de Adamo. Plantus explicatus contra Salmasium. Nocturnus idem, qui Vesperus; qua occasione aliquid de Vespero & Lucifero. pag. 206

CAP.

SUMMA CAPITUM.

CAP. XVIII.

De clepsydris. Theon. Quot clepsydris hora finiretur. Erasmi error. Causis perorandis non idem semper tempus prescriptum. Orator quando desineret. Florens Christianus notatus. Aqua in clepsydris sistebatur, & quare. Clepsydrarum varius usus, Rhetores Româ pulsi, & postea in magno honore ibi habiti. Coronati dicere solebant. De Philosophis eadem fere, quæ de Rhetoribus. Varia exempla hominum longævorum.

pag. 219

CAP. XIX.

Alexander Magnus serpente Deo genitus. Jupiter Ammon unde dictus. Vetus commentator in Germanici Aratea Phœnomea notatus. Ammon cornutus. Læcanus correctus. Martialis explicatus de ara Apollinis ceratina. Curtius emendatus. Jupiter Ammon non tantum cornibus arietinis; sed prorsus ut aries toto corpore expressus. Arnobius, Minucius Felix, Josephus Scaliger, & Jacobus Ouzelius notati. Alexandri successores cornuti. De ipso Alexandro quare cornutus fingatur, variæ sententiæ. Cornuum varia significatio. Politiani error. Scaliger represensus. De Baccho, & cur ipse cornutus. Locus Exo. xxxiv. vers 29. explicatus de Mose cornuto. Unde originem habeant umbellæ Lunatæ circum caput sanctorum. Equus Alexandri cur dictus Bucephalus. Equi inusto signo notati. Aristophanes explicatus. Beatarum particula augens. Alexander in magno honore semper habitus. Turcarum de Alexandro error. Julianus se credidit Alexandrum. Calceis adjunctæ Alexandri effigies.

pag. 235

CAP.

SUMMA CAPITUM.

CAP. XX.

Urna Severi osculis excepta. Adorare. Heraldus, Lipsius, & Henricus Salmuth notati. Martyrum vulnera olim osculabantur. Ante celebrationem sacrae coenae Christiani olim sibi invicem oscula figebant: recens baptizatis non item. Imperator Pontificis Romani pedes osculabatur, & Pontifex Imperatoris. Theodora Augusta pedes etiam patricii osculo prosequi solebant. Nonnihil de Theodora & duabus aurigarum factionibus Veneris atque Praesinis.

pag. 262


SYLLA-

SYLLABUS

Auctorum Veterum & Recentiorum,

Q U I

Emendantur, illustrantur, aut notantur.

 <i>Puleius</i> explicatus.	Pag. 155
<i>Aristophanes</i> illustratus.	pag. 56.
112. explicatus.	238. 255
<i>Arnobius</i> notatus.	pag. 241
<i>Artemidorus</i> explicatus.	pag. 95
<i>Ausonius</i> illustratus.	pag. 95
 <i>Barthius</i> notatus.	 pag. 17
<i>Berneggerus</i> notatus.	pag. 4
<i>Boeclerus</i> notatus.	pag. 36
 <i>Casaubonus</i> notatus.	 pag. 132. 170
<i>Castellio</i> notatus.	pag. 136
<i>Cicero</i> correctus. pag. 77. explicatus.	165. 191
<i>Commentator in Germanici Arat. Phæn.</i> notatus.	pag. 236
<i>Curtius</i> correctus.	pag. 240
 <i>Dempsterus</i> notatus.	 pag. 180
****	<i>Dre-</i>

S Y L L A B U S.

Drelincurtius notatus. pag. 185. 188

Drusus notatus. pag. 132

Epietetus explicatus. pag. 155

Erasmus notatus. pag. 25. 221

Nicod. Frischlinus notatus. pag. 255

Florens Christianus notatus. pag. 223

Gatakerus notatus. pag. 134

Gronovius notatus. pag. 115

Heraldus notatus. pag. 263

Horatius explicatus. pag. 84. 117. 133.
illustratus. 91

Ioannes Euangelista illustratus. pag. 76

Iuvenalis illustratus. pag. 159. explica-
tus. 163

Lactantius notatus. pag. 92

Livius notatus. pag. 195

Lipsius non probatus. pag. 35. nota-
tus. 263

Lucanus emendatus. pag. 239

Lucas

S Y L L A B U S.

Lucas Evangelista illustratus. pag. 153.
in Actis explicatus. 203

Martialis explicatus. pag. 98. 201. 239

Minucius Felix notatus. pag. 241

Moses Propheta explicatus. pag. 150.
180. 230. 250.

Ouzelius notatus. pag. 242

Paulus Apostolus explicatus. pag. 85

Perottus non probatus. pag. 31

Persius illustratus. pag. 56. defens. 207

Petavius notatus. pag. 6

Plautus illustratus & defens. pag. 215

Plinius explicatus. pag. 100

Politianus notatus. pag. 207. 247

Ronsardus notatus. pag. 99

Rosinus notatus. pag. 93

Salmasius notatus. pag. 207. 208. 215

Henr. Salmuth notatus. pag. 264

Ios. Scaliger notatus. pag. 241. 247

Seneca tentatus. pag. 10. notatus. 160

Henr. Stephanus notatus. pag. 121

Sue-

SYLLABUS.

Suetonius explicatus. pag. 182. expen-
sus 188. illustratus. 227

Synesius explicatus. pag. 7

Terentius illustratus. pag. 86. explica-
tus. 143. defensus. 208

Theocritus illustratus. pag. 142

Virgilius explicatus. pag. 133. 191. il-
lustratus. 142. emendatus. 204

Vulgata S. Bibliorum versio defensa.
pag. 251

VARIA.

V A R I A R U M
L E C T I O N U M
L I B E R.

C A P. I.

De Belisario, & Justiniano. Berneggerus notatus.

INgemiscere solemus, quotiescunque Belisarii fortunam recolimus, quem & gratiâ apud Justinianum & oculis ejus jussu privatum ostiatim obolum collegisse dudum est, quod multis persuadeatur. Verum evenit hic, quod in tragicis historiis ferme solet, ut multa affingerentur, quæ quidem ad misérias exaggerandas faciunt; sed præter historiam aberrant. Istud quidem diffiteri neque possumus neque volumus Belisarium Justiniani gratiâ excidisse; aut eum effossis oculis mendicasse plane negamus. Negarunt id quoque ante nos alii, Viri doctrinâ & Historiarum cognitione præstantissimi, inter quos Alciatum Alcimannum, & Berneggerum nomino. Illum quidem in *Parergis*, istum in *Notis ad Historiam Arcanam Procopii*, hunc vero in *Observationibus Historico-*
A Poli-

Politiciis. Et qui, quæso, hoc verum esse queat, cum Procopius, qui Justiniani & Belisarii cœvus, utriusque historiam eleganti quidem at mordaci stilo perscripsit, ne γὰρ quidem hujus meminerit? Fuit igitur Belisarius ter apud Justinianum perduellionis accusatus: semel cum in Perside contineret exercitum, Justiniano graviter ægrotante: iterum in Aphrica post devictum Gelimerem: tertio cum jam senex ageret Constantinopoli à Sergio inter socios conjurationis nominatus. Sed nihilominus semper in pristinum honorem restitutus fuit. Quamquam dubitare possumus annon etiam quarto apud Imperatorem delatus fuerit, cum legamus ejus bona post obitum fisco addicta, & in domum Marinam, quæ recondendis Cæsarium divitiis inserviebat, asportata fuisse. Hoc tamen verius Justiniani avaritiæ, quàm majorem in modum flagrabat, quam Belisarii crimini adscripserimus. Nam Justinianum aurum ardentissime sitivisse auctor est Procopius & quam ille nihil pensi neque moderati habens omnia pro pecunia fecerit inter cæteros Evagrius ostendit, cujus verba *Lib. IV. cap. 30.* Hæc sunt: οἱ ἰὺσταδὸς ὡς μὲν χρημάτων ἄπλητος, & τ' ἀλλοτρίαν ἕως ἐκτόπως ἐραστὴς, ὥς & τὸ ὑπόηκον ἅπαν χρεῖσιν ἀπερῶσκεν, τοῖς τε ταῖς ἀρχαῖς, ὅπῃ τρεπδύσει, τοῖς τε ταῖς φόρῃς ἐκλήγετο, & πῶς ὅσοι ἀπ' ἐδεμῆς αἰτίας ῥάπτειν ὀπῶντας τοῖς ἀνθρώποις ἐβίβουσι. Πολλὰς δ' & διαριθμὰς τὰ πολλὰ κληκμάναν πορφαίσεις ἀπερρωσίσεις ἐπιχρῶσας τὰς ἐσθλας ἀπείσας ἐξημίωσι. Id est: *Erat autem Justinianus ita avarus, ut nullis opibus exsariari posset, & alienorum ita appetens, ut omnes subditos quasi auro diven-*
deret

deret iis, qui aliquam præfecturam gerebant, aut vectigalia exigebant aut innocuis struebant insidias. Innumeros profecto eorum, qui in re erant lautiore, nullam vel falsam ob causam, omnibus opibus spoliavit. Atque sic quidem Belisarii bona ab Justiniano rapta fuisse merito quis suspicetur; cum vivus aliquando in tanto apud eum honore fuisset, ut nummos excudi jussit, qui ab altera parte suam, ab altera Belisarii imaginem præferrent, cum ejusmodi elogio: *Belisarius Romanorum spes & gloria*. Hujusmodi nummus est, cujus meminit Petrus Gillius in accuratissimâ Constantinopoleos descriptione *Lib. II. cap. 15*, cujus verba subjungam: *Nunc vero Circus Constantinopolitanus friget, omnibus ornamentis spoliatus, nuperque exadificari cœptus est: quod me spectantem dolore affecit, quem augebat Belisarii primum de rege Vandalorum in Hippodromo triumphantis, deinde ob virtutem summam maxime periclitantis, recordatio, quam mihi dabat numisma, quod tum forte habebam in manibus in cujus uno latere sculptus erat Justinianus, Belisarium excipiens triumphantem; in altero Belisarii imago cum hoc elogio: GLORIA ROMANORUM BELISARIUS*. Sic quidem Gillius. Jam videamus unde fabula de Belisario occæcato suum duxerit ortum. Erat Constantinopoli quidam Johannes Capadox, qui cum semel Consulatum honorarium, bis præfecturam Prætorii gessisset, tandem à Justiniano in exilium pulsus

ἀπὸ τῶν αἰτεῖσθαι, *panem vel obolum ab obviis petere* coactus fuit, uti narrat Procopius *Lib. I. Bell. Pers. extremo*. Erat præterea Buzes, qui bello clarus & Belisarii per Orientem collega, cum in suspicionem affectati Imperii venisset, à Theodora, quæ verius quam Justinianus ipse regebat, ultra biennium carceri tenebricoso inclusus, adeo ut diem inter noctemque nihil discerneret, & tandem inde emissus ex eo tempore, oculis lucem ferre defueris, cœcutire & valetudine adversâ uti cocepit, ut idem narrat Procopius in *Archanâ Historiâ* pag. 17. Hæc cum aliqui minus in historiarum cognitione versati de celebribus ducibus tacitis ipsorum nominibus, narrari audivissent, neque alium à Belisario ducem sub Justiniano noscent, huic uni falso adscripserunt, quæ istis duobus evenerant. Quis autem princeps autor fuerit hujus fabulæ nullus dixerim. Illud certò constat errare Cl. Berneggerum, qui autumaverit primum à Baptista Egnatio vel Petro Crinito fuisse confictam: cum idem dudum ante narraverit Johannes Tzetzes *Chiliade III. Histor. 88*.

Οὐτὸς ὁ Βελισάριος ὁ στρατηγὸς ὁ μέγας
 Ἰουστινιανῷς ἂν ἔα χρόνιοις στρατηλάτης,
 Πρὸς πᾶσαν τετραμέριαν γῆν ἐφαπλάσας ἵκας,
 Ὅσπερ φθόνῳ τυρλαθεῖς, ᾧ τύχης τῆς αἰσάτης!
 Ἐκπομπὰ ξύλινον κρατῶν ἐβίβα τῇ μιλίᾳ,
 Βελισαρίῳ ὁ βολὸν δότι τῇ στρατηλάτῃ
 Οὔν τύχη μὲρ ἰδῶξας, δποτυλοῖ ᾧ ὁ φθόνος.

Quorum verborum hic sensus est: *Belisarius hic,*
qui

qui Imperator fuit magnus, & Iustiniani tempore exercitum duxit, suasque per quatuor terra partes circumtulit viatorias, tandem per invidiam occæcatus, ô Instabilem fortunam! ac ligneum manu tenens poculum populo in stadio clamabat: Belisario Imperatori date obolum, quem fortuna quidem evexit, livor verò excæcat. Subjungit tamen Tzetzes, tanquam ipse de eo dubitaret, illud quod ab aliis traditum, nos verum esse jam ostendimus:

Αἱμοὶ φασὶ τῶν χειρῶν μὴ θυρωσθῆναι τῦτον,

Ἐξ ἐπιτίμων δ' ἄπμον ἰσχάτως γυγνίνα,

Καὶ πάλιν εἰς ἀνάκλησιν δόξης ἰλθεῖν ποστίνας.

Id est: *Alii verò Historici hunc nequaquam oculis privatum fuisse tradunt; sed ex summo honore ad ultimum decidisse despectum, unde tamen ad priorem dignitatem iterum assurrexit. Est autem illud Tzetæ opus, quod ipse nonnunquam epistolam, nonnunquam πίναν, sæpe historiam appellat, ab eo scriptum. Anno à C. N. M. C. LXXVI, uti docet Nicolaus Grebelius in præfatione Tzetæ præfixâ.*

CAP. II.

Petavius notatus. Synesius ex Procopio explicatus. Consules Alter Orientis alter Occidentis. Consules honorarii. Seneca tentatus.

INter scriptores, quorum lectione me sæpius oblecto, magnas habet Synesius, cujus opera nobis doctissimus Jesuita Petavius non edidit solum: sed & multum emaculavit ac notis illustravit elegantissimis. Plurimum autem inter cætera opera me afficiunt Epistolæ, quas Suidas *δαμναζομένης* vocat, ego mellifluas vocitare solco. Incipit ipsius Epistola CXXXIII. his verbis: *Χθὲς ἐπερίω ἐπὶ τῶν ἡγετῶν ὑστάτων, αἱ ἀπὸ τοῦ ἐκ τοῦ Ἀριστάνετου τὸν γὰρ συνάρχοντα ἄγνοῶ. κατὰ σπουδαίαν ἐκνομίαν ἐπολλὺ, τὸ σὺν τῆς ἱερᾶς κεφαλῆς ἐπιγεγραμμένον ὄνομα.* Hoc est, vertente Turnebo, modo verum hæc versio præferat autorem: *Hæc & paulo ante his consularibus, qui modo facti sunt, quorum alter est Aristanetus, collegam enim non novi, accepi epistolam, quam ad me miseris obsignatam, inscriptam tuo sacri tui capitis nomine.* Ad hæc verba ita Dionysius Petavius: *Συνάρχων Aristaneti Honorius Imperator fuit anno CCCCCIV. Nec mirum ignorari à Synesio; etenim consularis honos principali fastigio velut sidus solis lumine condebatur.* Sed falleris, Petavi: nam ludi, venationes, cæteraque munera initio consulatus ab Honorio de more

more data nonne satis Consulem prouidebant? Dicamus quod res est. Synesius Orientis Consulem commode & statim tenere potuit, Occidentis vero Consulem non potuit. Postquam enim Imperium à Constantino Byzantium translatum esset, ἡ πάλαι Ρωμαίων ἀνὰ Πᾶν ἔτερον ἐργαζόμενος δύο ἀπὸ τοῦ μὲν ἐν τῷ Ἄμυ, ὁ δὲ ἐν τῷ ἐν Βυζαντίῳ, quæ sunt ἑνὶ τῷ Procopii verba *Histor. Arc. pag. 114. Duo singulis annis apud Romanos consules creabantur, unus Romæ, alter Byzantii.* Facile igitur evenire potuit, cum Constantinopolis à Româ longiuscule distaret, ut qui in Oriente essent non statim Consulem Romanum agnoscerent, nec qui in Occidente Constantinopolitanum. Atque hinc facile viderimus, quid causæ sit, cur multæ Antiquorum Epistolæ, ac alia monumenta unico consulis nomine notata exstent, iis etiam annis, quibus fasti duos Consules produnt. Quomodo vero in tabulis publicis, Consulis, cujus nomen ignorabatur, mentio fieret, non injucundum erit si doceam ab exemplis, quæ doctissimo Alemanno nisi transcriberem, plagii merito condemnarer. Sic igitur habemus in *Actis VII. Concilii Constantinop. sub Flaviano*: Φλαῳίῳ Προτογενεὶ καὶ τῷ δηλοθρονοῦ ὑπατά. *Flavio Protogene & declarando consulibus*: Chalcedonensis Concilii Actiones notatæ sunt, *Marciano*, & qui fuerit nuntiatus *Consf.* In calce diplomatis Theodosii sic legimus: *Fl. Antiochi & alterius declarandi Consulatu.* Possem hac occasione multa addere de consulibus: sed cui non

dictus Hylas? Quanta in dignitate iste honos fuerit, vel hinc claret, quod multi, non modo magni æstimarint; sed & magni emerint per paucas dies; imo per paucas horas consules esse, qualis ille fuit, quo Consule neminem somnum vel cibum percepisse memoriæ proditum est. Istud adnotare non pigebit, præter *Ordinarios* Consules, quosdam *Honorarios* fuisse, qui & *Codicillares* vocabantur, *ἐπὶ αἵματι καλαμῶδες μύρον*, solo nomine Consules ut ait Procopius *Lib. III. Bell. Goth.* Hi præter nomen nihil dignitatis habebant, neque in fastis Consularibus notabantur. Poterant autem Eunuchi hujusmodi Consules esse, cum *Ordinarii* esse lege prohiberentur. Patet hoc ex Narsetis Eunuchi, qui sub Justiniano florebat, inscriptione ad Pontem Salarium: NARSES. VIR. GLORIOSISSIMUS. EX. PRÆPOS. SACRI. PALATII. EX. CONS. ATQUE. PATRITIUS. Neque solum Consules *Honorarii*; sed & Senatores, aliique præfecti *Honorarii* erant. Cassiodorum certe nonnulli recte appellant, non officio, sed nomine *Senatorem*. Aufonius de Patre utriusque Romæ Senatore *Honorario*. *Eidijl: II.*

*Curia me duplex & uterque Senatus habebat
Muneris exortem, nomine participem.*

Justinianus *Novell. LXX.* Plurima horum quæ olim sancita sunt, neglecta & non facile in republica tractata, omnino visa sunt, absone lege & sine legislatione consistere: Novimus enim quia

an-

antiquitus erat quadam præfectura, quam Hono-
nariam vocabant, codicillis ab imperio super ea
collatis. Hanc autem ita nominabant, ut nihil
aliud nisi purum honorem iis, quibus præbatur,
conferret, quæ curiales non liberabat à fortuna cu-
riali, nisi quis eam ipso opere ministrasset. Hu-
jusmodi præfecturam Euagrius habuit, cujus in
fine historiæ hæc verba legimus: Δι' ἧν ἐ δούτε πτω-

χήκαμεν ἀξιώματ' αὐτῶν, Τις τοῖς μὲν Κωνσταντίνῳ, τῇ τῷ κοινῶς τοῖς
ἀφελ' αὐτοῖς, Μαυρικίῳ δὲ Τις τοῖς δὲ λ' αὐτῶν ὑπάρχοντες εἰσέλαντο.

Per quos & duas obtinuimus dignitates, Tiberio
quidem Constantini filio conferente Quæstoris gra-
dum, hujus vero filio Mauricio mittente codicil-
los, quibus præfectum scribebat. Ad Consulem
Codicillarem, non inepte forsan quis retulerit Se-
necæ verba *Lib. III. de Ira, cap. 31*: puto enim
hujusmodi consules Senecæ quoque tempore fa-
ctos fuisse, quod nemo mirabitur, qui consulatum
à primis etiam Imperatoribus in paucos dies da-
tum ex Suetonio didicerit. Verba autem Senecæ
ita sonant. *Dedit mihi præturam? sed consula-
tum speraveram. Dedit duodecim fasces? sed
NON fecit ORDINARIUM Consulem.*

*A me numerari voluit annum? Sed deest mihi ad
Sacerdotium.* Non repudio tamen, quæ Cl. Lip-
sius ad hunc locum hisce verbis notat: *Duplices
Consules ab Augusto, SUFFECTI & OR-
DINARIJ.* Isti Ordinarii, qui initio anni
inibant, & fastis prænotabantur, & instrumentis,
& ubicunque annorum ratio erat. At alii per men-

ses tres aut duos sufficiebantur, potestate pari, non dignitate. Hic velim eruditiores perpendant an non elegantius apud Senecam interrogationis nota tollatur? Mihi quidem ita videtur.

CAP. III.

Muretus laudatus. De insigni Grotii, Vossii, Salmasii, Mirandulani, Pascalii, Guyeti, Roberti Constantini Theodor. Bezae & Christ. Longolii memoria. Adagium nulli notatum, quod contra Barthium explicatur.

CUM nuper in Antonii Mureti *Varias Lectiones* incidissem, magna cum voluptate, magnoque fructu totas evolvi. Eas elegantissimas esse si quis dubitat Muretum profecto non novit, quo alter non fuit elegantior. Orationes & epistolas testes interroga, & nisi verum me dixisse confiteare, stipitem te ac plumbeum libere pronuntiabo. Adeo is quidem feliciter Veteres imitabatur, ut Epigramma, quod ipse fecerat Cæsari Scaligero (at quanto Viro!) pro antiquo Veteris Scriptoris obtruderet. Quod hic ubi rescisceret hoc disticho ultus fuit:

*Qui rigide flammæ evaserat ante Tholosæ
Muretus, fumos vendidit ille mihi.*

Is igitur Muretus *Lib. III. cap. I. Var. Lect.*
varia

varia exempla profert eorum qui memoriâ excellerunt, inter quæ illud adolescentis Corsici omnem fidem superaret, nisi ipsemet se vidisse testaretur. Ea cum legerem, in mentem veniebat quod de Hugone Grotio, viro Celeberrimo,

Quem sibi quindenis Astræa sacravit ab annis.

Aliquando narravit Parens meus cui præter vitam, studia mea, qualiacunque ea sunt, debeo, ipso à pueris præceptore usus. Accidit nimirum ut Grotius ex Autoritate Illustrium ac Præpotentum Hollandiæ Ordinum aliquot militum cohortes lustraret, magno sane memoriæ summæ exemplo, quod statim non modo omnes milites, nunquam sibi antea visos de facie nosceret; sed & singulorum nomina absque hæsitazione teneret. Neque minus mirandum quod de Viro undiquaque doctissimo Gerardo Joanne Vossio vir quidam & ipse doctissimus mihi retulit. Aiebat is, se ex ipso Vossio audivisse, tantâ cum fuisse memoriâ præditum, ut non sciret se unquam cujusquam rei esse oblitum. Huic profecto non multum hac felicitatis parte cessit, si non & superavit CL. Salmasius, quo lumine nullum illustrius Academiam nostram *ἐκτίπτει*. Ponam de eo Clementii verba, qui Viri CEL. vitam copiose descripsit. *Memoriâ profecto stupendâ fuit. Adeo ut pares illi hac in parte vel universo orbe paucissimi, superiores nulli. Nulla pene nomina erant propria Virorum; Regionum, Urbium, Montium &c. quæ si semel legisset non posset continuò revocare in mentem.*

tem. Narravit mihi V. CL. & eximium Academia nostra lumen ac columnen, I. Golius, qui utebatur eo perfamiliariter, incidente occasione aliquot sibi recitasse memoriter periodos ex Pentateucho Arabico, quem decennio ante, nec nisi semel legisset. Adversaria, aut dispositos locos communes, (habebat plurimos, cujus jam mentionem feci, CL. Vossius) quod fidem fortasse non inveniet, nullos habuit. Solis enim excerptis, quæ in Bibliothecis olim puer collegerat, utebatur, & iis quidem valde inordinatis; sed quæ memoria, cum occasio ferret, facile suggereret. Sape in scriptis suis hujus felicitatis argumenta & signa exhibuit expressissima, cum Autorum locos fere citaret memoriter. Haftenus Clementius. Tanto autem C. L. L. Horum virorum memoriam magis mirari debemus, quanto in retinendis, quæ ceperat, fuit felicior. Nam cum duo sint genera eorum, qui memoria excellent, quorum alteri facile quævis arripiunt, alteri arrepta retinent: hi tamen ista duo, quæ diversa esse solent simul præstabant. Et quid, quæso profit multa memoriæ tradere & cum curâ infigere, si continuo effluant, veluti in vento & rapidâ aquâ scripta essent, nec ad usum, ubi opus est, depromas? Itaque tenacem esse memoriam oportet, qualis in illustrissimo Mirandulæ Comite Joanne Pico fuisse traditur. Ita de Patruo Franciscus Picus in ipsius vitâ: *In discendo quidem celerrimus erat, prompto adeo ingenio præditus, ut audita semel à recitante carmina, & directo &*

retro-

retrogrado ordine, mira omnium admiratione recenseret, tenacissimâque retineret memoriâ, quod ceteris contra evenire solet: nam qui celeri sunt ingenio, natura fieri saepe solet, ut non multum memoria valeant, qui vero cum labore percipiunt, tenaciores perceptorum evadant. His non multum distant quæ de Paschalio in Galliis notissimo viro narrat is, qui Præfationem addidit Cogitatis ejus Posthumis. Et comme, dit il, il avoit un memoire excellente, & qu'on peut dire mesme prodigieuse. de sorte qu'il avoit souvent assuré qu'il n'avoit jamais rien oublié de ce, qu'il avoit une fois bien imprimé dans son esprit; lors qu'il s'estoit ainsi quelque tems applique à un sujet, il ne craignoit que les pensées qui luy estoient venues luy pussent jamais échapper: & c'est pourquoy il differoit assez souvent de les escrire, soit qu'il n'en eust pas de loisir, soit que sa santé qui a presque tousjours esté languissante & imparfaite, ne fust pas assez forte pour luy permettre de travailler, avec application. Quæ verba in hunc sensum confero. Et quoniam admiraculum usque memoriâ valebat, adeo ut sepe dixerit nihil sibi unquam excidisse eorum, quæ semel tantum menti bene imprefferat, inde evenit ut nihil vereretur, ne quæ aliquando cum curâ de aliquâ materiâ cogitaverat, iterum oblivisceretur: Ideoque ea chartis mandare sapius differebat, sive ob otii penuriam, sive ob valetudinem, quâ utebatur infirmâ & laborum minus patiente. Hujusmodi si quis memoria præditus sit, ad usque senium plerum-

rumque retinebit. De Francisco Guyeto, qui egregie in Terentium commentatus est, quique novo ac inaudito antea consilio linguam Latinam à Græca non modo derivabat; sed & Græcæ Linguae primitiva omnia, unde cætera deducerentur, vocabula, monosyllaba esse contendebat, de eo, inquam, Guyeto Antonius Periander in ipsius vita refert, *quod memoriâ imprimis valuerit, quam fidam omniumque, quæ semel tradita erant, tenacissimam ad extremum usque conservavit.* Hoc quoque verum esse apparuit in Roberto Constantino, cujus Lexicon Græco-Latinum in omnium versatur manibus, de quo Viro τὸ πάλιν Thuanii verba adscribam: *Vixit ad annum tertium supra centesimum, integris corporis ac mentis sensibus, & memoriâ adhuc valida.* Adeo ut non semper verum sit quod senex dicit apud Senecam in Oedipo:

— *Prima languescit senum*

Memoria, longo lapsa sublabens sua.

Mirum profecto est, quod refert de C. E. L. Theologo Theodoro Beza, jam fere centenario C. L. Casaubonus in Epistolis. *Venerandus senex Theodorus Beza, cum per longinquitatem ætatis factus sit obliviosus adeo, ut post frequentes de novo Rege Angliæ sermones, subinde me rogaret de regina, an verum esset, quod fama jactaret, eam fauis concessisse: idem tamen in literis nobis visus is esse, quem ante annos viginti noveramus. Loquitur Latine, interdum & Græce, ut antea. Audivimus de*
Histo-

Historia Veteri differentem è re nata luculentissime, ut videretur recens esse à lectione Plutarchi, & id genus autorum. Iam textus Biblicos, maxime N. T. in numerato habet. Longum sit omnia persequi quæ sumus in optimo sene mirati, &c. Cum memoria nihil jam novi admitteret, humore omni ætate depaſto, vetera tamen fideliter retinebat. Neque dubito quin idem obtinuisset in illo Ciceronis Imitatore verius, quam æmulatore Christi. Longolio, si ad senium pertingere ei licuisset: obiit enim ætatis anno quarto & trigesimo. Libet hîc adscribere quæ in Vita ipsius de insigni ejus memoriâ literis consignata exstant. Memoriâ vero tantâ fuit, ut ad ea tollenda, quæ animo semel insedissent, diuturnitas temporis vix aliquid valeret. De pluribus & variis rebus sæpe interrogatus, de quibus à multis annis nihil legerat, non minus prompte de singulis solitus est respondere, ac si eo die ab eo perlecta fuissent. Cujus rei, cum familiariter cum eo viverem, in consuetudine quotidiana crebro periculum facere licuit. Hocque in eo magis mirum fuit, quod cum plurima legisset, omnia autem, quæ Grace aut Latine scripta essent, sibi legenda proponeret, nunquam fere ad metam semper properanti ad eundem scriptorem revertere licuit. Si quando de iis rebus sermo incideret, quæ à diversis & variis scriptoribus tractata essent, cum res ipsæ essent eadem, ita tamen oratione solebat distinguere, sua verba singulis scriptoribus, à quibus ea acceperat, referendo,

ut

ut non memoriter ea dixisse, in quo saepe offendi solet; sed de scripto pronuntiassse videretur. Quae saepe cum faceret, ita auditorum admirationem incendit, ut eum artificio quodam non naturali memoriae bono uti existimarent. Hujusmodi autem insignis memoria, quin plurimum in studiis conducatur, nemo, opinor, diffitebitur. Quapropter *Ars* quaedam *Memoriae* excogitata fuit, quam à Lullio inventore Lullianam vocant. Sed cum illud naturae donum sit, quod industria & opera perficit, frustra me iudice, eam artem adhibent. Alia est memoria verborum, alia rerum, quarum illam absque hac nemo magni aestimabit, qui didicerit quid solidae res nugis canoris distent. Etsi igitur quis multa verba per artem doceri possit, res vero non possit; tamen eâ arte non utetur: praesertim cum eò res se penetrare non possint, ubi multis & inanibus verbis memoria obsita sit. Aliud autem per eam artem teneri non potest, nisi confusum verborum chaos, & inutilium terminorum farrago. Recte itaque Cicero eos notat Oratores, qui verborum studio dediti res ipsas negligebant: adeo ut cum splendoras voces multas tenerent, rerum tamen omnino ignari esset. Sed hæc res cum prolixiorẽ dissertationem desideret, impræsentiarum à nobis mittetur. Contenti erimus Adagium adjecisse, nulli Adagiographorum hætenus, quod scimus, notatum.

Id exstat in elegantissimo Procopii Gazæi libro, quem scripsit de *Animæ Immortalitate*. Ipsa
Gazæi

Gazæi verba ponam, quibus Axitheus Theophrastum ita alloquitur: Εὐδαῖμον εἶ, ὃ θεόφραστο, ὅλα πόλιν, ἔντων ἔ ποιήλων τ' ἀάλα λεγόμενων, ἔδιν σε δίδλαθιν. ἀλλὰ πάντα διδάσκεις σαφῶς, οἷς αὐτοὺς ἐξέδισον, ἔ τὰ τ' παλαιῶν διεξίστην. Μνημονικὸν μᾶλλον τοῦ Ἰππία ἐφάνης. *h. e. Felix es, ὃ Theophraste, qui, cum multa sint atque varia antiquitus dicta omnium istorum gnarus sis, atque ita edifferas perspicuè, tanquam ipse primus excogitasses, nec aliunde ab antiquis accepisses. HIPPIAM IPSUM MEMORIA VINCERE VISUS ES.* Non dubito quin non sumptum sit ex Platone in *Hippia Maggiore*, ubi Hippias de semet ipso hæc verba usurpat: Ἀπαξ ἀκούσας πεντήκοντα ὀνόματα ἀπομνημονεύσω. *Quinquaginta nomina, modo semel audiam, memoriter recensebo.* Caspar Barthius, cujus diligentia in re literaria plus forsitan, quam iudicio, debemus, istud Adagium non sine sale dictum putat in hominem jactatorem. Istud ut verum esse assentiar, facere non possum. Hippias quidem de co se jactat, quod maximâ memoriâ præditus sit, & ideo se effert: sed inde concludes eos omnes qui Hippiaæ memoriâ similes esse dicuntur, jactatores esse? Mihi sanè illud ἀκολούθῃ, qua sum stupiditate, non patet. Melius itaque hoc Adagium usurpatur de eo, qui maximè memoriâ excellit, quales illi, quorum jam meminimus. Hisce si quis plura exempla desiderat, is præter cæteros adeat Jonstorum in egregio libello. *De Natura constantia Prop. IV. Artic. 3. Membr. I.*

CAP. IV.

*De mancipio Peruano faceta historiola.
Purpuramentum vel encaustum, quo
Imperatores subscribebant, deque ipsa
subscriptione. Capita legum, librorum
tituli, & errores in scribendo minio
notati. Erasmus & notatus simul &
laudatus. Minium in simulacris Deo-
rum & triumphis, nec non in sepulcris
usurpatum: Canicularius.*

Nihil profecto rebus humanis utilius esse qui-
verit, quam scribere. Qui hoc princeps
mortales docuit, quisquis fuerit, næ ille rem egre-
giam præstitit. Per scriptionem nosmet ipsos
tanquam in speculo ostendimus, & sicut Majo-
rum res gestæ ad nos transmissæ sunt, ita no-
stras ad posteros transmittimus. Per ea in absen-
tes loquimur cum absentibus, & intimos animi
sensus communicamus. Sint licet

——— *μᾶλα πολλά μετάξυ*

Οὐρά τι συμβῆτα θαλάσσης τι ἡχέισα,

*Multi umbrosi montes inter siti, ac mare sonans;
tamen ultro citroque literæ commeant, & scri-
ptio præsentis facit, quos longum intervallum
disjungit. Venuste Seneca ad Lucilium suum
Epist. XL. Quod frequenter mihi scribis gratias
ago:*

ago: nam quo uno modo potes te mihi ostendis. Nunquam Epistolam tuam accipio, ut non protinus unâ simus. Si imagines nobis amicorum absentium jucunda sunt, qua memoriam renovant, & desiderium absentia falso atque inani solatio levant: quanto jucundiores sunt litera, qua vera amici absentis vestigia, veras notas afferunt? nam quod in adpectu dulcissimum est, id amici manus epistolæ impressa praestat, agnoscere. Facetum est, quod C. L. Vossius Lib. de IV. Art. Pop. pag. 7. narrat de mancipio Peruano, qui quid epistolæ essent, quidve possent, plane videtur ignorasse. Miserat eum Dominus (Vossii verba describam) ad virum nobilem cum corbe ficuum pleno, & literis. Mancipium deliciis captum bonam in via partem voravit. Cui missus erat, ex literis deprehendit quantum absumpsisset. Quare nequitia arguit. Hic mendacii arguere literas, seque diris devovere, si reus furti inveniretur. Denuo à Domino mittitur cum ficibus & literis. Jam metuere literas caperat, quasi videre, & visa proloqui scirent. Comesturus igitur ficus prius sub saxo abdidit literas, eique insedit. Viâ confectâ reliquum tradit cum literis. Iterum arguitur. Ille negare factum, quod sciret literas in obscuro id non potuisse conspicer. Et fortasse permansisset animus nisi tergo à Domino Ibericis fimbis, vel virgis ulmeis perusto in posterum etiam Plautinam metuiset virgidemiam. Sed ad rem quam volumus. Epistolæ Imperatorum quibus ad materias quæsitæ respondebant, quæ

proprio nomine *Rescripta* vocantur, ut & omnia diplomata, quæ principum nomine vulgabantur, ut ut communi atramento scriberentur, proprio tamen colore nomen Imperatoris subnotatum habebant. Testem, cum possemus plures, citabimus solum *Procopium in ἀνecdotic pag. 28.* quæ cur

Fr. Guyetus supposititium ac alienum factum esse crediderit, causam profecto video nullam. Hæc sunt Procopii verba: *Ἡ δὲ ἐργασμένη βασιλεὺς ἐγκλάψαντες*

μορφοῦ τινα γεγραμμένων τετραέρον, ἃ περ ἀναγιγνώσκῃ Λατίνων φωνῇ

διδάσκουσιν, γεγράφειν τε βασιλεὺς βέλαντες, ἢ βασιλεὺς γεγράφειν εἰσάβασιν

ἐπιχειροῦντο τῇ βασιλεῖ τῆς τῆς. Lignea tabella perpolita

formam quatuor literarum, qua legi Latine possent, incidendam curant, eaque libello impositâ, calamum colore imbutum, quo scribere mos est Imperatoribus, huic Principi tradebant in manum.

Loquitur de Justino, quem Imperium Romanum ἀναστάσαντα Principem primum habuit, cujus manum, cum subscribendum esset libellis, alius dirigebat, circum agebatque per quatuor literarum formas. Ejusmodi autem subscriptionem etiam ab Imperii exordio de more necessariam fuisse, in

rebus præsertim gravioribus, ut si de capite alicujus ageretur, argumento fuerit una illa vox egregia Neronis, de quâ *Suetonius Vit. Ner. cap. 10.* Cum de supplicio cujusdam capite damnati, ut ex more subscriberet admoneretur, *QUAM VEL-*

L. E. M., inquit, N E S C I R E L I T E - R A S. Optima verba! quibus Seneca se maxime impulsuin ait, ut de Clementiâ scriberet. Ita quippe

quippe librum de Clementia secundum orditur :
*Ut de clementia scriberem , Nero Caesar , una me
vox tua maxime compulit , quam ego non sine ad-
miratione , & cum diceretur , audisse memini , &
deinde aliis narraſſe , &c.* Quod vero Iuſtinus qua-
tuor tantum literis nomen ſubnotârit ſuum , in eo,
non modo commoditati ſuæ conſuevit ; ſed &
prifcum Romanorum uſum retinuit , de quo *Plu-
tarchus in Queſtionibus Romanis* : Τα ἃ περὶ ταῦτ' ἱλο-
γεῖσθαι, ἀλλὰ ἢ δι' ἑνὸς γεγράμματα, ὡς τὸ Τίτον, ἔτ' Ἀέμιον, ἔτ' τὸν
Μάρκον. ἢ διὰ δύο, ὡς τὸν Τιβερίον ἔτ' Κρίον. ἢ διὰ τεσσάρων, ὡς τὸν
Σέξτον ἔτ' Σέρβιον. *Prænomina , Romani non tota ſcri-
bunt : ſed aut , unica litera , ut Titum , Lucium ,
Marcum ; aut duabus , ut Tiberium & Cnæum ;
aut tribus denique ; ut Sextum Servium.* Ille ta-
men uſus poſtea exolevit apud Imperatores , qui
integrum nomen arcanis quibuſdam nodis & im-
plicationibus literarum ſcribere cæperunt : quod
genus nodorum & hodie videmus plurimum &
maxime annulis ſignatoriis inſculptum. Notat A-
lemannus in *Sexta Synodo Actione XII.* mentio-
nem fieri μονογεγίμμη Imperatoris Conſtantine Pro-
gnati , quod hæſce continebat voces Κωνſταντίνου
Διαπόντου Conſtantine Domini. Juſtinianum vero ,
quem Juſtinus ſucceſſorem habuit , unica litera I.
nomen ſuum indicare conſueviſſe , quidam ex Co-
ripppo eruunt , qui propterea *Iota* Juſtiniani api-
cem eſſe dixerit. Qualis autem ille color fuerit ,
quo in ſubſcribendo imperatores uterentur , non
aliunde luculentius patet , quam ex *Lib. 6. C. de*

Divers. Rescript. ubi Leo Imperator sacra rescripta alio colore, quam purpurea Inscriptione, lustrari vetat, de quo vide *Brissonium Lib. III. de form. & solemn. Pop. Rom. verbis*, & præter hunc *Pancirollum de Rebus deperditis Tit. II.* & ibi *Henricum Salmuth.* Lex ipsa ita sonat: *Sacri affatus, quoscunque nostra mansuetudinis in quacunque parte paginarum scripserit autoritas, non alio vultu penitus, aut colore, nisi purpurea tantum inscriptione lustrentur: scilicet ut cocti muricis, & triti conchilii ardore signentur. Eaque tantum fas sit proferri aut dici rescripta in quibuscunque judiciis, quæ in chartis sive membranis subnotatio nostra subscriptionis impresserit. Hanc autem sacri encausti confectionem nulli sit licitum aut concessum habere, aut querere, aut à quocunque sperare: eo videlicet, qui hoc aggressus fuerit, tyrannico spiritu, post proscriptionem bonorum omnium, capitali non immerito pœna plectendo. Nec minus luculentum est illud testimonium, quod ex Gregorio II. Honoratus Nicquetus profert de Tit. Sanct. Crucis Lib. I. cap. 7. Ita quippe inter cætera Gregorius ad Leonem Isauricum: Illud autem in primis præcipuum est, quod literæ tuæ, & non alienæ sigillis Imperatoriis obsignatæ diligenter sunt, & accuratæ intus subscriptiones per cinnabarum propria manu tua, ut mos est Imperatoris scribere. Clara quoque sunt Constantini Manassis verba in Annalibus, quæ quoniam Græca ad manum non sunt, Latine adscribam:*

bam : *Imperator*, inquit, *precibus sororis annuit*, *mox calamumprehendit manu*, & *exaratis purpurei coloris literis chartam confirmat*. Erat autem, ab isto purpureo colore diversus alter ruber, qui in capitibus legum & titulis librorum conspiciebatur. Unde capita Legum *Rubricas* dici solere notius est, quam ut indicetur. Respicit eo *Persius Satyrâ V.*

*Cur mihi non liceat, jussit quodcunque voluntas,
Excepto, si quid Masuri R U B R I C A
notavit.*

Et *Juvenalis Satyrâ XIV*, ubi leges Majorum *rubras* vocat. Consule, si vacat, magnum olim Gallix lumen, *Ad. Turnebum in elegantissimis Advers. Lib. IV. cap. 2.* Hinc ortum duxit illud vulgo quod dici solet: *Non intelligitur nigrum, nisi legatur rubrum*. Necesse enim est, ut legis titulus prius teneatur, quam ipsa lex intelligi possit. Fiebat autem hoc tum Majestatis, tum terroris causa: ut nempe legibus minio, sinopide, aut cinnabari notatis, & sanguineum quidam ac cruentum minitantibus, sua Magistratui constaret Majestas, ac subditis terror. Docuit nos *Prudentius Lib. II. cont. Symm.*

— *Dicant cur condita sit lex.*

*Bis sex in tabulis, aut cur rubrica minetur,
Quæ prohibet peccare reos, quos ferrea fata
Cogunt ad facinus, & inevitabile mergunt.*

Ab hoc instituto plane discrepant Hebræi, qui neque legem, neque ullos sacros libros alio, quàm

atro scribunt colore. Testantur quippe eorum Doctores, non licuisse libros sacros describere, ne Regi quidem, nisi atramento speciali, modo in cumulum confecto, ex fumo olei, vel picis, vel sevi, vel talium, quod cum exusto ligno pinsebatur, & dein depsebatur, cum melle, donec attenuatum esset. Post, prius exsiccatum, reponnebatur donec, tempore scriptionis iterum dissolveretur in aquâ Gallarum aut similium. Ferunt quippe Mosi injectum in Monte Sinai, ut libri sacri solo atramento scriberentur, omnibus coloribus, præter hunc, prohibitis; adeo ut si unica literula iis scriberetur, totum pollutum esse censeretur atque prophanum. Nec vel nobilissima auri tinctura excipiebatur. Atque ideo de Penteucho Alexandri Magni pronuntiatum est à sapientibus, eum è medio tollendum esse, quod nomen Dei aureis literis perscriptum esset. Vide *Guilielmum Schickardum de jure Regio Hebr. cap. 2. &*, qui ex Schickardo sumpsit, *Rivetum Isag. ad Sacr. Script. cap. 10. Etiam Lomeierum de Bibliothecis cap. 3. Sect. 2. De titulis librorum minio notatis notissimus Ovidii Initio Trist. locus exstat:*

Nec titulus minio, nec cedro charta notetur.

Errores quoque in scribendo sive Sphalmata minio notari consuevisse patet ex Cicerone: nisi quis à solo Attico in Ciceronis *συτάξις* corrigendis miniatam cerulam adhibitam esse putet. Ita eloquentissimus Romuli nepotum *Ad Atticum lib.*

Lib. XV. Epist. 15. His literis scriptis, me ad αὐτῶν dedi: quæ quidem vereor, ne miniatâ cerulâ tuâ pluribus locis notanda sint: ita sum μινιῶ, & magnis cogitationibus impeditus. Et iterum Epist. 2. Lib. XVI. Nostrium opus tibi probari lator: ex quo ante ipse posuisti, quæ mihi florentia sunt visa tuo iudicio: cerulas enim tuas miniatulas illas extimescebam. Huc haud dubiò respiciunt Baptista Guarinus in Epistola ad Joan. Picum Mirandulæ Principem, quæ inter hujus exstat epistolas, hisce verbis: Neque transversæ calami signo, neque miniata cerula (sic enim legendum est, cum typographi vitio ut multa alia in istis Epistolis, perperam legatur, minuta cerula) neque obelisco denique aut asterisco tantum promovisse mihi conscius sum. Nec non αὐτομαθῶ, Thomas Reinesius, maximi inter Germanos vir iudicii, sed ingenii asperioris, in Epistolis ad Hoffmannum Epist. 12. Sciatis autem certissime, ingentis beneficii loco habiturum me, quicquid contra dederitis: & effligito igitur ceras miniatulus vestras, ἀδελφῶν & obelos. Hic mirari subit, quid Magnum Erasmum dignum reddiderit miniatâ cerâ, qui in Ciceroniano suo Nosoponum ita faciat loquentem: Quæ sunt apud Ciceronem miniatâ virgulâ signo: quæ non sunt, ἀτῶ. Erat autem Nosoponus Ciceroni addictissimus, adeo ut nullum vocabulum probaret, nisi quod in Cicerone invenisset. Non igitur, quæ apud Ciceronem erant miniatâ virgulâ aut cærulâ signari

debebant, cum ille putaret ea non tantum bona esse, sed etiam sola. Quovis potius fausto & candido signo notari conveniebat. Et, si dicendum est, parum in isto libello decorum ab Erasmo servatur. Neque solum minime Ciceroniane loquitur, quem fingit Ciceronianum: (quod non spernendis rationibus excusat) sed nulla coactus necessitate in aliud dicendi genus, Poëticum sane, deflectit, nec raro ipsos Poëtas sibi assumit, tanquam in ipsis, non in Cicerone operam posuisset. Parum quoque hæc conveniunt, annos septem totos nihil attingere præter libros Ciceronianos, & de multis scriptoribus, qui etiam inter ea temporis prodierant, judicare quasi totos perlegisset. Nolim tamen hoc eo animo à me dictum quispiam existimet, tanquam Erasmo nostro quippiam detractum velim. Altioribus ejus fama nixa est radicibus quam ut hircem inutiis moveatur. Plurimum ei res literaria debet, quem multis exteris nos Batavi unum opponimus. Neminem illi proferunt, qui magis multa præstiterit vel majora. Hujus viri, cum ingenium & judicium non possumus, utinam saltem imitaremur diligentiam, cujus exempla in aliud tempus reponimus. Suis tamen nævis Erasmus non caruit. Neque mirum: cum nihil perfectum sit & ab omni parte beatum. Excidunt sæpe magnis viris quædam minus bona, dum gravioribus intenti non demittunt se ad minutias: quod & ipsi Ciceroni evenisse, hætenus qui negavit, vidi

vidi neminem. Quid autem de illo Erasmi libello, quem *Ciceronianum* inscripsit, omnino statuendum sit, aliorum esto iudicium. Illud constat J. C. Scaligerum duas adversus Erasmus orationes scripsisse, quarum in unâ *Ciceronianum* ex professo reprehendit. Sed quis nescit Scaligerum pœnituisse, quod adversus Erasmus scripserat? Hoc tum Josephus Filius, tum ipse his verbis ostendit:

*Tu ne etiam moreris ! ab, quid me linguis
Erasme,*

Ante meus quam sit conciliatus amor ?

*Tunc etiam? cui tam parvus fuit orbis ut alte
Expleres mentis fulmina torva tua.*

*Ergo fidereis postquam est subvecta quadrigis
Atque Dei lato lingua recepta sinu ;*

*Ille ego, qui insana ridebam vulnera mortis
Conditaque Aetnea tela trisulca manu,*

*Ad quodvis stupeo momentum, ac territus adsto:
Maxima cum videam numina posse mori.*

Josephus vero Scaliger in *Scaligerianis*, sic loquitur: *Mon Pere attaqua Erasme, en Soldat. Depuis apres avoir étudié, il vit, qu'Erasme estoit un grand Personnage. Peut estre Mon Pere n'avoit pas l'en, ou n'entendoit pas Erasme. Pater meus Miles adhuc in Erasmus scripsit. Postquam se studiis dedisset, facile vidit Erasmus esse maximum praeclarumque Virum. Forsitan Pater vel Erasmus non legerat, vel non intellexerat. Et paulo*

paulo post: *Erasmus mortuus est anno cIo Io xxxvi, quatuor annos ante me natum. C'estoit un grand homme. Magnus atque praeclarus erat Vir. Poenituit patrem adversus eum scripsisse. Il vist sa faute. Vidit ipse perperam abs se factum. Sed fuerat irritatus, cum vocaretur ab Erasmo miles, quasi per contemptum: ut amphiteatrum (intelligit pessimum Caroli Scribani Jesuitæ librum, cui titulus *Amphiteatrum honoris*, sub Clari Bonarscii nomine in vulgus emissum, de quo multa Baudius in Epistolis) vocat Dominum Pleßaum & Lanovium Milites per contemptum. Et iterum: Ille in dialogo Ciceroniano nugaciter Lapsus, cum tamen nihil fuerit Erasmo doctius. Quid praeclarius epistolis ejus & paraphrasi? Ne quis mihi hîc virio vertat quod longius ab incepto abierim, id sciat velim, me *Varia* scribere, in quibus frustra sunt, qui ordinem desiderant. Sed tamen redeamus in viam. Fuit minii, præterquam in iis quæ recensuimus, varius & multiplex usus. Cum Roma eò divitiarum nondum venisset, ut auro & argento templa splenderent, cumque simplicior esset Deorum cultus, tunc (ut Ovidius aut in *Fastis*)*

Juppiter exigua vix notus stabat in ade

Inque Jovis dextra fictile fulmen erat.

Is autem obtinebat mos, ut Jupiter fictilis minaretur. Patet hoc ex Varrone, qui apud *Plinium Lib. XXXV. cap. 12.* auctor est, *Turrianum à Fregellis accitum, cui locaret Tarquinius Pri-*

Priscus effigiem Jovis in Capitolio dedicandam. Fictilem cum fuisse, atque ideo miniari solitum.

Neque minus clara sunt quæ idem *Plinius* ex *Verrio* refert *Lib. XXXIII. cap. 7. Enumerat, inquit, auctores Verrius, quibus credere sit necesse, Jovis ipsius simulacri faciem diebus festis minio illini solitam, triumphantumque corpora: Sic Camillum triumphasse. Hac religione etiam nunc addi in unguenta cœna triumphalis, & a Censoribus imprimis Iovem miniandum locari. Cujus rei quidem causam miror: quanquam & hodie id expeti constat Æthiopum populis, totosque eo tingi proceres, huncque ibi Deorum simulacris honorem esse. Jupiter vero à Minio vocabatur Minianus, quod Cicero docet *Lib. IX. ad Famil. Epist. 16.* hisce verbis: *Quod si perseveras me ad Matris tuæ cœnam vocare, feram id quoque. Volo enim videre animum, qui mihi audeat ista, quæ scribis, apponere, aut etiam Polypum MINIANI IOVIS similem.* Non desunt tamen, qui loco *Miniani*, legunt *miniati*, quod profecto non minus arridet. Pana quoque Sylvarum Pastorumque Deum miniari consuevisse, *Virgilius* testis esse poterit, cujus *Ecl. X.* hæc verba legimus:*

*Pan Deus Arcadiæ venit, quem vidimus ipsi
Sanguineis ebuli baccis, minioque rubentem.*

De *Baccho* certò constat ex *Pausania* in *Achai-
cis*. Τὸ πρὸς Διόνυσον ἀγάλματι καὶ κινναβάρει ἐπιχρίσασθαι ὅτιν.
*Bacchi simulacrum cinnabari, (quæ ut ut à minio
diversa, promiscuè tamen à multis iisque autori-
bus*

bus probatis pro minio usurpatur,) *conspicuum est*. Libet his adjungere testimonium *Arnobii ex Lib. VI. adv. Gent.* qui Dei cujusdam, qui Leonis sub facie colebatur, sic meminit: *Inter Deos videmus vestros Leonis torvissimam faciem, mero oblitam minio, & nomine Frugiferi nuncupari.* Nec non *Plutarchi in Quæst. Rom. Quæst. 97.* ἡ δὲ γένεσις τῆ ἀγαλματὸς ἀναγκασία. τὰ δὲ γὰρ ἱερὰ τὸ μέλι πον, ὡς τὰ παλαιὰ τῶ ἀγαλματὶ ἔχει. *Simulacro autem nitorem addi necesse est: facile enim minium evanescit, quo antiquitus simulacra inducebant.* Sed quæ causa fuerit cur triumphantes minio tingèrentur, quæso, videamus.

Potuit hoc fieri ad Imitationem Jovis cujus multa insignia triumphantibus usurpata fuisse nemini ignotum esse potest. Atque hujus quidem sententiæ fuit. *Iustus Rycquius de Capit. Rom. Cap. XVIII.* à quo si me in hoc negotio adjutum negarem, injuriosus essem optimo & utilissimo scriptori. Magis tamen se mihi approbat *Nicolaus Perottus*, vir, ut ista ferebant tempora, doctissimus, cujus in Martialem commentaria, quæ *Cornu copia* vocantur, prætio non habentur suo. *Minio*, inquit, illini solebant triumphantium corpora. Sic enim fertur *Camillus triumphasse: ob eam (ut arbitror) rationem, ut Imperatores horribiliores viderentur, quemadmodum Cæsar Britannos scribit glasto se inficere, quo horridiores videantur in bello. Glastum herba est plantagini similis, quo Britannorum quoque conjuges*
nuntius-

nurusque, quibusdam sacris, toto corpore oblinuntur, nudaque incedunt, *Æthiopum colorem imitantes*. Quæ ultima verba desumpta sunt ex *Plinio Lib. XXII. cap. 1.* Cæsar autem locus, quem respicit, is occurrit *Lib. V. de Bell. Gall.* his verbis: *Omnes verò se Britanni glasto insciunt, quod caruleum efficit colorem: atque hoc horribiliore sunt in pugna adspectu, capilloque sunt promisso, & omni parte corporis rafa, præter caput & labrum superius.* Id etiam intendebant *Æthiopes*, qui (ut ait *Alexander ab Alexandro Genial. Dier. Lib. I. cap. 20.*) dimidiatum corpus minio, dimidiatum gypso solent illinire. *Herodotus* quoque *Lib. VIII.* auctor est *Phocenses* aliquando sexcentos viros eorumque arma gypso illinivisse. Illud vero, quod *Perottus* ait, *minium addi unguentis cœne triumphalis ad lavandas manus*, vereor ut recte dixerit: nam puto *Plinium* indicare minuta unguenta ipsis cibis addita fuisse. Bene enim *Mercurialis Var. Lect. Lib. II. cap. 19.* ex *Plinio*, *Plutarcho*, & *Athenæo* constare scribit, *Veteres* tam potibus, quam cibis unguenta admiscuisse. Ita quippe, ut musicis sonis cantibusque aures, spectaculis visum, eduliis palatum, & variis unguentorum atque florum odoribus nares in conviviis delectare studebant. Quem tamen usum, ut porro ait *H. Mercurialis*, non primis illis seculis, quando nondum increverat *luxus*, inventum credimus, sed multo post *Hippocratis* tempora; apud quem de unguentis variis sæpius

sæpius quidem mentio facta invenitur, at Medicinæ potius, quam ullius libidinis loco. Adhibebatur quoque minium in Epitaphiis ad characteres spectabiliores reddendos, quod liquidò constat ex *Plinio Lib. XXXIII. cap. 7. Minium in voluminibus quoque scriptura usurpatur, clarioresque literas vel in auro, vel in marmore, etiam in sepulcris facit.* Ita quippe hi tituli clariores fiebant, & tanto facilius à viatoribus legi poterant, uti rectè observat *Kirchmannus Lib. III. de Fun. Rom. cap. 19.* qui multa mutuavit ex *Kornmanni Libro de Miraculis Mortuorum.* Plura hisce possem attexere, nisi jam prolixior fuisset in hoc capite. Desinamus itaque, ubi pauca addiderimus de Caniculariis. Encausto Imperatorio, quod & purpuramentum dici potest, de quo jam sumus loquuti, ei encausto conservando destinatum fuit vasculum, quod à forma caniculi *Caniculus* vocabatur, quales atramentariorum formas & hodie nonnullis in usu esse solent. Huic *caniculo* aliquis præficiebatur, qui *Canicularius*, Præpositus *Caniculi*, aut à *Caniculo* dicebatur? *Anastasius Bibliothecarius ad VIII. Syn. Act. 10.* *Præpositus Caniculi est, inquit, qui curam & custodiam gerit Caniculi, id est, atramentarii ex quo Imperator Phœniceas literas scribit in chartis.* Præficiebantur *Caniculo* primarii à Secretis, ut *Alemannus* testantur, quorum magna dignitas & autoritas fuit, utpote quæ solis tantum Imperatoris sanguine propinquis concederetur. Neque
solum

solum Canicularius purpuramentum Imperatori ministrabat; sed si quid præter nomen subscribendum erat, id manu sua exarabat. Cujus rei exemplum habemus in Christophoro Basilii Imperatoris à Caniculo *in fine Syn. VIII.* Id alias plerumque à Quæstore Palatii vel Magistro scriniorum fieri consuevisse notat *Doct. Gutherius de Offic. Dom. Aug. Lib. I. cap. 35*, quem nullam Canicularii mentionem fecisse valde profecto miror; cum cæteras plerasque functiones pertractari accuratissime.

C A P. V.

Sex loca ex Herodiano enumerata quibus meminit de prælatione Ignis. Ille mos à Persis ortus. Sol idem qui Jupiter. Dii mares simul & fœminæ. Sol post Domitiani tempora præ cæteris Diis à Romanis cultus. Consecratio. Ab illa originem ducit canonizatio. Ex autoritate Senatus Romani Dii vel colebantur vel rejiciebantur. Gentilium in Diis colendis superstitio. Persius illustratus.

RESTE quidem *Paulus Colomesius in KHM. Litera. C. 8.* qui utinam tandem absolvat quæ in præfatione *Gallie Orientalis* promisit, re-
C pre-

prehendit Balzadium, illum politissimum Gallia scriptorem, qui in quadam ad Capellanum Epistola hæc verba usurpaverit: *Le feu, qu'on portoit devant les Empereurs Romains pour marque de Souveraineté, ne se trouve qu'en deux lieux dans l'Histoire de Herodian. Ignis, qui in signum Imperii Romanis Imperatoribus præferebatur, non nisi bis mentio fit, idque in Herodiani Historia.* Ipse tamen reprehensione non caret, quod quinque tantum loca proferat, cum sex proferre debuisset: nisi quod errorem minuunt hæc verba: *De hac ignis prælatione quinque minimùm locis Herodianum agere comperimus.* Non gravabor in rudiorum gratiam sex illa loca describere, & ideo quidem libentius, quia hujus consuetudinis nemo inter veteres meminit, præter Herodianum.

Lib. I. c. 8. hæc verba occurrunt: Οὐδὲν ἥτιον μὲν τοῖς ἑὸ Κόμμοδου ἐρούλατῃ τοῖς πρὸς τῇ ἀδελφῇ, καὶ γὰρ ἐπὶ τοῦ βασιλείᾳ θρόνῳ καθίστο ἐν τοῖς θεάτροις, ἢ τὸ αὐτὸ θεωροῦν ἐμπλεῖν αὐτῆς.

Nihilò tamen secius pristinum sorori honorem Commodus reliquit usurpandum. nam & cellâ imperatoriâ sessitare in theatro, & ignem de more præferri patiebatur. Eodem libro cap. 16. dicitur de Marcia Commodi concubina, cui plurimum deferebat, sic ut eam uxoris loco haberet, ὅτι πάντα αὐτῇ ὑπεῖχεν, ὅσα σέας, πλὴν τοῦ πυρὸς, omnes ei honores velut Augusta, delatos fuisse, præter Ignem. *Lib. II. cap. 3.* de Pertinace sic legimus, ὅτι ἐκ εἰας τοῦ αὐτοῦ θεωροῦν ἐμπλεῖν, ἔτι πᾶσι τοῖς βασιλικαῖς συμβόλαις ἐπὶ τῇ ἀρχῇ, πρὶν ἢ μεταίτι τῷ γυνάμει τὸ σκυλλῆ-

loquatur de lampadibus , quæ inter signa & statuas ponebantur : vel de simulacris , quæ manibus lampadas gestabant , de quibus *Lucret. Lib. II.*

*Si non aurea sunt juvenum simulacra per ades
Lampadas igniferas manibus retinentia dextris ;
Lumina nocturnis epulis ut suppeditentur.*

Quamquam , ut verum fatear , non omnino à me stant duo summi Viri , qui in Antoninum scripserunt *Mericus Casaubonus & Thomas Gatakerus*. Hærent ipsi , quid statuant incerti. Quod hic quidem expressim profitetur : ille vero aliud in notis Anglicis , aliud in Latinis sentit. Sed mihi non facile quis persuaserit Herodianum totiens Ignem inusitato loquendi modo fuisse dicturum , si lampadem significare voluisset. Quid vero isti consuetudini originem dederit , non ita facile est indicare. Quæ *C. L. Bæclerus* ad primum illum , quem ex Herodiano citavimus , locum notat , ratione non carent , ac proinde inspicienda sunt. Minus tamen (quod cum bona venia Viri doctissimi dictum velim) arrident , quibus notam claudit : *De cætero , non absurde cogitarent , qui crediderit , Romanos de occulto præcipuoque Imperii pignore , id est , Vesta cogitasse , cum Ignem Imperatoribus suis auspicii singularis & fatalis ergo , ut opinabantur de Vestali Igne , præferrent.* Melius , meo judicio , *C. L. Lipsius* , qui opinetur Romam tractum morem è
Per-

Persis: illorum enim Regi Ignis præferri solebat. Huc facere videtur *Curtius Lib. III. cap. 3.* qui motionem Castrorum Darii sic describit:

Die jam illustri signum è tabernaculo Regis bucina dabatur. Super tabernaculum, unde ab omnibus conspici posset, imago Solis crystallo inclusa fulgebat. Ordo autem agminis talis erat. Ignis, quem ipsi sacrum & aeternum vocabant, argenteis altaribus præferebatur, Magi proximi, &c. Clarissimum vero est Xenophontis Παιδ., Lib. VIII. testimonium, quod non pigebit integrum describere.

Επει δ' ἀνιπτάινοντο αὖ τῷ Βασιλεὺς πύλας, ὡρῶντες μὲν ἦγοντο τοῖς Διὶ ταῦροι πάγκαλοι· εἰς τίσσας, καὶ εἰς τὸ ἄλλαν θιῶν οἱ μᾶζοι ἐξήγαντο. πολλοὶ (αἱ. πολλὰ vel πολλοὶ) γὰρ ὄλοντο Πέρσας χεῖνας τοῖς ἐπὶ τὰς θύας τεχνίταις χεῖναι, ἢ περὶ τ' ἄλλα. Μὲν δ' ἔτι τὰς βύς ἔπποι ἦγοντο, ὄμας τῶν ἡλίων. Μὲν δ' ἔτι τὴν ἐξήγατο ἄρμα λευκὸν χρυσοῦρον, ἱερωμένον, Διὶς ἱερὸν. μὲν δ' ἔτι τὴν ἡλίου ἄρμα λευκὸν, ἔτι τὸ ἱερωμένον, ἄσπερ τὸ πρόδιον. μετὰ δ' ἔτι τὸ ἄλλο τρίτον ἄρμα ἐξήγατο, φοινικίσι καταπιπλωμένον οἱ ἔπποι, ἔτι πῦρ ὅππῃ αὐτῷ ἐπ' ἰχάρας μεγάλης ἀδίδας εἶποντο φέροντες.

Patefactis autem Regia portis, primum agebantur tauri quaterni, perpulcri sane & Jovi caterisque Diis, quibus Magi censuerint, victima futuri: sic nempe Persæ statuerunt, erga Deos magis, quam aliis in rebus hominibus peritiis utendum esse. Post boves agebantur equi, sacrificium Soli. Hos sequebatur currus albus jugo aureo & coronis ornatus, qui Iovi sacer erat. Tum solis currus veniebat, & ipse albus, ac coronis, ut prior, ornatus. Denique tertius currus agebatur cujus equi strati erant puniceis amictibus, & quem se-

quebantur, qui ignem ferebant in magno foco. Post hos omnes ipse Cyrus prodibat in conspectum. Anne autem hic ignis carmine sacerdotum incenderetur, & vocum quarundam murmuratione (unde *cantatus ignis*, de quo vide Doct. *Heinsium in Primum Lib. Sil. Italici P. 334.*) hætenus mihi liquido constare non potuit. Si quis autem modum præferendi Regibus ignem apud Persas usitatum aliquanto plenius descriptum videre cupiat, is adeat *Calium Rhodiginum Lect. Antiq. Lib. VIII. cap. 2.* Scribit *Leunclavius Hist. Turcica Lib. I.* hunc sacrum ignem, quem *Ori-masda* appellant, & antiquissimo cultu Solis loco venerabantur, extinctum fuisse circa tempus nati-vitatis Muhammedis. Hoc in ejus gloriam Mu-hammedani trahunt. Neque apud Persas tantum; sed etiam apud Asiaticos ille mos obtinuit. Te-stem hæc habeo optimæ frugis scriptorem *Am-mianum Marcellinum*, ex cujus *Lib. XXIII. Edit. Lindenbrogiana P. 272.* hæc verba pono: *Feruntque Mægi, si justum est credi, etiam ignem calitus lapsum apud se sempiternis focis cu-stodiri, cujus portionem exiguam, ut faustam, præisse quondam Asiaticis Regibus.* Atque hæc quidem ex Lipsii sententia scribo, cum mihi multo sit verisimilius *Marcellinum* per Asiaticos Reges non alios indiguisse à Persarum Regibus. Nam Persidem in Asia sitam, & inter Asiaticas Regiones maxime celebrem fuisse nemo in Geo-graphia tam rudis est, qui ignoret. Spartanos quo-

quoque hoc moris habuisse bene ex Xenophonte docet Cl. *Freinshemius Comment: in Curtium Lib. IV. C. 14. §. 24.* Unde vero is mos apud Romanos, & quando invaluerit, quam potis est compendiose declarare instituiamus, ita tamen ut prius veniam petamus, si forsitan nos labi contigerit, in re necdum satis in apurum, quod quidem scimus, producta. Atque illud quidem opinor, mihi nemo negabit ignem esse Solis symbolum, neque aliud Persas in Igne coluisse quam Solem, quem illi Patrio sermone Mitsram vocabant. Hoc etiam constat, primos quos homines pro Diis venerati sunt, fuisse Ignem cœlestes, & maxime quidem Solem. Digna sunt lectu, quæ hac de re occurrunt apud *Doct. Seldenum de Dis Syris in Prolegomenis C. 3. & Beyerum in Additamentis.* Neque hoc in dubium vocari potest Soli ea à plerisque tribui, quæ aliàs Jovi adscribi solent: unde recte statuerimus Solem sub multis olim nominibus plerumque solum cultum fuisse. Solem autem eundem cum Jove esse *Plutarchus* aperte docet in *Quæst. Rom.* Δεῖ ὅ μιν νομίζειν ἀπλῶς εἰκόνας ἐκείνων τῶν θεῶν, ἀλλ' αὐτὸν εἶναι ὡς ἡλίου, τὸν ἡλίον, & αὐτῷ τῷ Ἡέρι εἶναι ὡς σελήνῳ. Neque ita simpliciter censendum est hos istorum esse Imagines, sed ipsum in materia Jovem esse Solem ipsamque in Materia Junonem esse Lunam. Multæ sunt præterea inscriptiones, quæ hoc ipsum testantur, inter quas non infimo loco hæc ponenda est, quæ legitur Dentini, & à *Buxhornio* describitur:

IOVI. SOLI.
INVICTO. SERAPIDI.
T. ÆLIVS. ANTIPATER.
PROC. AVGG. CVM. VMBRICIA
BASSA. COVIVGE. GRATIAS.
AGENTES. POSVERVNT.

Cum autem in eo Jovis principatum constituerent, quod omnium autor esset, omnia que in se complecteretur, ut videre est apud *Aratum initio* *παντα πύσкульς versiculis*, unde ipse Apostolus Paulus hemistichium desumpsit: id quoque Soli adscripserunt. Hic non minus, quam Jupiter, Omnipotens audit & *παντα ἰσχυει & παντα ἰστανται*, *Omnia videns & omnia audiens*. Per Jovem jurabant, & ad illum omnia juramenta referebant, etiamsi Jovis nomen in Jure-jurando non exprimebatur, uti recte *Heinsius* observat *ad Silium Italicum ipso Notarum initio*. Neque minus tamen per Solem cujus exempla cum plurima possemus, duo tantum notabimus. Prius sumptum est ex *Ovidio Metam. Lib. III. vs. 658. &c.*

*Per tibi hunc ipsum (neque enim presentior illo
Est Deus) adjuro, tam me tibi vera referre,
Quam veri majora fide.*

Verum quidem est, ibi de Baccho sermonem esse: sed Bacchum eundem plane cum Sole veteres statuisse, ei ignotum esse non potest, qui vel à limine hunc Deum salutaverit. Adi *Macrobius*
Lib.

Lib. I. Saturn. cap. 18. & Laurentium Pignorium
tractatu, cui titulus *MAGNÆ DEVM
MATRIS IDÆÆ ET ATTIDIS
INITIA.*

Posterius ex *Juliano in Misopog.* καὶ τίτε μάρτυ-
ρα καλῶ πῖν μίγασι ἥλιον ποιεῖ τὰς ἀπὸ τῶντα. *Et hoc quidem
verum esse, si quis dubitat, testor Magnum Solem.*
Vide *Beyerum ad Seldenum de DIs Syris* P. 77.
&, a quo Beyerus sumpsisse videtur, *Joan. Pri-
caum ad Apuleji Metamorph. P. 11.* Huc refer-
ri potest, quod *Pseudo-Clemens* dicit in *Consti-
tutionibus Apostolicis Lib. II. cap. 52. vel, ut
alii, 46.* Apud Gentiles, qui suffragium de Ca-
pite contra aliquem loquutus est, sublatis mani-
bus Solem testari, innocentem se esse ac mundum
à sanguine hominis illius. Id etiam veterum su-
perstitio de Jove statuit, Marem eum esse ac fœ-
minam, quo nihil aliud velle videtur, quam
Deum sexu non distingui, omnia ipsum esse, & in
ipso omnia. Juvat hic describere quæ ex *Orpheo*
citatur *Apuleius de Mundo prope finem*, ne quod
non sunt notissima; sed quod mihi admodum ad
rem nostram facere videantur.

Ζῶς ποτὶ Ζῶς, Ζῶς ὕστατος, ἀρχιάρχων.

Ζῶς κεφαλὴ. Ζῶς μίαρα, διδὲ δ' ἐν πάντα τίτνκται.

Ζῶς πυθμῶ γαῖῃσι ἐ ἔχει ἀστέρων.

Ζῶς ἀρσενὸν Ζῶς, Ζῶς ἀμείροτος ἔπλε τὸ θυμὸν.

Ζῶς ποτὶ πάντων. Ζῶς ἀκαμάτω πνεύς ὀρμῇ.

Ζῶς πόντος ῥίζα. Ζῶς ἥλιος, ἥδη σελήνη.

Ζῶς βασιλεὺς. Ζῶς ἀρχὸς ἀπάντων ἀρχιγῆινος.

Πάντα γὰρ κρύφας αὐτὸς φάτος ἐς πολυχύθους.

Ἐξ ἱερῆς κεφαλῆς ἀνιόντα μέρμερα ῥίζαν.

*Primus cunctorum est, & Jupiter ultimus idem.
Jupiter & caput & medium est: sunt ex Iove
cuncta.*

Jupiter est terra basis & stellantis Olympi.

*Jupiter & mas est, estque idem nympa pe-
rennis.*

Spiritus est. cunctis validusque est Jupiter ignis.

Jupiter est Pelagi radix. Est Lunaque Solque.

*Cunctorum Rex est. Princepsque & originis
autor:*

Namque sinu occultans, dulces in luminis oras.

Cuncta tulit sacro versans sub pectore curas.

Neque minus Sol & Vir & Foemina est. in quam
rem *Catulliana* hæc verba cito, quibus Attis de se
loquitur *Epig. 64.*

*Quod enim genus figura est, quod ego non ha-
buerim?*

*Ego Mulier, ego Adolescens, ego Ephebus,
ego Puer,*

Ego gymnasii fui flos, ego eram decus olei.

Hunc autem Attidem eundem esse cum Sole tum
ex *Arnobio* discimus, tum potissimum ex *Ma-
crobio Lib. I. Saturnal. cap. 21.* Ne vero plura
coacervemus, quibus Solem omnia cum Jove
communia habuisse constat; id solum dicimus,
ut quidam omnes Gentilium Deos ad Jovem re-
tulerunt, ita ad Solem itidem omnes referri posse.
Vide Macrobius Lib. I. Satur. cap. 17. &
sex

sex seqq. nec non, quæ haud ita pridem scripsit *Alexander Rossæus libro cui titulum fecit, De Mundi Religionibus.* Hinc est, quod Sol non raro *ὁ θεὸς* sive Deus καὶ ἱεὺς vocatur, ut recte observat *Heraldus ad Arnobium P. 31.* Hic addere libet illud quod statim de Jove sive Sole dicebamus, Marem eum esse & scæminam, de cæteris quoque Diis apud Gentiles dictum reperiri. Postquam enim πολυθεΐα invalescere cœpit, omnia ea, quæ Deo primo tributa erant, & cæteris tribuerunt. Sic Lunæ & Luni sæpius antiqui meminerunt. Venus quoque mascula & barbata colebatur. Minerva ἀρρητὸς dicebatur, id est, utroque sexu prædita. Quod in Baccho quoque & Vulcano locum habuit. Facile esset hæc variis multisque ex autoribus probare, sed actum agere, quod ajunt, non volumus. Consule *Clar. Vossium in diffusa eruditionis Thesauro de Idololatria Gentili Lib. VII. nec non. Elegantissimum Cuperum Observat. Lib. II. cap. 1. & Buxhornium in Questionibus Romanis cap. 13.* Bardefanes ille, qui de Brachmanibus & Samanæis Indorum Philosophis conscripsit, cujusdam Indorum idoli meminit, cujus τὸ μὲν δεξιὸν αὐτοῦ ὡς ἀνδρὸς ἐστὶν ἀνδρῶν, τὸ δὲ ἀριστερὸν θηλυκόν; pars dextra faciei virilis, sinistra muliebris est. *Manethon Aegyptius Apotelesmaticῶν libris*, qui nusquam alibi quam in Bibliotheca Medicea reperiuntur, astra non filios, ut fit a plerisque, sed filias Jovis facit:

Ἀντὶς ἰσὺ Μύση & αἰθερίοισιν ἀμ' ἀστροῖς
 Εὐξείνου, λεγὺν ὕμνον ἱμελὲς κατὰ πᾶσι τοῖσι δῖοις.
 Ἀστὲρ δὲ πρὸς τοῖς, Διὸς αἰγυγίοιο θύγατρες, &c.

*Caterum ego, postquam Musam & aetherea astra
 precatus fuero, carmen meum, stridulum hymnum,
 finiam. Astra splendentia, quae filia estis Iovis à
 capra enutriti, &c. Vide unde hoc sumpsi,
 Alexandrum Morum, quem ut ut ejus vita fue-
 rit, certe doctissimum fuisse constat, Notis ad
 N. Test. P. 123. Sed ne in latissimo hoc campo
 exspatiemur longius, quam nostri fert instituti
 ratio, addemus tantum Vossii verba, desumpta ex
 eo, quem nominabam modo, thesauro Lib. VII.
 cap. 6. Veteres quidam Philosophi (Stoici praeter
 ceteris & Platonici) in naturâ attenderunt vim
 activam & passivam, & proinde eam tum ma-
 rem, tum foeminam dixere. Marem secundum
 illud, quod vim in alia exserit: foeminam, quae
 vim alienam recipit, & quasi facundatur. Quia
 vero hoc universae convenit natura, & singulis
 ejus partibus, sive Diis eas partes denotantibus
 tributum a Theologis fuit. Jam itaque pergamus.
 Post Domitiani tempora tanto in praetio apud
 Romanos Sol esse coepit, ut fere alii Dii praeter hu-
 jus cultu sordescerent. Non minus Romae, quam
 olim apud Persas Mithra colebatur, cujus quidem
 sacra etiam sub Christianis Imperatoribus ali-
 quam diu durarunt. Hujus rei, dum cogito, duas
 potissimum causas invenio, quarum unam ad ho-
 mines refero, alteram ad diabolum. Cum ea quae
 de*

de Diis cæteris narrarentur absurda esse homines viderent, eo rursus prolapsi sunt, ut Solem potissimum, à quo in mortales maxima commoda derivantur, Deum & præ cæteris colendum esse judicarent. Et, si verum fateri volumus, minus crasse errarunt illi, qui Solem, quam qui homines, consecratos licet, & inter Deos relatos, qui animalia, qui terræ fructus & his aliquando pejora, divinis prosequerentur honoribus. Accessit Diaboli dolus, qui Deo, quæ potest obnitens, in ludibrium Religionis Christianæ Mithræ sacra promovit, quæ Christianis admodum similia cum essent, inagnum inde commodum speravit. Itaque quippe Dei Simia solet, & veritate ad mendacium abutitur. Si quid à Deo recte atque ordine factum est, ut sunt omnia, id corrumpit mala æmulatione, & medicinam vertit in venenum. Quod igitur ex divino instituto apud Christianos obtinebat id quoque, curante Diabolo, apud Mithræ cultores obtinuit. Lavacro enim tingebant, & signabant in fronte suos, & speciem Eucharistiæ habebant, martirii etiam initiationem, & resurrectionis opinionem. Audiamus

Iustinum Martyrem in Apol. II. pro Christ: non longe a fine. Οἱ γὰρ Ἀπόστολοι ἐν τοῖς Χριστιανοῖς ὡς αὐτοὶ Ἀπο-

μνημεύουσιν, αὐτὸ καλεῖται ἐναργέστερα ὅτι παρὶς ἀκαίῃς ἐν τῇ ἰουδαίᾳ, λαβόντες ἄρτον, ἐν χειρὶ σπένοντες εἰς τὸν οὐρανόν, τοῦτο ποιεῖτε, εἰς τὴν ἁναμνήσιν μου. τοῦτο ἐστὶ τὸ σῶμα μου. καὶ τὸ ποτίζειν ὁμοίως λαβόντες καὶ ἐν χειρὶ σπένοντες εἰς τὸν οὐρανόν. τοῦτο ἐστὶ τὸ αἷμα μου, καὶ μίνετε αὐτοῖς μιταδύμενοι, ὅπως καὶ ἐν τοῖς αὐτοῖς Μίθρα μυστηρίοις παρὰ δα-

καὶ ἡνικα μνηστῆρες οἱ ἄσπετοι δαίμονες. ὅτι γὰρ αὐτὸς
καὶ ἀσπύριον ὕδατος πίβει, ἐν ταῖς αὖ μακρὰς τιλατῆς μετ'
ἐπιλόγει Λιῶν, ἢ ὀπίσσω, ἢ μακρὴν δυνάμει. *Aposto-*

*li enim in Commentariis à se conscriptis, quæ
Euangelia vocantur, ita tradiderunt præcepisse
Iesum, & dixisse cum sumpto pane gratias egis-
set: HOC FACITE IN MEI ME-
MORIAM: HOC EST CORPUS
MEUM. Et similiter cum sumpto poculo iti-
dem gratias egisset hac verba protulisse: HIC
EST SANGUIS MEUS, & ipsis solis
tradidisse. Quod quidem pravi demones imitati
etiam fieri præceperunt in Mithræ sacris. Scitis
enim, vel scire potestis morem esse in initiationibus,
ut panis ponatur cum poculo aquæ, & certa verba
addantur. Neque minus clara sunt Tertulliani
verba Lib. de præscript. Hæret. Sed quaeritur,
inquit, a quo intellectus interpretum eorum, quæ
ad hæreses faciant? à Diabolo scilicet, cujus sunt
partes intervertendi veritatem, qui ipsas quoque
res Sacramentorum divinorum, in Idolorum my-
steriis amulatur. Tingt & ipse quosdam, utique
credentes & fideles suos; expiationes delictorum
de lavacro repromittit, & sic initiat Mithræ;
signat illic in frontibus milites suos, celebrat &
panis oblationem, & imaginem resurrectionis in-
ducit, & sub gladio redimit coronam. Quid sit
autem gladio redimere coronam, ex ipso Tertul-
liano docemur Lib. de Cor: Milit: Erubescite
Romani commilitones, jam non ab ipso [Christo]
judi-*

judicandi, sed ab aliquo Mithra milite, qui cum initiaretur in spelao, in castris nempe tenebrarum, coronam interposito gladio sibi oblatam quasi minimum martyrii, dehinc capiti suo accommodatam, monetur obvia manu capite depellere, & in humerum, si forte, transferre, dicens: *Mithram esse coronam suam. Atque exinde numquam coronatur; id quod in signum habet ad probationem sui, si ubi tentatus fuerit de Sacramento: statimque creditur Mithra miles, si dejecerit coronam, si eam in Deo suo esse dixerit. Agnoscamus ingenia Diaboli, idcirco quaedam de divinis affectantis, ut vos de suorum fide confundat, & judicet. De reliquis autem initiationis ritibus, & nominibus eorum, qui Mithræ operabantur, vide Thomam Reinesium, criticum summum, Epistolis ad Hofmannum & Rupertum P. 644. Atque ex hoc Mithra sive Sole Basilidiani finxerunt suum Abraxam, uti recte solideque probat Joannes Macarius in Abraxa Apistopisto, cui subjunctus est egregius Joannis Chistatii commentarius de Abraxa Proteo, lectu profecto dignissimus. Quin & Julianus ille Apostata, quem existimo non doctissimum modo, sed & optimum Principem fuisse, si maluisset.*

— *Laudare Deum, cui sordida monstra*

Pratulit & liquidam temeravit crimine vocem,

Ut olim de Symmacho canebat Prudentius: Is, inquam, *Julianus*, cum a vero Deo defecisset,

non

non ad alium conversus fuit, quam ad Mithram suum, id est, Solem. Id patet tum ex hymno, quem in Solem scripsit, tum ex his verbis, quibus Satyram claudit, quâ Imperatores, qui sibi præcesserant, acriter quidem, at eleganter pupugerat, quam Satyram ante aliquot annos nondum ex ephebis egressi ex Græco in Belgicum transtulimus sermonem, & aliquando correctam revisamque dabimus in lucem: Σολ δὲ, σπρίς ἰμε λήγων ὁ Ἑρμῆς, δίδωκε τὴν πατέρα Μίθραν ἰπὶ γυνῶναι. σὺ δ' αὐτῷ, πρὸς αὐτὸν ἔχε, σπρίσμα δ' ὅμιον ἀσφαλῆ ζῆντι τι σιαντὶ σπρεσκιδάζον, εἰ νείκεα αὖ ἐπιδύθην ἀπίναι δέη, μετὰ τῆς ἀγαθῆς ἐλπίδος, ἡγεμόνα θιόν ἐν μὲν καθίσα σιαντὶ. *Postremo ad me conversus Mercurius, Tibi vero, inquit, hoc dedi, uti Solem agnosceres Patrem, cujus tu præcepta sequere, atque ita te para uti is perfugium tibi tutusque portus in omni vita sit: post vero, ubi emigrandum illinc erit, plenus bonæ spei, hunc tibi Deum fac propitium viæ ducem.* Cum igitur Romani Solem præ cæteris Diis Persas imitati colere cæpissent, Ignem quoque, quod olim Persarum fiebat Regibus, Imperatoribus in Imperii signum prætulere: adeo ut cum Solis illo cultu hic mos simul invaluerit. Quem quidem Principibus tanto gratiorem fuisse existimo, quanto magis augebat divinitatis opinionem, quam illi sibi arrogare non erubescebant. Idem enim & Symbolum Dei & Imperii esse signum ostendebat eandem fere Imperantibus cum Deo sortem esse. Quam vero Romani Cæsares cupidissimi essent haberi

pro Diis, Soli lucem fœnerari merito censerer, si ostenderem. Notum est ex *Suetonio* de Domitiano, qui formalem epistolam cum dictaret procuratorum suorum nomine, sic cœpit: *Dominus & Deus noster sic fieri jubet*. Idem quoque affirmat *Aurelius Victor* cujus verba, quia notatu digna sunt, subjungam: *Major libidinum flagitio, ac plus quam superbe utens patribus: quippe qui se Dominum Deumque dici coegerit: quod confestim ab insequentibus remotum, validius multo posthac deinceps retulere*. Non ipse quoque Augustus, cætera egregius Princeps, hoc vitio caruit. Nec tantum oculis suis quiddam divini vigoris inesse putabat, gaudebatque si sibi quis acrius contuenti, quasi ad fulgorem Solis, vultum submitteret; sed inter convivas ipse, pro Apolline ornatus, confidebat. Unde postridie acclamatum est, *Fru mentum omne Deos comedis se, & Casarem esse plane Apollinem; sed Tortorem*. Et profecto non adeo mirandum est Cæsares, dum viverent, divinos affectasse honores, cum scirent priores Principes inter Deos relatós, & idem se post mortem consequuturos sperarent. Cur enim ipsi Dei non essent, qui alios fecissent Deos? Sic nempe *Manilius* sequitur de Augusto, qui primum post Romulum J. Cæsarem consecravit:

*Jam facit ipse Deos, mittitque ad sidera numen;
Majus & Augusto crescit sub Principe cælum.*

Huc facit etiam *Juliani* jocus in Augustum, qui est in elegantissima illa, cujus jam memini Satyra:

Πολλὰ εἶπεν ὁ Σειληνός, καὶ θεῶν ὄντως σωτήρων ἔργα δίδοντα συνεφόρουν ἔτι ὁ κοροπλάστης. εἶτα ἔφη διὰ τι αὐτο τὸ ὄνομά μοι γελοῖον ἔστω ἔθες; Ἡ γὰρ ἐκ ἡπλαγῆς ἡμῶν, εἶπεν, ὡς περικείμενοι ταῖς νύμφαις, αἱ σιβασεῖ, θεές, αἱ ἵνα καὶ παῖτον ταυτοὶ Καίσαρες.

*Inter hæc Silenus, iste vero, inquit, pupparum effictor multa nobis Deorum tutelarium simulacra congeffit. Unde tu, ait Augustus, istud jocosum nomen mihi das? Quid vero, inquit Silenus, annon sicuti illi Nymphas, ita tu nobis, Auguste, effinxisti Deos, quorum unus & primus, ecce, hic Cæsar est. Facile hic nobis esset multa addere de Imperatorum consecratione, quam Græci ὑποθέουσι, vocant, cujus ritum egregie inter Veteres Herodianus describit Lib. IV. cap. 2. sed si quid in hac materia post Onuphrium Panvini-um, Dempsterum, Kirchmannum, Guthe-rium aliosque viros præclarissimos conarer, merito in me conveniret illud adagium: Post Homerum Iliada. Buxhornii tantum verba, quibus utitur in quadam de Theologia Paganorum oratione, faciam mea: Principibus, inquit, terrarum jam fato functis factus est in cælum aditus, & adscriptum nomen divinitatis. Sic adulationi patuit latissimus campus, in quo posset grassari. Dii facti, qui Deorum in terris expresse-
rant imaginem. Dii facti, qui quamquam libenter voluissent, non poterant tamen diutius inter homines extare. Sic ut initium divinitatis esset vita
finis,*

finis , & maluissent Principes diutius interesse mortalium cœtibus , quam vixisse & sic inter Deos collocari. Vide , si vacat , quæ in hanc rem scripsit *Laëtan. Lib. I. de Fals. Rel. cap. 8. & 15. nec non Commentatores ad Laëtantium. Etiam Plinium Hist. Naturalis Lib. II. cap. 7.* ubi inter alia sic loquitur ; *Hic est vetustissimus referendi benemerentibus gratiam mos , ut tales numinibus adscribantur. Quippe & omnium aliorum nomina Deorum , & quæ , supra retuli siderum , ex hominum nata sunt meritis.* Græcos enim , Romanos . aliasque nationes in Deorum numerum referre consuevisse , à quibus insignia beneficia acceperant , præter alios docuit *Augustinus* , quem adi *de Civit. Dei Lib. II. cap. 5. & ibi Coqueum.* Atque hunc quidem ritum in Christianismum inductum esse jure quis miretur. Quod tamen nemo inficias iverit ; qui illam , quam barbare vocant canonizationem recte perpenderit. Per hanc enim Sancti inter Divos , ut olim Imperatores , referuntur. Quam quidem relationem *Liber ceremoniarum Ecclesiæ Romanæ Divorum nostrorum Apotheoses vocat.* Quando autem hæc Canonizatio inceperit litigant & adhuc sub judice lis est. Quo vero pacto fiat , id certo constat ex *Cerimonial. Rom. Lib. I. Sect. 6. Fol. 64. Edit. Col. 1558.* Non pigebit pluscula illinc describere , quia plurimos esse credo , qui ignorent. Postquam , ipsissima verba pono , increbescente fama de excellentia vite , opinione sanctitatis & miraculo-

culorum corrufcatione , summus Pontifex fape fuerit per Reges , Principes feu populos certior factus , rogatusque ut aliquem vitâ jam functum adfcribendum Sanctorum catalogo , & venerandum ut sanctum decernat , committuntur aliqui Prelati in partes illas , ubi Sanctus ille vixit & mortuus jacet. Horum est solerter de famâ , opinione & devotione populorum circa sanctum illum inquirere : quam inquisitionem in genere & sine testium juridica examinatione facere debent , & quæ invenerunt , fuis literis ad summum Pontificem fideliter referre. Pontifex interea Commiffariorum relationem proponit fagro collegio. Poftea his aut aliis Prelatis committitur in provincia teftes examinandi de Sanctimoniam vitæ , fide & miraculis illius sancti : quæ testimonia deinde Auditoribus S. Palatii examinanda traduntur , ut videant , an inquisitio & probatio fit legitima & fufficienter facta. Poft multas deinde ceremonias , inquisitiones ultiores , testium examina , quæ hic referre longum , Papa ftatuta die canonizationis cum Cardinalibus , Prelatis & Officialibus descendit ad Ecclesiam : ad porticum Sancti Petri excipitur à Clero urbis ad modum supplicantium parato : intrat ecclesiam & ascendit suggestum cum Prelatis & aliis Officialibus , referens summarie vitam & miracula canonizandi &c. Tunc Procurator causa instanter petit à Pontifice nomine procuratorio & nomine Principum &c. pronuciari & declarari beatum N. in sanctorum catalogo.

logum adscribendum, & sanctum venerandum à Christi fidelibus. Pontifex antequam pronuntiet, solet protestari hanc in formam: Protestamur publice apud vos presentes, quod per hunc actum canonizationis non intendimus aliquid facere, quod sit contra fidem aut ecclesiam catholicam sive honorem Dei. Sunt aliqui clarissimi Viri, qui dicunt hoc introductum ex quadam causa, qua nunc cessat, quia Papa tunc quodammodo cogeatur ad canonizandum quendam contra suam opinionem, & propterea protestabatur. Dein alta voce, sedens tamen cum mitra, pronuntiat hunc in modum: Ad honorem sanctæ & individue Trinitatis, & exaltationem fidei catholicæ ac Christianæ religionis augmentum, autoritate ejusdem Dei Omnipotentis, Patris, & Filii, & Spiritus Sancti, & beatorum Apostolorum Petri & Pauli & nostra, de Fratrum nostrorum consilio decernimus, definimus, bonæ memoriæ N. Sanctum esse & Sanctorum catalogo adscribendum, ipsumque catalogo hujusmodi adscribimus, statuantes ut ab universali Ecclesia anno quolibet in die tali. festum ipsius & officium ejus devote & solemniter celebretur. Hæc eadem citat ille, qui notas scripsit ad *Taxas Cancellariæ & Penitentiariæ Apostolicæ*, librum, qui habeatur, multis de causis dignissimum, pag. 167. Multa mihi se hinc offerunt, quæ dicerem in hanc canonizationem, nisi Theologum non agere decrevissem. Istud meritò mirari subit eò impietatis homines, eosque Christianos,

nōs , prolabi , ut ipsi , pulvis & umbra cum sint, mortuos quosdam divino cultu prosequendos esse, decernere non erubescant ? Quam ignari videntur illius præcepti, quod jubet ne alii divinum honorem tribuamus præter Deum , unicum illum ac verum , *« & ipse i Quæ , genus à quo ducimus nostrum ? »* Imitantur plane gentilem Romanorum senatum , ex cujus autoritate Dii vel colebantur, vel rejiciebantur : adeo ut ne Imperatori quidem privatas inducere religiones , aut novum aliquem Deum consecrare liceret. Hinc factum est , quod Tiberius de Christo in Deorum numerum transferendo ad Senatum tulerit : quanquam postea cum senatorius honos principali fastigio , ut ait non nemo, velut sidus Solis lumine conderetur eam sibi autoritatem Imperatores cum cæteris Reipublicæ muniis assumpserint. Eos igitur tantum Populus Romanus Deos habebat , quos Senatus decrevisset , vera ratus , ut est apud *Prudentium* , quæcunque fiunt autore Senatu. Unde in historia B. Apollinaris Martyris Messalino vicario suadentis ut Christum coleret , vicarium ipsi dixisse traditur : *Tu mihi persuadere non potes ut ego Deos sequar ignotos , qui à Senatu præcepti non sunt.* Neque tantum à Senatu Dii consecrabantur ; sed quibusdam jus concedebatur hæreditatem adeundi , legatum capiendi , fideicommissum , aliudve mortis causa relictum recipiendi , quod non omnibus , ne selectis quidem, majorumque quasi gentium Diis , promiscue licuit.

Quia

Quin & jus trium liberorum hanc ob causam Diis dabatur, ut patet ex loco quodam Dionis, quem citat Tolosani Senatus quondam Præses *P. Faber Lib. III. Semest. Cap. 1.* quem de hac re operæ prætium est consulere. Si quis autem scire desideret, qui fuerint Romanorum proprii Dii, quive cum Græcis communes, is adeat *Salmasium in eruditissima ad Ægidium Menagium Epistola*, pro Balzacio adversus Heinsium scripta, unde quoque petas licet, quid de Diis Consensibus, *vontrōis*, & *aischtrōis* sentiendum sit. Quis non in cachinnos solvitur, ejusmodi Deos dum cogitat? Quis Gentilium non ridet ineptias, aut quis potius non deplorat insaniam? Cum istud deinvin Dei sit mortales juvare eorumque commoda promovere, ipsi mortales videri volebant suos juvare Deos, & eorum commodis inservire. Apage istiusmodi numina, quibus bene non esset, absque hominibus si essent; imo qui ne sint quidem extra stolidorum animum, Quisquam ne adhuc his Diis se credere ausit, quos pius ille Æneas apud Virgilium *victos* esse agnoscit? Sic nempe *Lib. II. Æneid:* loquitur.

*Ecce autem telis Pantheus elapsis Achivis,
Pantheus Otrιάdes arcis Phæbique sacerdos,
Sacra manu, VICTOS QUE Deos, par-
vumque nepotem*

Ipse trahit, cursuque amens ad litora tendit.

Digna sunt legi, quæ de hac re occurrunt apud *Augustinum de Civit. Dei Lib. 1. cap. 3.* quæ-

que ad eum locum notat doctissimus Hispanus *Ludovicus Vives*. Holce tamen Deos summis Ethnici prosequerantur honoribus, & superstitione colebant. Neque solum eos adoraturi caput venerationis ergo velabant, quod ex plurimis scriptoribus patet: sed & ipsa templorum limina osculis converrebant, ut alibi loquitur *Arnobius*. Hoc etsi paulo videatur abjectius, factum tamen à Romanis in magnis rerum difficultatibus.

Tanta adeo, cum res trepide, reverentia Divum

Nascitur, & rara fumant felicibus ara:
ut recte à *Silio* dicitur. Adeundus hinc est *Nobil. Janus Doussa Præcidaneis in Tibullum cap. 2.* Mulieres quoque ante Deorum simulacra procumbebant, crinibusque suis verrebant pavimentum, uti clarè docet *Heraldu* ad *Arnobium* pag. 47. I. nunc & mirare, Lector, in templis non licuisse alvum exoperare, aut reddere urinam; quod nefas fuisse ostendit *Cl. Petitus Commentario ad Leges Atticas* pag. 7. Huc respicit Sacerdos Jovis apud *Aristoph.* in *Pluto: Act. V. Scen. 2.*

οὐκ ἔστι δὲ εἷς

Θεὸς τὸ παρῆται εἶδεν, εἰδ' εἰσέρχεται,

Πλὴν ὑπεπατρουμένοι γε πλεῖν ἢ μύριοι.

Nunc autem nemo est, qui vel tantillum sacrificet: nemo qui templum adeat Jovis, præter illam magnam turbam, qui eò veniunt, ut cacent. Hinc lucem sceneratur Persius Saty. I.

Heic,

— — Heic, inquis, veto quisquam fa-
xit oletum

Pingue duos angues : pueri, sacer est locus;
extra

Mejete. discedo.

Quod autem loco sacro angues jubeat adpingi inde est, quod in auguriis incantationibus, aliisque sacris magnus illorum apud gentiles fuerit usus, uti bene observat *Dionysius Vossius ad Majmonidem de Idol. cap. VI. §. 2.* Hinc apud Hebræos & Arabes idem vocabulum & serpentem, & divinationem sive augurium denotat. Vide *Dickinsoni Delph. Phœniciz. pag. 10.* Quin & serpentes divinos, imo & Deos esse multi sibi antiquitus persuaserunt, non solum Ægyptii, qui Aspidem colebant; sed Græci etiam & Latini. Unde Opinioni suæ originem traxerunt illi Ophitæ, qui inter veteres reconfentur hæreticos. Nec priscis tantum seculis; verum & multo recentioribus à multis Gentibus divinus honos serpentibus tributus fuit, & etiamnum tribuitur, ut videre est apud *Jacobum Ouzelium Animadv. ad Minu. Feli. pag. 169.* Nullum autem olim inter Divos ferme numen fuisse, quod non anguis auspicio, necessitudine, consortio se consepserit, fulciverit, muniverit, sigillatim demonstravit, *M. Antonius Severinus Lib. de Vipera Pythia*, quem consule, ut & *Joannem Chislerium Comment. ad Gemmas Abraxas cap. 10.*

C A P. VI.

De Berenicio quodam historiola, non illiterata. Latinum ac Belgicum in Hassium, virum fortissimum, epigramma.

PRæcedenti capite hoc certe mihi usu venit,
quod figulis solet, quibus dum

— — Amphora cæpit

Institui, currente rota saepe urceus exit.

Non ut initium, sic exitum scriptioni invenire potui. Paucas lineas cum destinarem, in aliquot paginas excrevit. Ita fit, dum aliud ex alio incidit, & ut cogitationes, sic & orationem arcano nodo connectit. Cum valde inter se principium & finis distent; imo aliquando sint contraria, ita tamen per ea, quæ intercedunt, conjunguntur, ut simile quid cum Irîde habeant,

In qua diversi niteant cum mille colores

Transitus ipse tamen spectantia lumina fallit;

Usque adeo quod tangit idem est, tamen ultima distant.

Ne tamen in hoc capite idem nobis eveniat, carebimus sedulo. Ac quoniam tædium lectori forsitan movimus, historiolum promemus non injucundam nec illiteratam. Vacuas præbete aures, Amici; nam nulla usus circuitione rem ipsam ordior. Biennium fere est, quod in Zelandia fuit Antonides, juvenis ex Poësi Batava notissimus, qui

qui de gravitate cum Virgilio, de facilitate vero cum Ovidio contendere videri posset. Huic multa cum narrasset Viri istic auctoritate conspicui filius de præceptoris sui prompto ingenio & eximia memoria, incensus est desiderio istum hominem videndi. Hic itaque in ejus, & amicorum aliquot, qui aderant, gratiam continuo accersit. Venit homo, statura parvus, corpore obesus, colore ater, pannis annisque oblitus, quem ex illuvie & sordido vestitu nullius esse prætii judicasses. Tamen si vultum attentius considerares, aliquid supra vulgus præ se ferre videbatur. Erat enim torva in facie severitas, ardebant oculi, & pedes ac brachia miram corporis agilitatem continuo motu indicabant. Avidi omnes hominem circumstant, ac rogant num vera essent, quæ à discipulo acceperant. Vera? inquit: imo verissima sunt omnia. Quibus cum se fidem adhibere posse negarent, Berenicus (id homini nomen erat) ira accensus non dubitavit eos convitiis incessere, asinos bestiasque appellans. Ac quoniam erat tunc temporis ut sæpe alias, largius aspersus flore Liberi patris, Thraſonem agere non erubuit. Mira narrat de ingenii sui promptitudine, deque extemporalitate sua. Hæc omnia illi vino adscribere. Tum noster memorare incipit, ut Ambrosii Calepini Dictionarium octingentis vocabulis locupletaverit: ut possit semel audita ex tempore versibus comprehensa pure pariter ac eleganter efferre: ut denique sæpius novellas sive chartas

chartas hebdomadales stans pede in uno ex Belgico transfuderit in Græcum aut Latinum sermonem, eumque non solutum; sed metro alligatum. Quæ omnia cum videret nulli fieri verisimilia, furenti similis foras erumpit, atque plenis buccis debacchatur. Postero die idem consortium convenerat Medioburgi in quodam celeberrimo diverforio, ut unà convivarentur. Illic, ut fieri solet inter patinas & pocula, variis de rebus verba fieri, ac tandem de negotiis publicis agi coëptum est; maxime quidem de pugna navali, quam nuperrime nostrates fortiter adversus Anglos pugnaverant. In qua cum præ cæteris egregio animi robore, & invictâ fortitudine Hasius eminuisse diceretur, Zelandicæ cujusdam navis præfectus, statim Antonides ille, ut non festivi tantum, sed & prompti admodum ingenii est, pectore sereno hos versiculos deducit.

*De Haas, een fiere Leeuw in 't Britsche Zee-
geuegh,*

*Stont pal in 't midden der gepreste Water-ban-
dan,*

*Tot hem een Kogel heeft voor wyts na Godt ge-
zonden,*

*Om wraak te vord'ren van 't geschonde Wa-
ter-reght.*

*Sia Vremdelingen, zeght tot glory van de Zee-
wen,*

*Dat hier de Bâzen zelfs veranderen in Leeu-
wen.*

Vix ac ne vix quidem hoc Epigramma, Musis bene faventibus prolatum, chartæque mandatum erat, cum in idem, quo nostri confidebant, cubiculum sese infert Berenicus, eò adductus à suo discipulo. Quam poterat optime atque humanissime se excusat de præterito die, rogans ut æquibonique consulere velint, quæ tum fecisset ebrius. Atque hic iterum eadem repetit de promptitudine ac extemporalitate sua, & offert ipse periculum, si velint experiri. Quare cum eadem à sobrio audirent, quæ ebrius ante dixerat, hominem explorare constituunt. Ergo Antonides ei exhibet Epigramma modo à se factum, de eo iudicium suum ut promeret. Legit, lectumque utroque pollice probat: et quid obstat, ait, quo minus id continuo civitate donem Latinâ? Illi mirabundi currenti calcaria addunt, ut constaret quid hominis esset. Interea, dum loquuntur, Viri mutari vultus, ac totus ipse tremere, ac si Apolline plenus esset. Sed tamen priusquam se operi accingeret, paucula rogavit, quæ sibi videbatur in Epigrammate non satis percipere. Quærebat quid sibi vellet vox Belgica *pal.* & quo Latino vocabulo exprimi posset. Dein petebat ut sibi liceret Præfecti nomen, in quo situm est totius Epigrammatis acumen aliqua periphrasi circumscribere, quandoquidem inauditum esset Latinis auribus. Omnibus in id consentientibus, quin habeo jam, inquit, vocem, quæ egregie hoc nomen ob oculos ponat, & nostro conveniat instituto.

tuto. Ea est *Dasyphus* : sic enim lepus , quod nomen cum Præfecti nomine coincidit , appellatur , quia est animal valde hirsutum , & villosos habet pedes. Agite , singula mihi legite disticha Belgice , & ea vobis reddam Latine. Infit ergo Dominus Buzerous , qui inter illos erat , & ipse eximius Poëta , quem Berenicius ita *ἔπειτα* sequitur :

Egregia D A S T P U S referens virtute Leonem ,

*In bello adversus Britonas super aquora gesto ,
Impavidus pelago stetit , aggrediente molossūm
Agmine , quem tandem glans ferrea misit ad
astra ,*

Vindieta cupidum violato jure profundi.

Advena quisquis ades , Zelanda encomia gentis

*Ista refer , Lepores dempta quodā pelle Leonem
Assumant , quotquot nostro versantur in orbe.*

Quam primum absolvisset , quasi re bene gestā , in cachinnos solvi , & exertis duobus mediis digitis frendens cum magno ululatu cunctos ridere cœpit. Cum illi intereo hanc extemporalitatem laudibus ferrent , accensus etiam est desiderio idem & Græce tentandi. Scilicet gloriā quisque ad studia incendimur , & laudes laudato vires addunt. Ô Miram ingenii facilitatem ! Bis terve scabit caput , oculos in terram flammeos defigens , & mox non interrupto tenore idem epigramma recitat Græce , addens , *daer is 't in 't Griekx* , hoc est , *en vobis Gracum*. Tunc Satyrum denuo agere ,

agere, ut ante, nec se temperare à risu intra horæ quadrantem. Quale autem Græcum fuerit Epigramma, certo non scio: istud certum est à Joanne Friderico Gymnicho, qui tunc temporis Teutoburgi summa cum laude Græcas literas profitebatur, (ipse enim aderat) prælatum fuisse Latino. Quare autem hîc inferi non possit, hæc causa est potissimum, quod pronuntiarit adeo rapide, ut nullus, quantumvis calamo celer, dictantem scribendo assequi potuerit. Post hominem varie explorarunt: sed ea semper dedit specimina suæ in re literatia eruditionis, quæ omnes obstupescerent. Varias linguas ita loquebatur, ut singulæ ipsi viderentur vernaculæ, cum primis Gallica, Anglica & Italica. De Latinâ nihil aliud dicere attinet, quam literatissimum Virum Joan. Frid. Gronovium aliquando subveritum fuisse cum eo loqui Latine. Græcam usurpabat tanquam maternam, eamque præ cæteris in deliciis habebat. Diu eâ diserebat cum clarissimo Gymnicho, quem cum eo sermonem habebat, finiens in hæc verba: Piget me diutius tecum Græce loqui; nam discipuli mehercule mei, modo annum ei discendæ linguæ impendissent, melius te loquerentur. Cum hoc & alia quædam liberius ab eo dicta nonnemo ægre ferret, proptereaue homini verbera minitaretur, ille, ut erat ad quævis paratissimus, ultro se pugnæ offerebat. Quin, inquit:

— *Age, si quid habes, in me mora non erit ulla.*

De

De omnibus fere priscis in utraque lingua scriptoribus differebat pro re natâ solidissime, atque id absque ulla hæsitazione, nec præmeditatus. Spuria à legitimis discernebat, & quæ phrasēs ac voces bonæ quæ malæ essent accuratâ crisi distinguebat. Non immerito itaque huic applicaveris, quod de Marco Varrone in Plautinis fabulis dijudicandis, & apud Græcos de Aristarcho in Homericis discernendis, narrat *Agellius Lib. III. cap. 3.* Huc accedebat memoriæ prodigium, quâ comprehenderat totum Horatium, Virgilium, plurima Ciceronis, & utriusque Plinii, ac non ausim dicere, quorum præterea autorum, ex quibus, quæ velles loca, memoriter recitabat, addens & librum & caput: quin & versum in Poëtis, ubi extarent. Juvenalem ita in succum & sanguinem convertebat, ut non versus tantum; sed & omnes prope modum literas in numerato habere dici posset. Ex Græcis Homerum cum quibusdam Aristophanis comædiis edidicerat, atque ita edidicerat, ut statim proferret quoscunque versus desiderares. Cujas fuerit hic Berenicus nemini unquam dixit: nam quoties super patriâ rogaretur, sic fere respondebat, patriam cujusque esse ubi cuique bene est. Suspiciantur nonnulli eum in Galliâ fuisse professorem, alii Jesuitam, vel alicujus generis monachum: sed incerta horum omnium sunt judicia. Istud multis est notissimum, plurimos annos oberrasse eum per Galliam, Angliam, & nostrum imprimis Belgium, dum ceu alter Bias,

omnia

omnia sua secum portat. Dicentibus quibusdam dignum eum esse professoris munere statim respondit, non placere sibi umbraticam istam vitam. Interim vitam tolerabat caminos verrendo, cultros acuendo & similibus artium mechanicarum vilissimis. Præ cæteris agyrtam agere, ac populo fumos vendere erat huic homini familiare. De victu & amictu aiebat se nunquam fuisse sollicitum; susque enim deque se habere quemadmodum vestitus esset, & naturam parvo esse contentam. Nihilo minus gaudebat sæpe interesse largioribus computationibus præsertim apud populi sæcem, in quibus interdum delitescibat totum octiduum, imo & diutius. Neque sobrium obiisse, acerbum fatum, quo functus est; satis ostendit: nam mortuus inventus est in palude; suffocatus aquâ ac limo. Id Dominus *Buzerous*, Poëta ingeniosissimus significat hoc, quod illi posuit, epitaphio:

Hier leit een wönderlyke geest,

Hy leefde en stierf gelyk een beest:

Het was een miselyke Sater:

Hy leefde in wijn en stierf in water.

Quorum verborum hæc fere est sententia, eo loco situm esse hominem miri ingenii, qui bestiarum instar cum vixisset, bestiarum quoque instar obierat: Satyrum egisse dum omnes ridet: vino vitam oblectasse, jam eandem finiisse aquâ. Habes, Lector, historiolum, quam promisi. Tu Berenicæ mirare promptitudinem atque extemporalitatem.

Quisquamne credat his ita quemquam posse esse præditum, ut stans pede in uno chartas hebdomadales versibus reddat sive Græcis, sive Latinis? Sæpius tamen hoc à Berenicio factum fuisse non modo Antonides, sed & Cel. Philosophiæ Professor Joannes de Raay, qui ante annos quasi viginti Bereniciū novit, summa cum fide testantur. Quid autem sit de auctario Calepini, quem librum hodie, quam olim, habemus multo auctiorem, istud an Berenicio auctore effectum sit, asseverare nequaquam ausim. Istud constat facetissimum libellum, qui nuper hoc titulo prodiit, *Georgarchontomachia, sive Expugnata Mesopolis libri duo*, esse à Berenicio conscriptum. Verbum amplius non addam, Lector, nisi ut discussio tædio alacrius ad reliqua pergas.

CAP. VII.

Literæ prius extinctæ renascuntur. Magnus isto tempore eruditorum numerus. Jam denuo literæ ad interitum vergent. Libri in re literaria hoc tempore plurimi. De autoribus, quicum notis Variorum prodierunt, judicium.

SI quis hanc nostram ætatem cum superioribus, quæ post renatas literas effluxerunt, comparat, istis majorem eruditionem fuisse comperiet, hæc vero majorem ad eruditionem comparandam

dam librorum copiam. Cum Gothi magnam orbis terrarum partem vastarent, ubicunque essent, secum barbariem intulerunt. Quod sane minime mirum videri debet, cum tanto illa gens in literas odio flagaverit, ut Amalosuntha, Theodorici Gothorum Regis filia, quia filium Athalaricum literas doceri voluerat, primores Gothorum offenderit, qui virum fortem & bello clarum inter literas versari nefas esse putabant, narrante *Procopio Gothic. Lib. 1.* Hoc sequuti sunt Longobardi, à quibus devastatâ Italiâ, simul cum Romano imperio Romanæ literæ intermortuæ fuere. Parum enim Musis cum Marte convenit, nec injuria Homerus Palladem & Martem odiis inter se fingit confluentes. Hic illic inter monachos optimi autores delitescabant, vel cum aliis plerisque rebus omnino perierant. Quos vero benignior dicam? an crudelior fortuna ab interitu vindicaverat, ii ab ineptis librariis qui plerumque monachi erant, miserandum in modum truncabantur interpolabantur, cominaculabantur. Omnes tunc ferme in ipsa barbarie laudem ponebant maximam. Quantum eo tempore eruditorum linguæ & artes liberales damnum fecerint, istud est non uno in loco ostensum à viris doctissimis. Legantur inter alios innumeros *Lomeierus egregio libello de Bibliothecis, & Hottingerus Hist. Eccles. N. T. Parte V.* Et sane si quando in libros incidamus id temporis scriptos, vix apparent magis Latini, quam qui olim ævo Augustæo conscribe-

bantur ultra Sauromatas & glaciale Oceanum. Græce autem scire hæreticum erat, & tantum non morte piandum. Certe risum continere non possumus, quotiescunque ad divinam artem poësin oculos retorquemus, quam illi scœdissime conspurcarunt. Atque adeo, quoniam eò devenimus, audi aliquid, mi Lector, asininis horum auribus dignissimum. *Thomas Morus*, vir probitate ac doctrinæ dotibus clarissimus, cum aliquando non inelegans epigramma scripsisset, obtinere non potuit, ut id admitteretur. Igitur aliud componere iussus est, quod maximis laudibus ad astra ferebant. Erat autem huiusmodi:

*Hic jacet Henricus, semper pietatis amicus:
Nomen Abyngdon erat, si quis sua nomina
querat.*

*Wellis hic ecclesia fuerat succentor in alma,
Regis & in bella cantor fuit saepe capella.
Millibus in mille cantor fuit optimus ille.*

*Præter & hac ista, fuit optimus orgaquenista.
Nunc igitur, Christe, quoniam tibi servit iste
Semper in orbe soli, da sibi regna poli.*

Ipsæ Erasmus, precibus magni cuiusdam viri impulsus, Sapphicum carmen fecerat de Michaële Archangelo, quod quoniam esset elegantissimum & vere Latinum, tam esse poëticum censebatur, ut Græce scriptum videri posset. Aliquando ex istis ineptulis quispiam cum valde in Erasmi *Encomion Morie* debacchatus esset, rogabatur eum libellum an unquam legisset. Respondebat ille se

nequaquam legisse, sibi tamen constare esse pessimum libellum, quod tam sublimi stilo conscriptus esset. Tamen aliquanto ante Erasmi tempora in Italia literæ renasci cæperant, maxime postquam Græci, inter quos & religionis puritas, & literarum studia magis hæcenus viguerant, Turcarum armis superati, una cum Musis, in exilium abierunt. Hac clade bonarum artium studia in Græcia quidem extincta, in Italia vero ac reliquis deinceps Europæ partibus excitata sunt. Qui autem Bessarionem Patriarcham Constantinopolitanum & Cardinalem Nicænum secuti in Italiam venerunt hi sunt potissimum: Emanuel Chrysoloras, Demetrius Chalcondyles, Constantinus Lascaris, Grammatici: Philosophi vero Gemistus Pletho, in Platonicis Bessarionis præceptor; Aristotelei vero Theodorus Gaza, Joannes Argyropulus; & Georgius Trapezuntius Rhetor. Brevi omnes Latine scribendo sic exercitati, ut & Gaza Romani sermonis pomeria in Animalium Aristotelis historia sic protulerit, ut quem illi conferam vix habeam, præferam vero neminem. Ita quidem hos recenset *Petrus Pantinus præf. præfixâ Apostolio Paramiographo*, qui & ipse Byzantio in Italiam confugerat. Vide quoque *Henricum Stephanum dialogo de parum fidei Græcæ Linguae Magistris circa initium*. Hos è Græcia Doctores multi discipuli continuo sectati sunt, inter quos maximi nominis Leonardus Arætinus, Franciscus Philelphus, Lauren-

tius Valla, Varinus Veronenſis, Nicolaus Perottus. Quos exceperunt Joannes Picus Mirandulanus, Hermolaus Barbarus, Angelus Politianus, Jovianus Pontanus, Petrus Bembus & alii, quos hic enumerare nihil attinet. Tunc novus quaſi literarum Sol oriri, & undique ad Muſarum caſtra concurrere. Mirabile dictu eſt, quam cito pulſa barbarie literæ renituerint. Ex profunda nocte in meridiem te delatum diceres. Illud quod à Juliano deſumptum Theodorus Canterus, Vir literatiſſimus & Conſul Ultrajectinus Bibliothecæ ſuæ foribus inſcripſit, tunc multi de ſe uſurpare poterant.

Ἄλλοι μὲν ἵππων, ἄλλοι δ' ὄρνιθων,
Ἄλλοι θηρίων ἱερῶσι. ἡμοὶ δ' βιβλίων
κτήσεως ἐν παιδείᾳ θεοῦς ἐπέτηκα πᾶσι.

Alii quidem equos alunt, aut aves, aut canes ad venandum. Mihi vero à puero iſtud deſiderium inſedit, ut multos acquirerem ac poſſiderem libros. Valde hunc literarum curſum promoverunt Magnates, tum exemplis præluendo, tum doctos opibus honoribusque maſtando; maxime autem & princeps Nicolaus V. Papa Romanus, de quo vide Caſaubonum præf. Polybianâ. Illorum aliquos recenſet Lomeierus Lib. de Biblioth. cap. ix. Sect. I. Multum quoque juvit ars typographica, nobiliſſimum Bataviæ noſtræ inventum, cujus ope facilius libri haberi poterant, qui antea non niſi graviffimo ſumptu comparabantur. Non tanta tamen initio librorum copia erat, quanta deſi-
de-

derari poterat. Autores non nisi sensum exueban-
tur ex tenebris plusquam Cimmeriis, quibus ob-
voluti jacebant. Quo casu multi inter priscos scri-
ptores è carceribus quasi emissi, & in Mediis rui-
nis servati sint, à multis est memoriæ proditum.
Vide inter alios, cujus jam bis memini, *Lo-
meierum cap. ix. Sect. 2.* Ita cum mortalium
rebus comparatum est, ut statis quibusdam modis
& gradibus procedant, nec quæ conducunt, sta-
tim omnia inveniantur. Sic homines magis indu-
striam acuunt & vires ad quærendum intendunt.
Aliàs obruerentur, ac ipsâ copiâ laborarent,
*ὡς ἐν δροπλίῳ τῷ Τάνταλῳ, ut Tantalus in mediis divi-
tiis egens.* Quid jam Herodoto est vulgatius? A-
deo parùm tamen Politiani ætate cognitus erat,
ut ille cum Florentiæ interpretationem Homericæ
Iliados in magna celebritate aggrederetur, non
sine ingenti ostentatione, quæ de Homeri poc-
mate perscripta sunt ab Herodoto, Auditoribus
suis è suggestu, ut sua, recitaret. Vide eruditis-
simum *Budaum Annot. in Pandect. pag. 282.*
Edit. Rob. Steph. &, qui idem ex Duareno nar-
rat, *Paulum Colomesium Κεμ. Liter. C. 31.* Ne-
mo jam est, vel inter eos, qui leviter literis tin-
cti sunt, qui Suidam non habeat. Ejus tamen co-
piam Erasmus vel ad paucas horas ab amico impe-
trare non potuit, *ut ipse testatur in Adagio Festina*
Lente. Quid interim Erasmo fuit doctius? quid isto
sæculo in literis consummatius? Omnes tunc quasi
dato signo, currebant ad (ut dicam cum *Lucretio*)

Edita doctrina sapientum templa serena.

Atque is quidem in rem literariam ardor ad nostrum hoc sæculum duravit: dum interea temporis plures indies ex tenebris tum Græci tum Latini autores eruuntur, vel ornatus aut auctius prodierunt. Deinde satietas quædam, quæ bonis in rebus multo est perniciosissima, homines capere. Studia jacere. Autores priscos negligere, dum novis & inficetis libellis inhiant. Non quidem nostra aut parentum ætas viris Literatis omnino caruit: quis enim (ne quid de illis, qui alibi flourerunt, dicam) in patria nostra *Grotios*, *Salmasios*, *Heinsios*, *Vossios*, *Gronovios* non novit? Sed interim perpauca sunt, qui maximos hosce viros imitati literis gnaviter incumbunt. Quid causamur? Librorum certe penuriam non possumus. Quicquid veterum Autorum temporis vel barbarorum injuria reliquerit, id omne typis descriptum prostat. Magnam quoque industriam Viri doctissimi adhibuerunt, ut suâ operâ explanarent & illustrarent, quod esset obscurius in ritibus & historia priscorum. Varii sunt de his materiis libelli, quos gnavi typographi nuper adeo ad prælum revocarunt. Atque hic *Andrea Frisii* non meminisse non possum, ex cujus officinâ multa accuratissime in re literaria jam prodierunt, & compluria exspectamus. Est ipse quippe in utraque lingua versatissimus, ac tum typorum nitore, tum mendarum emendationi imprimis studet. Ipsi autem antiqui autores multis commentariis & no-

tis à viris eruditis explicati sunt : ita ut nihil in studiis nostris nos morari posse videatur. Quid autem de iis autoribus sententiæ ferendum sit, qui cum *Variorum notis*, prodierunt, ut prisce fere omnes, qui tum soluta tum ligata oratione scripserunt, ego aliàs sæpe à Viris doctissimis quaesivi. Neque verebor in medium proferre, quid ab iis didicerim. Cum ante aliquot annos Aulus Gellius cum *Variorum notis*, Antonio Thyfio & Jacobo Ouzelio curantibus, in lucem prodiisset, ille tum quidem ab eo, qui utili sane instituto rerum literariorum diaria conficit, laudem obtinuit. De cæteris vero hoc iudicium fertur, quod ex *Ephemeridibus Eruditorum A. 1667. p. 51.* de Gallico in Latinum his verbis transfundo : Aliquot anni jam sunt, quod Hollandi prælo subicere ceperint optimos Antiquitatis autores additis notis, selectis ex illis, qui præ cæteris egregie in eos auctores scripserant. Hi libri, quos vulgo *VARIORUM* vocamus, valde expetiti sunt, magis ob tituli speciem, quam quod quid egregium continerent. Sapissime enim perperam satis excerpabant, & cum in integris commentariis multa bene essent ad autores notata, eorum loco nihil dabatur nobis, præter observationes literales, Varias Lectiones, & ejusmodi minutias, quæ etsi non sint omnino negligenda, optimam tamen partem non faciunt eorum, unde hæc seligebantur. Et paulo inferius : Hujusmodi selecta rei literaria plus obsunt, quam prosunt. Hinc enim verendum

est, ne dum ipsa, quæ prius scripta sunt, integra commentaria de novo non imprimuntur, hæc tandem tota pereant, ac pro Lipsii, Casauboni & aliorum integris observationibus, nihil aliud habeamus, quam decurtatas epitomas: quod quidem in Servii ad Virgilium commentariis, aliisque antiquorum operibus, evenit. Certe, si recte calculum ponimus, huic sententiæ refragari non poterimus. Quid enim istæ Variorum notæ sunt aliud, quam, ut ait ille, burræ, quisquiliæ, ineptiæque? Non idem tamen de omnibus dico; nam quicquid Thysius, Gronovius Schildiusque vel ipsi fecerint, vel ex aliis elegerint, id recte atque optimo iudicio ab iis factum est. Neque alios omnes uno ore condemno: sed pudet me pigetque illius, qui plurimos autores cum Variorum notis dedit: tantum abest enim à iudicii laude, quâ optima quæque comprobasse censendus sit, ut contra non nisi de pessimis recipiendis autor esse videatur. Puerilia fere sunt, quæ profert, omnia. Nec est, quod ea pueris selecta esse dicat. Quid enim opus fuit in eam rem varios scriptores advocare, & ex optimis pessima excerpere? Melius fecisset, si ipse non interrupto tenore, quæ in antiquorum monumentis pueris obscura sunt, suis verbis explicasset. Quod præterito sæculo *Badins Ascensius*, & ante paucos annos *Minellius* fecere, qui pueris operam navarunt utilissimam, Itaque nemini mirum videri debet, parum viris doctis Autores sic editos placuisse.

cuisse. Hoc cum typographi animadverterent, facum excogitarunt, quo multos decipiunt. Ajunt se integros commentarios excudere, observationes non mutilare, notas, ut scriptæ sunt, totas adferre. Sic tituli præ se ferunt. Verum si rem ipsam excutias, egregie te falsum invenies. In nullis enim vel paucis saltem (excussi enim plerisque) ita rem se habere comperi. Utinam tandem exoriatur aliquis, qui absque fraude hic agat, & doctorum Virorum commentaria quæ jam rarissime prostant, integra in lucem proferat! Multum utilitatis præbet non solum explicationes nosse; sed etiam causas scire, cur eæ recipiendæ sint. Quod aliunde, quam ex observationibus non mutilatis haberi non potest. In quibus licet quædam nobis supervacanea videantur, tamen retinenda sunt, quia aliis forsitan videbuntur necessaria. Et si dicendum est, non minus furti tenetur, qui, inscio & invito autore aliquid ex literariis laboribus dempserit, quam qui ex auri vel frumenti acervo. Sed quoniam omnium commentaria vel notæ ad idem opus simul imprimi non possunt, ne in nimiam molem excreseat, id consilium typographis dederim, ut quem Doctorum judicio optime commentatum fuisse constat, eum integrum excudant; ex aliis vero id tantum feligant, quod illi deesse videbitur, atque hoc ipso titulo profiteantur. Non dubito bene meritum de literis, quicumque sic egerit. Uti sane ille apud eruditos laudem consequetur maximam, qui *Servium*,

vinum, Donatum, Acronem, Porphyrionem, & quotquot ex veteribus Latinis Scholiastis restant, ex servitute, quâ veluti constricti in bibliothecis jacent, liberali asserat manu, & cum antiquis grammaticis docili juventuti tradat.

CAP. VIII.

Canis nomen in conviviiis usurpatum. Cicero emendatus. Diaboli sive mali demones pro perturbatoribus & hominibus nequam. Evangelista Joannes illustratus.

Nihil apud plebem nostratam est vulgatius, quam ut inter convitia, quibus invicem se proscindunt, *canis* quoque nomen usurpent. Nec injuria *canis* nomen inter maledicta ponitur, nunc enim *immunditia*, nunc *sevitia* notam & notionem in Sacris literis habet, ut multis allatis locis probat, Vir in crisi cum sacrâ, tum prophanâ fuimus *Thomas Gatakerns Miscel. Theol. cap. 38.* Quid cinædo est turpius, aut magis immundum? Is autem per *canem* proprie denotatur. Huc respicit *Chrysostomus Hom. 1v. ad Rom.* his verbis, quibus hujusmodi propudium alloquitur: *ἢ πε ἰλθὼν ἐπιβλέψω ἐξ ἀνδρώπε κύνα ποιεῖν, ἃ ἔα ἐκ αἰσχυμῶνα ἔρυν; ἀλλ' ἰδὲ, ἐκύα σταυρὸν ἐποίησας. ἀλλὰ τὸ τέτε ζῶν ἀπμότερον, ἐκείνο μὲν γὰρ χεῖσι κατήσκει, ὃ δὲ ἰταίρεως ἐκ μὲν χεῖσι μὲν.* *Si quis ex homi-*

ne te vellet canem facere, hunc nonne tu ut pestem fugeres? Ecce autem, non canem temet ipse facis, sed quoddam etiam cane vilius animal. Canis enim alicujus usus est: cinædus vero nullum omnino usum habet. Apud Romanos quoque id obtinuisse, ut canis nomen in convitiis haberetur præter alios docuit P. Faber Semest. lib. I. cap. 9. De Vespasiano narrat Suetonius Vita Vespas. cap. 13. eum Demetrium Cynicum in itinere obviam sibi post damnationem, ac neque assurgere, neque salutare se dignantem, oblateraltem etiam nescio quid, satis habuisse Canem appellare. Facetum est quod in hanc rem apud Plautum legimus Menæchmis Act. V. Sc. 1. ubi Menæchmus Socicles ita Mulierem alloquitur:

Nontu scis, Mulier, Hecubam quapropter
CANEM

Græci esse prædicabant? MU. Non equidem scio.

Men. Quia idem faciebat Hecuba, quod tu nunc facis.

Omnia mala ingerebat, quemquem adspexerat:

Itaque adeo jure capta appellari est CANIS.

Hinc optime, si quid judicii mihi est, doctissimus Faber Ciceronem emendat Orat: in Pisonem, ubi in vulgatis libris sic legitur: Ego istius pecudis, aut putidæ carnis consilio scilicet, aut præsidio niti volebam? quis non videt pro putidæ carnis cum Fabro legendum esse putidæ canis? Insolens enim non est, ut canis nomen feminino

genere apud classicos autores usurpetur. Istud quoque apud nos obtinet, ut si quem atroci admodum ingenio & animo perturbatore novimus, hunc *Diabolum* vel *malum Daemonem* esse dicamus. Hoc quidem ex antiqua consuetudine sumptum est. Nam (ut recte *Alemannus ad Procopium*) ex quodam usu & communi consuetudine, qui rempublicam atrocius vexarint Principes, id ipsum olim etiam audierunt. Clara sunt *Procopii* verba *Hist. Arc. pag. 56.* unde & ejus consuetudinis causam haurire licet. *Διότι ἡμεῖς τε καὶ οἱ ἄλλοι οὐ μόνον τὸν Θεοδοσίον αὐτοῦ (de Justiniano & Theodora loquitur) ἀδρανῆς εἶναι, ἀλλὰ δαίμονι παραμιᾶται τινὲς, ὃς ὅσους οἱ ποιοῦνται νόμους βροτολογεῖς ἔσθιν, αὐτὸν δὲ καὶ τοὺς βυλυσάμενος ὅπως ἀπαντα ἀνθρώπινα γένεσι καὶ ἔργῳ αἰετῶς τε καὶ τὰ χεῖρα διασείρειν ἐκείνους εἶναι, ἀνθρώπων τε ἡμπίχοντο σῶμα, καὶ ἀνδραποδαίμονες γενημένοι τῷ πρῶτῳ τῷ τῷ ζύμπτῳ τῷ ὁκεῖν καὶ ποιεῖν. Quam ob rem & mihi & mei ordinis plerisque hi nunquam homines esse visi sunt. Sed demones perniciosi, & ut poeta loquuntur, hominum perniciēs fuerunt. Qui quidem una consulentes, quo pacto humanum genus humanaque negotia, quam facillime & citissime perderent, humanas formas induerunt, & semibovines furia facti, sic universam urbem concusserunt. Consule Alemannum ad hunc Procopii locum, ubi plura hujus loquutionis exempla recenset. Septuaginta quoque Bibliorum interpretes hoc modo loquenti fuerunt, idque nomen Hamani tribuerunt. Librum enim *Estheris* ver-*

tentes

tentes *cap. VII. vers. 4. cap. VII. vers. 1.*
 nomen $\gamma\alpha$ vel $\gamma\tau$ per $\delta\iota\alpha\beta\omicron\lambda\omicron\varsigma$ transtulerunt. Si-
 gnificat autem proprie eum, qui id operam dat ut
 alios perdat vel ad angustias redigat, à Rad. $\gamma\alpha$
Concludere, concludendo premere, angere. Ipsi
 sæpissime reddunt per $\epsilon\chi\theta\rho\acute{o}\nu$, $\mu\epsilon\gamma\alpha\lambda\acute{\eta}\nu \epsilon\pi\alpha\gamma\gamma\acute{\epsilon}\lambda\iota\sigma\iota\sigma\iota$, $\epsilon\tau\iota\sigma\iota\sigma\iota$,
 nonnunquam per $\beta\acute{\epsilon}\lambda\epsilon\iota\sigma\iota$, & $\sigma\epsilon\lambda\lambda\epsilon\sigma\theta\epsilon\iota$. Ac hoc qui-
 dem Judæis Syrisque proprium videtur, ut notæ
 improbitatis homines Dæmoniis comparent, vel
 diaboli filios esse dicant. Vide *1 Reg. XXI. 13.*
Matth. XXII. 38. Johan. VIII. 44. Act. XIII.
10. 1 Johan. III. 8. Sunt autem Diaboli filii,
 non quia ab ipso geniti, sed quia eum, ut filii
 Patrem, moribus & pravitate referunt, & ejus
 mala opera imitantur ac faciunt. Hinc viderimus
 quo sensu impii Judæi Servatorem nostrum *Dæ-*
moniacum vocitent, & quæ sit mens ipsius Sal-
 vatoris, ubi Judam respiciens, *Johan. VI. 7.*
 hæc verba usurpat: $\omicron\upsilon\kappa \epsilon\gamma\omega \epsilon\mu\acute{\epsilon}\varsigma \tau\acute{\epsilon}\varsigma \delta\acute{\iota}\delta\omicron\kappa\alpha \epsilon\zeta\epsilon\lambda\epsilon\gamma\acute{\alpha}-$
 $\mu\epsilon\nu$, $\kappa\alpha\iota \epsilon\zeta \epsilon\mu\acute{\omega}\nu \epsilon\iota\varsigma \delta\iota\alpha\beta\omicron\lambda\omicron\varsigma \epsilon\iota\varsigma\iota$; *Nonne ego vos duo-*
decim elegi, & unus ex vobis diabolus est?

Hyrçani mortuos canibus objicere solebant. Sepelire. Ritùs sepeliendi mortuos in bello apud Athenienses usurpatus. Spartani mortuos in urbe sepeliabant, quod secus factum à plerisque gentibus. Horatius explicatus. Canis ad fores catenâ alligatus. Apostolus Paulus explicatus. Januæ quomodo à Romanis & Græcis apertæ. Terentius illustratus.

QUOD modo ex Chrysostomo notavi cinædum esse nullius usus, canem vero esse alijus, id mihi in memoriâ revocat barbarum Hyrcanorum morem, qui mortuos solebant canibus objicere. Id Cicero, ut alios omittam, docet, *Lib. I. Tuscul.* his verbis: *In Hyrcania plebs publicos alit canes, optimates domesticos. Nobile autem genus canum illud scimus esse: sed pro sua quisque facultate parat, à quibus lanietur, eamque optimam esse illi censent sepulturam.* Hos autem canes Græci *κύωνες* id est, sepulcrales vocant, ut ex Strabone recte docet: Doct. *Cuperus Observ. Lib. I. C. 7.* Vide *Kirchmannum Append. ad Lib. de Funer. Roman. cap. 11.* ubi agit de variis ritibus à barbaris gentibus in sepultura usurpatis. In sepultura dico: vox enim *sepelire*

fire, quam hodie omnes usurpant, & usurpatam veteribus solummodo credunt, quando terra cadavera obruuntur, etiam de combustione omnibusque sepulturæ generibus ponitur, puta, quando in mare projiciuntur mortui, quando suspenduntur ex arboribus &c, ut prolixè probat *Cuperus loco citato*. Est igitur *sepelire* inter ea vocabula, quæ hodie brevibus circumscripta finibus, olim latiore usum obtinuerunt. Non nego quidem *sepelire* proprie humationem denotare; sed inde ad quemvis sepulturæ modum translatus est. Utrum vero crematio an humatio apud Romanos prius usurpata sit, certò non constat. Apud multas vero gentes consuetudinem humandi corpora vetustissimam fuisse præter alios *Ouzelius* docet *ad Arnobium pag. 203*. Ne quid autem de sepulturæ diversis ritibus conscribam, Kirchmannus, Gutherius, Meursius, & Quenstedius potissimum faciunt, quorum absolutissimi de hac materia libelli exstant, atque nuper adeo novæ editione prodierunt. Juvat tamen ex *Thucydide Lib. II.* locum adscribere, unde constet quo pacto ii, qui in bello occubuerant, sepeliri apud Athenienses consueverint. Neque enim omnes hunc locum sciunt, citatum licet à *Samuele Petitò Comment. in Leges Atticas pag. 501.* & *Joanne Meursio Ceram: Gem. cap. 23.*

Εν δὲ τῷ αὐτῷ χειμῶνι οἱ Ἀθηναῖοι τῷ πατρὶος νόμου ἡγεμονίᾳ τὰς ἐπιτάφιας ἐποίησαντο ἥ ἐστι τῷδε τῷ πολέμῳ πρῶτον ὁποδα-
νόντων, πρὶν τὸ τοιοῦτον. τὰ μὲν ἐστὶ ἀποτίθηναι ἢ ἀποκαίμεναι

ἀρότετα σκληρὰ ποιοῦσάντες; καὶ ὑπερείκει τῷ αὐτῷ ἱκασθῶν ἢ π
βύληται. ἐπιδαὶ δ' ἢ ἐκφορὰ ἢ, λάρνακας κυπαριστίας ἀγυσι
ἀμαρξαι, φυλῆς ἑκάστης μία. οἷσι δὲ καὶ τὰ ὅσα ἦς ἱκασθῶν ἢ
φυλῆς. μία δ' κλίη κατὰ φέρεται ἐς ἐρωμένη τῶν ἀθανῶν. οὐ αὖ
μὴ ἐυρεθῶσιν ἐς ἀνείρεσιν. Συνεκείρει δὲ ὁ βελόρυθρον καὶ ἀσῶν
καὶ ξένων. Καὶ γυναῖκας πάρεσιν (παρῆσαν) αἱ ποροήκουσαι ὅτι τ
τάφον, ὀλοφύρεσθαι. τιθίσκειν ἔνι ἐς τὸ δημόσιον σῶμα, ὃ ἐστὶ
ὅτι αὐτὰ καλλίστη ποροαίε τις πόλιος, καὶ αἰεὶ ἐν αὐτῷ θάπτουσι
τὸς ἐκ τῆ πόλεως, πλὴν γὰρ τὸς ἐν Μασσαθῶνι. ἐκείνων δὲ δια-
σπῆ τὴν ἀρετὴν κήρυττες, αὐτὴ καὶ τὸ τάφον ἐποίησαν. ἐπιδαὶν
δὲ κρύψουσι γῇ, αἰὴρ ἤρημύθου δὲ αὖ γυναῖκα τε δοκῇ μὴ ἀξύνε-
τῶ εἶναι, καὶ ἀξιώματι ποροήκη, λέγει ἐπ' αὐτοῖς ὑπαίον τὸν
πρίποντα. Μετὰ δὲ αὐτῷ ἀπέρχονται. ὧδὲ μὲν θάπτουσι. ὁ δὲ δια-
παντὸς τῷ πόλεμῳ, ὅπου ξυμβῶν αὐτοῖς, ἐχρῶντο τῷ πόλεμῳ.

Eadem hyeme Athenienses patrio instituto condunt
eos publice, qui hoc bello primi occubuerant. In-
stitutum est huiusmodi. Triduo ante quam effera-
ratur solus, tabernaculum faciunt, sub quo ossa
defunctorum proponunt. Unusquisque interim suis
inferias afferunt, si quas velint. Dies efferendi fune-
ris cum venerit, currus advehuntur cum loculis ex
cupresso factis, singulis ex singulis tribubus. His im-
posita sunt ossa earum tribuum, ex quibus quisque
fuerit. Unus autem lectus vacuus fertur, stratus
eorum causa, qui inventi non sunt, nec tolli po-
tuerant. Quilibet, siue civis Atheniensis (Athe-
nienſes enim peculiariter ἀσῶι vocantur) siue pe-
regrinus funus prosequitur. Mulieres genere pro-
pinqua flextes sepulcro adstant. Collocant autem
in publico monumento, in pulcherrimo totius urbis
suburbio. Atque hic semper sepeliunt eos, qui
sunt

sunt in bello interfecti, iis exceptis, qui ad Marathonem cæsi fuerunt. Horum enim cum insignem virtutem esse iudicassent, in ipso pugna loco iis sepulcrum fecere. Postquam condiderunt, vir è tota civitate lectus, qui & sapientia & dignitate excellit, laudationem, quæ conveniat, recitat. Post hac abeunt. Et hunc quidem sepeliendi ritum observant omnibus bellis, quæ gerunt. Ab Atheniensibus ad Lacedæmonios transeo. Fuit is quidem mos receptus à plerisque gentibus, ut mortuos suos extra urbem sepelirent, quod cum ab aliis, tum à Kirchmanno & Gutherio multis testimoniis ostensum est. Nec causam ullam video cur à Christianis, quos omni dissidemia & superstitione vacuos esse oportet, contrarium usurpetur. Spartani tamen à reliquis gentibus plerumque moribus dissidentes suos in urbe sepeliebant. Testis est *Plutarchus Vita Lycurgi* p. 56. Editionis Parisinae. Καὶ μὲν ἐπὶ τοῖς περὶ τὰς ταφὰς ἀρεταῖς δικέσμενοι αὐτοὶ. (ὁ Λυκῦργος) ὡρεῖται μὲν γὰρ ἀνελὼν δεισιδαιμονίας ἀπασας ἐν τῇ πόλει θάπτειν τὰς νεκρὰς, ἐπὶ πλείονι ἔχειν τὰ μὴμεῖλα τῷ ἱερῷ, ἐκ ἐκείλων, σωλῆφους ποιεῖν τὰς τοιαύτας ὕψους ἐπὶ συνήδους τῶν νέων, ὥστε μὴ ταράττειν αὐτοὺς, μηδ' ὀρῶσθαι τὸν θάνατον, ἀλλ' ἐμύκνοντα τὴν ἀφαιμένην νεκρῷ σάμαλῳ, ἢ διατάφῳ διελθόντας. Quæ quoque ad sepulturam attinent, ista optime ordinavit. Primum enim omnem superstitionem tollens minime prohibuit mortuos in urbe sepelire, & ante oculos habere monumenta sacrorum, quod juventutem assuefacere vellet & quasi inustrare huiusmodi speculis, ne trepidarent vel

mortem horrerent, tanquam quæ pollueret tangentem mortuum corpus, vel transeuntem per sepulcra. Vide etiam accuratissimum Nicolai Cragii tractatum de *Repub. Lacedam.* lib. III. pag. 186. ô Bone Deus! quantâ mutatio! Quod Lycurgus olim instituit ut vanam de pollutione opinionem evelleret, id Pseudo-Christiani per vanissimam superstitionem observant. Si quis in templis, quæ sunt fere in media urbe, non sepeliatur, hunc pollutum censent, & fere est, ut ejus animam ipso cœlo excludant. Sed de hac re non est hîc disserendi locus. Pergamus ad reliqua, quibus hoc caput destinavi. Præter illum canis usum, quem initio indicabam, alii sunt quam plurimi, verum multo honestiores. Unum in præsentiarum notabimus. Apud Romanos non solum servi ad Januâs catenis alligati erant, inde janitores dicti, qui & ostiarii vocantur, de quibus consule *Pignorum tractatu de Servis, Titum Popmam de Operis Servorum, Doussam præcidenis in Catullum c. 1. Gatakerum nostrum Miscell. Theolog. p. 387. aliosque.* Neque in privatis tantum ædibus; verum & in Deorum templis, qui prophanos aditu arcebant, unde *Horatius* explicandus *Lib. III. Od. 1.*

Odi prophanum vulgus, & arceo.

Adi Petrum Gregorium *Tholosanum Synt. juris Universi Lib. XVI. c. 3.* qui liber quam juris, tam bonarum literarum studiosis est utilissimus. Sed etiam prope januam canis unus pluresve accu-
ba-

babant, qui januam custodiebant, ne quis invitis janitoribus intraret. De Vitellio narrat *Suetonius Vita Vitel. cap. 16.* confugisse eum in cellulam janitoris, religato pro foribus cane, ad quem locum videndus *Casaubonus in Commentario, & Gatakerus loco allegato.* Ne quis autem inscius in noxam incurreret, cane in cella latitante, canis figura in pariete depicta erat, hoc programme prope posito: *Cave canem.* Audiamus *Petronium*, cujus verba sic habent: *A sinistra intrantibus non longe ab ostiarii cella, canis ingens catena vincibus in pariete erat pictus, superque quadrata litera scriptum: CAVE, CAVE CANEM.* Non dubito hinc ortum esse adagium, *βλέπει κύνε, Cave Canem*, quod Varro olim cuidam Satyræ titulum fecit, de quo vide *Ausonii Popmæ conjectanea in Varronis Satyras Menippeas.* Magnum tamen Galliæ suæ decus *Adrianus Turnebus Advers. lib. XV. cap. 4.* hoc adagium respicere autumat furiosos canes, à quibus maximum vitæ periculum imminet. Hinc facile est explicare Apostolum *Paulum ad Philip. III. 2.* ubi sic legimus: *βλέπει τὸς κύνας, βλέπει τὸς κακὸς ἰργάτας, βλέπει τὴν κατατομήν. Cavete canes, cavete malos operarios, cavete* (ita odioso vocabulo Judæos appellat) *concionem.* De janitoribus aliquid diximus. Non nihil restat de ipsis januis observandum. Ipse tamen non primus observo: sed quicquid est, hoc totum elegantissimo Muræto debeo. Apud Romanos fores ædium intror-

fum trahendo aperiebantur. Secus fiebat apud Græcos, qui fores aperientes eas in viam publicam propellebant. Quoniam igitur periculum erat, ne quispiam, qui aut præteriret, aut pro foribus staret, ab impulsa janua pelleretur; ideo qui exituri erant domo, solebant prius ipsimet intrinsecus forēs ædium suarum percutere: ut illo strepitu admonerentur, qui foris erant, cavere sibi, atque eatenus absistere, ut ne læderentur. Hinc patet cur in Plauti ac Terentii fabulis, quæ cum sint pleræque ex Græco versæ, non mirum est retinere consuetudines Græcas, nunquam fere quisquam egrediatur domo, ut non antea crepuisse fores dicatur. Hæc quidem *Muretus Var. Lat. lib. I. cap. 17.* Ac quoniam in Terentii mentionem incidimus, non possum præterire ejus locum, quem semper existimavi esse oppido elegantem. Is exstat *Eunu. Act. III. Sc. v.*

————— *Dum apparatur, virgo in conclavi sedet*

Suspectans tabellam quandam pictam: Ibi inerat pictura hæc, Jovem

Quo pacto Danaæ misisse ajunt quondam in gremium imbrem aureum.

Ego met quoque id spectare cœpi: & quia consimilem luserat

Jam olim ille ludum, impendio magis animus gauderat mihi.

Deum sese in hominem convertisse, & per alienas regulas

Venisse clanculum, per impluvium fucum factum mulieri.

At quem Deum? qui templa cæli summa sonitu concutit:

Ego homuncio hoc non facerem? Ego illud vero ita feci, ac lubens.

Multa ad hujus loci illustrationem adferri possent. Nihil enim verius est, quam picturas inhonestas juvenum animos ad nequitiam incitare. Quapropter Plato Ægyptios commendat, apud quos pictorum licentia legibus coerceretur. Non minus vere, quam scite *Propertius Lib. II. Eleg. 6.*

Quæ manus obscenas depinxit prima tabellas,

Et posuit casta turpia visa domo,

Ille puellarum ingenuos corrumpit ocellos,

Nequitiaque sua noluit esse rudes.

Ab gemat in terris, ista qui protulit arte

Jurgia sub tacita condita latitia.

Non istis olim variabant tecta figuris,

Cum paries nullo crimine pictus erat.

Nihil autem magis animum incendit, quam si Dei alicujus vel nobis præstantioris exemplo nos tutari possimus. Audi *Julium Firmicum Lib. de Erro. Proph. Relig. Adulterio delectatur aliquis? Jovem respicit, & inde cupiditatis suæ fomenta requirit. Probat, imitatur & laudat, quod Deus suus in Cygno fallit, in tauro rapit, ludet in Sa-*

tyro. Multa in hanc rem collegit eruditissimus Gruterus, quem adi *Discurs. in Tacitum Par. I. pag 47. & seqq.* Non pigebit pluscula describere ex *Achille Tatío*, non contemnendo scriptore, quia Terentium egregie illustrant. Ita quidem ille *pag. 19. Edit. Leidenfis Salmasiana* :

Ὡς δὲ ἔαμ' ὁπὸ τῷ δειπνῇ, παῖς ἔρχεται καθάραν ἀρμυσάμενος, τῷ πατρὸς οἰκίῃ, & ψαλαῖς τὸ πρῶτον διατινάξας ταῖς χορδαῖς, τὰς χορδαῖς ἔκρει, καὶ τι κρυμμένον ὑπολιγνῆας ὑποψιθεύει, τοῖς δακτύλοις. μετὰ τούτῳ ἔδη τῷ φλύκτρῳ τὰς χορδας ἔκρει, & ὁλίγον ὅσον κεντρίσας συνῆδε τοῖς κρέμασι. τὸ δὲ ἄζμα ἦν, Ἀπόλλων μισρομένῳ φθύγεται τὴν δάφνην, & δῶκαν ἄμα & μίλλῳ καταλαμβάνειν. & γινώσκῃ φυτὴν ἢ κήρην, & Ἀπέλλων τῷ φυτῷ σφραγίσμενος. Τούτῳ με μᾶλλον ἀδινῆσαν εἰς τέλος τὴν ψυχὴν ἐξέκασον. ὑπέκκαυμα γὰρ ὁπαθυμίας λόβῳ ἱερῶν. Καὶ εἰς σωρεσύνην τις ἑαυτὸν κεντρίῃ, τῷ παρεδίδεματι πρὸς τὴν μίμνησιν ἐπιθίσταται, & μάλιστα ὅταν ἐν τῷ κρείττονι ἢ παρεδίγμα. ἢ γὰρ αἱ ἀμαρταῖς τις αἰδῶς, τῷ τῷ βελτίονι ἀξιωματι παρρησία γίνεταί. Καὶ ταῦτα πρὸς ἑαυτὸν ἔλεγον. Ἰδὲ & Ἀπόλλων κέκῃν ἱερᾷ παρδίνῃ & ἱερῶν ἐκ αἰχύνεται, ἀλλὰ δῶκε τὴν σωρεδίνον. οὐ γὰρ ἐκείνῃ & αἰδῇ & ἀκρίως σωρενείς; Μὴ κρείττων εἶ τῷ δεῦ; Ὡς γὰρ ἦν ἰσώρεα, πρῶτα μὲν πρὸς ὑπὸν ἰσώρεον αἱ γυναῖκες. Posteaquam finis edendi factus est, è pueris domesticis unus cum cithara processit: ac primum nudis manibus fides tentans, exilem quendam sonum, digitis murmur adjuvantibus, edidit. Deinde sumpto plectro, cum aliquantulum chordas percussisset, cithara sono vocem ipse suam addidit: cecinisque, ut fugientem Daphnen Apollo incisaret, simulque persequeretur, ut jam

jam prehensurus esset, ut puella in arborem mutaretur, & ut ex arboris frondibus ille sibi coronam faceret. Hac profecto cantilena ardentiores amori meo faces subjecit. Amatorius enim sermo vehemens quadam cupiditatis incitatio est. Ac quamquam ad temperantiam aliquis comparatus est, exemplo tamen ad imitandum trahitur: eoque facilius, quo nobilius proponitur exemplum. Nam pudor, qui à peccando revocabat, præstantioris alicujus dignitate loco pulsus, in licentiam commutatur. Hisce itaque verbis memet alloquebar: Ecce ipse Apollo virginis amore captus est, & abjecto pudore, eam persequitur. Tunc verò cunctaris, & pudore suffunderis, & alieno tempore temperanter te geris? Num illo Deo præstantior es? Cæterum cum advesperasset, primum mulieres cubitum iuverunt.

*Pasiphae quare dicta concepisse ex tauro.
 Horatius illustratus. Meretrices quo-
 modo à Romanis & Atheniensibus di-
 vino honore cultæ; quales. Laurentia
 & Leæna. Flora non fuit Meretrix.
 Rosinus notatus. Liberi cultus valde
 obscænus. Meretrices floridis vestibus
 indutæ. Artemidorus explicatus. Ve-
 stes meretricum pellucidæ. Ausonio lux.
 Martialis explicatus. Cestus. Ronsar-
 dus notatus. Plinius explicatus.*

DE Pasiphae nota historia est, eam monstrum peperisse, cui corpus virile, caput vero tauri esset, hinc Minotaurum dictum. Taurus quippe, quem deperibat, eam lignæ inclusam vaccæ iniverat. Valde credulum esse oportet, qui hoc credat. Parum certe verisimile Palæphato visum fuit, qui putat Pasiphaen ex quodam juvene formoso, Tauro nomine, concepisse, & ex eo conceptu puerum enixam. Hoc fabulæ locum dedisse. Non quidem inepte sic dicitur: verum petitum videtur longiuscule. Mihi magis placet, ut cum Pasiphae ex tauro concepisse dicitur, per taurum intelligamus membrum virile. Et ea de causa hoc dictum fuit, quod dum Minos ab ea parte laboraret, alium ei suffecerat virilem magis ac ro-
 bu-

bustum. Istud tauri nomen hoc significatu insolens
 non esse cum alii, tum *Muretus* docuit *Var.
 Lect. lib. XII. cap. 9.* nec non *Paulus Colomesius
 Notis ad Quinctilianum pag. 239.* Neque du-
 bito id spectare *Horatium lib. II. Od. 5.*

*Nondum subacta ferre jugum valet
 Cervicē: nondum munda comparis
 Equare, nec tauri ruentis
 In Venerem tolerare pondus.*

Hoc cum turpe esse videretur, vel minus fortassis
 à quibusdam intelligeretur, occasione præbuit
 fabulam effingendi. Simile fere est illud de edu-
 catione Romuli commentum. *Laurentia Faustuli*
uxor ob vulgati corporis vilitatem lupa (quæ vox
 meretricem denotat) dicta Romulum educaverat.
 At quia turpe esse id fateri Romani existimarunt
 bestię hoc potius, quam scorto, maluerunt ad-
 scribere. Vide ꝑ. *Zeveconum ad Flor. lib. I.
 cap. 1.* Simile quid apud Athenienses evenit,
 apud quos (verba sunt. *Lact. Div. Inst. lib. I.
 cap. 20.*) meretrix quadam nomine *Leana*, cum
 tyrannum occidisset, quia nefas erat, simulacrum
 constitui meretricis in templo, animalis effigiem
 posuerunt, cujus nomen gerebat. *Plinius lib.
 XXXIV. c. 8.* ita hujus rei meminit: Et *Iphicratis*
Leana laudatur. Scortum hac *Lyra* cantu fami-
 liare *Harmodio & Aristogistoni*, consilia eorum de
 tyrannicidio, usque ad mortem excruciat, ty-
 ran-

rannis non detexit. Quamobrem Athenienses & honorem ei habere volentes, nec tamen scortum celebraſſe, animal nominis ejus fecere: atque ut intelligeretur cauſa honoris, in opere linguam addi ab artifice vetuerunt. Patet ergo meretrices à Romanis ac Athenienſibus cultas fuiſſe ſub imagine belluarum, neque inſolens eſſe id brutis adſcribi, quod factum eſt ab hominibus parum honeſtis. Audiamus *Arnobium Ad. Gent. lib. I.* In civitatibus maximis, atque in potentiſſimis populis ſacra publice ſunt ſcortis meritoriis quondam, atque in vulgarem libidinem proſtitutis. Quod vero quidam Floram, quam Romani colebant, meretricem eſſe exiſtimarunt, in eo valde falluntur, ut à ſummo Viro *Ger. Johan. Voſſio in inſigni opere de Idol. Gent. lib. I. cap. 12.* prolixè oſtenditur. Adeo ut, quæ de ea *Lactantius* narrat *loc. c.* parum vera eſſe videantur. Unde hic error ortus ſit, ſi quis me roget, affirmare non dubito, inde profluxiſſe, quod multi Larentiam, cujus feſtum decimo Calend. Decemb. celebrabatur, confuderint cum Acca Laurentia Romuli nutrice quæ Aprili menſe colitur, ut ait *Plutarchus*. Fuit autem Laurentia, quæ & Tarrutia dicitur, Anco Marcio regnante, nobiliſſimum ſcortum, quæ multorum bonorum compos facta, cum decederet, populum Romanum nuncupavit hæredem. Et ideo ab Anco in Velabro loco celeberrimo urbis ſepulta eſt (ita quidem *Macrobius Saturn. lib. I. cap. 10.*) ac ſolenne ſacrificium, eidem conſtitutum.

tum, quo Dii manibus ejus per flaminem sacrificaretur. Adi porro *Plut. Vitâ Romuli* p. 19. Edit. *Parif. & Quast. Rom.* 10. *A. Gellium. lib. VI. cap. 7. August. De Civit. Dei lib. VI. cap. 7.* Quis non videt quam facile hæc Floræ tribui potuerint, ab iis; qui præter Accam Laurentiam Larentiam non noverant? Quod autem *Johannes Rosinus*, de quo hoc *Casparis Barthii* est judicium, neminem fere minore ambitione utilius & planius res prisca juvenutem docuisse. *Antiq. Rom. lib. II. cap. 20.* in ea est sententia Floram cum Larentia eandem esse, id vereor ut cuiquam probet. Illius enim festum celebrabatur quarto Calend. Maji, hujus vero, ut diximus, decimo Calend. Decemb. Est quoque Flora inter Deos Deafque, quos Romani Romuli tempore à Sabinis acceperunt: cum Larentia demum vixerit sub Anco Martio, qui tertius post Romulum regnum obtinuit. Hic mirari subit, quid Romanos sic verecundos fecerit, ut profiteri erubuerint meretrices à se coli: cum obscænissimo Priapo palam operarentur. Non dicam quæ de obscænis in hoc Deo colendo ritibus dici potuissent: fatius enim est ea honeste ignorari, quam sciri cum pudoris damno. Istud tantum, quia minus tritum est, quod ab Ægyptiis initium sumens inde in Italiam devenit, indicabo. *Inter cetera (inquit Augustinus de Civ. Dei lib. VII. cap. 21.) quæ prætermittere, quia multa sunt, cogor: In Italia compitis quædam dicit sacra Liberi (quem quidam Priapi patrem,*

trem, quidam ipsum Priapum, plurimi vero comitem Priapum sortitum, esse existimant) consecrata, cum tanta licentia libidinis, ut in ejus honorem pudenda virila colerentur: non saltem aliquantum verecundiore secreto, sed in propatulo exultante nequitia. Nam hoc turpe membrum per Liberi dies festos cum honore magno plostellis impositum, prius per rura in compitis, & usque in urbem postea vectabatur. In oppido autem Lavinio unus Libero totus mensis tribuebatur, cujus diebus omnes verbis flagitiosissimis utebantur, donec illud membrum per forum transvectum esset, atque in locus quietus quiesceret. Cui membro inhonesto matrem-familias honestissimam, palam coronam necesse erat imponere. Sed videlicet Liber Deus placandus fuerat pro eventibus seminum: sic ab agris fascinatio propellenda, ut matrona hoc facere cogeretur in publico, quod nec meretrix, si matrona spectarent, permittere debuit in theatro. Vide quoque Cælium Rhodiginum *Ant. Lect. lib. IV, cap. 6*. Cur autem Libero Priapus in cultu adjungatur, ad August. l. c. docet Ludovicus Vives. Sed ut ad Meretrices, de quibus habeo quædam dicenda, revertar: istud apud Athenienses obtinuit, ut quæcunque artem profiterentur meretriciam, vestitu distinguerentur ab honestis matronis. Erant enim indutæ veste florida, sive varia, quod lenonum quoque & servorum proprium gestamen erat. Huic non absimiles sunt hodierni muliercularum amictus, quibus in ipsa hyeme ver quasi nobis adve-

hant,

hunt, quo joco in *Nigrino Lucianus* utitur. Hinc facile est explicare *Artemidorum lib. II. cap. 3.* ubi hæc verba legimus : Γυναικὶ δὲ ποικίλῃ καὶ αἰθροῦ ἰδῆς συμφύει. *μαλίστα δὲ ἱταίσκαι. αἱ μὲν γὰρ διὰ τὴν ἰργασίαν αἰθροῦς ἰδῆσαι χροῖται.* *Mulieribus bonum omen est somniare de veste varia & florida; maxime meretricibus: hæc enim in signum quaestus floridis vestibus utuntur.* Consule elegantissimum *Cuperum Observ. lib. III. cap. 8.* nec non doctissimum *Petitum Comment. in Leges Atticas pag. 476.* ac clarissimum *Casaubonum Animad. in Athenæum lib. VII. cap. 6.* Plura in hanc rem procul dubio suppeditat *Ferrarius Libris & Analectis de re vestiaria*, quem quidem autorem hæctenus nancisci non potui. Hujusmodi versicolorei vestem eleganter describit, quisquis sit, autor apud *Athenæum lib. XV. cap. 9.*

Γμῦτα μὲν χροῖας τότε αἱ χροῖες τι ἐν αὐραῖ
 Πόλυσται ἐν ἐσάφῃ ἐν αἰθροῖσι εἰαρινόισι,
 Οἷα φορέσθ' ἄρα, ἴντι κροῖα ἴνθ' ὑακίνθου,
 Ἐντ' ἴσθ' θαλίβοιτι, ῥόδε τ' ἐν αἰθροῖσι καλῶ
 Ἡδὲ, νεκταρίῳ, ἴν τ' ἀμβροσίας καλῆκασιν,
 Ἀθροῖσι γαρκίαν καλλιρρόν. δὲ Ἀφροδίτη,
 Ὡς οἷς πάντοτε τιθεσθ' ἱμάτια ἐστ'.

*Vesti colores & Gratia & aura
 Illeverunt, vernisque floribus eam tinxerunt,
 Qualibus exornant sese hora, croco, hyacintho,
 Florenti viola, rosa pulcro flore,*

*Iucundo, nectareo, ambrosiis calicibus
 Floribus Narcisei eleganti colore formosi. Te,
 sancta Venus,
 Id nunc precor, vestis hac ut omni tempore sa-
 cra sit.*

Erant quoque Meretricibus vestes suæ, sive seri-
 cæ, sive lineæ, pellucidæ & raræ: in quibus,
 quasi in nebula lineæ, prostabant. Sic nudæ simul
 erant, & tunica crocotula amictæ. Audiamus
Apuleium Metamorph. lib. X. ubi hunc in mo-
 dum loquitur: *Super has introcessit alia, visendo
 decore præpollens, gratiâ coloris ambrosiei desi-
 gnans Venerem: qualis fuit Venus, cum virgo
 fuit, nudo & intecto corpore resectam formosita-
 tem professa; nisi quod tenui pallio bombycino in-
 umbrabat spectabilem pubem. Quam quidem laci-
 niam curiosulus ventus satis amanter nunc lasci-
 viens reflabat: ut dimota, pateret flos ætacula:
 nunc luxurians adspirabat, ut adhærens pressule
 membrorum voluptatem graphice laciniaret. Ad
 hunc locum videndus Pricæus innotis. Martialis
 quoque lib. VIII. Epig. 68. sic loquitur.*

*Invida purpureos urat ne bruma racemos,
 Et gelidum Bacchi munera frigus edat:
 Condita perspicua vivit vindemia gemma,
 Et regitur felix, nec tamen uva latet.
 Famineum lincet sic per bombycina corpus.*

Hinc lucem fæneratur *Ansonius*, *Epig.* 38. Descripturus enim qualem velit amicam, inter cætera sic loquitur:

Nec bis cinctæ Diana placet, nec nuda Cythere:

Illa voluptatis nil habet, hæc nimium:

Callida sed media Veneris mihi venditet artem

Famina: qua jungat, quod volo, nolo voces.

Accidit aliquando unà ut essem cum juvenibus aliquot non indoctis, inter quos agebatur de rebus literariis. De variis scriptoribus loquuti tandem ad *Martialem* devenimus, cujus septimum & quadragesimum *lib.* X. Epigramma omnes uno ore ad cœlum tulimus. Ibi illa enumerat, vitam quæ faciunt beatiorē, his inter alia verbis:

Res non parva labore, sed relictæ:

Non ingratus ager, focus perennis,

Lis nunquam, toga rara, mens quieta.

Quærebat tunc unus ex nobis, per *togam raram*, quid putaremus intelligi? Quid aliud, inquam, quam modicum honorem, qui à vulgi contemptu nos vindicet, nec altius tamen evehat, ubi invidiæ & turbidis fortunæ procellis exponimur. Certe cum *Martiale* bene convenit noster *Horatius lib.* II. *Od.* 10.

*Rectius vives, Lucini, neque altum
Semper urgendo, neque dum procellas
Cautus horrescis, nimium premendo
Littus iniquum.*

*Auream quisquis mediocritatem
Diligit, tutus caret obsolet;
Sordibus tecti, caret invidenda
Sobrius aula.*

Ita quidem exponi solet, ait ille: sed videor mihi videre alium sensum genio Martialis magis proprium. Quid si *raram togam* κατασκευαστὴν dixerit pro tunica rara & pellucida, qua uti consueverant meretriculæ. Nec plane insolens est apud classicos autores vestes viriles cum muliebribus commisceri. De toga constat, *Nonco Marcello* teste æque fuisse à fæminis, quam viris usurpatam. *Toga enim*, sunt verba *Varronis*, *olim fuit commune vestimentum, & diurnum & nocturnum & muliebre & virile*. Videri de hac re potest *Petrus Faber Semest. lib. I. cap. 15.* & de pellucidis vestibus *cap. 16.* Cum autem Martialis nimis quam amoribus scortisque deditus fuerit parum mihi sit verisimile eum vitam dulcem putasse, quæ non aliquando in Veneris castris militaret. Ita quidem ille, non quod ita sentiret; sed ut à sententia recepta recederet, quod ingenii acuendi causa ut sæpe, ita libenter faciebat. Hujusmodi quoque tunica fuit cestus, qui cum Veneri potissimum, tum Venereis puellis tribuitur. Lorum per-

pertenuè collo mammisque curiose ac delicate implicatum sustinebat velum levidense, velum bombycinum ante voluptarias ædes pendulum : idque Veneris erat cestus & tunica. Adi eruditissimum *Rigaltium Notis ad Onofandri Strategicum* pag. 25. Parum se hîc mihi, ut & *Rigaltio*, probat *Petrus Ronsardus* maximi vir ingenii, & ævo suo in Gallica Poësi princeps, ad cuius *Lib. II. Amorum Car. 22.* postquam hæc verba ex *Homero lib. XIV. Iliad. vers. 214.* &c. recitasset:

Ἦ ἔ σπὶ στήθεσιν ἰλύσεται κιστὴν . ἱμάτια

Ποικίλον . ἔνθα δὲ οἱ θελητήρια πάντα τίττετο.

Ἐνθ' ἐνὶ ἀφ' φιλότης , ἔν δ' ἱμαρῶ , ἔν δ' ὀαριζυς

Πάρφασις , ἥ τε ἐκλεψα νόον ἀνέκαπρ φρογίοντων.

Τὸν ῥὰ οἱ ἑμῶκαλῃ χερσίν.

Hæc pectoribus solvit cestum, cingulum versicolor : (sic enim vertendum est ; ita ut cestus dicatur cingulum versicolor per appositionem, cujus ea vis est ut posterius explicet prius) *in eo autem illi illecebra omnes inerant. Ibi inest amor, desiderium, inest confabulatio, & blandiloquentia, quæ decipit mentem valde quoque sapientium. Hoc ejus manibus imposuit.* Postquam inquam hæc verba recitasset, ita pergit *R. Bellaqua*, (sive *Bellaqueum* cum *Aurato* malis) qui *Anacreontem* versibus Gallicis ex Græco transtulit : *Icy faut noter, que les Poëtes modernes, voire les Latins, se sont fort abusez, comme m'a conté nostre Auteur, d'avoir appelé la ceinture, ou tissu, ou*

demy-cinct de Venus, Ceston : car ceston n'est que l'Epithete de *ἰμάντις*. *Ἰμάντις* est donc la ceinture ou demy-ceinct de Venus, & cestos l'Epithete au adjectif, qui signifie brodée, 'ouvrée a l'aiguille, peinte & bien facconée. *Notandum hic est Poetas, maxime Latinos, valde falsos esse, ut noster quidem autor sentiebat, quod cingulum, sive textum, sive semicinctium Veneris CESTUM vocaverint: CESTUM enim in illo Homeri versu non est nisi epitheton τῷ ἰμάντι. Ἰμάντις autem est cingulum sive semicinctium Veneris, & cestus ejus epitheton aut adjectivum, quod significat praetextum, acufactum, pictum & bene formatum.* Non dubito fore plerosque, qui miraturi sint eò impudentiæ meretrices fuisse prolapsas, ut prostare non erubuerint in tunicis hisce, seu cestibus pellucidis. Sed quo non perrumpit istud vitium, ubi semel ei vincula laxaveris? Priusquam hinc abeamus explicandus venit optimæ frugis scriptor C. Plinius, apud quem lib. VII. cap. 48. sic legimus : *Galeria (opiola Embolaria (vulgo perperam emboliaria) reduéta est in scenam, Cn. Pompeio, Q. Sulpitio Cos. ludis pro salute Divi Augusti votivis, annum centesimum quartum agens.* Ibi vox *embolaria* multum interpretibus negotii faceffit. In eo plerique conveniunt, quod per *embolariam* scenicam intelligant mulierem. Mihi magis placet, ut meretrix intelligatur. *Ἐμβολαίαι* sunt porticus, in quibus meretrices plerumque prostabant. Ibi sua cuique cella erat, sive fornix,

nix, unde meretrices quoque *fornicaria* dictæ sunt. Atque hanc explicationem (ne quid dissimulem) acceptam fero doct: *Alemanno Notis ad Hist. Arca. Procopii p. 33.*

CAP. XI.

Arabica Lingua omnium locupletissima.

Hebraica olim, quam hodie, multo copiosior. Chinesium lingua pauperima. Vocis Interpretis tres significationes maxime vulgares. Galli omnes antiquos scriptores suâ lingua conversos legunt: nos Belgæ non item. De Belgicâ Taciti versione ab Hoofdio factâ. Triplex interpretandi, id est, auctores convertendi genus. Interpretatio, qua verbum verbo redditur. Interpretatio, quæ sensum potius appendit, quam verba adnumerat. Gronovius notatus.

A verbis non temere recedendum. Horatius explicatus. Duo in Interpretatione præcipue tenenda. De Herodiani versione à Politiano factâ, deque ipso Politiano. Ruffinus qualis Interpreter. In sacris libris vertendis maxima etiam circa verba cautio adhi-

benda. Illi sua eloquentiâ non carent. Impium Petri Bembi dictum. In Versione Græca Veteris Testamenti τῶν Septuaginta, & ipso Novo Testamento plurimi Hebraismi. Multi ex Philosophis Ethnicis à Judæis & Sacris Bibliis plurima edocti, & Plato ante omnes: Virgilius Horatiusque explicati. Anglorum de versione Tremellii ac Junii judicium. In sacris vertendis non nimis elegantis Linguae Latinae studendum. Castellio notatus. Deterio genere Interpretationis, quæ paraphrasis dicitur. Interpretatio, quæ Poëtarum Oratorumque propria. Theocritus ac Virgilius illustrati. Terentius explicatus.

Linguae aliæ aliis sunt multo copiosiores, & quanto quæ vocabulis ditior, tanto & faciliior esse solet. Si singulis rebus distincta dentur vocabula, istud ut ambiguitatis minimum, ita facilitatis plurimum parit. Nam fieri non potest, quin, ubi multa sunt *πολύσημα*, dubius aliquando hæreas quo significatu sumenda sint. Quamquam & hoc evenire posse non negem, ut ipsâ copiâ laboremus. Ut in rebus, ita & in verbis modus est, sunt certi fines, quos ultra citraque nequit consistere

stere rectum. Si multa vocabula uni rei exprimenda inserviunt magnum profecto laborem iis edificandis impendere necesse est. De Arabica lingua constat, eam antehac copiosissimam fuisse totius Orientis, imo totius orbis: quod vel hinc conijcere licet, quod aliquando vel sola diversarum ejusdem rei appellationum enumeratio & explicatio justam voluminis integri materiam præbuerit. Sic, referente *Pokokio Noti ad Abulf. p. 153. doctissimo Grammatico Ebni Chalanaih libri unius subjectum Leonis nomina, quæ quingenta, alterius serpentis, quæ ducenta. Autor. Kamusi, Muhamed Alfrauzabadus librum integrum de mellis appellationibus & utilitate se conscripsisse ait, in quo cum octoginta ejus nomina recensuerit, totam tamen ejus nomenclaturam non absolvisse notatur. Testatur idem ensis appellationes ultra mille se in libro à se compositio enumerasse. Frustra itaque sunt, qui Græcam Arabicâ uberiorem esse contendunt. Nam licet Græca vocum compositione maxime gaudeat, non tamen inde ejus copia evincitur. Hæc non è luxuria compositorum; sed ex quantitate vocum simplicium æstimanda est. Ac ut ut jam tanta in Arabica lingua copia, ac olim, non inveniatur, valde tamen locupletem esse asserunt, quibus in hac re versatissimis, fidem negare non potes. Vide sis *Augustum Pfeifferum Synops. Nobil. Quæst. Disput. I. Quæst. 8.* Habent quæque linguæ fata sua; sic ut ex hodierna inopia de priori copia judicare non liceat. Hoc*

patet in Hebræa lingua, quæ cum Israëlitis vernacula & in vulgi usu esset, locupletissimam fuisse credibile est, & si jam sit paupercula. Et id quidem ea de causa, quod nullum scriptum supersit pure Hebræum præter sacra Biblia, in quibus non omnibus de rebus, sed de historiis tantum, & divinis præceptis agitur. Egregia est *Cl. Gatakeri* observatio de *Stylo N. Test. cap. 3.* quam transcribere non gravabor. *Radicum*, inquit, numerum quod attinet; dato lingua cujusdam, Græce puta vel Latine, tantundem duntaxat, existare, partim historice, partim didactice scriptum, quantum è lingua Hebraica pura jam superest: satis probabile est, thematum, sive radicum, censum haud valde discrepantem utrobique iri deprehensum. Imo, ne longius abeamus; instituaturs collatio inter veteris instrumenti versionem Græcam, aut Latinam certam aliquam, ejusdemque contextum Hebraicum, thematumque primitivorum utrobique numerus ineatur: haud multo radicum Hebraicarum, si hanc superet saltem, superaturam vel Græcorum vel Latinorum summam existimem. Certe haud multum intra numerum bis millenarium subsistunt Themata Hebraica, vel prima, vel quorum natales primi in occulto prorsus delitescunt, ut pro primis haberi debeant. De Arabica locupletissima lingua loquuti, non nihil addemus de lingua Chinaica, quæ quod ad vocabula omnium merito esse censetur pauperima. Ponam verba *Waltoni* ad *Bibl. Polygl. Proleg.*

leg. II. Num. 21. quæ debeo Pfeiffero, qui citat *Disert. Philolog.* pag. 136. quem ibi vides, ut & *Synops. Nobil. Quaest. Disput. II. Quaest. 20.* Sic igitur Waltonus: *Vocabula habent, Chinenſes ſcilicet, pauciſſima, omniaque monosyllaba: Nomina enim non agnoſcunt ultra CCCXXVI. nec in univerſum ultra CIO CCXXVIII. vocabula. Characteres tamen habent fere infinitos. Alii ſexaginta millia, alii octoginta, alii uſque ad centum & viginti millia numerant: omneſque in vocabulo ſuo magno, quod HALPIEM, i. e. OCEANUM nominant, deſcripti ſunt. Et qui ad eruditionis faſtigium apud ipſos pervenire velit, neceſſe eſt ut omnes vel pleroſque memoriter teneat. Ad communem tamen uſum inter artiſices, mercatores alioſque de plebe, octo vel decem millia ſatis erunt. Hinc apud ipſos doctiſſimus habetur, qui plures illorum characterum memoria tenuerit. Maxima itaque Chinenſes in loquendo homonymia laborant, cum una vox quandoque viginti vel triginta diverſiſſimas ſuſtineat ſignificationes, quæ ſola pronuntiatione diſtinguuntur. In ſcribendo tamen per illos characteres omnem homonymiam effugiunt, qui, etſi in ampliſſimo Chinarum regno viginti circiter ſint linguæ, tamen ab omnibus pariter legi & intelligi queunt. Unde quidam concludunt poſſe dari certas figuras, quarum beneficio à mutis res ipſæ, earumque conceptus nobis ſiſtantur, per quas ſe mutuo intelligere poſſint omnes hujus univerſi incolæ, ut ut*

diversissimis linguis utantur. Vide *Vossium de Arte Grammaticâ lib. I. cap. 4. & Historiam Geographicam & Civilem nuper editam pag. 225.* Sed ut tandem eò, quò tendimus, perveniamus; de lingua Latina varia sunt doctorum Virorum iudicia quorum alii eam Græca locupletiolem esse asserunt, alii vero negant. Utri autem rectius sentiant definire, neque partium nostrarum neque virium est. Dignissimus lectu est liber *Marii Corradi*, quem inscripsit *de copia Latini Sermōnis*, quem tamen in omnibus probare non possumus. Istud saltem in dubium mihi nemo vocare poterit, Latinis multa esse vocabula *εὐλομια*. Sumamus vocem *Interpretis*, quæ cum alias quasdam, tum has maxime vulgatas significationes habet. *Interpres* eum denotat qui partes dissidentes componit atque conciliat. Sic ab *Asconio Padiano Comment. in II. Orat. Cicer. contra Verrem* interpretes dicuntur, per quos inducitur pactio. Hoc sensu dixit *Virgilius lib. IV. Aeneid. v. 608.*

*Tuque harum interpretis curarum & conscia
Iuno.*

Ubi *Servius*, *Interpres*, hoc est *Mediatrix & conciliatrix*. Ac quoniam huiusmodi mediatores animos eorum, quibus dati sunt interpretes, scrutantur, & postmodum illis aperiunt, factum est ut *interpres* pro eo accipiatur, qui obscura exponit.

nit. Sic Virgilius Lib. X. *Aeneid.* vers. 175

— Ille Hominum Divumque interpretas A-
sylvas.

Ubi iterum Servius, Deorum quos interpretatur, hominum, quibus interpretatur, & divinas indicat mentes, interpretas vocatur. Cumque etiam, qui ex incognita lingua in cognitam aliquid transfert, obscuram quodammodo orationem claram reddit ac perspicuam, hinc quoque Interpretas is dicitur, qui quid in aliam seu scripto, seu vivâ voce, linguam vertit. Hoc sensu ait Horatius in *Arte Poëtica* v. 133.

*Nec verbum verbo curabis reddere fidus
Interpres.*

Nos de interprete aliquid dicturi, deque interpretandi modis, eam vocem postremo significatu sumimus. Istud autem imprimis certum est, cum qui sit interpretaturus, utriusque linguæ, ex qua & in quam convertit, gnarum peritumque esse oportere. Sunt autem ejusmodi interpretationes per quam necessariae: multa enim singulae gentes vernaculâ quæque linguâ conscripserunt quæ scire omnium interest. Atque utinam nobis Belgis tam felicibus esse liceret, quam se esse jactitant Galli! Sic enim dicunt, nihil esse quod ad scientiarum orbem (Græci *ἐγκυκλοπαιδείας* vocant) pertinet, quod Gallicâ linguâ non sit scriptum, vel aliun-

aliunde in eam conversum. Exstat *Cl. Sorelli*, qui inter Historiographos Regis Galliarum principem locum occupat, egregius liber, qui inscribitur *Bibliothèque Française. i. e. Bibliotheca Gallica* quo conatur ostendere solâ contentos esse posse Gallicâ Linguâ, qui ad eruditionem tendunt, ac Gallicos quidem libros, qui ad eam assequendam faciunt, magno numero recenset. Et si verum fateri volumus, nullus ex antiquis, siue Græci sint, siue Latini, autoribus invenitur, quem conversum suâ linguâ Galli non legant. Historici, Oratores, Philosophi, Poëtæ, qui olim Athenis vel Romæ vixerunt, jam in Gallia Gallis loquuntur. Merito profecto stupemus assiduam *Marolli* diligentiam, qui præter alia multa quæ cum vertit, tum ipse composuit, hos Poëtas Latinos in vernaculam linguam transtulit: *Lucretium, Virgilium, Horatium, Ovidium, Lucandum, Catullum, Tibullum, Propertium, Juvenalem, Persum, Martialem, Plautum, Terentium, Senecam Tragicum, & Papinium Statium*. Non ignarus sum omnes non æque bene de his versionibus sentire, cum quæ illi ligatâ oratione scripserant, hic solutâ reddiderit: multa enim esse, quæ plane sordeant, nisi ligatis verbis & Poëtico spiritu efferantur. Ego, cum nihil difficilius esse sciam quam quid ligatis verbis ita vertere, ut nativus simul decor retineatur, nihil autem sensui detrahatur, aut addatur, minime vituperandos censeo, qui integram fidem fer-

servant, & verum Poëtarum sensum verbis licet solutis efferunt. Quid vero *Ablancurtius* in historicis transferendis præstiterit, ex Græcis *Xenophon*, ex Latinis *Tacitus* potissimum testantur. De *Claudio Fabro*, *Vogelasi* Domino, qui patre natus erat Antonio Fabro, cui tum alia multa tum *Codicem* debemus *Fabrianum*, de eo Claudio constat, triginta annos insudasse eum versioni *Quinti Curtii*, quam ut ut elegantissimam esse omnes concedant, tamen haud tanto temporis dispendio digna videri potest. Velim his Gallorum exemplis nostri ut incitentur Belgæ, ne minus hanc Spartam exornent. Quisquis nostram, simul cum Græca & Latina, linguam excoluit, hoc sibi negotii datum putet. Sane pudet me pigetque, quoties cogito nihil fere priscorum Autorum in nostram conversum esse linguam, quæ ut elegantia Gallicæ non nihil cedat, ita copia & compositionis facilitate multo est superior. Saltem ad historicos transferendos gravitatis habet plurimum. Hic deflere subit vestram, ô Belgæ, sortem, quod vobis carendum sit integro Tacito, quem Nobilissimus *Hoofdius*, ex Latino Belgicum fecit. Quanti iste thesaurus faciendus sit, ex edito specimine patet. Quid autem obstat cur non toto fruamur? Ipse testamento cavit, quia nondum omnia satis elaboraverat. Sic *Virgilius* testamento comburi jussit *Aeneida*, ut rem inemendatam imperfectamque, ut *Donatus* scribit in *ejus Vita*. Sed cur *Hoofdii* hæredes *Augustum* non

non imitantur qui ex quarta parte *Virgilii* hæres factus tam dirum nefas prohibuit. Notum est Imperatoris carmen, quo inter alia sic loquitur:

*Sed legum servanda fides; suprema voluntas
Quod mandat, ferique jubet, parere necesse
est:*

*Frangatur potius legum veneranda potestas,
Quam tot congestos noctesque diesque labores
Hauferit una dies.*

Atque istam jacturam, si hæredes minus assentiantur, feremus iniquius, quod neminem inventum iri existimen, qui Tacitum melius, quam Hoofdus, converterit: ita gravis est utriusque stilus ac pondere plenus. Est quidem ille autor in Belgicum bis conversus; sed ita ut intelligi à nemine possit; adeò parum, prior præsertim interpret, & Latinæ & nostræ linguæ videtur fuisse gnarus. Neque minus in cæteris, quotquot ex antiquis translati sunt, peccatum fuit. Aut si cui fidelior contigerit interpret, is tamen tam obsoletis & uti desitis verbis usus est, ut absque tædio legi non queat. Verum enim verò (ut ex hoc diverticulo redeamus in viam) cum de tribus interpretandi modis non nihil me dicturum promiserim, hoc jam agamus, benevole Lector. Primus interpretandi modus is est, cum nulla elegantiae habita ratione, eodem ordine, eodemque numero verba redduntur. Hoc si quis, verbum ver-

bo reddere, appellare velit, haud equidem valde repugnaverim: quamquam aliud istis verbis *Horatium* intendisse mox ostendam. Hoc modo Poëtas Græcos multi verterunt in Latinum, utili omnino instituto. Fit autem hujusmodi interpretatio magis ut intelligamus illam ex qua, quam in quam linguam conscribitur. Sic pueri dum Latine quodammodo sciunt, per hanc versionem ad Græca penetrant. Si quis verò solas ejusmodi translationes sine collatione *ἢ ἰδέσθαι* (quo vocabulo in re simili olim usus est Origines, ut videre est apud *Morum Exercit. Genev. pag. 121.*) legere aggreditur, vix percipiet, quid sibi autor velit. Magis enim in hac versione ad verba, quam ad sensum attenditur. Sic nempe comparatum est, ut quæ in una lingua intellectu facilia sint, eadem eisdem verbis in alteram translata intelligi à nullo possint. Secundus interpretandi modus hic est, cum in eo interpret laborat ut verum auctoris sensum ob oculos ponat. Quid autem in ejusmodi interpretatione potissimum requiratur, id potius *Petri Nannii*, Viri Doctissimi, quam meis verbis proponam. Sic igitur ille *Συμμιχ. Lib. I. c. 3. Video in omni translatione tria esse observanda. Ut verba, quatenus licet, retineantur, quale est verbum verbo expressum, quod isto in loco vestitum appellabimus. Ut sententia ubique incolumis maneat, quod pro corpore imputabimus. Denique ut indoles incorrupte servetur, quod (scilicet) animam orationis nominare posses. Ea autem consistit*

in

in ipsis figuris dictionis, & moratam actuosamque sententiam reddit. Multum enim interest an per dictionem, an per interpretationem, an interrogationem, insultationem, optationem, vel affirmationem enuntiaveris. Jam superiori seculo quidam verba verbis ita admensi sunt, ut sententiam depravarint, non aliter quam indocti pictores, qui operosi in cultu effigendo, membra secundum vestem distorquent: cum Apelles Parrhasique prius nudum corpus efformare, quam vestem superinducere soleant. In quorum numero Argyropyllum reponas & Raffinum, alterum interpretem Aristotelis, alterum Gregorii Nazianceni, de quibus vere id hemistichii dici potest:

— — — DANTSINE MENTE
SONUM.

Fit autem illud vel ex inscitia, vel ex ignorantia: cum enim sententiam apprehendere nequeunt, verba reddunt, quasi quod ipsi non intellexerint, alius ex illorum verbis intelligere queat: cum verba non minus ex sententia vim suam & significatum accipiant, quam sententiam constituent. Aliqui rursus: fidem existimant à numero verborum non discedere. Alii aliquanto feliciores verba simul & sententiam reponunt; sed indole prorsus extincta. Ex quorum translatione quid auctor dixerit vides, sed quo modo dixerit non vides. Vis enim affectuum, gratia figurarum, lepor,

lepor, venustas, elegantia dignitas; acrimonia, arguties nusquam apparent. Talis est (haud dubie) *Marfilius Ficinus*, ex cujus quidem translatione sentimus, quid *Plato* velit; sed ita, ut si ipse *Plato* legeret, pro suis non agnosceret. Ubi enim in *Latinis Heroica* illa vis & sublimitas grandiloqua? Ubi ista beata, nec tamen ociosa verborum luxurios. Mentior, nisi id statim judicaturus es, lecto *Platonis Axiocho* ab *Agricola* verso. Est quidem illud opus adulterinum & è *Platonis* familia eliminatum; sed tamen dexteritate vertendi jus legitimorum filiorum & adoptionem emeruit. Qui igitur reddendis verbis sententiam corrumpunt monstra gignunt. Qui sententiam incolumem indole extincta afferunt, cadaver edunt, vel (si malis) sceleton. Omne autem punctum tulit, qui tria ista officia absoluit. Pro exemplo adduci posset *Angeli Politiani Moschus*, ubi verbum verbo, sententia sententia, versus versui, servatis iisdem numeris redditur. Sed quia operosius hoc est, ideo eruditissimi quique circa sententiam & indolem diligenter versantur, levi verborum cura habita, Qualis est *H. Barbarus*, atque adeo ipse *Cicero*. Nec longe abest ab iis *G. Budeus*. Religiosiores autem *Erasmus* & *Rodolphus Agricola*. Hactenus eruditissimus *Nannius*, quem describere non piguit, quia rarissime prostat, & placitura credo cordato lectori, quæ dixit verissima. Illud in primis certum est, eruditissimos quosque interpretes, levi verborum cura habita, ad sententiam

& in idolem potissimum intendere. Quid Cicerone in vertendo eruditius aut elegantius dici aut fingi potest? Is tamen parum de verbis sollicitus, in hoc tantum incubuit, ut ipsam sententiam exprimeret. Digna sunt in hanc rem quæ conferas diligenter collecta ab Henrico Stephano in *Lexico Græ. Lat. Ciceroniano*. Quin ipsum Tullium audiamus *Lib. III. de Finib.* Ibi docens de Philosophia Græca quo modo Latine differendum sit ita Catonem alloquitur: *Nec tamen exprimi verbum è verbo necesse erit, ut interpretes indiserti solent: cur sit verbum, quod idem declaret, magis minusve usitatum. Equidem soleo etiam, quod uno Græci, si aliter non possum, idem pluribus verbis exponere. Hoc vero quo pacto fiat non aliunde melius, quam ex ipso Tullio discemus. Sic igitur ille de Opt. Gener. Orat. Converte enim ex *Aticis* duorum eloquentissimorum nobilissimas orationes, inter se contrarias, *Æschinis* *Demosthenis*que: nec converte ut interpret, sed ut orator, sententiis iisdem, & earum formis tanquam figuris, verbis ad nostram consuetudinem aptis: in quibus non verbum pro verbo necesse habui reddere, sed genus omnium verborum vimque servavi: non enim ea me adnumerare lectori putavi oportere, sed tanquam appendere. Quod autem se non ut interpretem, sed ut oratorem convertisse ait, id de ejusmodi interprete intelligendum est, quem priori loco indisertum vocaverat, vel qui in puerorum gratiam, ut Græce discen-*

discientes vim proprietatemque verborum perciperent, verbum è verbo exprimebat. Certe cum *Cicerone* bene convenit *Hieronymo*, cujus verba ad *Pammach. de Opt. Gen. Interpr.* ita habent. Sufficit in prasens nominasse *Hilarium confessorem*, qui *homilias* in *Job*, & in *Psalmos tractatus plurimos* in *Latinum* vertit è *Graco*; nec adsedit *litera* dormitanti, & *putidâ rusticorum interpretatione* se torfit; sed quasi captivos sensus in suam linguam victoris jure transtulit. Qui secus faciunt, hos alibi ait, verbum de verbo exprimere conantes, obscuriores facere sententias, & veluti herbis crescentibus frugum strangulare ubertatem. Quare interpretationem illorum *putidam* vocat, hoc est, (uti observat maximum haud ita pridem Belgii lumen J. F. Gronovius *Observat. in Script. Ecclesiast. Cap. xix.*) anxiae, stultæque diligentiae. Sed cum nullibi aut perrarò hoc significatu ea vox inveniatur, vir maximus heic dormitasse videri potest. Locum enim *Ciceronis Lib. III. de Orat.* sive malo libro, sive memoriâ deceptus citat perperam. Nam ibi non legitur, ut vult Gronovius, *Nolo exprimi putidius, nolo obscurari diligentia*: sed, *Nolo exprimi literas putidius, nolo obscurari negligentius*. Quid autem *putidum* sit, ex *Nonio Marcello* discimus. *Putidum*, inquit, non solum ab ore foetido & gravi, quod naribus prebetur, sed & quod auribus triste, & insuave, austerum, & rancidum, id *putidum* dici posse, auctoritas vetustatis admisit. *Literæ* igitur

tur exprimuntur *putidius*, cum vox austerè & insuaviter sonat, cui vitio illud opponitur, cum exilius efferuntur, aut pravâ quâdam negligentia in ipso quasi ore opprimuntur. Hoc satis patet ex iis, quæ statim apud *Ciceronem* subsequuntur: *Nolo verba exiliter examinata exire, nolo inflata & quasi anhelata gravius.* Et alibi idem *Cicero* ait: *Sonus erat dulcis, litera neque expressa, neque oppressa, ne aut obscurum esset, aut nimis putidum.* Hinc patet *putidam* interpretationem Hieronymo non eam dici, quæ anxie nimis stultæque diligentia esset; sed quæ austerior atque insuavior, qualis eorum est, qui verbum de verbo exprimentes obscuriores faciunt sententias. Quod autem dixi illam vocem istoc significatu perrarò inveniri, non ita intelligendum est, quasi *putidus* non sæpe significet hominem nimis diligentem, præsertim in re non magni momenti, in re quapiam persequenda nimium: sed nego eam rebus tribui. Hominibus ipsis adscribi certissimum est. *Affectatus* contra non hominibus adscribitur; sed rebus, quæ dicuntur affectatæ. Sic dicimus affectatus sermo, affectatus incessus, affectata oratio &c. Vide *Johann. Vorstium de Latinitate merito suspecta* C. 15. Omnes igitur, qui rusticis hisce & indifertis interpretibus præstare student, summa opemiti dicet, ut cum sententias recte perceperint, easdem ita reddant, ut ne versæ quidem esse videantur. Hac laude claudit Nicolaus Perottus, celebre inter doctos nomen, de quo ita alicubi magnus

Casaubonus : *Erat in hoc viro non vulgaris industria in Græcis ita vertendis (quæ quidem intelligeret) ut nullum persæpe Græci idiomatis in Latina ejus versione vestigium appareret, quam interdum esse opus æmulo dicas, non alieni interpretationem. Istud ex Paulo Jovio discimus quosdam ex æmulis ideo ejus versionem, quam ex Græco Polybii fecerat, antiquissimam fuisse furtoque surreptam judicasse, quod omnes aliorum interpretationes recens factas prorsus antecederet. Si quid reticetur, quod in alia lingua omitti non potest, id addant: si quid vero præter sensum ornatûs gratia maxime in orationis particulis additur, id nisi eleganter exprimi potest, omittant. Quare nec iisdem periodis includi necesse est, vel iisdem distinctionibus orationem interpungi. Nolim tamen hoc eo animo à me dictum quispiam existimet, quasi temere à verbis recedendum sit: nam optimum esse censeo, ut illa, quatenus liceat, retineantur, nec quicquam præter eorum sententiam, assuatur. Hoc est, quod *Horatius* monet :*

*Nec verbum verbo curabis reddere fidus
Interpres.*

De quo loco vide sis *Henricum Stephanum Schediasm. Lib. I. Cap. 19. & Observ. in Horat. Diatribâ V. in fine.* Hoc interpretandi genere se valde delectari idem alibi ait in *Pseudo-Cicero-*

ne Dialogo, cum propemodum verbum verbo redditur: quæ certe interpretatio, quoniam est adstrictior, veniâ quoque digna est, si quid habet duriusculi. Ejusdem etiam sententiæ est *Erasmus*, adeo ut minus quoque in hac parte Ciceroni faverit. Tædio non erit Viri magni verba describere ex *præf. præfixâ Hecub. & Iphig. Tragœd.* à se in Latinum sermonem conversis: *Conor, quo ad licet, Græcanici poematis figuras, quasque filum representare, dum versum versui, dum verbum pene verbo reddere nitor, dum ubique sententiæ vim, ac pondus summa cum fide Latinis auribus appendere studeo. Sive quod mihi non perinde probatur illa in vertendis autoribus libertas, quam Marcus Tullius ut aliis permittit, ita ipse (pene dixerim immodice) usurpavit, sive quod novus interpretes in hanc malui peccare partem, ut supersticiosior alicubi viderer potius, quam licentior, id est, ut litoralibus in harenis non nunquam harere viderer potius, quam fracta nave mediis natâre fluctibus, maluique committere, ut eruditi candorem, & concinnitatem carminis in me forsitan desiderarent, quam fidem. Istud mihi negare nemo poterit, diligenter imprimis perscrutandum esse cujusque linguæ genium, ut sciatur ubi verbis sit inhærendum, vel ab iis plus minusve declinandum. In eo enim negotium omne consistit, ut eleganter juxta ac vere autoris sensum versione nostra lectori ob oculos ponamus. Qui hoc consequutus fuerit, is*
omne

omne punctum tulit. Maxime autem necessarium est, ut adagia, quæ non rara occurrunt, adagiis, & idiomata idiomatibus vertantur, quod neglectum obscuritatis plurimum parit: adeo ut quid dicatur sæpe non intelligas: *Hieronymus ad Suniam & Fretellam* ait, *Hanc esse regulam boni interpretis, ut idioma alterius lingua sua lingua exprimat proprietate: quod quidem & Tullium in Protagora Platonis, & in Oeconomico Xenophontis, & in Demosthenis contra Æschinem oratione fecisse convincimus, & Plantum, Terentium, Cæciliumque, eruditissimos viros, in Græcis comædiis transferendis.* Duo sunt, quæ hîc potissimum moneam. Unum, ut ubi dubia sit orationis incerta sententia, eam quoque dubie ac incerte reddas: Maxime mihi semper placuit, quod de emendandis autoribus ait Vir Cla. Vincent. Contarenius de *Frument. Rom. Larg. Pag. 34.* Hoc quæso, Lector, ad eos interpretandos transfer. Sic ille: *Statuo igitur esse emendandi genus vetustis autoribus imprimis perniciosum, quo tollitur verbum, cujus multa esse notiones possunt, & supponitur alterum, cujus vis pertinet ad pauciora. Quod si id eo consilio fiat, ut unum tantum significet, ferendum non esse, ne si constet quidem, id ipsum scriptorem dicere.* Alterum, ne rebus antiquis nomina imponamus recens nata: quod imprimis observari velim circa dignitates & munera, quibus cum nostris nulla est convenientia. Quo pacto enim *Ætules, Prætores, Proconsules, Tribu-*

nos, Propratores &c. hodiernis dignitatum nominibus ita exprimas, ut quæ eorum munera fuerint, sciri à quopiam possit? Præstat ut ipsa Latina nomina retineantur, quorum explicatio vel marginem occupare, vel calcem subsequi potest. Consule, si placet, Doct. *Sorellum dans sa Bibliothèque Françoisé Chapit. ix. Pag. 235.* Plura quidem animo obversantur, quæ monerem forsitan non indigna: sed delibare hanc materiam, non exhaustire constituimus. Olim pluribus & accuratius dicemus. Jam

Condo & compono, quæ mox depromere possim.

Interim maxime desidero librum *de fidi interpretis officio*, quem conscripsisse se affirmat *Henricus Stephanus Schediasm. Lib. III. Cap. 27.* nec non *Cl. Casauboni* Diatribam quam de optimo genere interpretandi ex una in alteram linguam, quâ se adversus eos defendit, quibus nulla probatur versio, quæ non sit *verba verba*, & pene de verbo ad verbum expressa. Hanc ait se composuisse. *Præf. Polybio præfixâ.* Sed pergamus. Inter eos, qui interpretandi negotium in se susceperint, plurimum sese mihi approbant Galli, quorum labor in eo potissimum defudat, ut eleganter sententiam expriment: quamquam plusculum sibi alicubi in quibusdam mutandis indulgisse haud negem. Eorum, qui scriptores ex Græco fecerint Latinos, alii aliis fuerunt multo feliciores. Tres maxime laudantur, *Sigismundus Gelenius, Guillelmus Xylan-*

Xylander, & Fredericus Sylburgius. Hos tamen omnes antequam Angelus Politianus, qui Herodianum optimum scriptorem optime ac supra quam dici potest eleganter, transtulit. Non ignoro H. Stephanum multa in Politiano reprehendisse: sed id minus ex merito tanto interpreti accidisse, luculenter ostendit J. H. Bœclerus, cui res literaria ut plurimum debet, ita quoque plurimum vult debere. Non plane aberrasse à vero Vir hic Clarissimus censendus est, cum ait, Henricum Stephanum, tum alibi tum in illa in Politianum censura præsertim prodidisse, se minus Latine quam Græce eruditum. Certe Stephanum multum in literis potuisse, tot ipsius monumenta testantur, quot nulli ferme post se reliquerunt. Verum enim vero non raro in id vitium incurrit, quod *Horatius* his verbis notat:

Quum tua pervideas oculis mala lippus inun-
ctis,

Cur in amicorum vitiis tam cernis acutum,
Quam aut aquila aut serpens Epidaurius?

Hoc credo occasionem dedisse *Josepho Scaligero Scaligeranis Primis Pag. 55.* ita, quamquam paulo durius scribendi: *Lexicon Erotiani exstat Geneva apud Henricum Stephanum, apud quem invenias auctores mire depravatos, quippe qui φιλαυτία laborans temere quicquid displicet immutat, & corrumpit.* Male itaque Vir doctissimus istam Politiani versionem, cui similem hactenus

in nullo scriptore habemus, tot castigationibus non necessariis in ordinem redigere conatus est. Cum istam versionem Politiani esse dico, communem sequor sententiam: non enim desunt, qui eam Tiphernati adscribant. *Paulus* quidem *Jovius* *Elogio Tiphernatis* hæc verba usurpat: *Fama quoque fertur Herodiani historias ejus ingenio laboreque fuisse translata: quasi eas morienti subtraxerit Politianus, vir in literario negotio saepe convictus furti.* Vide *Gerar. Joan. Vossium* insigni opere *de Historic. Lat. Pag. 628.* & *de Poëtis Latinis Pag. 79.* Sic certe plagiarium fuerit Politianus, & ex Justininiani, sive alius cujusdam ex Orientis Imperatoribus constitutione manus amputatione mulctandus. Vide *P. Fabrum Semest. Lib. III. Cap. 19.* Quam pœnam ex hodiernis scriptoribus, si rigido jure ageretur, pauci effugerent: esse enim plagiariorum multa genera magnamque copiam prolixè ostendit Jesuita *Rainandus Erotemat. de bonis & malis libris*, in quo libro cum liberam de multis censuram instituisset, Romanæ curiæ censuram effugere non potuit. *Voiez le Journal des Sçavans de l'an 1667. P. 79.* Proxime ad Politianum accedunt in interpretationis genere duo clarissimi viri *Isaacus Casaubonus* & *Nicolaus Alemannus*, quorum alter *Polybium*, alter *Procopii* in linguam Latinam ex Græco convertit: ita tamen ut non nihil discriminis intersit, cum liberius & cum quadam paraphraseos mixtura sensum exprimant. Ad
doctif-

doctissimum *Boeclerum in Herodian. Annot. P. 462.* De se quidem ipse *Alemannus prafat. secund. P. 15.* sic loquitur : *Noftra verò translatio fententiis quidem ad Græca hiftoria fidem, verbis & modis ad Latinam confuetudinem aptis compofita eft. Id genus interpretandi cum Hieronymo ac univerfa antiquitate optimum puto; & fi hiftoriam interpreteris, id maxime convenire cenfeo: denique fi cujus alterius fcriptoris, Procopii certe ftylus hoc in primis requirere femper vifus eft mihi, cujus formam dicendi fi fpectes ea fophifticis compa eft lenociniis, Atticisque leporibus ad oftentationem inftituta, à quo orationis habitu Latina gravitas præfertim in hiftoria quam abhorreat nemo nescit. Quod hætenus contra eos fcripfimus, qui dum verba annumerant, fententiam depravant infipidamque reddunt, id eos non excufat, qui ut verborum, ita & fententiæ parum folliciti, vel demunt multa, vel addunt de fuo. Hac labe ne Hieronymum quidem caruiffe, & ipfe de fe alibi teftatur, & ex Ruffini in eum invectivis conftare cuivis poteft. Jam qui, qualisque interpres ipfe Ruffinus fuerit, luculentiffimo documento eft (ut nihil dicam de Iofepho, fi credere fas eft, ah hoc ipfo Ruffino translato: vide *Th. Reinesium Epift. ad J. Vorftium p. 50.*) ab eo olim Latine edita ecclefiaftica Eufebii hiftoria. Si quis enim Græca cum Latinis contenderit, reperiet Ruffinum audaci licentia ufum multa addidiffe, demiffe, plura, nec pauciora mutaffe, dimidium octavi libri omiffiffe, decimum*

mum vix attigisse. Non minus, si non magis
 quoque, in Originis scriptis transferendis auda-
 ciæ suæ dicam? an impudentiæ hunc hominem
 indulgisse omnium clarissime docet *Joan. Dalens*,
 Vir eruditissimus, quem adi *Lib. II. de scriptis*
Pseudo-Diony: & Pseudo-Ignat: Cap. 40. &
seqq. nec non *Christ. Sandium Tract de Veter:*
Script: Eccles: Pag. 65. & seqq. Sic igitur sta-
 tuimus, à verbis quandoque discedere interpre-
 tibus licere, à sensu vero nunquam. Magis ta-
 men illud de profanis quam sacris scriptoribus af-
 firmandum ducimus, in quibus interpretandis ma-
 jor est, etiam circa verba, cautio diligentiaque
 adhibenda. Quare illorum opera maxime laudan-
 da est; qui iisdem Phrasibus, & totidem verbis,
 si potest, sacros autores convertunt, quibus quis-
 que usus est suâ linguâ. Aliter enim se habent,
 quæ divinitus conscripta sunt, quam, quæ ho-
 minum excogitat indultia. Illa non modo verif-
 sima sunt; sed ita quoque prolata atque expressa,
 ut elegantius significantiusve non possint. Tanta
 profecto Phrasium verborumque vis est, quibus
 sacris utuntur scriptores, ut frustra sint, qui eam
 assequi se posse sperent. Neque id mirum cuiquam
 videri debet: sunt enim ea, non minus quam ipsæ
 res, divinitus prolata. Est quidem inter sacros
 autores non parva stili diversitas, pro cuiusque
 genio ingenioque; sed quam ita semper Deus di-
 rexit, ut non, nisi quam optime, res, divinas
 propoherent. Quod si nos Sacrorum scriptorum
 elegan-

elegantiam non capimus, id nostra culpa accidit, qui sumus in iis suâ linguâ legendis parum exercitati. Non negamus quidem abesse à Sacra Scriptura mellitos verborum globulos, ac flosculos, quos in prophanis scriptoribus captamus: sed eos recte abesse, ii intelligunt, qui sciunt ~~et aptius~~ *decori* ubique rationem esse habendam. Ibi sermo instituitur à viris sanctis & non nisi de rebus gravibus. In his nihil fuci opus est, illecebrarum nihil. Possumus huc accommodare quod de pulcra muliere *Plautus* ait, *Mostel. Act. 1. S. 3.*

Pulcra mulier nuda erit, quam purpurata, pulcrior.

Postea nequicquam exornata est bene, si morata est male.

Pulcrum ornatum turpes mores pejus cæno continunt:

Nam nisi pulcra est, nimis ornata est.

Bene igitur, meo iudicio, scripsisse videtur *Flaccius Illyricus* *Clav. Sac. Script. Part. II. pag. 15.* *Etsi non adsunt illa otiosa delicataque Veneres aut illecebra, illa externa dulcedo aut blanditia, illa numerositas sonorum, seu nuga illa canora in sermone sacrarum literarum, quæ in ostentatoriis oratorum Poëtarumque scriptis tunc temporis in Græcia & Roma maximâ cum aviditate & admiratione audiebantur & celebrabantur, tamen suâ gravi masculaque eloquentia minime destituuntur.* Consule porro summum Theologum *Andream Rive-*

Rivetum Isag. ad Soc. Script. Cap. 28. & quos ibi citat autores, imprimis illustrissimum Plessaum de Verit. Relig. Christ. Lib. IV. Cap. 26. Quis itaque ferat istiusmodi homines, qui ullam sacris literis inesse eloquentiam negant, quales aliquot in Italia olim fuisse, sunt qui memoriæ produnt. Inter hujus farinæ ingenia chorum duxit Petrus Bembus, qui cum in id totis viribus incumberet, ut in solutâ oratione Ciceronis puritatem, ac in ligatâ Ovidii assequeretur suavitatem facilitatemque, Cardinalis factus, & à quodam è collegis admonitus, sacris literis operam ut daret, & Prophetica atque Apostolica scripta evolveret, invereconde profecto ac impie respondit, se semel illa legisse, & valde fuisse offensum, cum ob humile & vile dictionis genus, tum ob res ipsas: nusquam enim se apud ullum scriptorem legisse orationem minus compositam & cohærentem, aut in omnibus partibus minus consentientem: amissurum quin etiam quod reliquum haberet pietatis, si semel præterea Sacra Biblia legendo perlustraret. Non desunt qui simile quid de Angelo Politiano narrant, quos hoc unum satis refellat, quod ipse ait Lib. IV. Epist. 10. Cum per hos quadraginta proximos dies enarrandis populo sacris literis essem occupatus, pellegi tamen libros carminum tuorum, quos mihi tu pro singulari humanitate tua, mutuoque inter nos amore dedicaveras. Adi sis Vossium de Poëtis Latinis pag. 80. Quanto satius est id dicere, quod
Esaia

Esaia Propheta alibi à *Joan. Pico* dictum, toti Sacrae Scripturae convenit. Scilicet nihil esse tam vehemens, tam subline, tam copiosum, tam resonans, nihil tam terrorem incutiens, nihil tam veram artem undique spirans. Ejusmodi enim eloquentiam divinis autoribus, asserimus, quae est cum maxima significantia ac perspicuitate conjuncta. Si qua autem nobis videntur obscuriora, id plerumque nostrae adscribendum est negligentiae, aut Phrasium verborumve ignorantiae. Non est hic perfunctorie agendum; cum Sacra Scriptura plurima in recessu recondat, quae frustra saepe exprimere conatur humana industria. Mihi certe id aliquoties usu venit, ut tantam in sacris literis invenerim vim & efficaciam, quantam verbis efferre non poteram. Quis igitur neget, cum optime facere, qui in istis vertendis, quantum sententia patitur, verbum de verbo transfert, & phrasibus iisdem sibi utendum putat, licet sint aliquando auribus nostris insolentiores. Constat hoc fecisse Septuaginta interpretes, quorum verso Hebraismis scater quam plurimis, quos scilicet eadem vi sese transferre posse desperabant. Hebraeam linguam suas habere Veneres maxime cum agitur de rebus sacris, quas caeterae linguae non assequuntur, norunt eruditi omnes: sed ii imprimis, qui conati sunt aliquid ex Hebraeo transferre. Hinc *Sirachidis* vetus querela praef. in *Librum ex Hebraeo avi sui conversum*:

Παρομιμνησθὲν ἡμεῖς τοῦ πατρὸς ἡμῶν ἡμεῖς οὐκ ἔμελλομεν ἵνα ἀνέλθωμεν εἰς τὸν οὐρανόν.

δα, & συγγνώμην ἔχειν ἐφ' οἷς ἐν δόξα μὲν ἐστὶ τῶν ἁρμονικῶν
 παρομοιωμάτων τισὶ τῶν λέξαντες ἰσχυραμέν, ἐν δὲ ἰσοδυναμείᾳ αὐτῶν
 ἐν αὐτοῖς Ἐβραϊστὶ λεγόμενα, & οὕτως μεταχθῆναι ἐτίθεναι γλώσσας.

Admoniti itaque estote, ut cum benevolentia & equitate hæc legatis, & veniam detis, sicubi videbimur circa interpretationem laborando vim verborum quorundam non assequuti: non enim æque valent illa, cum Hebraice dicuntur, & cum fuerint in aliam linguam translata. Quin videte Novi Testamenti divinos autores, qui cum alibi passim, tum præsertim, dum quædam ex Veteri Testamento testimonia proferunt, meros Hebraismos spirant. Neque quicquam interest, sive eos suis verbis, sive iis, quæ in versione ἡ Septuaginta invenerant, usos esse dicas, dummodo id fatearis, quod fateri necesse est, eos divinitus inspiratos nihil, quod optimum non esset, aut scribere aut approbare potuisse. Scio quidem non deesse qui ita dictitant, nullas phrasas vel verba in Novo testamento inveniri quæ itidem apud alios autores non inveniantur; esse Græce & id pure conscriptum. Hoc aliquando non inepto libello stabilirum iovit Doct. Pfochenius; sed felicissime hunc refutavit Vir immortalis nomine dignissimus Thomas Gatakerus in Aurea de Stylo Novi Testamenti Dissertatione. Nam etsi negari non potest phrasas quasdam formulasque in Græcis scriptoribus, quantumvis probatis, reperiri, quæ sint iis similes, quas in Novo Testamento Hebraismis accensemus, inde tamen non recte con-
 cludes

cludes esse pure Græcas. *Tum*, ut loquar cum Gatakero dict. dissert. Cap. 5. *de usu sensuque vocabulorum*, illud observarunt Viri magni, quod nemo hæcenus est inficiatus, nec etiam inficiari quisquam poterit, nisi mero meridiæ solum ortum negare animum obstinaverit, Testamenti Veteris interpretes Græcos, hosque sequutos novi scriptores, vocabulis Græcis plures sensus significatisque tribuisse quam Græci sermonis usus receptior ferat; quia quæ illis in sensu primo proprioque apud Hebræos respondent, notiones in ea lingua plures designant. Quamquam & hoc diffiteri nolim, non continuo Hebraïsmis accensendum esse, quod eorum speciem gerat, qua de re consule Doct. Reinesium Epist. ad Joannem Vorstium p. 38. De ipsis autem Hebraïsmis vide hunc Vorstium duabus, quas edidit, partibus de Philologia Sacra, ubi unam & triginta Hebraïsmorum classes enumerat. Quod si quis me roget, unde illæ sint phrasæ & vocabula in probatis Græcæ Linguæ autoribus, quæ in sacris literis inter Hebraïsmos ponimus, affirmare non dubitabo, ea in Græcam linguam primitus illata esse ab iis, qui inter Hebræos versati erant, vel Biblia sacra legerant in vernaculam conversa. Quod ne cui parum videatur verisimile, is velim sciat plusculos ex Ethnicis Philosophis sapientiam suam hausisse apud Judæos. De Pythagora audiamus *Originem Lib. 1. cont. Cels. pag. 13.* Αἰγύπτῳ δὲ ὁ Εὐριππὼν ἐν τῷ πρώτῳ περὶ νομοθετῶν ἱστορίῳ, Πυθαγόρῃ τῷ ἑαυτῷ φιλοσοφίαν διδόντι

Ἰουδαίαις Ἐμμανὺς ἀγαγὼν. *Fertur & Hermippus Libro primo de Legislatoribus memoria prodidisse, Pythagoram philosophiam suam à Judæis traduxisse ad Græcos.* De Platone quidam tradunt, eum in Ægypto audivisse Hieremiam Prophetam, quos quamvis *Augustinus* ex temporum ratione refellat, tamen asserit eum divinarum literarum minime ignarum fuisse, *de Civit. Dei Lib. VIII. 11.* Quod magis erit credibile, si statuimus quinque libros Moïsis, ut non nulli sentiunt, dudum ante septuaginta Interpretes Græce fuisse conversos. Recte itaque *Origines cont. Cels. Lib. VI. pag. 288.* Ἐγὼ δὲ ἐκ ἀπορρήτων τὰς ἀπὸ τοῦ Φαίδρου λήψεις ἀπὸ πρὸν Ἐξερῶν μαθητὰς τὸ Πλάτωνα, ὡς δὲ πρὸς ἀνέξε-
ται, ὅτι ἐκ τῶν προφητικῶν ἐτυχόντα λόγοις. *Nolim inficiari sententias istas, quæ in Phædro leguntur, Platonem hausisse ab aliquibus Hebræis, quin etiam, ut quidam tradunt, ex verbis propheticiis.* Vide eundem *Originem Lib. VII. pag. 352. Augustinum de Civit. Dei toto Libro VIII. Christophorum Sandium, Virum doctissimum, sed plus æquo paradoxis addictum, Dissert. περὶ τοῦ λόγου pag. 281. & de Orig. Anima pag. 86. & 118. etiam H. Stephanum Lib. III. Schedias. C. 111. IV, V, VI, VII, VIII.* Ex quibus omnibus satis apparet Platonem scripsisse multa de Deo & rebus divinis, quæ non aliunde hauserit, quam ex sacris literis, & adeo, quæ veritati nostræ religionis congruunt. Hinc non immerito à Numenio, Philosopho Pythagorico dictum est; Τί ἐστὶ Πλάτων δὲ

Μόσῃς Ἀττικῶς, *Quid est Plato aliud, quam Moses Attice loquens.* Atque hic ipse Numenius plurima quoque ex Prophetis in libros suos transtulit, testante *Origine cont. Cels. Lib. I. p. 13.* ad quem locum vide *Spencerum in Notis.* Nolim tamen hoc ita dictum à me quispiam existimet, quasi omnia, quæ apud Ethnicos sacris Bibliis convenientia occurrunt, inde esse translata putem, in qua sententia nimii fuerunt quidam inter veteres Christianos: nam *nimis quæsitum, ne quid gravius dicam, mihi videtur, continuo statueret ea, quæ in Homeri & Platonis libris veritatis sacrarum literarum, consentanea leguntur, ex Mose aliisque auctoribus sacris esse desumpta*, ut loquar *Buxhornii* verbis, quem adi *Quæst. Rom. cap. 13. pag. 63* ut & *Reinesium Epist. ad Vorstium pag. 38*, Tamen hoc omnino certum esse videtur, sapientiores inter Græcos sacra volumina lectitasse, quod ne de Latinis quidem Ovidio imprimis, negari potest, maxime postquam & Septuaginta versio (liceat nobis sic scribere, donec contrarium probaverimus) sub Ptholomæo Philadelpho procurata per latum orbem vagari cœpisset. Hinc desumptæ sunt illæ formulæ loquendi, quæ Hebraïsmum sapiunt, ab iis, qui ipsa Biblia legerant, dein quoque ad alios propagatæ. Sic plane constitèrit, non rectè à quibusdā concludi, esse inere Græca, quæ apud sacros auctores occurrunt, quia aliquando his similia apud Græcos scriptores, eosque classici, in-

veniuntur : quamquam sæpe , cum videntur esse similia , magna differentia intercedat. Hoc ita esse , cum pluribus possem , duobus tantum exemplis ostendam. Nihil est apud Hebræos usitatus , quam ut , cum affectione quadam præditum significare volunt , hunc istius affectionis filium vocitent : quem loquendi modum sæpe quoque in Novo Testamento reperimus. Sic *filium iniquitatis* dicunt pro homine iniquo , & *filium inobedientia* pro homine inobediente. Hanc phrasin quidam non tantum pure Græcam esse contendunt ; sed & Latinis quoque usitatam , quia simile quid apud Varronem legisse se putant , quod tamen valde est dissimile. Quippe ajunt Varronem apud *Nonium Marcellum in Bivira* dixisse *inconstantia filium* pro homine inconstante , his verbis : *Ad biviram venio , cum vellem* , ostendere quid vellem *metamelos inconstantia filius me reprehendit*. Ac sicquidem *Drusius Observ. Lib. IV. c. 2.* & posthunc *Casaubonus Notis ad Matth. c. 23.* senserunt. Sed quis non videt Varronem non loqui de homine inconstante , sed τὸν μετάνειλον , hoc est , pœnitentiam inconstantia filium dixisse : qui enim inconstantes sunt & in proposito non permanent , eos ut pœnitentia sequatur necesse est. Sic quidem recte Petrus Victorius Varronem exposuit , cum docere vellet , consuevisse eum appellare res inanimas rerum itidem inanimarum filios. Vide sis sæpius jam citatum *Reinesium Epist. ad Vorstium pag. 41.* & ipsum *Vorstium Philog. Sac.*

Sac. Part. II. cap. 24. pag. 53. Non raro in Veteri Testamento vox *ψυχή* quam Septuaginta Interpretes fere semper per *ψυχή* reddunt, sumitur pro cadavere, id est, corpore animâ casso. Ut hanc *ψυχή*, id est, animæ significationem etiam Græcis usitatam fuisse ostendant, valde quidam laborant; quin & apud Principem Latinorum Poëtarum invenisse se gloriuntur. Sic enim ille, cum loquitur de Troianis sepelientibus Polydori corpus *Aeneid. Lib. III. v. 66.*

*Inferimus tepido spumantia cymbia lacte,
Sanguinis & sacri patinas, animamque sepulcro
Condimus.*

Verum enim verò, (sinamus, quæso, veteres avias nobis à pulmone revelli) hoc dictum est ex ethnicorum superstitione, qui credebant animas eorum, qui insepulti jacebant, ubique vagari, nec posse esse quietas. Post justam sepelitionem demum animam cum corpore monumento includi. Digna sunt, in hanc rem quæ legas apud *Plinium juniorem Lib. VII. Epist. 27. & Aug. Buchnerum ad illum locum.* Ideo Ethnici valde de sepelitione erant solliciti. Hinc lux oritur *Horatio Lib. I. Od. 27.* ubi Archytam geometram hoc pacto inducit loquentem:

*Me quoque devexi rapidus comes Orionis,
Illyricis Notus obruit undis.*

*Attu nauta, vage ne parce malignus arena
Ossibus, & capiti inhumato
Particulam dare.*

Proin satis mirari non possum, quid doct. *Gatakerum Dissert. de stylo N. T. cap. 19. pag. 107.* impulerit ut communem sequutus opinionem statueret animam apud Virgilium sumi pro cadavere. Ne quis vero me putet hic solum incedere. adeat *Eruditif. Cuperum Observ. Lib. I. cap. 20. nec non maximum Salmasium in Simplicium pag. 327.* Jure merito itaque statuo, esse ita profecto, ut dixi: Septuaginta Interpretes verbis phrasibusque Hebræis inhærere, satius duxerunt, quam ab illis discedere; etsi nescire non poterant, id fieri cum nonnullo puritatis linguæ Græcæ damno. Ac quoniam idem à divinis N. Testamenti scriptoribus factitatum est, facile viderimus, optime facere eos sacrorum librorum interpretes, qui quam arctissimis cancellis se continent. Non tamen omnis versio statim rejicienda est quæ paulo liberius exspaciatur; si hoc modo teneatur, non tantum divinæ autoritatis habere, quantum illa, quæ divina verba ac phrasés non excedit. Si quæ præterea adduntur, aut mutantur ut ab hominibus profecta, ita & erroribus sunt obnoxia. Hoc certe Angli quidam Theologi spectarunt, quibus cum Bibliorum versio, ab Emanuele Tremellio & Francisco Junio procurata, nimis à verbis phrasibusque sacris abire videretur (quo jure quæve injuria jam non disputo) eam in bibliopolis publice exponi passi non sunt; nisi additâ censurâ, quâ testabantur, non ut accuratam metaphrasin, sed ut paraphrasin; annotationes verò ut huma-

nas opiniones legendas esse : multa enim in iis esse , quæ probari non possint. Edita est hæc censura *Londini* M. D. XCIII. Neque similem , quoque vir solide doctus Theodorus Beza effugere valuit , cum longius in translatione Novi Testamenti à verbis sacris discedere nonnullis sit visus. Utiliter tamen ejusmodi versiones leguntur , quæ commentarii instar esse possunt ; modo semper exigantur ad lapidem Lydium , quæ ipsa sunt sacrorum scriptorum verba , nude atque simpliciter proposita. Atque ista verba velim ut exprimantur istiusmodi verbis quibus ab initio Christiani assueverunt , quamquam alicubi minime sint Ciceroniana. Parum hîc elegantis Latinæ Linguæ studendum , sed ut Christiani semper loquuti sunt , ita & nobis loquendum est. Nescio sane quid rudia illa verba , & sæpe parum Latina plus præ se ferunt majestatis divinitatisque , quam quæ magis Latina ac elegantiora esse nemo neget. Nisi hoc inde est , quod illis non utimur , quam ubi de rebus agatur & seriis & sacris. Minime igitur sese mihi probaverint , qui , ut exemplis rem illustrem , *πιστιν* per persuasionem potius , quam fidem ; *αποστολὰς* per legatos potius , quam Apostolos ; *ἐκκλησίαν* per concionem potius , quam ecclesiam ; *χαρίαν* per munificentiam potius , quam gratiam ; *βαπτίζειν* per lavare potius aut tingere , quam baptizare ; *παρεδείκνυ* per pomarium potius , quam paradisum , qui hæc & hujus generis alia posteriore potius , quam priore modo reddunt.

Eleganter juxta ac vere hoc pridem docuit magnus *Erasmus*, cujus *Ciceronianum*, quæso consule, potissimum pag. 97. & seqq. Edit. *Leidensis* in 12. Magna autem imprimis cautio provisioque adhibenda est, ne res sacras ejusmodi vocabulis exprimamus, quibus olim stolidi gentiles circa superstitiones suas usi sunt. Quis paulo in eorum scriptis versatior nescit, quam multa illi de geniis & oraculis suis confixerint? Ac quoniam Linguae Latinae cognitio ex prophanis istis scriptoribus haurienda est, facile adolescentulorum animis species earum rerum (Græce *εἰδῆς* melius dixeris) imprimuntur, quas illi de geniis oraculisque suis tradunt. Unde provenire necesse est, ut si adolescentuli eadem vocabula in divinis scriptis legant, eò quoque transferant ideas, quas de ipsis rebus, quas ista vocabula designant, sibi in prophanis autoribus formaverant: quod ne quando fiat summis viribus est adnitendum. Multo itaque satius, angelos & prophetias dicere, quam genios & oracula. Atque utinam idem Sebastiano Castellioni animus fuisset, cujus translatio egregie quidem Latina est; sed non temere iis legenda, qui nondum in sacris sunt exercitati; quod recte quidem contra Episcopium *Rivetum* mihi visus est monere *Isag. ad Sac. Script. p. 917. Edit in fol.* Nec valde mihi arrident Catullianæ hæ elegantiae, quibus ille in versione Cantici Canticorum usus est: *Mea columbula in petra forulis, in cochlea latibulis, ostende mihi tuum*
vul-

vulticulum, fac ut audiam tuam voculam: nam & voculam venustulam, & vulticulum habes lepidulum. Quanto formosiores habes mammulas, mea sororcula sponsa, quanto pulciores habes mammulas vino. Tua plantariola sunt punicorum viridariolum. Aperi mihi, mea sororcula, mea amicula, mea columbula, mea perfecta &c. Quamquam forsitan hoc ab eo factum est majore venia, quod putaret istum Salomonis librum in sacro canone non esse habendum. Nam hunc errorem aliquoties sibi objectum nusquam, opinor satis diluit. Nollem tamen hunc Viri doctissimi laborem sic inique à quibusdam fuisse exceptum, ut eum diaboli instinctui adscribere veriti non sint. Sed pro instituti nostri ratione nimis fortasse diu hisce immoror. Jam pergamus ad tertium interpretandi genus, de quo haud ita multa habeo, quæ dicam. Hoc proprie paraphrasis dici solet, in qua sententiæ potius quam verbis studendum inhærendumque est. Quibus verbis hîc & quam multis utaris parum refert, modo verum auctoris sensum ob oculos ponas. In ea autem plerumque continentur periodorum connexio, sententiarum pura explicatio, historiarum, fabularum, antiquitatum, troporum, allusionum, similiumque rerum succincta enarratio. Unde pateat, non tantum quid sit scriptum; sed quâ ratione, & quibus modis. Certe hujusmodi paraphrasis non rarò magis ad scriptores intelligendos facit, quam prolixa commentaria. Quantum lucis magnus

Erasmus suâ Novi Testamenti paraphrasi sacris literis attulerit, nemo est, qui ignoret. Atque vellem in hoc quidam incumberent, ut quosdam ex Auctoribus profanis, Poëtas præsertim, ex Græco luculentâ paraphrasi transferrent in Latinum. Sunt quidem, quorum versio plus minusve ad paraphrasin verget: sed qui id ex professo eger, hæcenus fuerunt admodum pauci. Nec scio an præter Pindarum quisquam alius paraphrasten nactus sit. Illum præterito sæculo Joannes Lonicerus, hoc nostro Joannes Benedictus egregiâ paraphrasi exornarunt. Plures sunt ex scriptoribus Latinis, quos doctissimi quidam Viri paraphrasi, seu continuo commentario, explicuerunt. Inter hoc facile aliis palman præripuerint Nicodemus Frischinus, qui Virgilium, Horatium, Persium; Eilardus Lubinus, qui Horatium; Joannes Bondius, qui Persium; Joannes Freinshemius, qui Tacitum hoc pacto illustrarunt. Non nihil jam dicendum restat de eo genere interpretandi, quod Poëtarum maxime, Oratorumque proprium est. Hi non omnia sic vertunt, ut inveniunt, sed pro libitu vel addunt multa vel demunt. Quid velim ex *Agellio* melius, quam me ipso intelliges. Hunc audi *Noët. Attic. Lib. IX. cap. 9. Quando ex præmatis Græcis vertenda imitandaque sint insignes sententiæ, non semper ajunt enitendum, ut omnia omnino verba incunt, in quem dicta sunt modum, vertamus: perdunt enim gratiam pleræque, si quasi invita & recusantia violentius trans-*
se.

ferantur. Scite ergo & considerate Virgilius, cum aut Homeri, aut Hesiodi, aut Apollonii, aut Parthenii, aut Callimachi aut Theocriti aut quorundam aliorum locos effingeret, partim reliquit, alia expressit: Nec hoc à Virgilio tantum, sed etiam ab aliis plerisque factum est, imprimis à Terentio, qui multa ex Menandro vertit, non semper in istum, in quem dicta erant, modum. Hoc ipse innuit, cum

*Quæ convenere in Andriam ex Perinthia
Fæctur transtulisse, atque usum pro suis*

Qua quidem in re Nævium, Plautum, Ennium auctores habuit. Hieronymi de optimo genere interpretandi hæc sunt verba: Terentius Menandrum, Plautus & Cæcilius veteres interpretati sunt. Numquid in verbis hærent? an non decorum magis & elegantiam in translatione conservant, quam veritatem interpretationis. Cicero Acad. Quæst. ad Varronem Lib. I. hoc interpretandi genus vocat non verba, sed vim exprimere. Sic ille: Quid enim causa est, cur Poëtas Latinos Grecis literis eruditi legant, Philosophos non legant? An quia delectat Ennius, Pacuvius, Atticus, qui non verba, sed vim Græcorum expresserunt poëtarum? Quanta magis Philosophi delectabunt, si, ut illi Æschylum, Sophoclem, Euripidem sic hi Platonem imitentur, Aristotelem, Theophrastum? Oratores quidem laudari video, si qui è nostris Hyperidem sint aut Demosthenem imitanti.

Hu-

Hujusmodi quidem, five interpretationem five imitationem dicas, sæpe Cicero usurpavit, ut luculentissime ostendit, cujus jam aliquoties memini, *Henricus Stephanus in Lexico Gra. Lat. Ciceroniano*. Neque ipse *Tullius* hoc dissimulat, quem audi *Lib. I. de Finib. cap. 3. Locos quidem quosdam, si videbitur, transferam, maxime ab iis, quos modo nominavi*, (nominaverat autem *Platonem & Aristotelem*) *cum inciderit, ut id apte fieri possit: ut ab Homero Ennius, Afranius à Menandro solet*. Sic in libris *Officiorum* multa transtulit ex fontibus *Stoicorum*, & *Panætio* potissimum. Est autem hoc interpretandi genus tum maxime vituperandum, cum aliorum cogitata pro nostris venditamus, tanquam primi scriberemus, quæ pridem fuerunt ab aliis conscripta. Recte hoc fuit à *Plinio Praef. Hist. Nat. ad Vespas.* animadversum. Scito enim, inquit, *conferentem autores me deprehendisse à juratissimis & proximis veteres transcriptos ad verbum, neque nominatos, non illà Virgilianâ virtute ut certarent, non Ciceroniana simplicitate, qui in libris de Republica, Platonis se comitem profitetur: in consolatione filiae, Crantorem, inquit sequor: item Panatium de officiis. Quæ volumina ejus ediscenda, non modo in manibus quotidie habenda, nosti. Obnoxii profecto animi & infelicis ingenii est, deprehendi in furto malle, quam mutuum reddere, cum praefertim fors fiat ex usura*. Sed ne longius abeamus, redeundum est ad *Virgilium*, qui quo pacto

pacto in aliorum sententiis transferendis se gesserit, ex Agellio porro discamus. Quod ut melius fiat, non gravabor pluscula transcribere, quæ jam citatis statim subnectit. Sicuti nuperrime apud mensam cum legerentur utraque simul Bucolica Theocriti & Virgilii, animadvertimus reliquisse Virgilium, quod Grace quidem mire quam suave est, verti autem neque debuit neque potuit. Sed enim quod substituit, pro eo quod omiserat, non abest quin jucundius lepidiusque sit :

Βάλλει & μέλαιοι τ' αἰπόλον Κλυεῖστα

Τὰς αἶγας περιλῶντα, & αἰδύ τε ποπυλίσσιν.

Malo me Galatea petit lasciva puella;

Et fugit ad salices & se cupit ante videri.

*Illud quoque alio loco animadvertimus caute omis-
sum, quod est in Græco versu dulcissimum :*

Τίτυρ' ἰμῖν τὸ χαλὸν περιλαμψέτω βοῦν τὰς αἶγας

Καὶ ποπὶ τὰν κρήνας αἶγ' ἰτίτυρι. Καὶ τὸν εἰόρχαν

Τὸν Λιζυκὸν κρήκοντα φύλασσο μὴ τὸ κερύφῃ.

Quo enim pacto diceret τὸ χαλὸν περιλαμψέτω, verba hercle non translaticia, sed cujusdam nativa dulcedinis. Hoc igitur reliquit, & cætera vertit non infestiviter : nisi quod caprum dixit, quem Theocritus εἰόρχαν appellavit, auctore enim M. Varrone is demum Latine caper dicitur, qui excastratus est.

TITYRE, DUM REDEO, BRE-
VIS EST VIA, PASCE CA-
PELLAS;

ET

ET POTUM PASTAS AGE, TI-
TYRE; ET INTER AGENDUM
OCCURSARE CAPRO (COR-
NU FERIT ILLE) CAVETO.

Non possum, Benevole lector, quin hac occa-
sione te ablegem ad *Renatum Rapinum*, qui mul-
ta egregie de Theocrito ac Virgilio scripsit. Vide
sis ejus *dissertat. de Carmine Pastoralis, maxime*
pag. 189. Edit. Leidensis in 12. Nec ingratum
fore opinor, si non nihil adtulero ad illustra-
tionem istius versiculi, quem primo loco ex
Virgilio citavi: quo modo & Theocritus simul
illultrabitur. Haud temere à Theocrito Virgilio-
que, factum est, quod malo potius, quam alio
quovis pomo puellam faciunt petentem amatorem
suum. Quippe mala Veneri sacra sunt, & amo-
ris ac amicitiae signum. Hinc ferunt ea in somniis
portendere rei Venereae fruitionem. Quare au-
tem illa sint Veneri consecrata, non difficile est
confectare iis, qui judicii meminerunt, quo Ve-
nus Junonem Pallademque vicit, ac malum au-
reum obtinuit, prætium pulcritudinis. Itaque
non alio ornatu crebrius in munificentiis visitur,
quam malo, quam fere tenet manu dextrâ. Pati-
sianias quoque adducit Veneris simulacrum, Ca-
nachi opus, quæ alterâ manu papaverum capita,
alterâ malum gestabat. Hinc sunt illæ amantium
nugæ, quando se mutuo nyalis petunt & ad amo-
rem laceffunt. Scitum est, quod fertur de Acon-
tio,

tio, qui Cydippes amore captus malum in ejus sinum injecit his literis inscriptum :

*Furo tibi sancta per mystica sacra Diana,
Me tibi venturam comitem, sponsamque futuram.*

Qua de re lege duas Ovidii Epistolas, Acontii & Cydippes nomine scriptas. Quia etiam mala inter ea fuisse quæ amantes invicem mittebant, patet ex hisce ipsius *Virgilii* verbis *Ecl. III.*

*Quod potui puero sylvestri ex arbore lecta
Aurea mala decem misi : cras altera mittam.*

nec don *Petronii Afranii* versibus :

Aurea mala mihi, dulcis mea Martia, mittis,

Mittis & hirsuta munera castanea.

Omnia grata mihi, sed si magis ipsa venires,

Ornaves donum, pulcra puella, tuum.

Tu licet apportes stringentia mala palatum,

Tristia mandenti est mellens ore sapor.

At si dissimulas multum mihi chara venire,

Oscula cum pomis mitte : vorabo libens.

Adi porro *Petrum Mollium* Notis ad *Longi Pastoralia* pag. 20. & *Josephum Scaligerum* Comment. in *Catalecta Vet. Poëtarum* pag. 206.

Priusquam hocce caput claudimus, *Terentius* explicandus venit eo quidem loco, quo illum agere putant de interpretatione, de qua hactenus egimus, sic satis prolixè. Is exstat *Eunuch. prolog.*

ubi

ubi de Luscio Lavinio, adversario suo, sic lo-
buitur :

*Qui bene vertendo , & eas describendo male
Ex Græcis bonis Latinas fecit non bonas.*

Hæc verba oppidò difficilia esse visa sunt, quot-
quot in Terentium scripserunt. *Petrus Nannius*
Lib. I. Συμπλκ. cap. 3. ita explicat *Carpit* heïc
Terentius anxiam interpretationem, quæ quasi cal-
culatrix, verbum verbo reddere curat, nec pen-
sare pondera, sed numerum quarit; cum Poeta
imitari debeat, & potius paria, quam eadem
facere, non nunquam leviter alludere, interdum
procul respicere, ac subinde pressioribus oculis in-
tueri. Quod cum non faceret Lavinius, jure in-
cessitur, ut qui in describenda imagine, quam de-
pingendam susceperat, longius aberret. Est enim
describere idem quod depingere, & archetypi li-
neamenta reponere. Non inepte sane hæc Nan-
nius : multa saltem melius, quam Faërnus,
qui bene vertere explicat bene eligere vertenda.
Ita enim iste : elegit ille quidem bonas, quas
verteret, sed easdem male scripsit. Verùm cum nec
Nannius, nec alius quisquam Guyeto, qui in Te-
rentii genium præ cæteris penitus penetravit, heïc
fatisfaceret, ille sibi ab emendatione præsidium
repetivit. Nam sic legit :

*Qui male vertendo , & eâdem scribendo male
ex*

Græcis bonis Latinas fecit non bonas.

Male

Male vertendo, id est, sensum autoris in versione non exprimendo. *Et scribendo male*, id est, dictione barbara & loquutione parum Latinâ in scriptione utendo. *Eâdem inanis* pro eâdem operâ. Ego nihil esse mutandum censeo, & omnem difficultatem esse sublatam, modo bene intelligatur, quid per verbum *vertere* Terentius velit. Id hoc loco non significat *transferre*, *interpretari* aut aliquid horum simile. Nihil minus. Inter omnes in Latinâ Lingua vel paulo versatiores constat, verba simplica aliquando vim obtinere compositorum, ut & composita non rarò simplicium. Itaque *Vertere* apud Terentium idem erit, quod pervertere, id est, vertendo corrumpere, & depravare. Hoc sensu *Cicero Lib. I. Offic.* de Callicratida dicit, eum postquam multa egregie fecisset, *vertisse ad extremum omnia*. *Virgilius* quoque, *Nonio Marcello*, teste, *vertere* usurpavit pro convertere, contorquere *Aeneid. Lib. VIII. v. 436.*

*Certatim squamis serpentum, auroque poleibant,
Connexosque angues, ipsamque in pectore Diva
Gorgona desecto vertentem lumina collo.*

Sic apud Terentium *bene vertendo*, idem erit, quod valde pervertendo, & contorquendo, quod in interpretatione vitium est maximum: ludit enim Poëta in ambigua utriusque vocis significatione. Neque dubium, quin prologi recitator hoc satis ostenderit, dum eas cum quadam emphasi

exprimit : ita ut minus obscuritatis in actuosâ illâ oratione fuerit, quam nudâ lectione. Ipse Donatus satis interpretationem nostram approbat. Terentium certe in Belgica sua versione hoc loco bene transtulit Henricus Zwaerdecroon, Erasmus quondam Scholæ Rector dignissimus. Atque hæc quidem hæc.

C A P. XII.

Quatuor in Græcia ludi. Præmia certaminis Pythii. Inter illa pomum. Jupiter Casius. Malum Punicum, seu malo-granatum. Captoræi. Propheta Moses explicatus. Septerium, festum Apollinis.

Quatuor in Græcia ludos fuisse, admodum celebres vel unus Pindarus satis ostendit, qui plerosque in iis sua tempestate victores egregiis carminibus exornat, quæ quicunque student æmulari, næ illi (ut loquar cum ipso Pindaro.)

————— Κόρινθος αἶ

Ἀκρόπολις γὰρ πόλις

Διὸς ἀπὸς ὀφείλει δῖον.

Veluti corvi irritæ crocitant adversus divinam Jovis avem. Notissimum quoque Epigramma est, quod in Anthologia Græc. Epigr. legitur omnium primum :

Τίναρτι

Τίταρις ἰσχυρὸν ἀγῶνι ἀν' Ἑλλάδα, τίταρις ἰσχυρὸν.

Οἱ δὲ μὲν θνητῶν, οἱ δὲ δ' ἀθανάτων.

Ζητὸς, Ἀπολλέου. Παλάμιον, Ἀρχιμήδης.

Ἄλλα δ' ἔτι κόνιν, μῆλα, εἰλίνα, πίτυς.

Quatuor sunt in Gracia sacri ludi, duo quidem mortalium, duo vero immortalium: Jovis, Apollinis, Palemonis, Archemori. Præmia vero illorum olea, poma, apium, pinus. De illis videre licet, quæ tradidit Natalis Comes Mythol. Lib. V. primis. 4. capit. & Alexander ab Alexandro Genial. Dier. Lib. V. cap. 8. nec non Ausonius Fine Eclogarii, Nos non nihil dicemus de præmio certaminis Pythii, quod Epigramma dicit fuisse poma. Recte illud quidem, ni alia præmia excludas. Nam præter poma plura fuisse, oppidò quam verum est, quod accidit, ut recte scribit N. Comes, quia & ludrica, & præmia victorum, & tempora, quibus agitabantur Pythia: sæpius mutata sunt. Primum esculea corona, cui dein laurea successit, post Daphnen in laurum mutatam. Hoc clare patet ex Ovidio Metham. Lib. I. v. 445.

*Hic juvenum quicumque manu, pedibusve, ca-
tave*

Vicerat, esculeæ capiebat frondis honorem.

Nondum laurus erat.

Etiam victores palmâ olim coronabantur: aut pecuniarum præmium accipiebant. Nec desunt, qui eos tripodibus æneis donatos esse asserunt,

quod donum Apollini valde convenit, qui (ut verbis *Aristophanis* utar init. *Pluti*)

— Οὐκ ἐπὶ τριπόδι ἐν χρυσάτῃ.

Ex tripode suo aureo ambigua solet responsa dare quærentibus. Poma autem, quæ dabantur, cujus generis fuerint, hæctenus non est omnino clarum : nam ut pomum aut Latinos, ita μήλον apud Græcos significat πᾶσις δένδρου καρπὸν *cujusvis arboris fructum*. Certe pomi nomen sese extendit ad omnium arborum fructus, tam qui duri sunt, quam qui molles. Sunt autem poma dicta à potu, teste *Varrone de Re Rust. Lib. I. cap. 31*. In poma, inquit, quæ insita erunt, siccitatibus aquam addi quotidie : à quo, quod indigent potu, poma dicta esse possunt. De illis, quæ præmium fuerunt certaminis Pythii, non una est doctorum Virorum sententia. Proxime à vero abesse videtur *Edmundus Dickinsonus*, eo libello, quem inscripsit *Delphos Phœnicizantes cap. 7*. Ibi statuit fuisse malo-granata, vel mala Punica. Ratio, cur ita sentiat, si non vera est, saltem admodum est vero similis. Ante omnia sic est habendum, quicquid sacræ literæ de Josua & ejus victoriis testantur, id omne fuisse ab Ethnicis ad Apollinem translatum; ut multis recte probat, quem jam citavimus, *Dickinsonus*, imprimis *cap. 3*. Sicut hic Typhōnem seu Pythonem ita ille Ogum vicit perdomuitque, ac tandem devenit ad montem *Casium*, qui Syriam ab Ægypto dividit, situm trans Pelusium, extremum Nili ostium;

ostium ; in ea Arabiæ petrææ parte quæ hinc *Cassioris* Ptolomæo dicitur. Est autem *Cassii* nomen haud dubiò derivatum à vocabulo *σπ* Syris usitato , quod *terminum* significat. In eo monte celebre erat *Jovis Cassii* , id est , *terminalis* templum. Non disquiremus quo nomine apud Philistæos ille Jupiter vocetur : hoc tantum addimus non absurdum esse , quod *Dickinsonus* putat , nempe vel *Dagonem* ab iis , vel *Marnam* appellari. De hoc dubitari non potest , eum ita pingi solitum , ut extensâ manu ferre videretur malum punicum ; idque non sine mysterio. Audi in hanc rem *Achillem Tatium Lib. III. pag. 167. Edit. Salmasianæ* :

Εἶσι δὲ ἐν τῇ Πηλυσίᾳ Διὸς ἱερὸν ἄγαλμα Κασίε. Τὸ δὲ ἄγαλμα νεανίσκου Ἀπόλλωνι μάλιστα ἰοικώς. ὃ τῷ γὰρ ἡλικίᾳ εἶχεν. Περὶ βλητῶν δὲ πῶς χεῖρα, εἶχεν ποιεῖν ἐπ' αὐτῇ. Τῆς δὲ ποιεῖς ὁ λοστόμουσικός. *Pelusii statua est Jovis Cassii , juvenili ætate , atque adeò ut Apollini quam simillima sit , dextrâ manu , quâ punicum malum sustinebat , extensâ. Cujus quidem pomi ratio mystica est. Nihil verò aliud mysterii subesse potuit , quam quod Deus ille Syriæ ; ac potissimum quidem Palæstinæ , cujus in aximam partem Caphthoræi occupaverant , terminos custodiebat. De his ita legere est apud Moysen Deut. II. 23. עַרְעוֹן וְחִתְיוֹן הַשְּׁנַיִם*

הַשְּׁמִידִם וַיִּשְׁבוּ תַּחְתָּם פְּכַתְרִים הַצֵּאִים מִכְּפַתַר בַּחֲצִירִים *Ha-vaos quoque habitantes in Hagarimusque Gaza , Caphthorim egressi & Caphthor exciderunt eos , & habitarunt ipsi loco illorum. Nescio autem cur Vetus Versio Caphthorim vertat Cappadoces ; non*

enim sunt incolæ Asiæ minoris, sed gens Palæstinae; ut non hic tantum patet, verum etiam apud *Amosum* cap. IX. v. 7. Quamquam cum ex Palestina oriundi non essent, à veteri sede Cappadocia Cappadoces dici potuerunt, de quibus vide *Plinium Lib. VI. cap. 3. Capthorum* non aliunde sic dicti videntur, quam à כפח id est, malo Punico, sive malo-granato, quod eorum veluti insigne fuit. Hoc igitur extensâ manu præ se ferebat *Jupiter* ille Casius, ut significaret se strare à Capthoræis. Atque hac quidem occasione, non possum quin addam, quod de illis, qui Jovi casio initiantur, apud *Sextum Empiricum Lib. III. cap. 24.* legimus. Verba Latina ponam; Græce enim eum autorem non habeo: *Jam vero & ex Aegyptiis, qui sapientes habiti fuerunt, alii caput animalis edere profanum esse arbitrantur, alii scapulam, alii pedem, alii nescio quid aliud. Cepas vero nullus unquam edit eorum, qui sacris Casii Jovis apud Pelusium initiantur.* Hunc Jovem Casium Josua tunc vincere visus est, cum protensis ad Casium usque montem victoriis, Palæstinos undique debellasset. Sic mala Punica, præmium victoriæ, retulit: & hinc Græci (qui omnia, quod ad fieri potuit, ad Josuæ historiam adaptabant) Pythiorum præmia desumpserunt. Jam non nihil addemus ad explanationem ejus loci, quem ex Deutronomio citavimus. Cum Deus populum Israëliticum per eversionem multarum gentium in promissam ter-

ram

ram ducere statuisset, tres tamen nationes excepit, Edomitas, Moabitas, Ammonitas, ex Esavo & Lotho oriundos. Hoc duplici quidem de causa Deus Israëlitis per Moſen indicat: tum his populis ut ne nocerent, tum ut horum exemplo Israëlita certò crederent eadem pro ſe Deum præſtiturum, quæ illorum gratia præſtiterat, nempe hoſtes proſi gaturum, quantumvis potentes ac viribus færoces. Hinc ad Caphtoræos deſlectit, de quibus idem dici non poteſt, quod de prioribus, Deum voluiſſe, ut ſuis ſedibus manerent. Sed eâ tantum de cauſâ horum facta eſt mentio, ut ſcirent Israëlita, non difficilius ſibi fore hoſtes ſubigere, quam quondam Caphtoræi ſubegerant Havæos. Licet pauci ad debiles eſſent, uſu tamen ſibi venturum, quod illis, qui multo ſemet potentiores devicerant. Certe de Philiftæis & Caphtoræis vetus eſt dictum, quod citat *Cl. Buxtorſius Lex. Rabb. Pag. 1083.* נְבוֹרִים כַּפְתּוֹרִים בְּנֵי מִלְכָּם פְּלִשְׁתִּים: *Philiftai ſunt Gigantes: Caphtorai ſeu Cappadoces ſunt pumiliones.* Ne caput hîc claudam *Plutarchus* facit, de quo ſic quondam judicare ſolebat *Ger. Joan. Voſſius*, Vir clariffimus, bibliothecam habere, quicunque hunc autorem poſſideret. Is, præter Pythia certamina in honorem Appollinis ob devictum Pythonem celebrari ſolita, alijs cujuſdam ſolemnitatis meminit, quæ Delphis agebatur nono quoque anno eâdem plane de cauſa. Hæc *Septerium* dicebatur, à maximo (ni fallor) cultu &

veneratione. Audi *Plut. Quæst. Græc. pag. 293.*

Τὸ μὲν ἔν Σειπτήριον ἰοικα μέμμη πῆς πρὸς τὴν Πύθωνα τῷ θεῷ μά-
χης εἶναι, & τῆς μετὰ τὴν μάχην ἐπὶ τὰ Γέμνη φυγῆς & ἐκδιώξεως.
Οἱ μὲν γὰρ φυγῆν ἐπὶ τῷ φόνῳ φασὶ χεῖρον ἢ καθαρίων, εἰ δὲ τῷ
Πύθωνι πλεονέκῃ & φάγοντι κατὰ τὴν ὁδὸν, ἢ τὴν ἱερὰν καλεῖσθαι
ἐπακαλεθεῖν, & μικρὸν ἀπολερωθῆναι τῆς τιμῆς. Κατίλας γὰρ
αὐτὸν ἐκ τῆς τραυματικῆς ἀφίτιθι καὶ, κακῶς δομῶν ὑπὸ τοῦ πατ-
ρός, ὃ οἶμα ἦν Αἰξ, ὡς λέγουσι. Το μὲν ἔν Σειπτήριον τέττω, ἢ
πρώτων τινῶν ἀπομειμαίς ἐστι τίθων. *Septerium imitatio-*
nem habet pugna Apollinis cum Pythone, & à
pugna fuga Dei ad Tempe, aut persecutionis :
alii enim fugisse eum ferunt, quod peractâ cade
opus expiatione haberet : alii Pythonem sancium
& fugientem viâ, quæ nunc sacra dicitur, cum
insequeretur, supervenisse ei recens è vulnere mor-
tuo, & funerato a filio, cui nomen Alex, ut
perhibent: Septerium ergo harum aut similium re-
rum est imitatio.

CAP. XIII.

Inconviviis suæ partes cuique attributæ. Evangelista Lucas illustratus. Epictetus in Enchiridio explicatus, nec non Apuleius. Sua cuique convivantium mensa assignari solita. Convivarum numerus. Seneca accusatus de luxu. Juvenali lux. Galli cujusdam de Seneca judicium, & nonnihil de Plutarcho.

CUM alii libri de variis rebus utiles exstant, tum ille *Guillielmi Stuckii* longe utilissimus, quo agitur de *Antiquitatibus convivalibus*. Possent tamen post uberem illam, quam messuit messem, quædam spicilegia colligi: quod alio tempore à nobis fiet accuratius. In præsens hoc tantum notabimus, quod ne à *Stuckio* quidem omninò est prætermisum, apud antiquiores id moris fuisse, ut singulis convivis cux partes distribuerentur in propriis scutellis. De Hebræis videri possunt *Augustus Pfeifferus Antiq. Sacrarum* Bec. II. Posit. 7. & *Andreas Rivetus in cap. XLIII. Genes. pag. 626.* Partes autem illas Græci *μειδας, μείγας & μετὰ μείγας* vocabant. Atque huc, rectissime meo judicio, Salvatorem alluisse statuit idem *Rivetus*, his verbis *Luc. X, 41. 42.* utentem ad Martham: *Μάρθα,*

Μάρθα μεριμνάς καὶ τυρβάζῃ περὶ πολλὰ. Ἐγὼ δὲ ἴσῃ χρεία. Μα-
ρίᾳ δὲ τὴν ἀγαθὴν μερίδα ἐξελίξατο, ἥτις καὶ ἀφαιρηθῆσεται ἀπ' αὐ-
τῆς. *Martha Martha sollicita es, & satagis de
multis. Unum autem est necessarium. Maria ve-
ro bonam* (id est, Hebraico loquendi modo,
optimam) *partem elegit, qua nunquam auferetur
ab ea.* Martha quippe valde erat occupata in
eduliis parandis, quorum præcipuam & optimam
partem Christo destinabat. Huic eleganter oppo-
nit illam partem, quam ipse docendo Mariæ lar-
giebatur, partem vere cælestem, & quæ non cor-
pus, sed animam nutriebat. Pandit ille sacra
Euangelii mysteria, dum Maria attente divinis
verbis inhiat, & ut mos est Judæis, ad magi-
stri pedes sedet, de quo more vide, si libet, præ-
ter commentatores Sacræ Scripturæ, quæ sæpe
ad illum respicit, *Molinaum in Vate Lib. IV.
cap. 10. & Pfeifferum initio Notarum ad libell.
de lusu. item Antiq. Sacrarum Dec. III. Po-
sit. I.* Ejusmodi autem portiones, de quibus su-
mus loquuti, non tantum cuique distribuebantur
in esu, verum etiam in potu, ut ostensum est à
viris doctissimis. Neque id hodie insolens est qui-
busdam populis, apud quos suo quisque vitro bi-
bit. Sed audiamus *Plutarchum*, qui *Probl. Sym-
pos. Quæst. ult.* sic quærit: Πότερ' οἱ παλαιοὶ βέλτιον
ἔποιον ὡς ἐν μερίδα, ἢ οἱ νῦν ἐκ κοινῆ διπνέοντες; *Veteresne
rectius fecerint, qui in conviviiis, suam cuique
portionem tribuerunt, an qui nunc in commune
præbent?* Multas ibi utrimque rationes proponit,
quas

quas legere est operæ prætium. Videtur autem hoc moris fuisse, ut sive Rex convivii, sive alius quisquam ejus nomine, partes divideret, ac cuique circumferret, pro cuiusque, credo, dignitate, vel prius vel posterius. Nec abhorret à vero etiam in privatis conviviis quosdam *οἰνῆας* fuisse, quos in publicis epulis adhibitos ex *Athenæo* discimus *Lib. cap. 6.* Hinc facile est explicare *Epictetum Enchir. Cap. XXI.* ubi hæc verba legimus: *Μέμνησιν ὅτι οἱ ἐν συμποσίου, (ἔστω) θεῖσι διὰ τὴν εὐερίαν (ἐν τῷ βίῳ.) Περὶ τοῦ εὐερίου γὰρ τί κατὰ θεῖν; ἐκτίνας τὴν χεῖρα, καὶ μὴ μετὰ λαβῆ. Παύριχτα; μὴ κατὰ θεῖν; ἐπὶ ἡμέρῃ; μὴ ὀψιὰ λαβῆ. Ὅψιν τὰν ὀψέειν, ἀλλὰ περιψῆν, μᾶλλον αἱ ψῆνται κατὰ θεῖν.* Memento sic in vita esse versandum, tanquam in convivio. Si quid circumferendo ad te pervenerit, porrectâ manu partem modeste capito. Præterit? Ne detine. Nondum adest? Ne longe appetitum extendito: sed expectandum ad te perlatum fuerit. Non rejicienda tamen est *Petri Castellani* sententia, qui *Ludo inter elegantes Satyras pag. 421.* Epictetum respicere putat veterem ritum, quo olim solébant olera & fassamenta in antecæniis circumferre; quod nitidius, quam vexatas manibus escas porrigere. Græcis dicuntur *ἀνθρακίσκας* *αὐτοεὐερίαι* *περιφοράι*, quæ solent circumferendo ante cætera apponi. Nullum mihi est dubium, non aliunde explicandum esse *Apulejum Metamorph. Lib. II.* ubi mulier eum, qui in domo funestâ calidam poscebat cum cœnophoris & calice, cœnarumque reliquiis ornatum discum, hunc in modum

dum alloquitur : *Abi, fatue, qui in domo fu-*
nestrâ cœnas & partes requiris, in qua tot jugis
jam diebus ne fumus quidem visus est ullus. Non
 respuo tamen, quod *Priceus* ad l. c. notat : *Cœ-*
nas & partes, ἡ δὲ δούρα, id est, ut paulo supra,
reliquias. Neque tantum suæ cuique partes di-
 stribuebantur; verum etiam (ut verbis utar *Pe-*
troni) *sua convivantium cuique mensa assignaba-*
tur. Hoc Hebræis insolens non fuisse, fidem
 nobis faciunt doctores Talmudici, quos citat
Joan. Buxtorfius, ὅτι πατέρις τὸ παίδιον, Dissert. de
Cœna Domini §. 37. Idem olim apud Germanos
 obtinuisse, *Tacitus* auctor est *Lib. de Morib.*
Germ. Lausi, inquit, *cibum capiunt : separata*
singulis sedes, & sua cuique mensa. Tum ad ne-
 gotia, nec minus sæpe ad convivia procedunt ar-
 mati. De Græcis testem habemus *Homerum*, de
 quo sic *Athenæus lib. I. cap. II.*

Ἐκείνη ἡ δασυτόμος παρ' Ὀμήρῳ παρατίθεται κἀνταυτῇ καὶ
 τεταμένη, & δίνας

————— Πινὴν δὲ θυμὸς ἀνέσσει.

Singulis convivis apud Homerum apponitur
canistrum, mensa, poculum, ut bibant
Si quando incessat, vini potusque cupido.

Idem, ut *Cap. præc.* refert *Athenæus*, quidam
 perperam probare conati sunt ex eo, quod *Odyss.*
lib. I. legitur; *Mentæ*, cum mensis jam collo-
 catis ad *Telemachum* venisset, appositam fuisse
 rasam

rasam ac politurâ lævigatam. Vide porro *Gatakerum* in *Cinno* lib. II. cap. 5. pag. 231. De Romanis satis patet ex verbis, quæ ex Petronio adduximus : quibus etiam hoc moris fuit, ut nunquam mensa tolleretur, super quâ non esset aliquid relictum, uti observat *Plutarchus Quest. Rom.* ubi quatuor ejus moris causas recenset, cui quintam *Buxhornius* addit *Notis ad Plut.* hanc nempe; *id boni ominis causâ usitatum & probandæ abundantia.* Aliquid enim deesse videtur, ubi ita omnia absumuntur, ut nihil omnino relinquatur. Istud autem de mensis cuique convivantium apponi solitis, tunc ferri potuit, cum justum numerum convivæ non excederent, de quo numero, consulendi *Cælius Rhodiginus Ant. Lect. lib. XVIII. c. 8.* *Alexander ab Alexandro lib. V. c. 21.* & ad *Alexandrum Tiraquellus*, qui tamen in eo errat, quod ex *Athenao* lib. I. caput primum citat, cum quartum citare debuisset. Notum certe est adagium : *Septem convivium, novem convivium.* A quo non nihil discedit *Ausonius* in *Ephemeride* his verbis :

*Quinque advocavi : sex enim convivium
Cum rege justum : si super, convivium est.*

Quantæ vero molis & molestiarum esset, si plures advocarentur, nemo non videt : præsertim si mensæ mutabantur, quod luxuriosa posteritas excogitavit, in singulos ferculorum missus. Non dubito tamen, quin utrumque factum sit à Seneca,

ca, si verum est, quod de eo narrat Dio, seu potius ejus epitomator Xiphilinus *Vita Neronis pag. 152. Edit. Gra. Rob. Steph.* Εὐκλέθης δὲ ὁ Ζήνωνος ἀλλ' ἄτλα, ὅτι τῇ Ἀγριππίνῃ συνήγειτο. ἔμνησεν δὲ ὅτι τέτοιον, ἀλλὰ ὅτι ἄλλοις πάντα τὰ ἐναντία ταῖς οἰκιστικαῖς περὶ αὐτοῦ διήλχθη. Καὶ γὰρ τυραννίδος κατήργηται, τυραννοδιδάσκαλος ἐγένετο, ὃς συνόριον τοῖς δυναστείῃς κατατείχων, ἢ ἀφίστατο τῷ παλατίῳ, τὴν τε καλαβυρνίαν πρὸς διαβάλλων αὐτὸς ὅτι τὰς βασιλίδας ὅτι ἐξελθόντες ἐβάσταλιν. ὃς πῶν ἐξέσκαμα συνεπὴς, τοῖς πλεῖστον ἐξαλαῖν, ὅτι ἐπταμυχίῳ ὃς πεντακσίον μυριάδων ἐκτίσταιτο, ὃς τὰς φιλοτιμίας τῶν ἄλλων ἀντιτίθηται πειτακσίους τρίποδας καὶ εἰνὴ ἑξῶν ἑξακσίποδας ἰσους καὶ ὁμοῦς εἶχε, καὶ ἐπ' αὐτῶν ἐστίατο. *Seneca autem cum aliorum quorundam, tum hujus accusatus est, quod adulterium cum Agrippina commisisset. Neque tantum in hac re, sed in aliis insuper dictus est plane fecisse omnia contraria iis, quae docebat. Tyrannidem enim cum vituperaret, ipse tyranni fuit praeceptor: cum eos reprehenderet, qui potentiores sectabantur, ipse palatio se non abstinuit: cum aliis, ut crimen magnum objiceret, cuiquam assentari, ipse & reginas & libertos palpavit, quorum etiam aliquot encomiis evexit: divites cum maledictis incesset, ipse ter millies sestertium paravit, habuitque quingentas mensas ex cedro, cum eburneis pedibus, similes omnes & aequales, super quibus convivium celebrabat, cum tamen in aliis numerosam, pretiosamque suppellectilem non ferret. Scio quidem, quam operose haec crimina diluit acerrimus Senecae vindex, Justus Lipsius, quem*

quem vide de *Vitâ & Scriptis Seneca cap. VI.*
item Manud. ad Phil. Stoic. lib. I. Diss. XVIII.
 sed tamen omni culpâ caruisse censerî non potest.
 Similis cujusdam circa mensas luxus Ciceronis &
 Gallii Asinii meminit *Plinius lib. XIII. c. 15.*
 Quare non injuriâ noster dixit *lib. VII. de Benef.*
cap. 9. Video istic mensas & astimatum lignum
senatoris sensu, eo pretiosius, quod illud in plu-
res nodos, arboris infelicitas torfit. Videtur autem
 citreis ac prætiolis mensis hoc fuisse proprium,
 ut pedes haberent eburneos, animalis cujusdam
 effigie efformatos. Hinc lucem sceneratur *Juve-*
nalis Satyrâ XI. v. 122.

Nil rhombus, nil dama sapit, putere viden-
tur

Unguenta, atque rosa, latos ni sustinet orbes
Grande ebur, & magno sublimis pardus hia-
tu

Dentibus ex illis, quos mittit porta Syenes.

Plura si desideras scire de materiâ, formâ ac or-
 natu mensarum, adi Doct. *Dempsterum Para-*
lip. ad Rosinum lib. V. cap. 26. Nos interim ad
 Senecam redeamus. Ut ut ejus vita fuerit, certe
 scripta, quæ dedit, sunt omnium consensu uti-
 lissima. Adeoque non possum quin mirer Galli
 cujusdam judicium, quod ex Gallico in Latinum
 conversum hîc adscribam. Est istud quidem in Se-
 necam iniquius; verum tamen non absque judicio
 scriptum. Invenitur autem in libello, cui titulus:

Re-

Recuil de diverses pieces faites par plusieurs personnes Illustres. En versionem meam, quâ parum de verbis sollicitus, ipsam sententiam expressi. Senecam quâ Neronis praeceptorem, Amatorem Agrippina, Imperii cupidum, facio maximi; quâ verò Philosophum & scriptorem plane contemno. Nec stilus ejus mihi placet, nec quâ stilo consignavit. Dictio nihil facile, nihil naturale, nihil denique habet avi Augustei. Pungit ubique, ac ea profert, quâ magis Africa Hispaniae calorem, quam Græcia aut Italia lumen literarum sapiunt. Vides ibi res plane concisas, quâ quidem gnomarum sententiarumque habent speciem; sed neque egregium sensum, neque soliditatem, quâ in illis requiritur. Aculeum menti infigunt, eamque exagitant; judicium verò in assensum non cogunt. Certe dum quasi vi sibi met illatâ sermocinatur, terrorem mihi incutit, & tantum abest, ut animus dictis adquiescat, ut magis commotus magisque tetricus à lectione recedam. Nero, qui etsi inter pessimos principes numerari debet, admodum tamen erat ingeniosus, delicatulos quosdam circa se magistellos habuit, qui Senecam non aliter habebant, quam putidum doctrina ostentatorem, & quantum poterant risui propinabant. Bervillii tamen opinionem, non sequor, qui ita putabat, Senecam esse, quem sub fictâ Eumolpi personâ Petronius inducit. Nam si eum injuriose depingere voluisset, non absurdi poetâ personâ, sed infulsi potius affectatoris eruditionis,

ditionis, ac arrogantis aliorum contemptoris, induisset. Quin nihil inveniri potest, in quo Seneca & Eumolpus conveniant. Seneca omnium ferme aulicorum erat ditissimus, cum interim paupertatem maximis laudibus efferret. Eumolpus, Poësi deditus ipso erat Iro pauperior: seculi ingratitude semper accusabat, hoc solo fruens solatio, **BONÆ MENTIS SOROREM ESSE PAUPERTATEM.** Seneca vitia sua maxima cum sollicitudine celabat: Eumolpus verò voluptati libere indulgens, quandam ex vitiis gloriolam captabat. Nil itaque video, quo possit Bervillius conjecturam suam stabilire. Sed istud omne, ni fallor, quod Petronius ait de sua ætatis stilo, de corruptione eloquentiæ ac Poëscos, ille **CONTROVERSIÆ SENTENTIOLIS VIBRANTIBUS PICTÆ**, quibus tantopere indignabatur, ille **VANUS SENTENTIARUM STREPITUS**, quo veluti obstupescibat, Senecam tangunt: illud verò **PER AMBAGES ET DEORUM MINISTERIA** &c in Lucanum dicitur. Laudes, quas Ciceroni & Virgilio tribuit, in nepotis patrique contemptum tendunt. Sed quicquid sit horum, illud certum est, (ut dicam, quid de Philosopho nostro sentiam) me nunquam ejus scripta legere, quin protinus quam longissime recedam ab eâ sententiâ, quam lectori approbare satagit. Dum persuadere conatur paupertatem, divitiarum

rum ipsius amore ardeo. Absterreret me virtus, quam laudat : cum ita plerumque de vitiis loquatur, & tam graphice ea depingat, ut in ea ruant vel innocentissimi. Sapissime de morte loquitur, & iis verbis, qua animo meo tristissimas species non injicere non possunt : ideoque in hoc potissimum incumbo, ut nihil omnino, aut saltem quam minimum ex ejus lectione proficiam. Quod me maxime in ejus scriptis afficit exempla sunt & citationes, quibus illa veluti condit. In aula delitiis dedita cum viveret, & gnarus esset rerum historiarumque cujuscunque temporis, multas saepe allegat, de Casare, Augusto, Macenate, aliisque. Ingenio minime destitutus plurimarum rerum cognitionem isti adjunxerat : sed stilum habet profecto nimis durum, & opiniones fovet non minus duras, quare neutrum placere mihi potest. Ridiculum est & quovis cachinno dignum, eum divitiarum ac mortis contemptum ubique inculcare, qui vitam sollicitè tuebatur, atque in superflua omnium copia traducebat. Montanus (intelligit illum celebrem Galliae scriptorem Michiel de Montagne, quem vide dans ses essais Liv. II. Chap. 10.) multum inter se convenire statuit Senecam & Plutarchum, ambos in Philosophiâ excellentes, maximos sapientia ac virtutis laudatores ambos, & Romanorum Caesarum praeceptores; hoc tamen discrimine, quod ille dignitate & divitiis magis fuerit conspicuus; hic vero in educatione discipuli sui magis felix. Quas Plutarchus

tue-

tuetur opiniones, ea, Montano iudice, ut magis dulces, ita humana societati magis sunt accommodata: Seneca verò, ut ipse sentit, mascula magis ac solida; sed, ut ego opinor, dura magis & austera. Plutarchus sapientiam molli-ter insinuat, & virtutem, quam laudat, in ipsis voluptatibus reddit familiarem. Seneca omnes voluptates ad sapientiam deducit, atque præter Philosophos felicem esse putat neminem. Plutar-chus naturam ducem sequutus, ac primus ipse persuasus, aliis, quæ cupit, facile persuadet. Seneca animus vi quadam virtutem affectat, & ad eam se exstimulat; ac, quasi sibi aliena esset, se ipsum vincere necesse habet, ut eam exerceat. De hoc iudicio tute iudica, erudite Lector: ipse enim sententiam meam non interpono. Istud inte-rim negare mihi non poteris, Senecam non rarò quædam vitia verbis descripsisse nimium profecto obscænis, quod ne exemplis ostendam, ipse præ-dor me prohibet. Tamen non possum, quin mas-culam ejus philosophiam exosculer, & laudibus ad cælum feram. Præter divina Prophetarum ac Apostolorum scripta, nihil est quod ad efforman-dos hominum mores Senecæ & Epicteto præfe-rant. Sin minus amamus, id non horum merito; sed effcæminatis nostris moribus est adscribendum. Ad

Edita doctrinâ sapientum templa serenâ
nostra mollicies non adscendit. Nolim tamen hæc,
L 2 quasi

rum ipsius amore ardeo. Absterreret me virtus, quam laudat : cum ita plerumque de vitiis loquatur, & tam graphice ea depingat, ut in ea ruant vel innocentissimi. Sapissime de morte loquitur, & iis verbis, quæ animo meo tristissimas species non injicere non possunt : ideoque in hoc potissimum incumbo, ut nihil omnino, aut saltem quam minimum ex ejus lectione proficiam. Quod me maxime in ejus scriptis afficit exempla sunt & citationes, quibus illa veluti condit. In aulâ delitiis deditâ cum viveret, & gnarus esset rerum historiarumque cujuscunque temporis, multas sæpe allegat, de Casare, Augusto, Mecenate, aliisque. Ingenio minime destitutus plurimarum rerum cognitionem isti adjunxerat : sed stilum habet profecto nimis durum, & opiniones fovet non minus duras, quare neutrum placere mihi potest. Ridiculum est & quovis cachinno dignum, eum divitiarum ac mortis contemptum ubique inculcare, qui vitam sollicitè tuebatur, atque in superflua omnium copiâ traducebat. Montanus (intel- ligit illum celebrem Galliæ scriptorem Michiel de Montagne, quem vide dans ses essais Liv. II. Chap. 10.) multum inter se convenire statuit Senecam & Plutarchum, ambos in Philosophiâ excellentes, maximos sapientiæ ac virtutis laudatores ambos, & Romanorum Caesarum præceptores; hoc tamen discrimine, quod ille dignitate & divitiis magis fuerit conspicuus; hic vero in educatione discipuli sui magis felix. Quas Plutarchus

tue-

tuetur opiniones, ea, Montano iudice, ut magis dulces, ita humana societati magis sunt accommodata: Seneca verò, ut ipse sentit, mascula magis ac solida; sed, ut ego opinor, dura magis & austera. Plutarchus sapientiam molli-
ter insinuat, & virtutem, quam laudat, in ipsis voluptatibus reddit familiarem. Seneca omnes voluptates ad sapientiam deducit, atque prater Philosophos felicem esse putat neminem. Plutar-
chus naturam ducem sequutus, ac primus ipse persuasus, aliis, quæ cupit, facile persuadet. Seneca animus vi quadam virtutem affectat, & ad eam se exstimulat; ac, quasi sibi aliena esset, se ipsum vincere necesse habet, ut eam exerceat. De hoc iudicio tute iudica, erudite Lector: ipse enim sententiam meam non interpono. Istud inter-
rim negare mihi non poteris, Senecam non rarò quædam vitia verbis descripsisse nimium profecto obscænis, quod ne exemplis ostendam, ipse præ-
dor me prohibet. Tamen non possum, quin masculam ejus philosophiam exosculer, & laudibus ad cælum feram. Præter divina Prophetarum ac Apostolorum scripta, nihil est quod ad efforman-
dòs hominum mores Senecæ & Epicteto præfe-
ram. Sin minus amamus, id non horum merito; sed effceminatis nostris moribus est adscribendum.
Ad

Edita doctrinâ sapientum templa serenâ

nostra mollicies non adscendit. Nolim tamen hæc,

quasi in Plutarchi contemptum dicta, quispiam interpretetur : nam nihil est isto scriptore , hoc præsertim tempore , utilius. Non secus ac pisces escâ quâdam sumus ad virtutem alliciendi , ut tandem discamus sapere & surgere ad altiora. Istac arte nemo Plutarcho præstat. Sic

— — Pueris olim dant crustula blandi
Doctores, elementa velint ut discere prima.

C A P. XIV.

Servus in dominum torqueri non poterat, nisi certis de causis. Cicero explicatus. Apud Romanos, salvâ libertate, soli servi torquebantur. Juvenalis illustratus. Athenis servis dabatur actio injuriarum, Romæ non item. Casaubonus notatus. Jura servorum apud Athenienses, quam Romanos longe solutiora. Servitus unde primum nata. Σώματα id est, corpora pro servis. Τοῦτο μανικόν. Jus Patronorum in libertos ingratos. De Samuele Petito judicia fere contraria. Servorum peculium. De sepultura servorum.

INter omnes *Ciceronis* orationes doctorum judicio valde eminet, quam scripsit pro *Tito An-*
nio

nio Milone. Eam cum nuper relegerem, ad hæc verba paulisper hæsi : *Cur igitur (servos Milo) manumisit ? metuebat scilicet, ne indicaretur, ne dolorem perferre non possent; ne tormentis cogerentur, occisum esse à servis Milonis in Appia via P. Clodium confiteri.* Sic enim Milonis adversarii dictitabant, Milonem manumisisse servos, ne tormentis victi indicarent insidias à Milone structas esse Clodio. Sed qui hoc metuere potuit, cum, ut Cicero paulo post ait, *de servis nulla quæstio sit in dominum, nisi de incestu, ut fuit in Clodium?* Majores nostri, inquit, in dominum de servo quæri noluerunt, non quia non posset verum inveniri, sed quia videbatur indignum esse, & domini morte ipsâ tristius. Hinc in servum dominum Deiotarum accusantem his verbis invehitur *Init. Orat. pro Deiotaro : Cum more majorum de servo in dominum ne tormentis quidem quæri liceat, in qua quæstione dolor veram vocem elicere possit, etiam ab invito : exortus est servus, qui, quem in equileo appellare non posset, eum accuset solutus.* Fuit certè aliquando in usu, ut de servis in dominos nec quæstio haberi, nec judicium dari posset. Vide *Alexandrum ab Alexandro Genial. Dier. lib. III. cap. 20. & ibi Tiraquellum.* Ino etsi servus ad hoc erit manumissus, ne torqueatur, posse eum torqueri Divus Pius rescripsit, dummodo in caput domini non torqueatur. *L. I. §. 13. D. de Quæstionibus.* Nec mirum est in dominos de servis quæstionem

haberi non potuisse : cum (ut verbis utar *At-
taliata in Synopsi Edit. Lennclav. Pag. 15.*)
 ὁ δὲ δούλος κατὰ δεσποτῶν μαρτυροῖται. καὶ ἑστιαζέμενος μάρτυς,
 ὁ καλόμενος δουράμενος. οἷον δούλος ἢ μισθός. *servi contra
dominos testes non sint. Non est testis fide dignus,
cui potest imperari, veluti servus aut mercena-
rius.* Quare igitur adversarii Miloni objiciebant,
 eum manumisisse servos? testes enim in dominum
 esse non poterant, nec in eum de illis quæstio ha-
 beri, etiamsi manumissi non essent. Ut certis de
 causis servi dominos deferre poterant, ita quoque
 duplici potissimum de causâ in dominos torqueri,
 ubi de incestu vel conjuratione agebatur. Patet
 hoc ex ipso *Cicerone de partit. Orat. non procul
à fine, his verbis: Dicendum de institutis Athe-
nienſium, Rhodiorumque, doctissimorum homi-
num, apud quos etiam (quod acerbissimum est)
liberi, civesque torquentur. De nostrorum etiam
prudentissimorum hominum institutis, qui cum de
servis in dominos quæri noluisſent, de incestu ta-
men & conjuratione, quæ facta me consule est,
quærendum putaverunt. Nec tantum de illa con-
juratione; sed, ut opinor, de iis omnibus, quæ
in rempublicam factæ esse videbantur: ut & aliis
de rebus omnibus, quibus salus publica læsa esse
videri poterat: ideoque quæſtionem habere li-
cebat de servis contra dominos in fraudati census
accusationibus per L. I. C. de Quæst. & L. I.
§. 20. D. cod. tit. Milonis autem adversarii ja-
ctabant, eandem, qua P. Clodius occisus est, se-*
 natum

natum judicasse contra rempublicam esse factam. Itaque Cicero non tam negat servos in Milonem dominum suum torqueri potuisse, quam probat, nihil opus fuisse, ut torquerentur. *Quid, inquit, opus est tortore? quid quaris? occideritne? occidit, jure an injuria? nihil ad tortorem, facti enim in equileo questio est, juris in judicio.* Postea Imperator Tacitus cavit (ut loquar cum Flavio Vopisco Vita Tacit. Cap. 9.) ut servi in dominorum capita non interrogarentur, ne in causa majestatis quidem. A Justiniano autem illa Taciti cautio abolita fuit: sic enim legimus L. 7. §. 1. C. ad leg. Jul. Majest. In hoc item crimine, quod ad lesam Majestatem Imperatoris pertinet, etiam in caput domini servi torquentur. Sed, dicat aliquis, quid Miloni profuit, manumisisse servos? nonne & liberti, & cæteri promiscue homines torqueri poterant? Nego id licuisse cum salvâ libertate Populus Romanus suis legibus vivebat: postquam verò exorti sunt, qui dice-

Hoc volo, sic jubeo, sit pro ratione voluntas, nulli ferme torturam effugere valuerunt. Quin tandem pro jure obtinuit ut liberi cujuscunque generis homines torqueri possint. Vide Tholqsanum Syntag. Juris univ. Lib. XLVIII. Cap. 12. Num. 28. 29. & Heemskerkium Notis ad Arcadum Batavicam Belgico idiomate à se conscriptam Edit. Ult. Pag. 435. Olim autem apud

Romanos præter servos, neminem tortum fuisse, manifestum sit ex toto titulo *D. de Quæstionibus* qui de servis ferme solis loquitur. Neque mirum sic in servos sæviisse, quos inter homines vix haberent. Quis nescit illos quadrupedibus æquiparatos fuisse, ac jure civili pronullis habitos? Hinc Imperator dicit §. 3. *Inst. de Injuriis*, servis nullam fieri injuriam, quod tamen de leviori tantum injuria intelligendum: at si servus infamatus sit, vel facto aliquo, vel crimine scripto, puto causæ cognitionem prætori porrigendam, inquit *Ulpianus L. V. §. 44. D. de Injuriis*. Quo autem pacto quæstio de servis per tormenta habebatur, satis clare à *Cicerone* est ostensum *Orat. pro Cluent.* *haud ita longe à fine*. Cum igitur servi Romanis tanto despectui essent, levibus etiam de causis torqueri poterant; liberi veròne quidem de causis gravioribus. In transitu non nihil lucis fœneremur *Juvenali Satyrâ. VI. v. 222.* ubi uxor marito pro servo intercedenti, ac dicenti, nimis diu de morte homini inferenda deliberari non posse ita indignabunda respondet:

O demens, ita servus homo est?

Scilicet putabat servum hominem non esse; forsitàn quia vitæ necisque potestatem in eum Dominus habebat; nam apud omnes peræque gentes animadvertere possumus, dominis in servos vitæ necisque potestatem fuisse, ut legimus *L. I. §. 1. D. qui sunt sui vel alien. jur. & §. 1. Inst. eod. tit.* Quod quam iniquum fuerit, vel ipse *Claudius*

dius vidit, cætera stultissimus princeps, de quo *Suetonius Vitâ Claudii, Cap. 25.* sic loquitur: *Cum quidam agra & affecta mancipia in insulam Æsculapii tadio medendi exponerent omnes qui exponerentur, liberos esse sanxit, nec redire in ditionem domini si convaluissent: quod si quis necare quem mallet, quam exponere, cadis crimine teneri.* Postea, Divus Antoninus constitutionem fecit, ex qua, qui sine causa servum suum occiderit, non minus puniri jubetur, quam si alienum servum occiderit. Quin & major asperitas dominorum ejusdem Principis constitutione coercetur; præsertim si servi ad Statuam Principum confugiant. Consule *L. I. & II. D. de his, qui sunt sui jur. vel alieni. §. 2. Inst. eodem titulo.* Sed ut ad Ciceronem revertamur, sic dicimus præter servos neminem invitum torqueri potuisse: quare homo pauper apud *Quintilianum Decl. VII.* qui ultro se tormentis offerebat, hæc verba usurpat: *Nemini, judices, credo dubium, legem, quæ torqueri liberum hominem vetat, hoc prospexisse tantum, ne quis torqueretur invitus; & jura, quæ nos à servilium corporum conditione secernunt, impatientia tantum succurrisse nolentium,* Atque hoc quidem pacto satis clarum fecimus illum M. Tullii locum, quem proponebamus hujus capitis initio. Libentes de servis alia multa dicereamus, nisi omnia occupasset *Laurentius Pignorius*, Vir eruditissimus, cujus egregium tractatum de *Servis* Andreas noster Frisius de novo

nuper typis excudit. Non nulla tamen addemus, quæ non omnibus ubique fiunt obvia. Cum Romani statuerent servis ne ab aliis quidem fieri injuriam, Athenienses contrà illis dabant injuriarum actionem in ipsos dominos, censente Cl. Casaubono *Animadv. in Athenæum Lib. VI. cap. 19.* Unde Casaubonus hoc hauserit, profecto nescio: saltem ex *Athenæo* non sequitur, apud quem ita legimus: Ἀθηναῖοι δὲ ἐπὶ τῆς τοῦ δούλου φρονέουσιν τύχης, ἐνομοθέτησαν καὶ ὑπὲρ δούλων γεγραμμένης ὑβρίσεως εἶναι. *Athenienses vero servili etiam fortuna consulendum esse rati, legem sciverunt, ut de injuriâ servis illatâ daretur actio.* Nam in quemvis, præter ipsum herum opinor, injuriarum actionem servis concedi, ex verbis sequentibus patet. Ὑπερίδης γὰρ ὁ ῥήτωρ ἐν τῷ κατὰ Μαντιθέου αἰκίας, φησὶν, ἴθισαν ἔμῳ ὑπὲρ τοῦ ἐλθούσης, ἀλλὰ δὲ ἰάν τις εἰς δούλου σῶμα ὑβρίσῃ, γεγραμμένη εἶναι κατὰ τὴν ὑβρίσιν. *Itaque Hyperides Rhetor in oratione contra Mantitheum, statuerunt, inquit, non tantum contra eum injuriarum actionem dari, qui liberos injuriâ affecerit; sed & qui servi corpus contumeliose flagris ceciderit.* Recte itaque Samuel Petitus *Comment. in leges Atticas pag. 176.* illum Athenæi locum refert ad istam Atheniensium legem, quæ injuriarum actionem dabat, contra eum, qui servum alienum pulsasset. Non nego tamen Athenis jus fuisse servis dominos iniquos adigendi, ut se venderent æquioribus: id enim abundè Petitus probat. Quin, certâ pecuniâ persoluta, libertatem consequi

sequi poterant. Quippe fuerunt servorum jura apud Athenienses, quam apud Romanos, longe solutiora. Huc *Plautus* respicit *Stic. Act. III. Sc. I.*

*Atque id ne vos miremini ; homines servolos
Potare, amare, atque ad canam condicere.
Licent hac Athenis nobis.*

Hinc quoque *Demosthenes* dicit *Philippicâ III.*

Πολλὰς ἂν τις οἰκίτας ἴδοι παρὰ ἡμῖν μᾶλλον ἢ ἐξουσίας δὲ τι βέλονται λέγοντας, ἢ πολιτάς ἐν οἰκίαις ἢ δ' ἄλλων σείλαιν. *Videre est in nostra civitate, servos multo liberius loqui quam in aliis quibusdam urbibus ipsos cives. Optime certe Athenienses justam & clementem servitutem præferebant ; ista fortasse ratione impulsæ, quod satis sua sponte miseranda erat servorum conditio. Ad animum revocabant, unde primùm servitus nata esset, quippe ab iis, qui cum se tueri non possent præ mentis aut virium infirmitate, potentioribus & sapientioribus in servitutem se dabant. Multi cum natura sui juris essent, in prudentiorum clientelam ultro venerunt, atque illis operas suas locarunt. Audiamus *Posidonium* apud *Athenæum Lib. VI. cap. 18.**

Ποσιδώνιος δὲ φησιν ὁ δὲ τῆς σοφίας, ἐν τῇ τῶν ἱστορίων ἐνδεχόμενῃ, πολλὰς τινας ἐκείων ἐν δυνάμει παρὰ τῶν σοφῶν, διὰ τὴν τῆς διαίτης ἀσθενείαν, ὅτι δὲ καὶ ἐκείνοις εἰς τὴν ἢ συντηγνῆσαν ὑπερσίαν, ἔπως παρὰ ἐκείνων τυγχάνοντες τῆς εἰς τὰ ἀναγκαῖα ὀφειλόμενης, αὐτοὶ πάλιν δοποδιδῶσιν ἐκείνοις δι' αὐτῶν ἅπαν ἂν ὅσιν ὑπερλείπῃ δυνάμει. *Posidonius Stoicus undecimo libro historia-*

rum scribit; Quosdam & eos non paucos, quia propter imbecillitatem ac tarditatem mentis jus suum tueri nequirent, prudentioribus se ministros tradidisse, ut iis, quæ necessario mente provideri debebant, acceptis, ipsi vicissim reddant suam illis, quam possunt, ministrandi operam. Sic servi, quibus anima pro sale data erat, ne putrescerent, dominorum sapientiâ regebantur, & à periculis præstabantur immunes. Illi corporis instar, domini instar animæ ac mentis erant. Itaque Græci, quod & Latini Jurisconsulti imitati sunt, servos σῶματα id est, corpora vocabant, uti prolixè probant Viri doctissimi J. Casaubonus *Animad. in Athenæum Lib. V. cap. 10.* & Thomas Gatakerus *de Stylo N. Test. cap. 10. pag. 103. & seqq.* Cum Posidonio non male convenit *Basilio*, qui non injuria Magni cognomen sortitus est, *Libro de Spiritu Sancto, c. 20.* Non pigebit integrum ejus locum describere, licet paulo longiorem.

Οὐκ ἐπεὶ οὖν οἱ, ὅτι παρὰ μὲν ἀνθρώποις τῇ φύσει δ' ἐλάττω ἐσθ'· ἡ γὰρ καταδυναστεύειντις ὑπὸ ζυγὸν δουλείας ἡνέχθησαν. αἱ δὲ αἰχμαλυσίαις, ἡ δὲ πείναις καταδεδάθησαν, αἷς οἱ Ἀἰγυπτίοι τῷ Φαραῶ ἢ κατὰ τινα σελὴν ἐδωκέρητον. οἰκονομίαις οἱ χεῖρες τῶν παιδῶν, ἐκ τῆς τῶν πατέρων φωνῆς, τοῖς φερεμματοῖς ἐβελτίοσι δουλεύειν καταδικάζονταν. ἢν ἐδὲ καταδίκην, ἀλλὰ δουλείας εἰποι τις ἂν εἰπαίτω τῶν γινόμενων ἐξ ἐπιστάτης. Τὸν γὰρ, δὲ ἰνδίκην τῷ φερεῖν, ἐκ ἰχθυῶν ἐν ἑαυτοῖς τὸ χτὶ φύσει ἄρχον, τῶν ἰπῶν κτῆμα γινώσκων λυσιστελίσσων. Ἦνα τὸ τῷ κρατύνῃ λογισμῷ διδουθὲν μὲν, ὁμοίῳ ἢ ἄρματι ἡνίοχον ἀναλαβόντι, ἐπὶ πλοῖον κυβερνήτῳ ἰχθυόντι ὅπῃ οἰκεῖν καθήκον. *Hoc est, vertente Eras-*

mo : *Haud reputantes apud homines quidem nullum esse naturâ servum. Aut enim qui viribus pressi sunt , sub jugum servitutis inducti sunt , veluti in bello capti : aut ob paupertatem in servitutem adacti sunt , velut Egyptii Pharaoni : aut juxta arcanam quandam ac sapientem dispensationem , parentum voce , sapientioribus ac melioribus in servitutem addicti sunt ; sed quam haudquaquam condemnationem , sed beneficium potius duxerit æquus rerum æstimator. Nam qui ob sensus inopiam non habet in sese id quod naturâ imperat , huic utilius est in alterius esse potestate : ut dum potentioris prudentiâ gubernatur , similis sit currui , qui aurigam recepit , aut navi , quæ nauticorum habet clavo assidentem. Quod Basilus vocat τὸ κατὰ φύσιν ἄρχον , id Græci τὸ ἡγεμονικόν dicere solent , quasi principatum obtinens & cætera regens. Principatus autem id dicitur , quo nihil in quoque genere nec potest , nec debet esse præstantius , ut Cicero ait *Lib. II. de Nat. Deor.* Nulli rei melius hoc nomen , quam rationi aut menti convenit , quæ in homine principatum habet , & omnes nostras actiones dirigit , non secus quam auriga currum , ac nauta navem. Tu , Erudite Lector , adi *Cl. Salmasium in Simplicium* pag. 309. & si vacat , cum *Basilio* compara , quæ *Aristoteles* tradit in *Politicis* , & *Jurisconsulti* , præcipue §. 4. *Inst. de jure Person. & L. 5. §. 1. Diges. de Statu Homin.* Nos interim ad ea , quæ instituimus , pergamus. Quamquam solutio-
essent*

essent jura servorum apud Athenienses, dum serviebant, quam apud Romanos : tamen in eos, postquam manumississent illi jus obtinebant longe arctius, quam hi. Ex Atheniensium instituto convictus à patrono libertus ingratus, jure libertatis exuebatur. Hujus instituti meminit *Val. Maximus Lib. II. Cap. 1. Superfedeo te*, inquit Patronus, *habere civem, tanti muneris impium aestimatorem. Nec adduci possum, ut credam urbi utilem, quem domi scelestum cerno : abi igitur, & esto servus, quoniam liber esse nescisti.* Apud Massilienses quoque tres in eodem manumissiones rescindi poterant : si verò quartò dominus deciperetur, errori subveniendum non putabant. Video hoc quoque Romanis licuisse, sed tantum in proprios filios, quos ter à parentibus venum dari potuisse lex Romuli statuit, uti docet optimæ frugis scriptor *Dionysius Halicarnassensis Lib. II. Cap. 28.* In cæteros verò, semel manumissos, etsi forent in patronos ingrati, nihil certum à Romanis statutum fuit, donec Claudius Imperator *ingratos & de quibus patroni quererentur*, ut *Suetonius* refert. *Vitâ Claudii Cap. 25. revocavit in servitutem : advocatisque eorum negavit se adversus libertos ipsorum jus ducturum.* Hoc autem non de omnibus ingratis libertis, sed de iis tantum intelligendum esse, qui delatores submiserint, qui patrono de statu ejus facerent quæstionem, recte docet *Casaubonus Comm. ad h. loc. ex lege 5. D. de Jure Patron.* Consule etiam,

etiam, si liber, §. I. *Inst. de Capitis deminut.*
 & L. 2. *C. de Libert. & eorum liberis.* Adipor-
 rò, quem aliquoties jam citavimus, doct. *Peti-*
tum Comment. in leges Atticas pag. 182. de quo
 viro satis multa tibi suppeditabit *Paulus Colome-*
sus in Galliâ Orientali pag. 169. & seqq. Hoc
 unum addo, *Petitum*, cum in *Punicorum Plau-*
tinorum expositione à *Salmasio Grotioque* vitu-
 peretur, ob eam tamen à *Reinesio* laudari *Epist.*
ad Daumium pag. 309. De sermone Punico apud
Plautum scripsi, posse ad Hebraismum reduci, &
fore, ut, si omnia monstra lectionum, & ineptias
librariorum inde refingamus, ista Punica plane
Hebraea esse certò simus deprehensuri. Hoc verò
 omnium esse verissimum, interea dum mea edun-
 tur, ostendit elegante ingenio homo *Samuel Peti-*
tus, qui omnium istorum *Plantino-Punicorum*
 à doctis depositorum veras lectiones ex *Hebraismo*
 constituit, & exposuit, ita ut nemo desiderare
 praterea possit quicquam. Sic hominum doctissi-
 morum judicia non rarò discrepant. De *Punicis*
 autem *Plautinis* vide autores, quos citat *Pfeiffe-*
rus Notis ad libellum de lusu fol. P. verso. Nos
 aliud jam agimus, neque ita sumus in *Hebraicis*,
 versati, ut in hac causa ferre audeamus ullam sen-
 tentiam. Apud *Athenienses* servi habebant suum
 peculium, ex quo aliquid dominis suis pendebant
 quotannis, atque etiam pro capite numerabant
 suo, ut servitatem exuerent. Multas tamen oc-
 casiones *Heri* captabant, quibus servos peculio
 emun-

emungerent. Harum aliquas eleganter Terentius describit *Phorm. Act. I. Sc. I.*

*Quod ille unciatim vix de demenso suo,
Suum defraudans genium, compar sit miser
Id illa (nova nupta) universum abripiet, haud
existimans*

*Quanto labore partum, porro autem Geta
Ferietur alio munere, ubi hera pepererit:
Porro autem alio, ubi erit puero natalis dies:
Ubi initiabunt. Omne hoc mater auferet:
Puer erit causa mittendi.*

Secus erat apud Romanos, ubi servus nihil habere poterat, in quod hero jus non competeret; nam, ut Imperator ait, §. 3. *Inst. per quas pers. cuique acq. dominis acquiritur, quod servi extraditione nanciscuntur: sive quid stipulentur, sive ex donatione, vel ex legato, vel ex qualibet aliâ causâ acquirant.* Ipse enim servus, qui in potestate alterius est, nihil suum habere potest. Mentio quidem fit apud Romanos peculii servorum; sed eo nomine tantum intelligitur ea pecunia, vel quævis alia res, quæ servis voluntate dominorum relinquitur, ut cum ea negotientur: & ista pecunia dicitur velut patrimonium servi, cum tamen non sit; sed quia separata est à dominicis rationibus, uti recte observat Meisingerus in *scholiis ad §. 20. Inst. de Legatis.* Desinam de servis conscribere, ubi aliquid addidero de eorum sepultura. Erat Romæ locus extra portam Exquilianam,

nam, qui *Puticula* vel *Puticuli* dicebatur, à puteis ibi fossis, in quibus condebantur pauperum ac fervorum cadavera; qui locus tandem in amantissimos hortos à Mæcenate est conversus. Tunc alium suburbanum Augustus. isti usui destinavit, quem ferunt *Culinas* esse dictum. Servis autem inscriptiones ponere vetitum non fuisse, docet *Jacobus Gutherus de Jure Manium Lib. II. c. 36.* quem vide sis, ut & *Kirchmannum de fun. Roman. Lib. II. cap. 23.* Athenis servos mortuos ungere, eorumve funeri circumpotationem adhibere, quam Græci vocant *μερίδατον, τὴν ἐν τῷ τάφῳ γινώσκον ἱστίασιν*, ex Solonis lege non licuit. Hoc *Marcus Tullius* docet *Lib. II. de LL.* ubi etiam patet hanc legem à decemviris in duodecim tabulas esse relata. Verba Ciceronis, ut ea *Manutius* legenda putat, sic habent: *Hæc præterea sunt in legibus de unctura circumpotationeque: SERVILIS UNCTURA TOLLITOR, OMNISQUE CIRCUMPOTATIO.* Cumque omne fortunæ discrimen in morte tollitur, non minus religiosus erat locus, ubi erant fervorum sepulcra, quam ubi divites ac magnates sepeliebantur, ut docet ex *Aristone Ulpianus L. 2. D. de Religiosis.* Nec mirum; fervorum enim etiam Deos Manes esse credebant, quos publicis inferiis propitiari solitos ex *Varrone* discimus *Lib. V. de Ling. Lat.* Hoc sacrificium, inquit loquutus de Accaliis, fit in *Velabro*, quâ in novam viam exitur, ut ajunt

M

qui-

quidam ad sepulcrum Accæ (ut quod ibi prope faciunt) *DIIS MANIBUS SERVI-
LIBUS*, qui uterque locus extra urbem anti-
quam fuit, non longe à porta Romulana. Atque
hæc quidem impræsentiarum de servis suffecerint.

CAP. XV.

*Ars Medica Romæ à servis maxime ex-
erceri solita. Dempsterus notatus.
Propheta Moses explicatus. Διόν. Me-
dicina inventa in Ægypto. Suetonius
explicatus. Ars Medica in maximo ho-
nore apud Græcos, ut & apud He-
bræos, De Medicis fœminis. Quin-
genui Romæ medicinam fecerint. Di-
eta quædam in Medicos scoptica. Dre-
lincurtius notatus. Suetonius expensus.
Antonius Musa. Medici à Justiniano ad
incitas redacti. Medicina ars vulga-
ris. Virgilius explicatus. Medici nomen
quam late apud Romanos patuerit.
Gymnasia sive exercitationes.*

NON ab equis, quod dicunt, jam transcendemus
ad asinos; sed ab asinis potius ad boves, id est,
à servis ad Medicos. Artem medicam apud Roma-
nos à servis plerumque exerceri fuisse solitam, ne-
mini, opinor, est ignotum. Itaque non opus
est, ut multis probem. Exstat Augusti epistola
ad Agrippinam neptem scripta, cujus fragmen-
tum

tum invenitur apud *Suetonium Vitâ Caligula C. 8.* & in eo hæc verba : *Mitto praterea cum eo ex servis meis medicum, quem scripsi Germanico, si vellet, ut retineret.* Apud *Senecam Lib. III. de Benef. Cap. 24.* sic legimus : *Corfinium Caesar obsidebat : tenebatur inclusus Domitius. Imperavit Medico eidemque servo suo, ut sibi venenum daret.* Ad quem locum recte *Cl. Lipsius: Diu Medicina Roma apud libertos aut servos, ut ingenuis parum digna. Julius Caesar primus decus addidit, & civitate eos donavit : qui liberi nempe & exteri essent.* *Augustus* deinde, in honorem *Antonii Musæ ; immunitatem.* Vide quoque disertissimum *Romuli nepotum, Marcum Tullium Orat. pro Cluentio*, ex quo itidem colligimus *Heros vel lucri, vel amicitiae causa aliis utendos dedisse servos suos Medicos.* *Sassia*, inquit, *emit de A. Rupilio, quo erat usus Oppianicus Medico, Stratonem quendam.* Quin *servis Medicis tabernæ dabant, ut ibi Medicinam exercerent.* *Larinum postquam venit, Ciceronis sunt verba, quæ à Stratone illo venenum antea viro suo datum sibi persuasum esse simulasset, instructam ei continuâ, & ornatam Larini medicine exercendæ causâ tabernam dedit.* *Conflctantur semper Medici cum ægrotis & sordibus, quod putabant homines dedecere liberos.* *Turpe quoque videbatur, & ingenuis indignum ex aliorum incommodis sua captare commoda, & victum quærere ex aliorum doloribus.* Nam *medicis* ut *Seneca ait, gra-*

vis annus in quaestū est. Lepide eos subsannat *Philemon* :

Τίς ἴσῃ δὲ τῷ ; ἰατρὸς. αἱ κακῶς ἔχῃ
 Ἄπας ἰατρὸς , ἀν κακῶς μυθεῖς ἔχῃ ;

Quis iste porro ? Medicus. ô quam sese ha-
bet

Medicus male omnis , nemo si male sese ha-
bet !

Ergo servis medicam artem relinquebant. Adi
Thomam Dempsterum , Paraleg. ad Rosini Anti-
tiq. Rom. Lib. I I. Cap. 17. Qui in eo tamen
 haud recte opinatus est , quod voluit apud Ægy-
 ptios quoque Medicos servos fuisse , quia *Gene-*
seos (Cap. L. v. 2. hæc verba occurrunt : יצו יוסף
אֶת-עֲבָדָיו אֲתֵּם הָאֵלֶּם לַחֲנֹת *Et præcepit Joseph servis*
: אֲתֵּם אֲתֵּם אֲבֵי *patrem suum.* Fateor quidem עֲבָדָיו proprie ser-
 vum denotare ; ast hoc semper obtinere meritò
 pernego. Non rarò significat *quemvis famulum ,*
subditum , & alicujus imperio subiectum. Qua-
 re Septuaginta Interpretes non modò per οἰκέτω ,
 aut δέλω ; sed & per ἀποθεσπον , ὑπέρτω , & ὑπὸ κούρ
 reddunt. Quin & δέλω apud Græcos non sem-
 per sumitur pro eo , qui ipso actu servit ; sed
 aliquandò pro jam manumisso , & δέλω οἰκίτης
 hoc interest. Non ingratum istud à me dici ,
 ex Chrysippo docet *Athenæus Lib. VI. C. 19.*

Διαφέρειν δὲ φησι χρύσιππος δέλω οἰκίτην , γράφειν ἢ δούτῳ
 περὶ ἐμονίας , διὰ τὸ τὴν ἀπελευθέρωσιν μὲν , δέλω ἵτι εἶναι.
 Οἰκίτης

Οἰκίτης ὅτι τὸς μὴ τῇ κτήσεως ἀρεμῆς. ὁ γὰρ οἰκίτης, φησὶ, δὴ-
 λὸς ἐστὶ κτῆσις καταπαταμένη. *(Chrysippus, libro secun-*
do de consensione, τὸ δὲλον discrepare censet τὸ οἰκίτη,
quod δέλοι permaneant, etiamsi manumissi sint;
οἰκίτης verò nondum exierint de potestate domino-
 rum : οἰκίτης enim esse adhuc domino obnoxium,
 qui eum possidet. Apud Ægyptios saltem, Me-
 dicos servos non fuisse hoc unum satis evincit,
 quod illi medicam artem cæteris fere omnibus an-
 teponebant, ac Medicos multis laudibus honori-
 busque mactabant, ut bene observatum est à doct.
Riveto ad cit. Genes. locum. Quin artem Medi-
 cam non alibi, quam in Ægypto ortum habuisse,
 traditum est à viris eruditis. Vide *Hieronymum*
Mercurialem Var. Lect. lib. II. cap. 18. In-
 venio in Græco penæ, inquit *Calius Rhodiginus*
Ant. Lect. lib. XVI. cap. 3. *Theona*, id est
 Θέονα, quem ὁ Θέων dicunt, apud Ægyptios
 fuisse artis *Medicæ* repertorem. Nec Tiberii
 quidem Cæsaris tempore medicina inter Ægy-
 ptios excoli desierat : cum enim ejus principatu
 insolens lues totâ Româ vagaretur quæ joculari
 nomine *Mentagra* vocabatur, neque opem ferre
 possent Medici Romani, advenerunt ex Ægypto
 genetrice talium virorum medici, hanc solam
 operam offerentes, magnâ suâ prædâ, ut verbis
 utar *Plinii lib. XXVI. cap. 1.* Senserunt au-
 tem id malum nec fæminæ, aut servitia, plebes-
 que humilis, aut media, sed procures, maxime
 veloci transitu osculi. Hoc credo occasionem de-
 disse

disse Tiberio, *quotidiana oscula editto prohibendi*, narrante in *ejus Vitâ Suetonio Cap. 34.* Quare istud edictum, quod quidam faciunt, superbiæ non adscripserim; maxime quia illo capite nihil *Suetonius* recenset, nisi quod recte & cum ratione à Tiberio est factum. Ab *Ægyptiis* artis Medicæ honor videtur transiisse ad *Hebræos*, de quibus recte *Iosephus Scaliger Scalig. Prim. pag. 61.* *Apud Hebræos autem Medici servi non erant, ut apud Romanos.* Quanti illi Medicos fecerint, non aliunde melius quam ex *Syracide* patet, quem audi, quæso, loquentem *Cap. XXXVIII. v. 1. 2. 3.* Τίμα ἰατροὺν ποθὲ τὰς χεῖρας τι-

μαῖς αὐτῷ. Καὶ γὰρ αὐτὸν ἔκτισεν ὁ κύριος. Παρὰ γὰρ ὑψίστου ἐστὶν ἰασις, & ποθὲ βασιλείας λήψεται δόξαν. Ἐπιστήμην ἰατρικῆς ἀνυψώσας κεφαλὴν αὐτοῦ, & ἱκανοποιήσει τὰ θαυματούργια.

Afflicte Medicum honoribus suis propter necessitatem: Dominus enim creavit eum. Nam medicina est ab Altissimo, & à rege gloriam accipiet. Scientia medici extollit caput ejus, & movet admirationem proceribus. Quid quod Tobias à Raphaële Angelo, medicinam sibi datam sive vere narrat, sive fingit dramatice. De Indis narrat Rhodiginus Ant. Lect. Lib. XVIII. Cap. 31. eos à suis Brachmanibus proxime colere medendi peritos: quorum Philosophia circa humani corporis contemplationem distringatur: verum non aliunde peti medicamenta fere, quam ex victus ratione. Græci quidem Medicinæ inventionem ad ipsos Deos retulerunt, Ocularia quidem ad Apollinem, Clinices

nices ad ejus filium Æsculapium, *Chirurgica* vero ad Chironem Centaurum, ut observatum est à *Dempstero loco sup. cit.* Athenis tantam dignitatem arti Medicæ tribuerunt, ut eam addiscere nec servis, nec fœminis licuerit: tandem tamen id fœminis ingenuis concessum fuit. Rem totam ex *Hygino* discimus *Fabul. Cap. 274.* Antiqui obstetrices non habuerunt, unde mulieres verecundiâ ductæ interrerant. Nam Athenienses caverant ne quis servus aut fœmina artem medicinam disceret. Agnodice quædam puella concupivit medicinam discere, quæ cum concupisset, demptis capillis, habitu virili, se Hierophila cuidam traiecit in disciplinam. Quæ cum artem didicisset, & fœminam laborantem audisset, ab inferiore parte veniebat ad eam: quæ cum credere se noluiisset, æstimans virum esse, illa tunicâ sublata, ostendebat se fœminam esse: & ita eas curabat. Quod cum vidissent medici, se ad fœminas non admitti, Agnodicen accusare ceperunt, quod dicerent eum glabrum esse & corruptorem earum, & illas simulare imbecillitatem. Quo cum Areopagita consedissent, Agnodicen damnare ceperunt: quibus Agnodice tunicam allevavit, & se ostendit fœminam esse. Et validius Medici accusare ceperunt: quare tum fœminæ principes ad judicium convenerunt, & dixerunt: Vos conjuges non estis, sed hostes: quia quæ salutem nobis invenit, eam damnatis. Tunc Athenienses legem emendarunt, ut ingenua artem me-

dicinam discerent. Vide sis Samuelem Petitem Comment. in Leges Atticas pag. 300. & de medicis fœminis, quæ etiam Romæ erant, Thomam Reinesium Epist. ad Rupertum pag. 296. ubi docet in qualibet urbis regione fuisse certo numero lectas mulieres, quæ & medicandi opere & obstetricandi vitam tolerabant. Quamquam autem, ut dictum est hujus initio capituli, medici plerumque servi erant apud Romanos, non deerant tamen ingenui, qui hanc artem exercerent. Hi ex Græcia potissimum, aut Ægypto adveniebant. Clarissima in hanc rem sunt Plinii verba Lsb. XXIX. cap. 1. Solam hanc (Medicinam) artium Græcarum nondum exercet Romana gravitas in tanto fructu: paucissimi Quiritium attigerunt, & ipsi statim ad Græcos transfuga: imo vero auctoritas aliter quam Græce eam tractantibus, etiam apud imperitos expertesque lingua, non est. Primum è Medicis venisse Romam Peloponneso Archagathum Lyfaniæ filium, L. Emilio, & M. Livio Coss. anno urbis D. XXXV. eique jus Quiritium datum, & tabernam in compito Acilio emptam ob id publice, Cassius Hemina, ex antiquis, memoriæ tradidit. Huc usque Romani sine Medicis degerunt. Inde tamen inferri minime potest Medicos sexcentis annis exulasse Româ, quam veterem calumniam à Medicorum ordine nuper depulit Carolus Drelincurtius ea oratione, quam quatuor ante annis in celeberrimâ Batavia Academiâ habuit. Istius autem

ca-

calumniæ primum seminatorem fuisse statuit *H. C. Agrippam*, qui non quinto decimo, ut ille ait, sed sexto decimo ineunte seculo integra literarum seminaria infelici istac semente conseruit. Natus est enim Colonia Agrippinæ 1486. obiit verò Gratianopoli 1535. annum ætatis agens quinquagesimum. Nec diu Roma Medicos foverat, cum eorum rursus tœdedit. Audiamus iterum *Plinium l. c. Vulnerarium eum* (Archagathum) tradunt fuisse vocatum, mireque gratum adventum ejus initio : mox à savitia secandi prendique, transisse nomen in carnificem, & in tadium artem omnesque medicos. Atque id profecto non injuriâ : quippe discunt periculis nostris, & experimenta per mortes agunt : medicoque tantum hominem occidisse impunitas summa est. Quinimo transit convitium : ultroque qui periere, arguuntur. Facete de Medicis *Sidonius Apollinaris Lib. II. Epist. 12. Parum docti, & satis seduli languidos multos officiosissime occidunt*, ad quem locum vide sis doct. *Savaronem*. Notum est illud ex *Menandro* sumptum :

Πολλῶν ἰατρῶν εἰσὸς μ' ἀπώλεσεν.

Multorum Medicorum introitus perdidit me. De Adriano Imperatore narrat Xiphilinus Vit. ipsius fine : Καὶ τίλῃ τ' τε ἀκριβοῦς τῆς κατὰ τὴν διαίτην ἀπώλετο, καὶ ταῖς μὴ προσήκουσαις ἰδαδῆς & ποταῖς χρεώμενος ἰπιδύτην, λέγων & βοᾶν τὸ δαμάσκειν, ὅτι πολλοὶ ἰατρὸι βασιλεῖα ἀπώλεσαν. Tandem diata rationem penitus ne-

glexit, & utens iis eduliis potibusque, quæ minime conducebant, exspiravit, dicens & clamans hoc vulgò tritum: Multi medici Regem occiderunt. Non possum hac occasione omittere elegantissimum *Agathie* epigramma, quod legitur *Anthol. Græ. Epig. Lib. II. Cap. 22.*

Γατὴρ τις ἔμοι ᾧ ἰὸν φίλον υἱὸν ἔπεμψεν,
ὥτ' ἐμαθεῖν παρ' ἔμοι τὰντα τὰ γραμματικὰ.
ὧς ᾗ τὸ, ΜΗΝΙΝΑ ΕΙΔΕ, καὶ ΑΛΓΕΑΜΥΡΤ
ΕΘΗΚΕΝ,
Ἐγγα, ὅτ' ἐρείπον τοὺς δ' ἀκάλυθον ἔπαι,
ΠΟΛΛΟΤΣ Δ' ΙΦΘΙΜΟΤΣ ΨΥΧΑΣ ΑΙΔΙ
ΠΡΟΙΑΨΕΝ,
Οὐκ ἔτι μιν πέμπει πρὸς με μαθησόμενον.
Αλλὰ με ἰδὼν ὁ πατὴρ· σὺ με χάρες, εἶπεν, ἱπταίρε.
Αὐτὰρ ὁ παῖς σὰρ' ἑμοὶ τὰντα μαθεῖν δύναται,
Καὶ γὰρ ἰγὼ πολλὰς ψυχὰς αἰδὼν προῖάμηναι,
Καὶ πρὸς τῷ ἑδὼν γραμματικῷ δίδμα.

Medicus quispiam mihi misit filium suum dilectum, ut eum in his Grammaticis erudirem. Simulac verò didicerat, IRAM CANE, & DOLORES MILLE INTULIT, & tertium versum, qui hosce sequitur, MULTAS AUTEM ILLUSTRAS ANIMAS DEMISIT AD ORCUM, non amplius ad me illum mittit, ut disceret. Sed cum me Pater vidisset, gratias tibi, inquit, ô amice, ago: verum ista à me ipso filius meus discere potest. Ipse enim multas animas ad orcum demitto, nec quicquam Grammatico indigeo, ut hoc faciam. Facetissimum est illud de prætore quodam, qui, certantibus inter se Medicis & Juristis utri dignitate præcederent, li-
tem

tem hanc lepidâ interrogatione diremit : *quaesivit enim (Agrippam loquentem audis de Vanit. Scient. Cap. 82.) ex litigantibus illis, quis mos & ordo servaretur in educendis ad supplicium reis, uter praeceperet & sequeretur, latrone an carnifex? Cum responderent, praeceperere latronem, sequi autem carnificem, dedit ille sententiam, praecedant ergo iurista, sequantur medici: istorum insigne latrocinium, horum temeraria homicidia notans.* Hæc in malos Medicos dicta bonis doctisque odium quidem conflare poterant; verum nunquam efficient, ut arte medicâ carere possimus. Roma saltem post Archagathum Medicis nunquam caruit, quorum aliqui ad summas divitias fuerunt evecti, ut illa gens pecuniæ avidissima esse solet. Istam labem ne ipse quidem Æsculapius effugit. De eo sic canit *Lyricus Thebanus Pyth. Od. III.*

Ἐτρεπε κακῆϊον ἀγόνος μ-
 ἔδω χυτὸς ἐν χερσὶν φαίεις,
 ἀνδρὶ ἐκ θανάτῳ κομίσσῃ,
 ἥδη ἰαλακτότα. χερ-
 σὶ δ' ἄρα Κροτίαν
 ῥίψαις δι' ἄμφοιν ἀμφοτέρῃ
 σέρων κατέλειν
 αἰκίας, αἰθων ᾗ κεχυ-
 τὸς εἰσεκνήψε μόρον.

Impulit illum quoque ingenti mercede aurum, quod manibus viderat, ut hominem mortuum ad vitam reduceret. Quare Jupiter manibus jaculatus fulmem per amborum pectora, statim vitam ademit, & ardens fulmen immisit mortem. Alia exempla

pla vide apud *Plinium loc. sap. cit.* & quædam recentiora apud *P. Camerarium Hor. subcis. lib. I. cap. 4.* Non probo tamen *Drelincurtii* argumentum, qui ut *Catonis* & *Archagathi* temporibus, plures Romæ fuisse Medicos evincat, *Plautum*, *Terentiumque* testes producit. Quis nescit plerasque illorum fabulas ex Græco esse conversas, & eas non Romanorum sed Atheniensium mores respicere? Romæ cum agerentur,angebantur tamen agi Athenis. Quare sæpius eorum mirari institutum subiit, qui ex *Plauto* vel *Terentio* testimonia citant, ubi de consuetudinibus, aut rebus Romanis intercedit controversia. Sed de ea re non est hic agendi locus. *Julius Cæsar* longo post intervallo magnum decus medicinæ addidit, testante in ejus *Vitâ Suetonio Cap. 42.* Omnesque, ita scribit, *medicinam Roma professos, & liberalium artium doctores, quo libentius & ipsi urbem incoherent, & cateri appeterent, civitate donavit.* Hos omnes liberos & externos fuisse, recte monet *Berneggerus ad hunc loc.* An idem dici possit, ut quidam velle videntur, de illo medico, cujus mentio fit *Cap. 4.* quemque *Plutarchus Cæsaris* *φιλότροπος* id est, *amicum* vocant, nondum certum est apud me, nec etiam an fuerit idem ille *Antistius*, qui principis sui tribus & viginti plagis in senatu confossi cadaver perlustravit, ut non nemo sentit. Nunquam mihi illorum ratio arrisit, qui quicquid à verisimilitudine non omninò abhorret, id continuò obtrudere conantur

tur pro vero. Est hoc ævum ejusmodi ingeniorum nimium profectò quam ferax. Non sequitur, quia *Amicum* à Plutarcho vocatur, ideo liberum fuisse ingenuumque : quamquam Romanos proceres ejusmodi aliquando circa se medicos habuisse non negem. Fuit forte servus domino suo maxime carus, atque ideo *amicus* dictus : sic ille, qui à Pyrrho perfuga senatui est pollicitus, se venenum regi daturum, & eum necaturum, ab antiquis autoribus cum famulus ejus, tum amicus & medicus dicitur fuisse. Quamquam, ut verum fatear, inter *famulum* & *servum* non parum interest : nam, ut recte scribit *Ansonius Popma de differt. verb. lib. II. famulus dicitur, quicumque in ministerio est, sive servus sit, sive liber, bona fide nobis serviens.* Vel potius credo liberum fuisse, quem Cæsar propter artis peritiam arctâ amicitia complectebatur. Talis fuit Antonius Musa, qui, cum ejus operâ ex ancipiti morbo Augustus convaluisset, non modo magnam pecuniæ vim, sed & statuam adeptus est, quam ei, ære collato, juxta signum Æsculapii statuerunt. Hic ille est, de quo ita *Virgilius in Cataleëlis* :

Cui Venus ante alios, Divi, Divûmque sorores,

*Cuncta, neque indigno, Musa, dedere bona,
Cuncta, quibus gaudet Phœbus, chorus ipseque Phœbi,*

Doctior ô quis te, Musa, fuisse potest?

Vide

Vide ad ad hos versus Illust. heroa *J. Scaligerum*.
 Hujus apud Augustum gratiâ & favore factum
 esse ferunt, ut universus medicorum ordo immu-
 nitatem vacationemque impetraret. Quare mi-
 rum non est Augustum, cum magnâ sterilitate,
 ac difficili remedio, venalicias & lanistarum fa-
 milias, omnesque peregrinos urbe expelleret,
 excepisse tamen medicos & præceptores. Quæ
 sequentes Imperatores de Medicis statuerint, vi-
 dere est *L. 6. §. 1. & seqq. D. de Excusationi-*
buss, & C. de Profess. de Medicis, toto titulo.
 Ea non repetam, contentus adscripsisse verba
 Imperatoris *Inst. de Excusat. Tut. & Curat.*
§. 15. Item Romæ Grammatici, Rhetores &
Medici, & qui in patriâ suâ has artes exercent,
& intra numerum sunt, à tutelâ & curâ habent
vacationem. Idem tamen Imperator immunita-
 tem vacationemque ademisse videtur medicis:
 saltem ad incitas fere eos redegissee certum est.
 Audiamus historicum veracissimum *Procopium*
Hist. Arcanâ Pag. 113. Ἀλλὰ ἔτι καὶ οἱ ἰατροὶ τε, ἔτι δι-
 δασκαλοὶ καὶ οἱ ἐκκλησιαστικοὶ ἀναγκάσιον ἐκείνοις περὶ τῶν
 πρὸς τὴν πόλιν, ἀπὸ οἰκιστῶν βασιλικῶν ἐν τῇ δημοσίᾳ χο-
 ρηγεῖσθαι τέτοις δὲ τοῖς ἐκκλησιαστικῶν ἵταξαν, ταύτας δὲ ἐπὶ
 ἀφείλετο πάσας. *Sed & Medicos, ac liberalium dis-*
ciplinarum magistros necessariis ad vitam exclusit;
quam enim priores Romani principes his ab ærario
largiti sunt, sportulam ademit. Et paullo inferius:
 Καὶ ἐπὶ ἰατροῦν τι, ἢ διδασκαλῶν καὶ λειπὸν ἔχοντο λόγῳ.
Neque medicorum, neque magistrorum nulla in
poste-

posterum ratio habebatur. Plura si de Medicis, & Medicæ artis præstantiâ scire desideras, consule Franciscum Vallesum de sacrâ Philosophiâ cap. 74. nec non Barnabam Brissonium Antiq. Select. lib. III. cap. 3. & 4. Sed quicquid sit de immunitate Medicorum & arte medica, nunquam eam Romani dignam duxerunt, quæ exerceretur à patriciis, senatoribus, Equitibusve: sed à mediâ potius vel infimâ plebe. Aut, fallor, aut Cicero lib. I. de Offic. hoc innuit: Quibus autem, inquit, artibus aut prudentia major inest, aut non mediocris utilitas quaritur, ut Medicina, ut Architectura, ut doctrina rerum honestarum; hæ sunt iis, quorum ordini conveniunt liberales. Quare non injuriâ Marcus Antonius lib. VI. ἡ δὲ εἰς ἰατρικὴν §. 26. medicinam refert inter artes vulgares, ad quem locum ad sis Mericum Casaubonum magni Isaaci filium. Hinc facile est intelligere, cur Virgilius Aeneid. lib. VI. v. 391. Iapin Medicum vocat inglorium:

*Jamque aderat Phœbo ante alios dilectus Iapis
Iasides: acri quondam cui captus amore
Ipse suas arteis, sua munera latus Apollo
Angurium citharamque dabat, celereisque sagittas.*

*Ille, ut depositi proferret fata parentis,
Scire potestates herbarum, usumque medendi
Maluit, & mutas agitare inglorius arteis.*

Quare autem medicina *ars muta à Virgilio* dicitur, cum cæteri interpretes, tum ex *Ursino* docet *Mercurialis Var. Lect. lib. III. cap. 13.* Atque hic tenendum est medicinæ nomen aliquanto latius apud Romanos olim patuisse, ac hodie apud nos patet: qua de re vide *Joannem Calvinum in Lexico Juridico*. Certe etiam inter medicos referuntur qui alicujus partis corporis, vel certi doloris sanitatem pollicentur: ut puta si auricularius, si fistula, vel dentium: non tamen si incantavit, si imprecatus est, si (ut vulgari verbo impostorum utar) exorcizavit: non sunt ista medicina genera, tametsi sint, qui hos sibi profuisse, cum prædicatione affirmant, ut legere est l. 1. §. 3. *D. de Extra. Cognit.* Quin & obstetrix medicinam utique exhibere videtur, uti dicitur §. *preced.* Habuisse autem Romanos non secus ac Græcos Medicos quosdam, qui nudis quibusdam experimentis peculiare corporum humanorum partes curare profitebantur, veluti aures, testes, dentes, sed præsertim oculos, dudum est quod docuit *Mercurialis Var. Lect. lib. II. cap. 8.* Isti multum præstitere agyrtis nostris & circumforaneis, qui non de unâ fidelia, quod dicunt, duos parietes dealbant; sed unâ eâdemque potione, sive unguento quosvis morbos curare præsumunt. De his vide quæ non in- eleganter congeffit *Henricus Salmuth. ad Pancirollum de Novis Repertis pag. 48.* Nihil amplius de Medicis & arte medicâ addam, nisi eam vul-

go dividi in partes duas, *ὕγιαν* seu *conservativam*, & *θεραπευτικὴν* sive *curativam*. De hac vel illa agere medicorum est. Id modò dicam ad valetudinem conservandam quatuor generum præsidia requiri. Illa sunt τὰ προφυλακτικά, τὰ κατέμικτα, τὰ ἱσχυρὰ θεραπευτικά, & τὰ τρομερά. Ad quartum genus potissimum pertinent gymnasia sive exercitationes, quas medicinæ causâ primitus inventas fuisse non absque ratione asseritur. De illis accuratissime scripsit *H. Mercurialis VI. Libris de Arte Gymnasticâ*. Hunc sequutus est *Petrus Faber* eo librò, quem inscripsit *Agonisticon*. Ex utroque pleraque sua desumpsit *Jacobus Lydius*, qui doct. senex ante duodeviginti annos egregium libellum edidit de *Agonistice Sacrà*.

CAP. XVI.

Duo fœderum genera. Livius notatus. Fœderati quinam proprie dicti. Perperam Unitas nostras provincias fœderatas appellant. Fœdera columnis æneis inscripta, & apud multos olim sanguine humano sancita. Simile quid à Gentilibus olim Christianis objectum; ut & hodie Judæis. Scordisci sanguinem humanum bibebant; Sarmatæ equinum. Hausto taurino sanguine aliqui obierunt. Judæi & Muhammedani ex religione suâ tenentur sanguine abstinere. Christiani non item. Lucas Euangelista in Actis explicatus. Virgilius correctus.

Cum primum luctari cœpissemus cum gravi hocce bello, quod coacti adversus Gallos gerimus, Deum experti sumus nostris peccatis valde iratum. Hinc tot illæ clades, quibus respublica nostra, extremum spiritum ducens, penè exspiravit. Nihil aliud videbatur exspectandum, quam ut universa patria, cum tantâ curâ tantoque molimine exstructa, corrueret, aut Gallis sese submitteret. Jam melius sperare licet, maxime postquam Gravia, urbs munitissima, in nostram redacta est potestatem. Tunc impar fœdus facile
in-

injissemus : nunc nullum, nisi æquis legibus ictum. Duo sunt enim fœderum genera, de quibus vide *Proculum L. 7. D. de Capt. & Postlim. redempt. ab hostibus*. Scio quidem *Livium* tria genera statuere ; sed, ut ego opinor, minus recte. Sic ille *lib. XXXIV. pag. Edit. Aldina 277. Esse tria genera fœderum, quibus inier se paciscerentur amicitias civitates regesque. Unum cum bello victis dicerentur leges. Ubi enim omnia ei, qui armis plus posset, dedita essent, quæ ex iis habere victos, quibus mulctari eos velit, ipsius jus atque arbitrium esse. Alterum, cum pares bello æquo fœdere in pacem atque amicitiam venirent : tunc enim repeti reddique per conventionem res, & si quarum turbata bello possessio sit, eas aut ex formula juris antiqui, aut ex partis utriusque comodo componi. Tertium est genus, cum, qui hostes nunquam fuerint, ad amicitiam sociali fœdere inter se jungendam coeant. Eos neque dicere, neque accipere leges ; id enim victoris & victi esse. Verùm si rem accuratius examinemus, compariemus de dedititiis dici solere, eos esse in ditione, non autem in fœdere. Itaque duplex tantum erat fœderum genus, alterum æquis conditionibus ictum, alterum imparibus sive iniquis. Operæ prætium est de hisce legere magnum *Literarum lumen Petrum Fabrum Sem. lib. I. c. 7. Illi, quibuscum fœdus iciebatur impar, tenebantur alterius populi majestatem comiter observare, suis tamen legibus relictæ. Hos liberos esse, omnino in-**

telligendum est. Atqui hi proprio nomine fœderati dicebantur, ac superiori populo auxilia subministrabant. Vide *Novell. cxvi. Cap. i.* Luculenter quoque *Cicero* docet, quinam populi fœderati vocentur, iis locis, qui dudum sunt ab aliis adnotati, à *Fabrò* maxime l. c. & *Dionysio Gothofredo* notis ad *L. 7. D. de Capt. & postlim. redemp. ab host.* Fœderati, etiam si liberi essent, erant tamen eo populo inferiores, cujus esse fœderati dicebantur. Libertatis autem eorum nullum certius esse signum potest, quam quod eos Romani magistratus absque lictoribus adiebant. Hoc à *Tiberio* factum est *Rhodi*, & à *Germanico* in oppidis liberis & fœderatis. Vide *Suetonium Vitâ Tib. cap. ii. & Vitâ Cal. cap. 3.* De eodem *Germanico Tacitus* narrat *Annal. lib. II.* eum fœderi socia & vetusta urbis *Athenarum* dedisse, uno ut lictore uteretur, ad quem locum *Iustum Lipsium* adi. Si quis tamen à fœderatis populis Romam legatus mitteretur, eum in orchestra confidere *Augustus* non permisit: cum quosdam etiam libertini generis mitti comperisset, testante in *Augusto Suetonio cap. 44.* Non æque rigidus fuit *Claudius Cæsar*, de quo idem auctor ita scriptum reliquit: *Germanorum legatis in orchestra sedere permisit, simplicitate eorum & fiducia motus, quod in popularia deducti. cum animadvertissent Parthos & Armenios sedentes in senatu, ad eadem loca sponte transierant, nihilo deteriore virtutem aut conditionem suam predicantes;*

eantes; Vitâ Claudii cap. 25. Fœderatis autem populis libertatem aliquando fuisse ademptam, clarum est ex Vitâ Aug. cap. 47. & Tib. cap. 37. ad quem locum in editione Schildiana hæc ex Carolo Sigonio, Viro doctissimo, verba adferuntur: Ut earum civitatum, quæ servitute oppressæ sunt, stipendiaria proprie dicta, quæ aliquid populo Romano pependerunt, immunes, quæ nihil; sic earum, quæ libertate donatæ sunt, fœderatæ præcipue appellatæ, quæ aliquid ex fœdere debuerunt, liberæ, quæ omnino nihil. Libertas autem in eo comprimis sita est, ut suis uti legibus, suosque creare more patrio magistratus possent. Ex dictis satis liquet non satis accurate eos loqui, qui septem Belgii provincias, (provinciarum nomen non pro divictis regionibus, quæ propria est vocis significatio, sed pro quavis diæcesi sumimus) quæ arctissimis inter se vinculis sunt colligatæ, fœderatas vocitant. Hæ non iniquo, sed æquo fœdere coierunt; & non tantum una quæque suis legibus vivit; verum etiam æquali inter se jure omnes fruuntur. Nulla cæteris est superior, aut tenetur aliarum majestatem comiter observare. Has posses confœderatas dicere, cum quadam inter cunctas relatione, nisi eam vocem multi rejicerent, ut Latinis auribus insuetam. Quare melius Unitas dixeris ab ea unione, quæ inter omnes facta fuit Ultrajecti anno 1579. De fœderibus autem ipsis multa sunt à variis scriptoribus collecta. Solebant illa, non secus quam leges, & res gestæ, æneis

columnis plerumque inscribi, ad perpetuum & indelebile monumentum, ut bene observat *Thomas Gatakerus in Cinno pag. 405.* Quin & saxis ea cautibusque apud rudiores populos incisa fuisse, multi sunt, qui testantur; quod apud Danos quoque obtinuisse, ni me fallit memoria, aliquando legi apud *Saxonem Grammaticum.* Id certum est, teste eodem Historico in *Præf. Hist. Danicæ*, eos patrii sermonis carminibus vulgata, linguæ suæ literis, saxis & rupibus insculpenda curasse. *Tanta quippe tradenda rerum suarum memoria cupido eos incescit, ut voluminum loco vastas moles amplecterentur; codicum usum à cautibus mutuantes.* Modi, quibus fœdera coibant, admodum fuere diversi. Hebræi olim solebant dissecare pecus, plerumque juveneam, in partes duas, & per eas transire, velut idem sibi imprecantes, si primi fœderis initi leges violassent. Multi ex Græcis, & præ cæteris Macedones feriebant fœdera, vel pane præciso & invicem gustato, aut vini poculo epoto. Quin & hoc apud eos moris fuit in sanciendo fœderibus, ut ferrum candens manibus tenerent, quod proprie *μύδος* vocatur, Deos precati, ut fœdus tam diu duraret, quam illud latuisset, statimque præcipiterent in mare. Romani cæslâ porcâ, per Jovem Lapidem jurantes, fœdera confirmabant. Plurimæ nationes sanctissimum fœderis vinculum putabant, humanum sanguinem bibisse, sive proprium, siye alienum. Hoc si prolixè probatum

videre desideras, adi *Alexandrum ab Alexandro lib. V. cap. 3. Eliam Putschium Notis ad Salustii Catilinam Cap. 22. Augustum Pfeifferum Antiq. Sac. p. 75. Iustum Lipsium ad Taciti Annal. lib. XII. Iacobum Lydium de Cœnâ Dominicâ Literatorum pag. 59. Ouzelium ad Minutium Felicem Pag. 165. aliosque. Videmus quoque ab improbis Ethnicis simile quid obiectum fuisse Christianis, quos ab hoc crimine satis absolvit Plinius Cæcilianus lib. X. Epist. 97. ubi hæc verba usurpat: *Adfirmabant autem, hanc fuisse summam vel culpa sua, vel erroris, quod essent soliti stato die ante lucem convenire, carmenque Christo, quasi Deo, dicere secum invicem: seque sacramento non in scelus aliquod obstringere; sed ne furta, ne latrocinia, ne adulteria committerent, ne fidem fallerent, ne depositum appellati abnegarent: quibus peractis morem sibi discendendi fuisse, rursusque coeundi ad capiendum cibum, promiscuum tamen & innoxium. Ad hunc locum consule Franciscum Balduinum in Commentario, & in Prolegomenis ad Minucii Felicis Octavium. Ipse apud Minucium Cæcilium, in Christianos ita invehitur: Infans farre contectus, ut decipiat incautos, apponitur ei, qui sacris imbuatur. Is infans à tirunculo farris superficie, quasi ad innoxios ictus provocato, cæcis occultisque vulneribus occiditur: hujus, proh nefas! sitienter sanguinem lambunt, hujus certatim membra disperitiunt, hæc fœderantur hostiâ, hæc con-**

scientiâ sceleris ad silentium mutuum pignerantur
 Quæ calumnia quantum abest à vero, *Minucius*
 his verbis ostendit : *Nobis homicidium nec videre*
fas, nec audire : tantumque ab humano sangui-
ne cavemus, ut nec edulium pecorum in cibis san-
guinem noverimus. De Judæis quoque traditur,
 eos quotannis sive puerorum, sive adultorum
 Christianorum sanguinem effundere, ac bibere;
 ut eo sanentur à fœdo sanguinis profluvio, quo
 infestari illos ajunt ab eo tempore, quo Servata-
 rem nostrum ad pœnam poscentes clamitabant :
Σταύρωσον, σταύρωσον αὐτόν. Crucifige, Crucifige eum,
 Ferunt autem barbarum illum morem originem
 traxisse ex vaticinio cujusdam inter eos prophetæ,
 qui dixerat eos sanari non posse, nisi solo sangui-
 ne Christiano. Hoc de Christi solius prætiolissi-
 mo sanguine dictum, Judæi ad horrenda homici-
 dia traxere. Vide *Iacobum Lydium de Cœnâ Do-*
minicâ Literatorum pag. 65. & ex quo Lydius
descripsit, Kornmannum de Miraculis Mortuo-
rum, Parte V. cap. 25. Item Iacobum Gensium
dialogo, cui titulus, Cajaphas & Annas ex orco
fugitivi. pag. 40. Cæterum an vere istud de Ju-
 dæis dicatur certo non affirmaverim. Ipsi saltem
 uno ore negant. Neque desunt exempla homici-
 dii Judæis à malis Christianis falso objecti. Con-
 sule *Historiam Iudaicam ex Hebraeo in Latinum à*
Georgio Gentio conversam, imprimis pag. 78.
130. 156. Sed hæc nihil ad fœdera, sanguine hu-
 mano olim, ut diximus, sancita. De Armeniis
 Ibe-

Iberisque verba Taciti describam *Annal.* XII. Mos est regibus, quoties in societatem coeant, implicare dexteras, pollicesque inter se vincire, nodoque perstringere. Mox ut sanguis in artus extremos se effuderit, levi ictu cruorem eliciunt, atque invicem lambunt. Id fœdus arcanum habetur, quasi mutuo cruore sacratum. Hinc non multum abludit ille mos, quem in feudis Ligiis observari fuisse solitum *Philippus Camerarius* docet *Horarum subcifarum* lib. I. cap. 6. & lib. II. cap. 59. Fœdera autem humano cruore sacrari minus mirum videbitur, si cogitemus olim non defuisse populos, qui vini aut aquæ instar sanguinem potabant, eundemque humanum. De Scordiscis, Thraciæ gente, id scriptum reliquit *Sextus Rufus Breviarii* cap. 9. Merito ferinam hanc crudelitatem exhorrescimus, cum vel à brutorum sanguine quodam naturæ instinctu abstineamus. Quamquam non nego, multos hunc potitasse, & Sarmatas imprimis, qui apertis equorum venis vitam inde tolerabant. Quò haud dubiò respicit *Martialis Lib. de Spect. Epig.* 3.

Quæ tam seposita est, quæ gens tam barbara,
Cæsar,

Ex qua spectator non sit in urbe tua
Venit ab Orpheo cultor Rhodopeius Hemo,
Venit & epoto Sarmata pastus equo.

Hoc, etsi sint, qui interpretantur de lacte equino, melius tamen de eorum sanguine intelligitur. Vide *Martinum Opitium Var. Lect.* cap. 9.

¶ 16. Gravis ac terrestris est brutorum sanguis, ac multorum, ut docent Medicorum filii, morborum causa, si quis eo utatur. De caprino & taurino sanguine legere est *Plinium lib. IX. cap. 38. & lib. XXVIII. cap. 9* Hauſto taurino sanguine aliquos obiſſe à variis eſt proditum. De Livio Druso vide *Aurelium Victorem cap. 66. de Mida Phrygiæ Rege Cælium Rhodiginum lib. XIV. cap. 12. de Themistocle Cornelium Nepotem*; nam quod hic de veneno tradit, id de taurino sanguine intelligendum eſſe, clare docet *Gebhardus in ſpicilegio. Vide & Ariſtophanem in Equitibus Act. I. Sc. I.*

Βίλλισον ἡμῖν αἷμα τάυρου πειν'

Ο' Θμισοκλῆς γδ δάδαλ' αἷμα τάυρου.

Erit optimum bibere taurinum sanguinem : nam mors Themistoclis optatissima omnium. Eſt igitur Phyſica ratio, quare à sanguine brutorum abſtineamus. A qua multum abeſt ea, quæ à religione petitur. Scimus Judæos cauſa religioſi mandati ne quidem sanguinem guſtare. Qui tamen in eo diſſentiunt, quod alii id ad legem ceremonialem referant, alii numerent inter præcepta Noacho olim data. Judæos, ut in aliis multis, ita hic quoque imitantur Muhammedani, qui tamen sanguine videntur uti ad Medicinam. Conſule virum eruditiffimum, *Joh. Hen. Heideggerum de Lege Cibaria Veteri cap. I.* Non defuerunt in Chriſtianis Viri, cætera quidem doctiſſimi & in Theo-
logicis

logicis ad prime eruditi, qui in eo errore sunt versati, ut putarent, nobis etiam ex divino præcepto à sanguine esse abstinendum. Hos invictis argumentis refellit *Heideggerus*, tum dicto Libro, tum Tomo. I. *Historia Patriarcharum*. Locus, quo illi maxime nituntur, occurrit *Act. XV. 19. 20.*

Διὸ ἰγὰ κείνοι μὴ παρενοχλεῖν τοῖς δούλοις τοῦ θεοῦ ὅτι ἐθνῶν ὁπσι περιέριον ὅτι τίς ἐσθλόν. Ἀλλὰ ὅπως εἴλω αὐτοῖς τῷ ἀπὸ καρδίας δούτῳ τοῦ ἀντιγράμματος ἡ ἰσχυρίαν, ἡ τῆς πορνείας, ἡ τῆς πικρίας ἡ τῆς ἀμαρτίας. *Quare ego censeo non obtundendos esse eos, qui ex gentibus convertuntur ad Deum. Sed ad eos scribendum; ut abstineant à pollutis per simulacra, & scortatione, & suffocatis rebus, & sanguine.* Recte de hoc loco judicat *Cl. Heinsius Exercit. Sac. pag. 300.* nullum in sacris libris locum esse, in quo plus difficultatis invenerunt, plus reliquerunt summi Viri. Nec ipse mihi satisfacit. Minus adhuc illi; qui statuunt Apostolos cum interdicto temporaneo rerum adiaphorarum conjunxisse interdictum scortationis, quam & jus naturæ, & Romanæ quoque leges prohibent. Rem omnem expeditivisse videtur *Alexander Morus*, acutissimi vir ingenii, & facundiæ plus quam humanæ, *Notis ad Novum Testamentum pag. 115.* Sentit enim Apostolos duo prohibuisse summe quidem necessaria, scortationem, imprimis cum mulieribus extraneis, & omnem idololatriæ participatum. Res verò suffocatas & sanguinem non *συνεχόμενους* vetari; sed velut appendices τῶν ἰσχυρίων. Hæc prohibere necesse habebant Apostoli: nam
ut

ut ex Judæis Christiani vix ac ne vix quidem poterant dediscere legem Mosaicam ; ita Christiani ex Gentibus ægre carebant festivis post sacrificia conviviis. Fugiebant quidem oblationem ; at non ita convivium , quod erat participatio sacrificii ex oblatis. Hæc ratio est , cur Apostolus hanc pollutionem vocat I Cor. x. 20. 21. *καταναίων & δαιμονίων , καὶ ἐσθίων δαιμονίων . & τετριζὺν δαιμονίων . Societatem cum Damonibus , calicem Daemonum , & mensam Daemonum .* Stat igitur sententia sanguinis brutorum esum Christianis divinitus non prohiberi. Physicas rationes dari , cur esui non satis aptus sit , libenter atque ultro concedo. De sanguine autem humano quis non abhorreat , nisi ipsis Scythis & Thracibus sit inhumanior , nisi ipsa barbarie magis barbarus ? Hæc de Thracibus facta mentio , in memoriam mihi revocat versiculos *Virgilii Ec. VIII.* ubi de Thraciæ quodam monte loquitur :

Nunc scio quid sit amor ; duris in cotibus illum

Ismarus , aut Rhodope , aut extremi Garamantes ,

Nec nostri generis puerum nec sanguinis edunt.

Miror hos versus in omnibus ferme editionibus sic legi ; cum duo summi Viri *Petrus Bembus de Calice Virgilii pag. 788. & Fulvius Ursinus Notis ad Servium pag. 57.* dudum monuerint , legendum esse.

Ant

*Aut Tmarus, aut Rhodope, aut extremi Gar-
ramantes.*

Non gravabor integra *Bembi* verba describere,
ut vel tandem elegantissimus locus corrigatur:
Non est mons Ismarus inhospitalis, ut Rhodope,
sed cultus: quem vitibus conserebant, neutro sa-
pientius dictum nomine, & numero plurali. Erat au-
tem etiam urbs, quæ quidem alio nomine Maronæa
appellabatur: ut illud quod ait, DURIS IN
COTIBUS, neque de oppido neque de monte
vitifero possit dici. Est igitur sic legendum:

AUT TMARUS, AUT RHO-
DOPE:

Tmarus autem, qui etiam Tomarus dicitur, mons
est Dodonis asperissimus atque incultissimus, non
minus quam Rhodope Thraica. Tota vero etiam
Epirus, in qua Dodone est, inculta & ferrox
semper est habita. Itaque Poëta cum dixisset,
DURIS IN COTIBUS ILLUM,
AUT TMARUS AUT RHODO-
PE: quoniam satis jam sibi videbatur Amoris
sevitiam duorum montium asperitate probavisse,
probat denuo à loci longinquitate, infertque,
AUT EXTREMI GARAMAN-
TES, & quæ sequuntur. Quamquam etiam
enumeratio ipsa duorum montium diversis in re-
gionibus positorum, elucere mihi quidem magis
videtur, atque splendescere, quam si de positis
una

una in Thracia dixisset. Versus quoque & cultior est, & sane hilarior, in quo ter illa segregantis vox AUT dicitur. Vide porro Urfinum l. c. Quid quod ipse Bembus testatur se librum admodum vetustum habere, in quo ita scriptum diserte exstat: qui quidem liber cum aliis quibusdam etiam ad Urfinum devenit. Atque hæc de Virgilii loco.

Claudite jam rivos, pueri: sat prata biberunt.

C A P. XVII.

Persii vulgata Lectio contra Salmasium asserta. Terentius illustratus, & contra eundem Salmasium defensus. Juno Lucina eadem cum Luna sive Diana, neque alia ab Astarte & Urania. Quare Lucina Dicta. Hæc Græcis Εἰλειθυία. Etymon τῆς Εἰλειθυίας. Lilith Adami ante Evam uxor, ac nonnihil de Adamo. Plautus explicatus contra Salmasium. Nocturnus idem qui Vesperus; qua occasione aliquid de Vespero & Lucifero.

RECTE à Cebete scriptum est in tabula ὅτι πάντες οἰνοῦσι τὸ ποτήριον τῆς πλάνης, & τῆς ἀλβίας, ἀλλὰ οἱ μὴ πλείον, οἱ δὲ ὕψιστον. *Omnes bibere potionem erroris & Ignorantia: sed alios plus alios minus. Videmus hoc cum aliis in rebus, tum potissimum in*

re literaria, quæ quoniam admodum est varia & latissime se extendit, neminem hæctenus assertorem nacta est, qui alicubi non cespitaverit. Maximum in studiis literariis nomen merito suo consequutus est; *Claudius Salmasius*,

— — — *cujus se pectore tota vetustas*
Condidit, & major collectis viribus exit.

Hujus tamen errores multi animadverterunt, & eos profecto non leves. Mihi nuper ejus epistolas relegenti, duo occurrerunt, quæ ut approbem, à me impetrare necdum potui pag. 196. contendit pro hisce Persii verbis:

Corvos Poëtas, & poëtrias picas
Cantare credas Pegaseium melos,

legendum esse, *Pegaseium nectar*. Quis unquam audivit nectar auribus propinatum? Bibitur illud quidem à Diis; nunquam verò cantatur, ne ab Apolline quidem & Musis. Multos insanabile auctores corrigendi cocoethes ita tenet, ut quæ sibi displicent, ea statim immutent atque corrumpant. Quæso te, Lector, quid vero est similis *Persium*, ut obscurum ita & duriusculum Poëtam, primam in *melos* produxisse vel auctoritate Homeri, vel literâ *L. geminatâ*; aut divinum potum auribus tribuisse humanis? Interim non est negandum alios quoque idem cum Salmasio de Nectore Persiano sentire; in primis, à quo multi
 sum.

sumpserunt, doctissimum *Politianum Miscell. cap. 44.* Porro satis mirari non potui, cum illustrissimum nostrum *Epist. ad Egidium Menagium pag. 6.* sic vidi scripsisse: *In palliatâ contra decorum Junonem Lucinam invocari à pariente facit Terentius.* Dudum est quod Viri doctissimi *Terentium* adversus hanc calumniam defenderint. Loci autem *Terentii*, quos respiciunt, duo sunt *And. Act. III. S. 1. & Adelph. Act. III. S. 4.* ubi parturientes Junonem Lucinam sic invocant:

Juno Lucina fer opem, serva me obsecro

Per prolepsin Poëticam fieri excusat *Scaliger de Arte Poëticâ lib. VI: cap. 3.* nempe Lucinæ nomen invocari à Græcis. Erat olim, cum de hac re ita judicabam. Quoniam non nisi à castis, & matrimonio jam junctis, aut certò jungendis hanc invocationem esse factam legimus, id eas velle, ut sicut Juno in matrimonio contrahendo faverat, ita sibi faveret Diana in pariendo. Huc respexisse credebam *Virgilium Ecl. IV.* ubi Lucinam ob matronam, dextrâ Junone Pollioni junctam, jamque puerperam, his verbis invocat:

*Tu modo nascenti puero, quo ferrea primum
Desinet, ac toto surget gens aurea mundo,
Casta fave Lucina; tuus jam regnat Apollo*

Junonem autem matrimoniis præesse multis adductis testimoniis probat *Cl. Brissonus de ritu nuptiâ-*

nuptiarum pag. 44. Hinc τίλη^α pronuba, & ζῦλη fuga vel fugatina dicitur. De Diana puerperarum curam gerente cum alii multi, tum Nonnus neminit *Dionysiac. lib. 42.*

Ἀγνυμένην κέρην ὃ μοῖρ' ὅσ' ἔδωκεν Ἰλιάχῃ Λατῶ,

Ἀρτίμιν Εἰλεῖθαι, ἀρηγόντα Σελυτρεῖαν.

Dolentem puellam agre partu editam sortita est Latona, Dianam Ilithyriam, auxiliatricem foeminarum. Clara etiam sunt *Horatii* verba lib. III. Od. 22.

Montium custos, nemorumque virgo,

Quæ laborantes utero puellas

Ter vocata audis, adimisque letho

Diva triformis.

Triformis autem Diana dicitur vel à triplici facie, corniculata, dimidiata & plena; vel quia triplicem personam gerit, triplexque nomen est sortita, in cœlis Lunam, in terris Dianam, apud inferos Proserpinam. Quare Dianæ templum Ephesi conflagrasse perhibent; quia tunc aderat Olympiadi, quæ Alexandrum parturiebat. Hoc alibi apud *Ciceronem* legitur: certe apud *Plutarchum* exstat circa *Init. Vit. Alexandri*. Itaque statuebam, puerperas per Junonem, ac propter eam sibi faventem, invocare Dianam, ut itidem partui adspiraret. Non omnino huic invocationi ab simile esse putabam illud Romanorum juramentum, de quo ita apud *Festum* legimus:

Lapidem silicem tenebant juraturi per Jovem, hac verba dicentes : Si sciens fallo, tum me Diespiter salva urbe arceque bonis ejiciat, uti ego hunc lapidem. Vide *Rosinum Antiq. Roman lib. X. cap. 2.* & *Autores, quos citat Ludovicus Vives ad Augustin. de Civit. Dei lib. II. cap. 29.* Re verò accuratius perpensâ, sic inveni, omnes Deos ad Solem referri, omnes Deas ad Lunam, ut recte scriptum est à *Macrobio Satur : lib. I. c. 17.* Est igitur eadem cum Junone Luna sive Diana. Vide *Plutarchum Quæst. Rom. Edit. Buxhorniana pag. 51.* & *Buxhornium in Notis, Macrobinum Satur. lib. I. cap. 15.* *Vossium de Idolol. Gent. lib. II. cap. 27.* Neque Astarten sive Uraniam aliam esse à Luna vel Junone, ex iis, quæ summi Viri tradiderunt, est clarissimum. Adi imprimis *Fabrum Semest. lib. III. cap. 1. 2.* *Fullerum Missiell. Theolog. lib. I. cap. 13,* *Scaligerum Notis ad Fragm. pag. 26. 27. 36.* *Seldenum de Diis Syris Syntag. II. cap. 1.* De Antonio Caracalla narrat *Herodianus*, gravis auctor, *lib. V. cap. 6.* eum jussisse simulacrum Uraniaë Carthagine afferri, hæc verba addens : *Λίβους μὲν ἐν αὐτῷ Οὐρανίαν καλεῖσι. Φόινικας δὲ Ἀστροάρχην ὀνομάζουσιν, Σελεύνην εἶναι δέλοντες.* Hanc *Afri Uraniam* vocant, *Phœnices Astroarchen*, Lunam esse affirmantes. Ergo qui Junonem Lucinam aut Dianam parturientibus adesse dicunt, nomine quidem dissentiunt, re non item. *Lucina* autem (cum *Macrobio Saturn. lib. VI. cap. 16,* loquor)

à par-

à parturientibus invocatur, quia proprium ejus munus est, distendere rimas corporis, & meatibus viam dare, quod accellerando partui salutare. Hoc est, quod eleganter Poëta Timotheus expressit :

Διὰ λαμπαρόν πρόλον ἄστρον, διὰ τ' ἁκυτόκαιο Σιλάδας.

Per lucidum polum astrorum, perque Lunam, quæ partum accelerat. Huic Junoni Lucinæ, ut *Dionysius Halicarnassensis*, idoneus auctor, tradit, *Servius Tullius* ærarium instituit, in quod pro singulis nascentibus parentes, sive cognati certi pretii nummum inferrent. Exstant elegantissimi nummi, ex quibus colligant eruditi, quæ partes fuerint Lucinæ circa parturientes, Horum unum nobis videndum exhibet *Ondanius* noster eo libro, quem Belgico Idiomate edidit, *de Potentia Romanâ* pag. 255. Alteros duos doct. *Cuperus Observ. lib. II. cap. 9.* desumptos ex *selectis numismatis Petri Seguini*, editis Parisiis 1666. Cur autem Juno sive Diana *Lucina* vocetur, diversæ sunt Doctorum Virorum sententiæ. Multi derivant à *Luce* vel *Luceo*, quia Lunæ est noctu lucere. Alii *Lucinam* ita dictam volunt, quia nascentes in lucem producit. Hoc certe confirmari videtur ex nummis, qui Lucinam sæpe cum face repræsentant. In Saloninæ Augustæ quodam nummo Juno Lucina cernitur, dextrâ infantem, sinistrâ facem gestans. Alii tamen facis aliam esse rationem autumant, ut videre est apud *Natalem*

Comitem Mytho. lib. IV. cap. 1. Neque defunt, qui ita dictam volunt à lucis, in quibus colebatur. Quæ de lucis Diis olim consecrari solitis à variis sunt tradita, fatis sciunt vel paulo in literis versatiores. Neminem proinde cito, præter *Beyerum Additam: ad Seldenum de Diis Syris Syntagm. II. cap. 2.* Dianæ autem præ cæteris luci consecrabantur, forsitan quia venationis erat Dea. Vide *Ouxelium ad Minucium Felicem pag. 112.* De Feronia, eâdem cum Junone vel Diana, sic apud Virgilium invenio *Æneid. lib. VII. v. 799.*

Circumque Jugum, queis Jupiter Anxurus arvis

Præsidet, & viridi gaudens Feronia luo.

Et apud *Silium Italicum lib. XIII. v. 84.*

Dives ubi ante omnes colitur Feronia luo.

Juno autem Lucina Græcis ΕΙΛΕΘΥΚΑ dicitur: quod nomen Latini quoque non nunquam usurpant *Ovidius Metam. lib. IX. v. 282.*

———— Faveant tibi numina saltem,

*Corripiantque moras tunc, cum matura vocabis
Præpositam timidis parientibus Ilithyjam.*

Horatius Carm. Secul.

Rite maturos aperire partus

Lenis Ilithyja, tuere matres:

Sive tu Lucina probas vocari,

Seu genitalis.

Hanc Ilithyjam *Blepyrus* cacaturiens invocatur, haud

haud dubiò alludeus ad morem puerperarum, apud
Aristophanem Εἴκετο.

ὦ πότνι Ελείθω, μή με περιέθῃς
Διαρραγῆντα, μηδὲ βεβαλαμένον,
ἵνα μὴ ὕψωμα σκυραῖς κομφοδύνῃ.

Hoc est, vertente *Tanaquillo Fabro*, Viro
Græcarum literarum peritissimo: ô *Veneranda*
Lucina, ne me quæso neglexeris disrumpitum,
podicem obseratum habentem, ut ne lasanum co-
micum fiam. Sed obstare dictis videtur, quod
multi *Ilithyjam* non *Junonem* esse dicant, sed
Junonis filiam; quod de *Junone Lucina* *Donatus*
quoque in *Terentium* tradit. Verum, ut *Vossii*
verba l. supra c. faciam mea, qui *Ilithyjam* di-
cunt *Dianam* sive *Lunam* non pugnant cum illis,
qui *Junonis*-faciunt filiam; sive *Luna* hic per *Ju-*
nonem intelligatur, sive ær. Siquidem *Luna* non
agit in parientes àμῖνος, immediate; sed in æra,
qui moderato colore relaxat corporis meatus,
quod parturientibus conducit. Aliis igitur *Luna*
ipsa partus dolores levat: aliis verò hoc præstat
Luna filia, sive effectus *Lunaris*; qui est remissio,
sive relaxatio humorum, per quam partum reddi
faciliorem dicebamus. De *Luna* *Plinius* lib. II.
cap. 101. hunc in modum scribit: E contrario
ferunt *Luna* famineum ac molle sidus, atque no-
cturnum, solvere humorem & trahere, non au-
ferre. Adiporro *Natalem Comitem Myth.* lib.
IV. ipso initio. De *Ilithyæ* etymo discrepant
eruditi. Aliis placet ita appellatam esse, ὅτι εἰς τὰς

τίκτωσας ἰλδύει, quod partuientibus adveniat opifera.
 Aliis δὲ τὴν εἰλήτην ἀπὸ τοῦ ἐκ ἐvolvendo, quia nascentes
 ex utero evolvit. Sed plerique censet etymon esse
 ex Oriente petendum. Est enim ab ילד, hoc est,
 partus, proles, puer, puella. Uti hoc ab ילד,
 quod cum genuit de viris, tum peperit de mulie-
 ribus significat. Non est tamen penitus rejicienda
 illorum opinio, qui derivatum volunt à לילית Li-
 lith, quod nomen est Lamiae apud Hebraeos, quae
 infantes recens natos infestat. Vide Seldenum de
 Diis Syris Syntag. II. l. 2. & Beyerum in addi-
 tamentis, Buxtorfium Lex. Talm. pag. 1140.
 & Synag. jud. cap. 14. unde pluscula verba
 verba transcribere non pigrabor. Quando mu-
 lier Judaea pragnans est, partusque appropinquat,
 cubiculum puerpera decenter prae paratur, & re-
 bus omnibus necessariis instruitur. Ante omnia
 paterfamilias, vel quispiam alius Iudeus vite
 sanctimoniâ & pietate insignis, (si modo talis us-
 quam sub caelorum convexitate reperiri possit) cre-
 tâ acceptâ, in ambitu cubiculi circulum descri-
 bit in omnibus parietibus, & supra januam tam
 extrinsecus quam intrinsecus, nec non in singulis
 parietibus, & circa lectum, Hebraeis characteri-
 bus sequentia inscribit verba : אדם חוה וצ'לית,
 i. e. Adam, Eva, apage te Lilith; quibus si-
 gnificant, Si gravida puero sit mulier, ei à Deo
 uxorem, Eva, non Lilitha similem, dandam;
 si verò puellâ, hanc olim marito suo in auxilium
 futuram, ut Adamo fuit Eva, non autem re-
 fra-

fractariam & inobsequentem, qualem se Adamo praeiit Lilitha. Quippe fingunt Adamum ante Evam, uxorem habuisse Lilitham, quæ cum viro esset immorigera, & hinc crebræ orirentur lites, tandem ab eo aufugit. Miror non addidisse Judæos ex Lilitha potius, quam Eva, natos fuisse Dæmones, quos credunt Adamum genuisse integros illos CXXX. annos, quibus rejectus fuit. Qua de re consule Hottingerum Hist. Orient. lib. cap. 3. pag. 23. Quis has Judæorum ineptias non rideat? quibus & illud addimus, quod à quibusdam est traditum, Adamum non tantum cum Lilitha & Eva concubuisse, sed etiam cum omnibus bestiis fœde coivisse. Quamquam sunt, qui hoc à Judæis scriptum esse, negant. Vide Scherzeri trifolium Orientale pag. 94. Atque hæc, occasione duum Terentii locorum sic dicta sunt. A Terentio ad Plautum transimus: à Lucinâ ad Nocturnum. Salmasii l. supra cit. hæc sunt verba. Infinitos habuere Deos Romani, quos Palliata repudiat, quia sunt Romanorum proprii, & ab ipsis ficti, non à Græcis accepti vel expressi. NOCTURNUM in his præter decorum nominavit in Amphitruone Plautus. Locus Plauti invenitur Amphib. Act. I. S. I. v. 115. ubi Sofia hoc pacto fabulatur:

Certe edepol scio, si quicquam est aliud, quod credam, aut certo sciam,

Credo ego hac noctu NOCTURNUM
obdormisse ebrum.

Putat Salmasius Plautum. hîc nominare aliquem Deum Græcis ignotum. Mihi secus videtur : nam *Nocturnus* non aliud est à Vespero. Veneris stella cum mane exoritur, Græce $\epsilon\alpha\lambda\phi\sigma\phi$ vel $\phi\alpha\sigma\phi$; Latine *Lucifer* dicitur. Eadem cum vesperi emergit ex radiis Solaribus, sub quibus interdiu veluti conditur, Græce $\epsilon\tau\mu\phi$; Latine quoque *Hesperus*, seu *Vesper* sive *Vesperus*, & *Vesperugo* nominatur. Hunc *Hesperum*, quoniam modice calefacit & humectat, uti ad generationem requiritur, generationi olim præfecerunt. Docemur hoc à Porphyrio apud *Eusebium de præp. Evang. lib. III. cap. II.* Vide etiam *Plinium lib. II. cap. 8.* Est autem *Vesper* nomen sortitus à Vespera, quando oritur; nisi malumus vesperam a *Vespere* esse dictam. *Nocturnus* verò appellatur a nocte cujus adventum indicat ortu suo; sicut *Lucifer* diei. Patet etiam ex ipso *Plauto* *Sofiam* non loqui de nocte concubiam; sed tantum incipiente. Quippe cum jam lucessere deberet, tantum a die aberat, ut ipsa *Vesperugo* adhuc splenderet. Sic enim *Sofia* & *Mercurius* pergunt :

Nam neque se Septemtriones quoquam in cælo commovent,

Neque se Luna quoquam nutat, atque uti exorta est semel :

Nec fugula, neque Vesperugo, neque Vergilia occidunt.

Ita

Ita statim stant signa : neque nox quoquam concedit die.

MER. Perge, Nox, ut accepisti : gere Patri morem meo.

Optumo optume optimum operam das : datam pulcre locas.

Sic Luciferum opposite ad Nocturnum diurnam stellam idem *Plautus* vocat *Menæch. Act. I. S. 2.* ubi *Menæchmus* surreptus his ad *Peniculum* verbis utitur :

Mihi, tibi, atque illi jubeo jam adparari prandium :

Inde usque ad diurnam stellam crastinam potabimus.

Ut autem nullum dubium relinquatur Nocturnum cum *Hespero* & *Vespere* eundem esse, *Papinii Statii Thebaid. lib. VI. v. 238.* testimonium adducemus : unde luce meridianâ est clarius, Nocturnum a *Lucifero* non distingui, nisi quatenus hic mane, ille vespere oritur :

*Roscida jam, novies cælo dimiserat astra
Lucifer, & totidem Luna prævenerat ignes
Mutato Nocturnus equo : nec conscia fallit
Sydera, & alterno deprenditur unus in ortu.*

Quare Poëta dixerit, *Mutato Nocturnus equo*, bene explicat celeb. *Vossius de Idol. Gent. lib. II. rap. 31.* De hoc Nocturno siue *Vespere* mirum

quid ex Varrone tradit *Augustinus de Civit. Dei* lib. XXI. cap. 8. In cælo, inquit, mirabile existit portentum. Nam in stella Veneris nobilissima, quam *Plautus Vesperuginem*, *Homerus Hesperon* appellat, pulcherrimam dicens, *Castor* scribit tantum portentum extitisse, ut mutaret colorem, magnitudinem figuram, cursum quod factum ita neque antea, neque postea sit. Hoc factum *Ogyge* rege dicebant *Adrastes Cycineus* & *Dion Neapolites Mathematici* nobiles. Verum istud minime portenti loco est habendum, si certum est, hanc stellam, plane ad instar *Lunæ*, crescere ac decrescere; quin & eclipsin pati, ut à *Vossio* est traditum l. c. Hoc unum addimus, *Pythagoram* primum deprehendisse, unam tantum stellam esse, quæ circa utrumque diei crepusculum fulgeret, testante *Plinio* lib. II. cap. 8. cum cæteri antea pro duabus semper habuissent.

CAP. XVIII.

De clepsydris. rdeiz. Quot clepsydris hora finiretur. Erasmi error. Causis perorandis non idem semper tempus præscriptum. Orator quando desineret. Floreus Christianus notatus. Aqua in clepsydris sistebatur, & quare. Clepsydrarum varius usus. Rhetores Româ pulsi, & postea in magno honore ibi habiti. Coronati dicere solebant. De Philosophis eadem fere, quæ de Rhetoribus. Varia exempla hominum longævorum.

FACTURUSNE SIM operæ prætium, si de Clepsydris aliquid in medium attulerim; equidem non scio. Est ea materia à multis ante me penitus occupata. Vide Dempsterum Paralip. ad Rosin. lib. IX. cap. 31. & quos ille citat, imprimis Rhodiginum Antiq. Lect. lib. XVIII. cap. 39. Etiam Erasmus nostrum Adag. Chil. I. Cent. §. 73. & alios immucros. Has à Scipione primum Romæ usurpatas ex Plinio discimus lib. VII. cap. 60. Haud dubium est accepisse à Græcis, apud quos in usu eas fuisse, vel unus Æschines satis probat Orat. Cont. Ctesiphont. :

Εἴχεται γὰρ τὸ μὲν πρῶτον ὕδωρ τῆς κατηγέρου, καὶ τοῖς νόμοις, καὶ
τῇ

τῇ δυνάμει, τὸ δὲ δύνειν ὕδωρ τῷ τῶν γαλῶν φέρειν, &
 τοῖς εἰς αὐτὸ τὸ πρῶτον λίγαισι. Ἐπειδὴ δὲ τῇ πρῶτῃ φέρῃ μὴ
 λυθῇ τὸ παρὸν, ἔδωκεν τὸ τρίτον ὕδωρ ἵσχυται τῇ τιμῇ & τῇ
 μεγεθὲς τῆς ὀργῆς τῆς ὑμῶν. *Nam prima aqua accu-*
satori, & legibus infunditur ac libertati. Secun-
da aqua reo, & qui in ipsam rem dicturi sunt.
Quod si primo suffragio non soluta fuerit legum
violatio, jam tertia aqua infunditur estimationi
multæ, & magnitudini vestra ira. Ipsas clepsy-
dras Guido Pancirollus de Reb. depert. Tit. 65:
hunc in modum describit: Capiebant vas vitreum,
in cujus fundo angustum foramen erat, auro cir-
cumdatum, ne ab aquâ consumeretur. In altera
vasis illius parte linea recta, duodecim horas in-
scriptas habens, erat ducta. Postea vas aquâ im-
plebant, quæ per exiguum foramen illud gutta-
tim emittebatur: ipsique etiam aquæ suber im-
mittebant, cui hastula seu virgula erat infixa,
quæ apice & extremitate suâ primam, mox,
emissâ sensim & gustatim aquâ, secundam & ter-
tiam, & alias tangendo monstrabat horas. At-
que hæc Græcâ voce clepsydra nominabatur, quasi
aquam eam subreptam dicas. Vide Hieronymum
Magium de Tintinabulis cap. 6. Neque κλεψύδρα
solum Græce dicebatur; sed & ὕδρια simplici-
ter. Audi Julianum Apostatam Saty. in Cæsares:
Ἐπεὶ δὲ εἰρητὸν & τῶν στρατιωτικῶν ὁ λόγος, ὅτι τὴν Ὀκ-
τασιανὸν τῶν ὕδριας ἔπειν τὸ Ποσειδῶντος Διόσκου, ἀπὸ μέρους
αὐτοῦ τὸ ὕδωρ ἔλασεν. Hæc Petrus Cunæus, vir eru-
ditissimus, sic vertit: Finierat ille plenam bel-
lici

lici spiritus orationem ; & jam clepsydram ad Augustum detulit Neptuni puer , eique parcius aquam affudit. Hujusmodi clepsydram sive iscia graphice depingit *Apuleius Metam lib. III. cir. initium* , his verbis : Sic rursus praconis amplo boatu citatus accusator quidam senior exsurgit ; & ad dicendi spatium vasculo quodam in vicem colli graciliter fistulato , ac per hoc gustatim defluo infusa aqua , populum sic adorat. Quæ *Pancirollus* tradit non dubito , quin vera sint : sed tamen non ita sæpe de clepsydris , quæ per duodecim horas fluebant , apud antiquos facta est mentio. Certe clepsydrarum , quibus in judiciis utebantur , longe brevior effluxus erat. Quippe tribus clepsydris , aut paullo plus , hora finiebatur , inquit *Alexander ab Alexandro lib. IV. cap. 20.* Hoc colligi potest ex *Plinio juniore lib. II. Epist. II.* Dixi , sunt Plinii verba , horis pene quinque. Nam decem clepsydris , quas spatiosissimas acceperam , sunt addita quatuor. Quamquam nonnulli hîc legant duodecim clepsydris : alii viginti : nonnulli xxii. Hinc facile est videre *Erasmi* errorem , qui in *Ciceroniano suo* , singulis horis singulas clepsydras attribuit. *Novem clepsydra* , inquit , opinior , reo infundi solebant. Respicit enim legem , ex quâ accusator sex horas , novem reus olim accipiebant. Vide *Alexandrum ab Alexandro lib. IV. cap. II.* Ex hoc loco itidem colligas omnibus causis perorandis non idem & certum spatium temporis fuisse præscriptum.

Nam

Nam licet C. Pompejus legem promulgasset, ut uno die atque eodem & ab accusatore, & à reo peroraretur; ita ut horæ duæ accusatori, tres reo daretur: tamen non diu illa lex viguisse videtur. Solebant enim tempus perorandi petere à iudicibus, vel majus, vel minus, pro gravitate causæ atque copia: ita tamen ut antiquam legem non, nisi rarissime, excederent; ut discimus ex *Plinio lib. IV. Epist. 9.* Audiamus eundem *Plinium lib. VI. Epist. 2.* Postquam obiit ille, increbuit passim & invaluit consuetudo, binas vel singulas clepsydras, interdum & dimidias, & dandi, & petendi. Et paulo inferius: *Equidem quoties judico, quod vel sapius facio quam dico, quantum quis plurimum postulat aquæ, do.* Etenim temerarium existimo divinare, quam spatiosa sit causa inaudita, tempusque negotio finire, cujus modum ignores: præsertim cum primum religioni suæ iudex patientiam debeat, quæ pars magna justitiæ est. Vide etiam *Martialem lib. VI. Epig. 35.* & *lib. VIII. Epig. 7.* Imprimis Iudices cavebant, ne reo, cui semper magis favent, quid esset, quod quereretur de brevi perorandi spatio. Quoniam, inquit *Apulejus Apol. 1.* mihi pro accusationis longitudine largiter aqua superest, cedo, si videtur, singula consideremus. Erat autem hoc moris, ut reo spatium concederetur tertiâ parte majus, quam accusatori. Istud observatum videmus in accusatione necis Germanici. Exin, inquit *Tacitus Annal. lib. III. biduum*
cri-

criminibus objiciendis statuitur. utque sex dierum spatio interjecto, reus per triduum defenderetur. Sed redeamus ad Clepsydras. Simulac præstituta aqua effluxisset, necesse habebat orator desinere. Scholiastes ad *Aristoph. Vespas.* Κλεψύδρα ἢ ἀλγύειον περιμετρικόν, ἐν ᾧ ὕδωρ ἱκανοῖς, & αἷται ῥεῖν ἀρχὴ τῆς ὀπῆς, & ὅπως ἵπταιτο τὸν ῥυθμὸν. *Clepsydra erat vasculum perforatum, cui aqua erat infusa, quam effluere sinebant usque ad foramen: & sic audiebant oratorem.* Ex his verbis perperam intellectis concludit *Florens Christianus*, Vir ob maxima in rem literariam merita inter Galliæ suæ decora referendus, rhetores aquâ verberari fuisse solitos, si ultra præscriptum tempus nugari pergerent. Vide *Jacobum Palmerium à Grentemesnil Exercit. in Autores Gracos pag. 735.* de quo Viro posses hoc usurpare *Ausonii*:

— — Quantum cessat de tempore belli;

Indulget Clariis tantum inter castra Camœnis. Testem rursus *Plinium lib. I. Epist. 23.* advoco: *Ipse cum Tribunus essem, erraverim fortasse, qui me esse aliquid putavi; sed tanquam essem, abstinni causis agendis: primum, quod deforme arbitrabar, cui assurgere, cui loco cedere omnes oportet, hunc omnibus sedentibus stare: & qui jubere posset tacere quemcunque, huic silentium clepsydrâ indici.* Vide ad hunc locum *Catanaum in Notis.* Ne autem aqua nimis cito efflueret, ea sistebatur, si quædam leges essent, aut testimonia recitanda. Clara in hanc rem sunt *Apulei verba*

ba *Apol. I.* Lege pauca de principio, dein quâdam de piscibus. At tu, interea dum legit, aquam sustine. Idem patet ex eodem *Apulejo Apol. II.* (distinctionis gratia sic dico; cum re vera una sit oratio in partes duas minime secanda) ubi hoc, tanquam insolitum, largitur; ut inter legendam epistolam aqua fluat. Cedò tu, inquit, *Aviti epistolas*: ut qua semper ornamento mihi fuerunt, sint nunc etiam saluti. At tu, licebit aquam finas fluere. Namque optimi viri literas ter quaterque adeo, quanto vis temporis dispendio lectitarem. Etiam ne adversarii inter orandum interloquerentur, prohibitum erat; cum interim aqua oranti curreret. Et ideo quidem *Apulejus* adversario suo hoc concedit, tanquam magnum quid & insolitum: Cedò pueros istos, quibus confiditis produc: nomina, qui sint: meâ aqua licet ad hoc utare. Dic, inquam, *Tannoni*. Quid taces? quid cunctaris? quid respectas? Ad eundem modum *Demuthenes* (ex fide *Erasmi* hoc narro: ipse enim *Demosthenis* locus quærenti mihi non occurrit) *Æschinem* provocat, ut vel suâ aquâ, si possit; dicat, quod decretum fuisset ipso unquam autore scriptum: *Ἀνὰ τὴν ὕδατος ἀνάστα*. Surge & dic, meâ ad hoc usus aquâ. Neque tantum in foro & judiciis clepsydram usus obtinuit; verum omnibus in rebus, quæ certo & statuto tempore fiebant. Eoedissimum istud est quod apud *Athenaum* legimus *lib. XIII. cap. 3.* de meretrice quâdam, quæ

Clepsy-

Clepsydra dicta fuit, ἐπιθεὶς τοῦ κλεψύδρας συνκρίαζοντος
 αἵματος. quod ad *clepsydram* sui copiam faceret,
 donec aqua omnis extillasset. Igitur habebant olim,
 qui *clepsydras* observabant, & de rerum agenda-
 rum tempore dominos admonebant. Studiis hisce
 dum nostrum singuli, quique pro ut libuerat, oc-
 cupabantur: ecce & ab *Archimagiro* adven-
 tans, qui tempus instare curandi corpora mone-
 ret, quem quidem nuntium per spatia *clepsydræ*
 horarum incrementa servantem, probabat compe-
 tenter ingressum quinta digrediens, ait *Sidonius*
Apollinaris lib. II. Epist. 9. Magnam proinde
 utilitatem ex inventis *clepsydris* Romani Græci-
 que percipiebant. Antea, nubilo cælo, incer-
 tæ fuere horæ usque ad proximum lustrum. Nam,
 si sol non splenderet, horologii Solaris usus erat
 plane nullus. De hujus inventione vide *Plinium*
 lib. VIII. cap. 60. Audi quæso, Lector, ver-
 sus, quos *Favorinus* apud *Agellium* lib. III.
 cap. 3. vocat *Plautinissimos*, qui mihi hac oc-
 casione incidunt. In *Bæotia* comædia parasitus
 sic loquitur:

Ut illum *D I.* perdant! primus qui horas rep-
 perit,

Quique adeo primus hic statuit Solarium:

Qui mihi comminuit misero articulatim diem:

Nam, me puero, uterus hic erat Solarium,

Multo omnium istorum optimum, & verissu-
 mum:

Ubi iste monebat esse, nisi quum nihil erat.

Nunc etiam quod est, non est, nisi Soli lubet :

Itaque adeo jam impletum est oppidum Solaris.

Major pars populi aridi reptant fame.

Quæ de clepsydris dixi, ad quas Rhetores olim dicebant, in memoriam mihi revocant de Rhetoribus ipsis quædam addenda. De Rhetorica possumus dicere quod de Grammatica tradit *Suetonius init. Lib. de Illustr. Grammaticis*. Eam olim Romæ ne in usu quidem, nedum in honore ullo fuisse : rudi scilicet ac bellicosa etiam tum civitate, necdum magnopere liberalibus artibus vacante. Exstant vetus senatusconsultum, item censorium edictum, quibus Rhetores urbe pelluntur. Vide *Agellium lib. XV. c. II. & Suetonium init. lib. de clar. Rhetoribus*. Paulatim nobilissima hæc ars & utilis ipsa honestaque apparuit : multique eam præsidii causâ, & gloriæ, appetiverunt. Consules, quin & Imperatores Rhetores esse, & causas agere non puduit. Probabant tunc uno ore omnes illud consulis disertissimi :

Cedant arma togæ, concedat laurea linguae

Hactenus præclaris facinoribus Romani gloriam quæsierant. *Optimus quisque, inquit Salustius, facere, quam dicere; sua ab aliis benefacta laudari, quam ipse aliorum narrare, malebat.* Jam Græcorum eloquentiam aut superabant, aut certe

certe æquabant. Quare mirum non est, ut cæ-
 terarum artium professoribus, ita & Rhetoribus
 immunitatem vacationemque esse datam. *Gram-
 matici*, inquit *Modestinus L. 6. §. 1. D. de
 Excusationibus*, *Sophistæ*, *Rhetores*, *medici*,
 qui *meudōm* i. e. *circulatores* vocantur, quem-
 admodum à reliquis muneribus, ita & à tutela &
 cura requiem habent. Vide etiam §. 15. *Inst.*
eodem tit. & C. de Profess. & Medicis. Quomo-
 dō autem Rhetores per fictas causas discipulos
 olim erudire consueverint ex *Seneca Controver-*
siis, & *Quintiliani Declamationibus* satis patet.
 Adis quoque *Suetonium init. de Cl. Rhetoribus*,
 & *Isaum Notis ad Lactantium lib. I. cap. 1.*
 Ipse *Lactantius* fatetur multum sibi exercitatio-
 nem illam fictarum litium contulisse, ut majori
 copia & facultate dicendi causam veritatis per-
 oraret. Si quando Rhetores in publicum dicturi
 prodibant, capite coronam gestabant: cum ve-
 ro dixissent, proxime dicturo eam tradebant. Vi-
 deturque hoc in more fuisse positum, ut qui sæpe
 cum laude ad populum dixisset, jus ei concede-
 retur gestandæ semper coronæ. Vide *Tanaquil-*
lum Fabrum Notis in Concion. Aristophanis pag.
997. & Carolum Paschaliū egregio Pere de
Coronis lib. V. cap. 5. Nec Athenis tantum;
 sed & Romæ hoc usitatum fuisse, ex his *Suetonii*
 verbis *Vitæ Domit. cap. 13*, videmur colligere:
Sed & Capitolino certamine cunctos ingenti consen-
su præcantes, ut Palfurium Suram restitueret,

pulsum olim senatu, ac tunc de oratoribus coronatum, nullo responso dignatus, tacere tantummodo jussit voce praeconis. De Rhetoribus Graecis plura suppeditat *Petitus Comment. in Leges Atticas* pag. 259. Ab Oratoribus ad Philosophos. De ambobus digna notatu sunt *Lactantii Div. Inst. lib. I. cap. I.* verba: *Nec tam de rebus humanis bene meretur, qui scientiam bene dicendi adfert; quam qui pie atque innocentem docet vivere. Idcirco majore in gloria Philosophi, quam Oratores, fuerunt apud Graecos. Illi enim recte vivendi doctores sunt existimati: quod est longe praestabilius: quoniam bene dicere ad paucos pertinet; bene autem vivere ad omnes.* Nihilominus Philosophos bis Athenis esse expulsos ex eodem, quem statim nominabam, *Petito* discimus *Comment. in Leg. Attic. pag. 303.* Vide etiam *Athenæum lib. XIII. cap. 9.* ubi idem *Lacæ* demone factum fuisse docet. Post longum temporis intervallum id tertio factum videtur ab Imperatore Justiniano. *Anonymus in Chronico: (teste Alemanno Notis in Hist. Arc. Procopii pag. 106.)* Ο βασιλεὺς Ἰουστινιανὸς πῦμας εἰς Ἀθήνας ἐκελθεῖν μὴδὲν τολμᾶν διδάσκειν φιλοσοφίαν & Ἀστρονομίαν. *Justinianus Imperator nuntios Athenas misit, qui prohiberent Philosophiam & Astronomiam doceri.* Neque in caufidicos aut Medicos æquior fuit, ut videre est apud ipsum *Procopium* *Pag. 113.* Apud Romanos etiam Philosophi non semper fuere accepti. Legimus apud *Suetonium & Agellium* locis supra ci-

tatis, hoc senatusconsultum: *Marcus Pomponius Prator senatum consulit. Quod verba facta sunt de Philosophis & de Rhetoribus, de ea re ita sensuerunt: Ut Marcus Pomponius prator animadverteret, curaretque uti è Republica fideque sua videretur, uti Roma ne esset.* Postea quoque *Domitiano imperante, ut Agellius loquitur, senatusconsulto eiekti, atque urbe & Italia interdicti sunt.* Idem testatur *Suetonius Vitâ Domit. cap. 10.* Inter hos à Domitiano eiektos *Agellius* ait fuisse *Epictetum*, Philosophum nobilissimum. Quod si verum est, ut & istud serviisse eum *Epaphrodito Romæ, sub Nerone, vix, ut vulgo putatur, vitam suam ad Marcum Antonium potuit extendere.* Qua de re *Lipsius Manduct. ad Stoicam Philosf. lib. I. Diss. 19.* dubitare non immerito videtur. *Salmasius* contrarium solidis rationibus probat *Animadv. in Simplicium pag. 2.* Hujus rei miror nihil monuisse eum qui nuper nitidam *Epicteti* editionem cum notis dedit. Quamquam, ut verum fatear, ex solo annorum spatio nihil solidi contra vulgatam opinionem adferri possit; Aliquot enim singulis seculis inventi fuerunt, qui ad plures annos vitam extenderunt. *Torniellus in Annal. Sacris p. 93.* Ex multis auctoribus homines profert, qui trecentesium, & multo plures vitæ suæ expleverunt annos. Sed horum pleraque sunt fabulosa. Vide *Plinium lib. VII. 48. & Valerium Maximum lib. VIII. c. 13.* Illud multo est verius, quod Auctores idonei tradunt, ad centum

& viginti annos perveniri solere : ita tamen ut hominēs eos nonnunquam excedant. Quare non omnino verum est , quod apud *Trebellium Pollionem* in *Claudio* legimus c. 2. *Doctissimi mathematicorum centum & viginti annos homini ad vivendum* datos judicant , neque amplius cuiquam jaſtant eſſe conſeſſum : etiam illud addentes , *Mosem ſolum Dei* (ut *Judaorum libri loquuntur*) familiarem , centum viginti quinque annos vixiſſe : qui cum quereretur quod juvenis interiret , reſponſum ei ab incerto ferunt numine , neminem plus eſſe victurum. Videtur hæc opinio eſſe hauſta ex perperam intellectis verbis *Gen. vi. 3.* ubi non eſt ſermo de annis vitæ hominum datis ; ſed pœnitentiæ ante diluvium conſeſſis. Qui verò ex veteribus adeo longævi fuerint , ut eam ætatem adipiſcerentur . ex *Luciano* , & *Phelgonte Traliano* diſcimus , qui utrique de *μανεſτιος* ſeu Longævis , non inelegantes conſcripfere libellos. Vide *Petrum Fabrum Semest. lib. I. cap. 8.* *Zofimi* cujuſdam annum prope vigefimum & centefimum agentis , Imperator *Juſtinianus* meminit *Novel. v. cap. 2.* his verbis : *Hoc quod nuper nobis ex Lycia nuntiavit Zofimus Deo amabilis , vir famoſiſſimus in converſatione , & prope vigefimum & centefimum ætatis agens annum , pollens autem & animi virtutibus , & corporis operationibus : tanta quadam in eò gratia Dei floret.* De *Symone Cleophæ filio* in *Martyrologio Romano ad diem XII. Calend. Martii* ſic legimus :

gimus : Hierosolymis natalis beati Symonis, Episcopi & martyris, qui filius Cleopha, & propinquus Salvatoris secundum carnem fuisse dicitur. Hic Hierosolymorum Episcopus post Jacobum fratrem Domini ordinatus, in persecutione Trajani multis suppliciis affectus, martyrio consummatus est, omnibus qui aderant, & ipso iudice mirantibus, ut centum viginti annorum senex crucis supplicium fortiter constanterque pertu'isset. Non multum ab hac ætate abfuisse credo Stephanum de Bonaire, de quo Scaliger de Emendat. tempo. lib. VI. pag. 603. Stephanus de Bonaire, inquit, vir nobilis Castellaris Dominus, matris mea magnus Avunculus major sexaginta annorum duxit uxorem. Decessit relicto Stephano nepote, ex filio majore, annorum viginti quinque. Hinc possumus conjicere quid ætatis esset, cum decederet. Accedit miraculo, quod nunquam agravit, ne minimo quidem capitis dolore, aut aliâ *μυλακία* tentatus unquam fuit. Homo abstemius omnium functionum; præterquam solius auditus, integrum tenorem ad ultimam vitæ calcem perpetnavit. Londinum, celeberrimum Angliæ emporium, hoc seculo vidit Thomam Parrum, qui vitam produxit supra centesimum & quinquagesimum annum. Recens est memoria de duobus viris, quorum alter sexto decimo supra centesimum anno amissum visum recepit: alter Amstelædami obiit, annos natus centum & octodecim, Vide Ephemerides Halland. edit. sub Nomine Mercurii,

Annoyrum 1657. & 1660. De longævis plura exempla suppeditat *Jonstons de Natura Constantia. Prop. V. Artic. 1. & 2. in fine.* nec non *Jacobus Uferius Armachanus* præsul doctissimus, *Chronol. Sac. Par. 11. cap. 12. circa finem.* Exstat liber, cui titulus, *Histoire memorable de France*, in quo illustres aliquot Viri recensetur, qui admodum fuerunt longævi. Quâ ratione autem brevior ætas longiorve nobis contingat, deque ætatum distinctione, consule *Rhodiginum Ant. Lect. lib. XIX. cap. 21. 22.* Sed ne longius præter orbitam divagemur, redibimus ad Philosophos. Diximus eos aliquoties Româ fuisse ejectos. Neque id mirum cuiquam videri debet. Erant enim permulti, qui sub habitu Philosophorum, malos mores & reipublicæ noxias opiniones occultabant. Juvat adscribere *Athenai* verba *lib. XIII. cap. 9.* *Καὶ Ρωμαῖοι ὅ οἱ πάντα δεισοῦ ἐξέβαλον τὰς σφίτας τῆς Ρώμης, ὡς διαρθείοντας τὰς νύκτας. Ἐπιτ' ἐκ τοῦ ὡς κατεδίξαντο. Ἐμφανίζει δ' ὁμῶν τὸ ἀνόητον Ἀτάξιππον ὁ κωμικοποιὸς, ἐν Κισαινεμῶν λέγων ἔταίς,*

Οἱμοι, φιλοσοφεῖς; διὰ τὰς τὰς φιλοσόφους

Ἐν τοῖς λόγοις φρονέοντας διερίκει μόνον.

Ἐν τοῖς δ' ἔργοις ὄντας ἀνοήτας ὁρᾷ.

Romani omnium omnibus in rebus præstantissimi atque optimi, sophistas, quod juvenes corrumpere, ejecerunt urbe: quâ verò de causâ postea receperint, me latet. Vestram hercle stultitiam satis declarat Anaxippus comicus in Fulgurito, his verbis: Hei mihi! Tunc Philosopharis?

At

*At ego Philosophos verbis tantum sapere animad-
 verto; in factis verò & rebus gerendis insipientes
 esse. Sunt quippe lingua Philosophi, ignavâ ope-
 râ, sublesthâ fide. Hos Epictetus apud Agellium
 lib. XVII. cap. 19. dicit esse Philosophos ἀλλὰ τὴν
 ἀρετὴν, μὴ δὲ τὸ λῆγειν. factis procul, verbis tenus.
 Hi licet sæpe effecerint, ut boni etiam odio ef-
 sent; nihilominus egregia de philosophis ubique
 testimonia inveniuntur. Ipsum jus Romanum im-
 munitatem vacationemque iis concedit, non se-
 cus quam artium professoribus & Medicis. Quin
 etiam hoc addit: *Philosophorum autem non con-
 stitutus est numerus, quia rari sunt, qui philoso-
 phantur. Cæteros, si immunitatem consequi
 vellent, intra numerum esse oportebat. Vide
 L. 6. §. 1. 4. 7. 8. D. de Excusationibus.**

CAP. XIX.

Alexander magnus serpente Deo genitus.

Jupiter Ammon unde dictus. Vetus commentator in Germanici Aratea phænomena notatus. Ammon cornutus. Lucanus correctus. Martialis explicatus de ara Apollinis ceratina. Curtius emendatus. Jupiter Ammon non tantum cornibus arietinis ; sed prorsus ut aries toto corpore expressus. Arnobius, Minucius Felix, Josephus Scaliger, & Jacobus Ouzelius notati. Alexandri successores cornuti. De ipso Alexandro, quare cornutus fingatur, variæ sententiæ. Cornuum varia significatio. Politiani error. Scaliger reprehensus. De Baccho, & cur ipse cornutus. Locus Exo. xxxiv. v. 29. explicatus de Mose cornuto. Unde originem habeant umbellæ lunatæ circum caput Sanctorum. Equus Alexandri cur dictus Bucephalus. Equi inusto signo notati. Aristophanes explicatus. ^{Be} particula augens. Alexander in magno honore semper habitus. Turcarum de

de Alexandro error. Julianus se credidit Alexandrum. Calceis adjunctæ Alexandri effigies

QUOD mihi aliquando accidit, id ne imperitioribus accidere possit, haud abs re vereor. Videbam Alexandri Macedonum Regis faciem cornutam, quæ Curtii editionibus præponi solet; nec quid illa cornua sibi vellent, sciebam. Verùm incidit statim, quod apud varios scriptores legimus Olympiadem Alexandri matrem, rumorem sparsisse, quasi Alexander genitus esset à serpente, quem Jupiter induerat. Eleganter hoc versibus extulit *Sidonius Apollinaris* Car. II. v. 121,

Magnus Alexander, nec non Augustus, habentur

Concepti serpente Deo: Phæbumque, Jovemque

Divisere sibi: namque horum quasi unus Cynisæ sub Scyræ patrem maculis genetricis.

Alter Phæbigenam sese gaudebat haberi, Pæonii jactans Epidauria signa draconis.

Huc idem *Sidonius* respicit Car. IX. v. 46.

*Non prolem Garamantici Tonantis,
Regnis principibusque principantem,
Porrectas Asiæ loquar paterno
Actam fulmine pervolasse terram.*

Nec

*Incipit Æneades : Lybici certissima proles
 Hammonis , quanto exsuperat tua gloria cun-
 ctos
 Indubitata duces ?*

Credo hoc ab Olympiade factum , ut adulterium suum , sive cum Nectanebo , sive cum alio commissum , sic occultaret. Sed quid hoc ad cornua ? inquires. Nemini ignotum est Jovem Ammonem frontem habuisse arietinam , & tempora cornuta. Unde Ammonis cognomen Jovi adhæserit ex sua & suorum sententia docet *Hyginus Fab. cxxxiii. & Astron. Poët. Lib. II. Cap. 20.* quem auctorem nuper adeò, Clarissimi Viri *Joannes Schefferus & Thomas Munckerus* notis suis illustrarunt. Vide etiam *Commentatorem in Germanici Aratea Phænomena*, qui tamen in eo videtur errare , quod ipsum arietem , qui Libero aquam præmonstraverat , Jovem Ammonem ab eo appellatum fuisse asserat , illique magnificum constructum fuisse fanum. Est quidem aries , petente Baccho , à Jove in astrorum numerum relatus ; sed ipsum arietem dictum fuisse Jovem Ammonem nusquam legimus. Verum melius sentiunt qui Ammonis etymon ex Oriente petunt. Apud Hebræos enim Sol non dicitur à Calore. Jovem autem non alium esse à Sole certissimum est , & nos alibi ostendimus. Vide *Macrobius Lib. I. Saturn. Cap. 23. & Ouzelium ad Minutium Felicem pag. 32.*

Ab his non valde dissentiunt, qui Ammonem cum Chamo eundem esse statuunt. A Chamo Ægyptii *Αμῶν*, Græci *Αμμων* fecere. Hic Ammon dicitur cornutus, quod pellem capitis bubuli cum cornibus pro galea habuerit. Vetus-
tissimis enim temporibus galeæ fiebant ex pelli-
bus mutorum animantium, Minime tamen falsi
videntur isti, qui Ammonis cornua referunt ad
potentiam Chami, & regni ejus, quod posteri
obtinuerunt: vel ad radios Solares. Notatu di-
gna sunt *Macrobii* verba *Satur. lib. I. cap. 21.*
Sunt autem ejusmodi: *Ideo & Ammonem,*
quem Deum Solem occidentem Libyes existimant,
arietinis cornibus fingunt, quibus maxime id ani-
mal valet, sicut Sol radiis. Nec aliam esse ra-
tionem puto, quare Serapis & Isis cum cornibus
arietinis in gemmis quibusdam apparent, quas vi-
dere est apud *Pignorium de Mensâ Isiacâ cap. 1.*
De Serapi eodem cum Sole iterum audiamus
Macrobius Satur. lib. I. cap. 20. Eidem Æ-
gypto adjacens civitas, quæ conditorem Alexan-
drum Macedonem gloriatur, Serapin atque
Isim cultu penè attonita venerationis observat:
omnem tamen illam venerationem, Soli se sub il-
lius nomine testatur impendere. De Ammone vide
Vossium de Idol. Gent. lib. I. cap. 27. & lib. II.
cap. 11. Fullerum Miscel. Theol. lib. II. cap. 4.
ac Pencerum de Divinationibus pag. 226. Præ-
ter jam dictas rationes, cur Jovi Ammoni cor-
nua affingantur, hæc quoque dari potest minime
sper-

spernenda, quæ est apud *Servium* in IV. *Æneid.* *Jovi*, inquit *Ammoni templum cum simulacro cum cornibus constitutum* : quod ideo fingitur, quod satis ejus sunt involuta responsa. Non dissimili de causâ *Apollo* Λοξίας ab *Aristophane* *Init.* *Pluvi* dicitur, ut bene observavit *Vossius* loco *sup.cit.* quamquam alias cognominis Λοξίας rationes reddit, quem sæpe citamus, *Macrobius Satur. lib. I. cap. 17.* Erant nimirum Ammonis atque Appollinis oracula certa quidem; sed verbis tortis flexisque, instar arietinorum cornuum. Apud *Arrianum* de *Exped. Alex. lib. III.* non longe ab initio de Ammonis oraculo hunc in modum legimus : *Ἐπὶ τούτοις δὲ πρόθῃ λαμβάνει αὐτὸν εἰλθεῖν παρ' Ἀμμωνία ἐς Λιβύην ; τὸ μὲν τι τῆς θεῆς χηρσώμενον, ὅτι ἀτρικὰς ἐλέγχετο εἶναι τὸ μαντεύον τῷ Ἀμμωνίῳ, ἔχρησάδων.* Dein cupidus cum cepit adeundi *Ammonem Lybicum*, ut oraculum consuleret, quod ferebatur esse certissimum. Quare istud oraculum fidei inclytæ dictum est à *Pom. Mela lib. I. cap. 8.* Quin ab Ammone dicta gemma divini quid habet, si *Plinio* credimus *lib. XXXVII. cap. 10.* *Hammonis*, inquit, cornu inter sacratissimas *Æthiopie gemmas*, aureo colore, arietini cornus effigiem reddens promittitur prædivina somnia representare. Hinc facile viderimus, quare *Jovem Ammonem* certiozem *Lucanus* vocet *lib. IX. v. 514.*

Ventum erat ad templum, Lybicis quod gentibus unum

*Inculti Garamantes habent : stat certior illic
Jupiter, ut memorant ; sed non ut fulmina
vibrans,*

*Aut similis nostro, sed tortis cornibus Am-
mon.*

Ita quidem hos Lucani versus ex membranis suis emendat *Isaacus Vossius*, Vir Clarissimus, quem vide *Pompo. Melam* pag. 33. Vulgo legitur *stat corniger illic*, quod ineptum hoc loco, cum sequatur statim, *sed tortis cornibus Ammon*. Ad hoc Ammonis templum *Nicolaus Perottus*, alii-que respicere putant *Martialem* Epig. omnium primo :

*Nec Trivia templo molles laudentur honores,
Dissimuletque Deum cornibus ara frequens.*

Sed hæc potius accipienda de arâ Apollinis in Delo, quæ inter septem orbis miracula celebratur. Erat enim sine ullo glutine aut vinculo ex dextris cornibus coagmentata, atque compacta. Vide doct. *Politianum* *Miscell.* cap. 52. *Dempsterum* *Paralip.* ad lib. II. *Antiq. Rosini* cap. 7. nec non *Virum Nobilissimum Joannem Passerrodium*, Libro nuper Belgice edito, de *Militia Græca & Romana*, lib. VI. cap. 3. quo quidem in libro multa insunt bona ; sed non nulla quoque ingenii nimium festinantis indicia. Non multum cornutæ huic aræ dissimilis est illa turris, ex capitibus cornibusque sive lstrum quorundam ani-
ma-

malium compacta , de qua videre licet *Petrum della Valle Itiner. Part. II. C. 21.* Ipsius Ammonis descriptionem habemus apud *Curtium lib. IV. cap. 7.* his verbis : *Id quod pro Deo colitur, non eandem effigiem habet, quam vulgo Diis artifices accommodaverunt. Umbilico maxime similis est habitus, smaragdo & gemmis coagmentatus. Hunc, quum responsum petitur, navigio aureo gestant sacerdotes; multis argenteis pateris ab utroque navigii latere pendentibus. Sequuntur matrone virginesque patrio more inconditum quoddam carmen canentes, quo propitiari Jovem credunt, ut certum edat oraculum.* Omnino videnda sunt, quæ ad hunc locum in *Commentariis suis* erudite scribit *Freinsheimius*, cui viro propter multa merita res literaria immensum debet. Tamen ne is quidem animadvertit, vitium apud *Curtium* latere. Hoc quale sit *I. Vossius* docet *l. sup. c.* Quippe sic ait esse legendum : *Umbliculo similis est. Habitus smaragdo & gemmis coagmentatus.* Ab *umber* fit *umbliculus*, ut à *venter* *ventriculus*. Quinam sint *umbri* ex *Plinio* discimus *lib. VIII. cap. 49.* *Est in Hispania, sed maxime Corsica, non maxime ab simile pecori, genus musmonum, caprino villo, quam pecoris vellere, propius. Quorum è genere & ovibus natos prisce Umbros vocarunt.* *Umbri* autem forma *Jupiter* in nummis visitur, sive, quod eodem redit, *arietis*. Vide *Cecropii votum à Philippo Thomasino explicatum cap. 5.* Errant igitur, qui
putant

putant Ammonem præter cornua nihil arietis habuisse. Hos inter numerandus est *Arnobius lib. VI. pag. 198.* ut recte ex his verbis colligimus : *Consimili rursus translatione si nudo Jovi cornua detrahat , & Martis temporibus affigat , Martem armis spoliet , & his rursus circumcludat Hammonem , interstitio fieri quæ poterit singulorum , cum qui Jupiter fuerit , idem possit existimari Mars esse , & qui Mavors fuerat , subintroyre speciem Iovis possit Hammonis ? Neque aliud Minucium Felicem sensissie crediderim , cum scriberet pag. 23. Quid ipse Iupiter vester ? modo imberbis statuitur , modo barbatns locatur : & cum Hammon dicitur , habet cornua ; & cum Capitolinus , tunc gerit cornua ; & cum Latialis , cruore perfunditur ; & cum Feretrius , non auditur. Possset tamen aliter sensissie videri , cum diceret pag. 32. Item boum capita , & capita vervecum , & immolatis , & colitis. Sed quicquid sit de Minucio Felice , istud certum est , multos ex recentioribus existimasse , Ammonem præter cornua arietina , cætera habuisse hominis. In his est *Scaliger de Emendat. Temp. lib. V. pag. 425.* Scribit ibi hoc pacto : *Postquam ille (Alexander) pedem extulit ex oraculo Ammonis , ex eo tempore Cyrenai , qui Iovem cornutum in nummismatis suis sculpebant , caperunt pro Iove cornuto Alexandrum cornutum in illis cudere. Utriusque formæ numismata subiciemus , in quibus vide vetustioremm nummum vultu Iovis**

Q

cornuti

cornuti & barbati percussum : recentiore[m] autem vultu Alexandri cornuti & imberbis. Tum utrumque nummum subjicit. Sed unde probabit vetustiore[m] Jovis præ se ferre effigiem? Similem vel eundem plane idem Scaliger adducit *Animadvers. ad Robert. Titium*, testante hoc *Ouzelio Animadvers. ad Manucium Felicem*, quem doctissimum virum miror haud vidisse Scaligeranum istum nummum nihil quicquam ad Animonem pertinere. Interim multa de Ammone habet scitu dignissima pag. 119. & seqq. Ego omnino credo, effigiem esse regis alicujus, cui Cyrenæ subditæ fuerunt. Illos, ut & omnes Alexandri successores ~~αὐτοκράτορες~~ fuisse, nisi rerum imperito, ignotum est nemini. Quem præclaris facinoribus æmulari neque volebant, neque poterant, cornuum istac similitudine æmulati sunt. Hanc in annulo vidit *Casaubonus*, de quo scribit *ad Scaligerum Epist. 445. Edit. Hag.* his verbis : *Vidi & alium annulum hisce diebus, in quo sculptum erat caput hominis arietinum cornu gestantis. Simul vidi, venerunt in mentem, quæ de Alexandri appellatione Arabica à te didiceram. Sed negabant periti harum rerum, eam esse faciem Alexandri : Philippum ipsi indigebant. Tu quid censes? nam ecce & illius exemplum.* Cur eam Alexandri esse faciem negaverint, barbam credo in causa fuisse. Quomodo vero Philippi esse potuerit, si Alexandri Patrem intelligimus, plane non intelligo : nam eum cornutâ facie

facie unquam expressum parum profecto fit verisimile. Sed ad ipsum Alexandrum jam veniamus. Is non tantum cornutâ facie in nummis visitur; sed etiam apud Arabes, *Dul-karnain*, id est, *Bicornis* vulgo appellatur. Quæ sit ejus cognominis ratio, non in promptu est dicere, propter scriptorum discrepantiam. Vide *Cla. Hottingerum Hist. Orient. lib. I. cap. 3. pag. 108.* Sunt, qui causam petant à cirris seu cincinnis & crobylis utrimque in cornuum formam acuminatis atque retortis. Istiusmodi cirris spectabiles incedebant sacerdotes Lydii & Armenii. Quo multi etiam referunt Mosis cornua, de quibus mox plura sumus dicturi. Idem esse vocabulum, quò Arabes & cornu & capillum exprimunt in *Lexico suo* docet *Iac. Golius.* Apud Græcos quoque cornua pro capillis posita inveniri, testatur *Celins Rhodiginus Antiq. Lect. lib. XXX. c. 1.* Sed non videtur hæc esse ratio, cur Alexander *bicornis* dicatur, & facie fingatur cornutâ. Eum voluisse haberi Jovis Ammonis filium, satis ex iis, quæ diximus, patet. Hac de re sic *Curtius lib. IV. cap. 7.* *Sed ingens cupido animum stimulabat adeundi Iovem, quem generis sui auctorem, hand contentus mortali fastigio, aut credebat esse, aut credi volebat.* Et paulo inferius: *Iovis igitur filium se non solum appellari passus est; sed etiam jussit; rerumque gestarum famam, dum augere vult, tali appellatione corrumpit.* Vide *Freinsheimium Comment. ad h. l.* Quam festive hunc

filiū suū factum riserit Olympias, ex *Agellio* discimus *lib. XIII. cap. 4.* Scitum est quod de Lacedæmoniis refert *Aelianus Hist. var. lib. II. c. 19.* Scripserat Alexander ad Græcos ut se publico decreto inter Deos fesserent: satis quidem stulte. Itaque Lacedæmonii decretum ejusmodi fecerunt:

Ἐπεὶ δὲ Ἀλέξανδρος βύλεται θεὸς εἶναι. θεὸς ἴστω Λακωνικῶς πᾶσι. Ἐκτὰ τοῖς ἐπιχώριοις σέβει τρέπον, ἐλίζαντες πῶς ἱμνηξεν οἱ Λακεδαιμόνιοι τῷ Ἀλεξάνδρῳ. *Quoniam Alexander Deus esse vult, esto Deus. Hoc pacto Lacedæmonii simul Laconice & patrio more stuporem & vecordiam Alexandri redarguebant. Quoniam igitur Alexander Jovis filius haberi volebat, arietina etiam cornua adsumpsit, & jussit (ut non nemo ait) se κεκορῆσθαι ἀναπλάττειν αὐτὸς τὸ ἀγάλματοποιῶν, cornutum fingi à statuariis. Huc alludit Vir Cl. Daniel Heinsius istis versiculis, qui cornutæ faciei Alexandri solent à non nullis subscribi:*

Εἶδ' ὃν Ἀλεξάνδρου τόδ' ἐστίν, κόρυοιο τρέπαιον.

Ἐκ γυνῆς, θνητῶν τῷ Διὸς. ἐκ κεκορῆτον.

Alexandri hac erat facies, mundi tropæam: ex genere mortalium; sed ex cornibus Jovis filius. Non est tamen eorum rejicienda sententia, qui putant Alexandrum dici fingique cornutum, quia ad extremos mundi fines victricia arma extendit, & Orientis atque Occidentis imperium occupavit. Cornu autem pro fine aut extremitate non raro sumi, docet sæpius citatus Freinshemius Ind. Curiano. Vide etiam Buxtorfii Lexicon Tal-

Talmud. Colum. 2140. Sed omnium rectissime isti opinantur, qui statuunt Alexandro cornua tribui propter fortitudinem, & maximam in bello felicitatem. In Sacris literis cornua sæpe potentiam, virtutem, gloriam, fortitudinem, quin & regnum designare ex locis quam plurimis patet. Vide *Glassium Philol. Sac. pag.* 1267. & *Fesselium Advers. Sac. lib.* IX. *cap.* 2. §. 23. Hinc ipsi Deo per metaphoram cornua tributa legimus 2 *Sam.* xxii. 3. *Psal.* xviii. 3. Est autem ea metaphora sumpta à quibusdam brutis, quorum omne robur & vis in cornibus sita est. *Constat*, inquiunt *Hottingerus & Ouzelius* locis sup: citatis, ex communi linguarum Orientalium usu, vocabulum קרן i. e. cornu pro fortitudine, incolumitate, felici prosperoque rerum successu, sumi: Imo sunt apud Talmudicos קרנו מלחמה i. e. CORNUA BELLI, ipsi belli duces. Unde cum in capite Genucii Cipi Prætoris subito veluti cornua emerfissent, responsum fuit, Regem eum fore si in urbem revertisset, referente *Valerio Maximo lib.* V. *cap.* 6. Vide *Henricum Salmuth. ad Pancirollum de Reb. Deperditis Tit.* 45. & *Carolus Paschalinus de Coronis lib.* X. *cap.* 4. Apud Phœnices cornua fuisse regium insigne, ex *Eusebio* docet *Cla. Pignorius de Mensa Isiaca pag.* 30. Fluvios quoque, taurinis cornibus instructos antiquitus fuisse cultos, idem ille *Pignorius* tradit. Nullus dubito, quin hoc factum fuerit ad denotandam maximam vim

rapiditatemque Fluviorum : quam eleganter *Virgilius* describit *Aeneid. lib. II. v. 305.*

— — — *Rapidus montano flumine torrens*

Sternit agros , sternit sata lata , bonumque labores ,

Præcipitemque trahit silvas : stupet inscius alto

Accipiens sonitum saxi de vertice pastor.

Tybrim cornigerum appellatum legimus apud eundem *Virgilium Aeneid, lib. VIII. v. 77.*

Corniger Hesperidum fluvius regnator aquarum ,

Adsis ô tandem , & propius tua numina firmes.

De fluviis cornigeris vide porro *Turnebum Advers. lib. XXIV. cap. 40.* De Seleuco , unde Seleucidarum genus incepit , quod ducentos & septuaginta per annos Syriæ imperavit , traditur , quod statux ei positæ fuerint affixis cornibus. Ita quippe *Appianus in Syriacis* . Καὶ τῷ σώματι ὄντι (Σελυκού) ἰεροῦσα τι ἐ μέγα , ἐ ταύρου ἀγροὶ ἐν Ἀλεξάνδρου θυρία ποτὶ ἐνδρόντα ἧς δεξιῶν ὑποστάντι μίση , ἐ ταῖς χειρὶ μέγας κατεργασθῆναι , περιθίβασιν ἐ τὰς ἀνδράσιν ἐπὶ τῷ δεικνύειν . Et quia vasto robustoque fuit corpore , adeo ut taurum ferocem , sacrificante Alexandro ex vinculis profugum , solus cornibus arreptum retinuerit manibus , affingunt ejus stans cornua.

Нос

Hoc perperam *Lyfimacho* tribuit *Angelus Politianus Miscell. cap. 79.* Quod hanc ob causam moneo, ne quis Viri magni auctoritate sibi patia-
tur imponi. Neque minus fallitur *Iosephus Scaliger lib. V. de Emend. Temp. pag. 426.* qui pu-
tat *Politianum*, sive *Lyfimachum*, sive *Seleu- cum* pro *Alexandro*, accepisse. Nam *Orienta- les* illi reges non tantum in honorem *Alexandri Alexandrum* ipsum cornutâ specie nummis suis imprimebant: verum etiam suam ipsius propriam, cornibus itidem ornata. Sic metus ille orbis, Deique flagellum *Atyla*, cornutus etiam in num-
mis visitur. De *Baccho* cornuto res est omnibus notissima. *Horatius lib. II. Od. 19.* de eo sic canit:

*Te vidit insons Cerberus aureo
Cornu decorum, leniter atterens
Caudam, & recedenis trilingui
Ore pedes, tetigitque crura.*

Et *Sidonius Apollinaris Car. XXII. v. 25.*

*Marcidus ipse sedet curru, madet ardua
cervix
Sudati de rore meri: caput aurea rumpunt
Cornua, & indigenam jaculantur fulminis
ignem.*

Sunt, qui credunt *Baccho* cornua à Poëtis esse afficta, quod primus terram junctis bobus exco-
luit. Alii, quod *Bacchi* liquor vim viris addit

& ad pugnam exstimulat , juxta illud *Horatii Epist. V.*

*Quid non ebrietas designat ? operta recludit :
Spes jubet esse ratas ; in praelia trudit inermem.
Sollicitis animis onus eximit : addocet artes.*

Hinc Bacchum nunc cum tauro comparant , nunc cum Pantherâ. vide *Athenæum lib. II. cap. 2.* Certe de Baccho narrant Græci , fuisse eum valde pugnacem , & Indos devicisse. Quare primus triumphum instituit , ipseque triumphavit , ut videre est apud *Diodorum Siculum lib. V. cap. 2.* Huc alludunt *Sidonius l. c.*

*Corriger inde novi fit Ganges pompa triumphi,
nec non Ovidius lib. III. Fast. v. 729.*

*Te memorant Gange , totoque Oriente subacto ,
Primitias magno seposuisse Iovi.*

Scimus antiquos bibere solitos ex cornibus, quem morem fabulæ de cornuto Baccho originem dedisse, valde est verisimile. Clara sunt in hanc rem *Athenæi verba lib. XI. cap. 7.* τὸς παλαιὰς ἀρχαίας τοῖς κίεχσι τὸ βοῶν πίνειν. Ἀπὸ δὲ τοῦ Διόνυσου κερνοῦν πλάττει. φησὶ τι τὰν ἐστὶν κερναίων ὑπὸ πολλῶν ποιητῶν. *Primos homines fama est olim cornibus bubulis bibisse. Quare cum cornibus fingitur , & à multis Poëtis Bacchus taurus cognominatur.* vide *Cælium Rhodiginum Antiq. Lect. lib. XXX. 1.* Potuit quoque cornutus dici à mitrâ , cornuto capitis
ge-

gestamine, quam & Sacerdotibus Ammonis in usu fuisse constat. Consule *Paschalinum de Coronis lib. IV. cap. 21. & Anselmum Solerium de Pileo Sect. XIII. pag. 289.* Sed cum Bacchus plane idem sit, qui Sol, haud absurdum est, per cornua radios Solares intelligere. Sic Solem sive Apollinem in nummis sæpissime videmus radiis coronatum : unde mos regibus manavit, radiata diademata gestandi. Est enim regibus maxima cum Sole convenientia. Hodie radiatam coronam vix quisquam usurpat, præter magnum Hetruriæ ducem, cui hoc à Pio V. Pontifice Romano esse concessum ferunt. Adi, quem jam bis terve citavimus, *Paschalinum de Coronis lib. IX. cap. 13. 14. 15.* Bacchum autem non alium esse à Sole, prolixè probat Cl. *Vossius de Idol. Gentili lib. II. cap. 14.* Interim negandum non est, in Baccho Noachum esse cultum. Quid, quod multi ex Noacho Bacchum esse dictum volunt. vide *Anonymum Observat in Mythologiam Natalis Comitibus in Baccho.* Hos tamen refellit *Vossius de Idol. Gent. lib. I. cap. 19.* Consule etiam *Edmundum Dickinsonum Delph. Pheniciz. c. 10. & de quibusdam Bacchi cognominibus Ælian. Hist. Var. lib. III. c. 41. ac Ovidium init. lib. IV. Metam.* Quam multa autem in Sacris literis de Mose prodita, Ethnici ac Bacchum retulerint, ostendunt *Beyerus Additam : ad Seldenum de DIis Syris p. 70. & Vossius de Idol. Gent. lib. I. c. 30.* Proinde nullum mihi est dubium, quin opinio de cornibus

Bacchi ex eo profecta fuerit, quod radii de Mo-
 sis vultu relucens cornuum præberent imagi-
 nem, ut colligere est ex *Exod. xxxiv. 29.*
 וְהָיָה כִּי יִרְאֶה הוּא חֹרֵן וְהָיָה חֹרֵן וְהָיָה חֹרֵן
 Hoc Septuaginta : *Græci* Interpretes sic vertunt : καὶ Μωσὴς ἔκλυε διδῶ-
 ας αὐτὸν τὴν ὁμοιωσιν αὐτοῦ. *Et Moses ignora-*
bat glorificatum esse adspēctum cutis faciei suæ.
Neoterici Interpretes Latini, diversis quidem
 verbis, sed ad eundem sensum transferunt fere
 omnes. Mihi autem maxime placet *Leo Juda*,
 (cujus versio Vatablo ab imperitis adscribitur, ut
 recte docet *Arnoldus Bootius Animad. Sac. in*
Indice sub nomine Stephani) vertens hoc inodo:
Moses autem nesciebat, quod radios ejacular-
tur cutis faciei ejus. Quorum quidem verborum
 non opus est aliunde interpretationem quærere,
 quam ex his Apostoli verbis. *2 Cor. III. 7. 8.*
 Εἰς ἣν διακονία τῆ διαύδα ἐν γέγραμμαις, ἐντιτυπωμένη ἐν λίθοις,
 ἰσχυρή ἐν δόξῃ, ὥστε μὴ δύνανται ἀτενίσαι τὰς ψυχὰς Ἰσραηλῆταις τὸ
 προσεσώπον Μωσίου, διὰ τὴν δόξαν τῆ προσώπου αὐτοῦ, τὴν καταρ-
 γησάντων. Πῶς οὐχὶ μέλλοι ἡ διακονία τῆ πνεύματος ἔσται ἐν δόξῃ;
 Quod si administratio mortis in literis, insculpta
 in lapidibus, fuit in gloria, adeò ut filii Israël
 non possent oculos intendere in faciem Mo-
 sis, propter gloriam vultus ejus, qua abole-
 tur: cur non potius administratio spiritus erit
 in gloria? Locum autem *Exodi*, quem citavi-
 mus, *Vulgatus Interpres* ita transtulit: *Ignora-*
bat quod cornuta esset facies sua. Καλῶς, καὶ καλῶς
 Nihil enim aliud his verbis voluit, quam faciem
 Moſis

Mosis cornuum instar radios emisisse. Est quippe **pp** radiare, sive radios cornuum instar ejaculari, seu emittere. Cornua pro radiis vel splendore usurpata legimus apud Prophetam *Habacucum cap. III. v. 4. Splendor ut Lux fuit, cornua è manibus ejus erant ei.* Interim negandum non est, vulgatam versionem nuperitioribus errandi dedisse occasionem. Quis non ridet, cum cernit Mosem cum cornibus effictum, pictumque? Digna res, propter quam Judæi Christianos subfannent. Tu vero, erudite Lector, præter commentatores, adi *Sixtinum Amamam Antibar. Biblico, Thomam Brouwnum Pseudodox. Epidem: lib. V. cap. 9. & Paschaliū de Coronis lib. X. cap. 4.* A radiis Mosis petitam esse existimo lunatam illam umbellam quam pictores Christo, sanctisque vulgo attribuunt. Alii tamen aliter sentiunt. *Laurentius Pignorius de Mensa Isiaca pag. 46.* scribit hunc in modum: *Maxime nobilis fuit orbis quidam capiti aliquando circumscriptus, venerationis index & majestatis, qua humanam excederet; hunc ego Imperatoribus, quos Veteres supra fastigium mortalitatis elatos suspiciebant, Provinciis orbis Romani, Urbibus primariis, animalibus etiam Deorum circumpositum notavi.* Et paucis interjectis: *Hunc orbem Egyptii in summo capite simmachrorum suorum locabant. Ab illis Romanos sumpsisse licet suspicari; & variasse, habitâ decoris ratione, quod capiti, cui divinum quid inesse putabant, eo*
situ

situ corona aptaretur. Qui tamen ornatus insequentium principum moderatione, & tacito omnium consensu, Deo & sanctis ejus, ut alia pleraque, in totum cessit, & antiquum diadematis nomen in hodiernum diem retinuit. Quippe, ut non nemo ait, prædictum morem pie æmulata est ecclesia, Sanctorum capitibus radios aut coronas superponens. Neque enim refugit ecclesia, sicubi deprehendit inter sordes ethnicismi aliquid honestum & utile, exprimere illud imitatione, vel potius ab iniquis possessoribus repetere ea, quibus illi abutuntur, & in usum pium convertere. Is autem orbis, vel umbella, de quâ loquimur, Græcis *μνίσκος* dicitur à Lunâ, quæ *Μῆνις* vocatur, *ἐπεὶ μνήσκουσιν αὐτὴν τῆς σελήνης πληρῆτα ὁ μῆνις*. Quoniam diminutâ ad summum lunâ, impletur mensis. Ut Sol cursu suo annum, ita Luna menses, è quibus constat annus, suis circuitionibus conficit. Latini *nimbus* appellant. Clarissime hoc patet apud Virgilium *Æneid*, lib. II. v. 615.

ſam ſummas arces Tritonia, respice, Pal-
las

Inſedit, NIMBO effulgens, & Gorgone
ſeuâ.

Ad quem locum vide *Servium* : ut & ad illum
Æneid. III. v. 587.

Et Lunam in NIMBO nox intempeſta tenebat.

Apud

Apud eundem, ni fallor, *Virgilium*, & alios ex autoribus classicis, is *μνῆρα* etiam *umbo* appellatur. Exstant in nummis varii Imperatores Romani, caput circumdati istiusmodi nimbo, ut Antonius, Constantinus, Justinus, Justinianus, & plures alii. Cum his, quæ diximus, non bene convenit *Josepho Scaligero*. Is quippe statuit, umbellam illam lunatam, quæ capitibus Sanctorum adpingitur, aliam omnino originem habere. Sic enim *Comm. in Append. Virgilii p. 211*. ad hos Tibulli versus:

*At, ô Priape, sape floribus novis
Tuas sine arte deligavimus comas,
Abegimusque voce sape, cum tibi
Senexve corvus, impigerve graculus
Sacrum feriret ore corneo caput.*

Sic enim, inquam, ad hos versus scribit: Idcirco *μνῆραι* imponebantur statuis, ne ab avibus conspurcarentur. Hi *μνῆραι* adhuc, hodieque in templis Christianorum imponuntur capitibus statuarum. Cujus tamen rei causam ignorantes pictores, dñi putant honoris causâ imponi debere, non solum omnibus statuis imponunt; sed & imaginibus quoque pictis adhibuerunt, quæ tamen illis opus non habent, ut statuae. Hæc totidem verbis descripsit *Henricus Salmuth ad Pancirollum de Rebus deperd. Tit. XLIV. Pag. 179*. Videmus non rarò ethnicis exprobratam fuisse à Christianis simulachrorum fœdidatē per avium stercorea. *Lactantius lib. II. cap. 4.* dicit ironice:

Fures

Fures enim tam stulti sunt, ut Priapi tentiginem timeant; cum aves ipsæ, quæ terrore falcis, aut inguinis abigi existimant, simulacris fabrefactis, id est, hominum plane similibus, insideant, nesciant, inquinant. Sed ut ut hæc sunt, Scaligeri sententiam nequaquam concoquere potuit *Anselmus Solerius*, quem vide sis tract. de *Pileo* Sect. XIII. Atquæ hæc quidem hætenus. Jam ad Alexandrum revertendum est, ubi de ejus equo Bucephalo non nulla addiderimus. Ut de cornibus Alexandri, ita de hujus equi nomine variè sentiunt eruditi. Communis fere est sententia ita dictum fuisse à capite bovino, quod frontem bovis instar haberet latissimam. *Equus Alexandri regis*, inquit *Agellius lib. V. c. 2. & capite & nomine Bucephalus fuit.* Aliter tamen *Plinius lib. VIII. cap. 42.* qui ita dictum vult, vel ab aspectu torvo, vel ab insigni taurini capitis armo impressi: *Arriani lib. V. de Expedit. Alexandri* hæc sunt verba. Σημείον δὲ οἱ ἦν βοὸς κεφαλὴ ἰγκραχέμεν, ἰσ' ἔτι & τὸ ὄνομα τῷ το λέγουσιν ὅτι ἔφειν. Οἱ δὲ λέγουσιν ὅτι λευκὸν σῆμα ἔχειν ὅππ' τῆς κεφαλῆς, μέλας δὲ αὐτὸς, ὡς βοὸς κεφαλὴν μέλαινα εἰχαλόμενον. Nota ei insignita erat, bovis caput, cujus etiam causâ nomen ei Bucephalo inditum est: vel quod, ut aliis placet, cum ipse nigri coloris esset, albam in capite notam haberet, bovis capiti perquam similem. His plane gemina tradit *Hesychius*, non ignobilis grammaticus Βυκέφαλος, ἵππος ἰγκραχέμενος, ἔχειν τοῖς ἰχθύσι βύκαρον, & ὁ Ἀλεξάνδρου ἵππος, ὃν ἔπλεον ἐν Ἰνδοῖς κτίσας

κτίσας λίχτας Βυκεράλειαι. *Bucephalus*, equus coxas
notatas habens capite bovino, & *Alexandri*
equus, de cuius nomine dicitur in India condidisse
urbem *Bucephaliā*. Antiqui circa equos maxi-
me curiosi erant, & quibus illi orti essent paren-
tibus, sedulo inquirebant. Semper enim verissi-
mum est illud *Horatii lib. IV. Od. 4.*

Fortes creantur fortibus, & bonis:
Est in juvencis, est in equis patrum
Virtus, nec imbellem feroces
Progenerant aquila columbam.

Ut autem cognoscerent, quibus nati essent equi
parentibus, clunibus eorum certas notas inure-
bant. Patet hoc ex *Anacreonte Od. ult.*

Εἰ ἰχίως μὲν ἵπποι
Πυθὸς χάραγμα ἵχουσι.

Equi solent inustum
Coxis habere signum.

Equis in Phaside natis, referente *Snida*, inuri
solebat avis phasianus. Hinc lux oritur *Aristo-*
phani Νεφέλ. Act. I. S. I. ubi Phidippides, qui
dormiens etiam rem equestrem animo agitabat,
patrem *Strepsiadem* hunc in modum alloquitur:

Οὐκ αὖτ' ἔμελλ' ἂν Διόνυσον, εἰ δόινε γίμνε
Τὸς φασιανὸς, ἔς τριπλ' Ἀλκυόνα.

Quæ verba *Nicodemus Frischlinus* non satis recte videtur percepisse, sic vertens : *Non sane per Liberum, etiamsi phasianos mihi dares, quos educat in vivariis Leogoras.* Vertendum enim est: *etiamsi mihi dares equos Phasiano aue notatos.* Phidippides parum de phasianis avibus sollicitus, inducitur quasi inepte jurans se nolle artem equestrem omittere, licet darentur sibi equi præstantissimi, in Phaside nati. Eâdem scenâ Equi Κοπιᾶτις mentio fit, ita dicti à literâ κάππα vel potius κίππα. Etiam equus quidam σαιπύρεας vel σαιπύρεας vocatur, à litera σῆμα, quæ conflata est ex inverso σῆμα, & incluso πῖ. Vide etiam *Petrus Fabrum Agonist. lib. II. cap. 28. in fine.* Unde Bucephalum nomen illud ob inustum bovis caput, aut literam B. accepisse; non verò ob taurinam capitis formam, recte statuitur. Minime tamen rejicienda est eorum opinio, qui ob magnum caput Bucephali nomen equo esse inditum volunt. *Et quoque particula* inquit *Henr. Stephanus in Græ. Ling. Thesauro, cum nominibus multis & verbalibus componitur, ubi non bovem significat; sed potius dictionum ejusmodi significationem auget. Ut in βύδαας qui instar bovis gravis est, & magnus.* Hujusmodi quoque sunt βύβορις, βύβρωσις, βυβάϊον, βυκόρυζον, βέλιμον &c. Eiusdem sententiæ est *Josephus Scaliger Scaliger. Primis pag. 22. Et apud Græcos intendit, ut βέλιμον & βυβύλια, INGENS FAMES, VEHEMENS FAMES,*
à re-

à refrigeratione ventriculi contracta. Sic particula *VE* apud Latinos, ut in *VEHEMENS* & aliis, Aliquando tamen minuit. Hinc fit βοειῶ vel βοιωῶ, de quo Plutarchus *Quaest. Grae. pag. mihi 299.* Η τῆ μετὰ αὐτῶν βοιωῶ λέγουσιν, αἷς βοιωτῶν ὁ ποιητὴς τὴν μεγάλην ὀφθαλμὸν, & βουβῶν τὸν μέγαν λαυχόν. *Vel bubulo pede dicunt, pro magno; sicut Poëta boopin dixit magnis præditam oculis, & bougaïum, qui se gloriose jaçtaret.* Atque hæc quidem occasione equi Bucephali, de quo videntur autores, quos citat Freinsheimius *Comment. in Curtium lib. VI. cap. 5. num. 18.* Ipse Alexander in magno semper honore, æstimationeque est habitus: adeo ut omne præclarum, & quod reliquis præcelleret, de Alexandro Α'λεξανδρω dictum fuerit, uti recte ab Heinsio observatum est *ad Silium Italicum lib. XIII.* Nihil igitur mirum, eum *Magnum* cognominatum & si vel per quietem videretur, læta somnia effecisse. De Augusto narrat Suetonius *Vit. Aug. cap. 18.* hunc in modum: *Per idem tempus, conditorium & corpus Magni Alexandri, cum prolatum è penetrati subjecisset oculis, coronâ aureâ impositâ, ac floribus aspersis veneratus est.* Simile quid de Julio Cæsare refert Lucanus *lib. X. v. 15.*

*Intrepidus superum sedes, & templa vetusti
Numinis antiquas Macedûm testantia vires
Circuit, & nulla captus dulcedine rerum,*

*Non auro , cultuque Deum , non mœnibus
urbis ,*

Effossum tumulis cupide descendit in antrum.

Illic Pellai proles vesana Philippi ,

Felix prado jacet terrarum , vindice fato

Raptus.

Idem hic Cæsar visa Alexandri imagine ingemuit, quasi pertæsus ignaviam suam, quod nihil dum à se memorabile actum esset ea ætate, qua jam Alexander orbem terrarum subegisset. Adi *Suetonium Vitæ Cæsaris cap. 7.* Augustus quoque, teste *Suetonio*, usus est annulo signatorio, cui Alexandri effigies erat insculpta. Scitu dignum est, quod de Macrianorum familia tradit *Trebellius Pollio in Quieto ex XXX Tyrannis: Videtur mihi*, inquit, non pratermittendum de Macrianorum familia, qua hodieque floret, id dicere quod speciale semper habuerunt. *Alexandrum Magnum Macedonem viri in annulis argento, mulieres in reticulis & dextrocheriis, & in annulis, & in omni ornamentorum genere, exsculptum semper habuerunt: eò usque ut tunica & limbi & penula matronales in familiâ ejus hodieque sint, qua Alexandri effigiem deliciis variantibus monstrent.* Tum paucis interjectis addit: *Quod idcirco posui, quia dicuntur juvari in omni actu suo, qui Alexandrum expressum vel auro gessitant, vel argento.* Aræ cujusdam Alexandro Magno, Cæsarique Augusto sacratæ meminit *Amm. Marcelli*

cellinus lib. XXII. pag. 234. Edit. Lindenb. Vide porro *Freinshemium* fin. *Comment. in Curium*. A Judæis maximum honorem Alexandro fuisse habitum, liquido ex his patet, quæ potius *Augusti Pfeifferi* verbis, quam meis subjungam: Sub secundo templo à monarchia Alexandri Magni publice recepta fuit מנין שטרות i. e. *ÆRA CONTRACTUUM*, idque, uti referunt in gratiam Alexandri. Cum enim hic deletio Persarum regno, & Græcorum recens instituto, urbem Hierosolymam bello petiturus & perditurus esset, Simeon, cognomine Justus, Pontifex maximus, Pontificali habitu indutus ei obviam processisse, bellum avertisse, & certas pacis condiciones inisse dicitur. Tum Alexandro petenti, ut statua sua aurea in templo, inter gradus & altare erigeretur, Simeon prætens non esse sibi integrum ullum sculptile templo inferre, præstantius pollicitus fertur *מנן שטרות*, ut omnes filii sacerdotum illo anno nascendi, Alexandri vocarentur, & omnes litera contractuum ab anno ingressus ejus in urbem signarentur. Contigisse hoc dicitur anno mundi 3638. sed juxta supputationem Judæorum 3448. Hæc Pfeifferus, quem vide *Notis ad libellum de lusu*, & autores, quos ipse citat; nec non *Josephum Scaligerum de Emend. Temp.* lib. V. pag. 429. Neque apud solos Judæos computus Alexandreus obtinuit; sed apud plerosque etiam Orientis populos. Etiam hodie eo utuntur Christiani in Syria & Arabia; ut &

Muhammedani. Bene autem observandum est, quod ait *Scaliger Proleg. pag. 10.* quosdam ignorasse, diversa esse initia Regum, ut ipsius *Nabuchodonosori cum patre & solius: Alexandri ab excessu Philippi Patris, & ab initio Seleuci.* De Muhammedanis facta mentio in mentem mihi revocat, quod aliquando de Turcis legi. Ils confondent, dit *Monsieur Ricaut dans sans Hist. de l'empire Ottoman Liv. I. C. 3.* tellement l'Histoire & la Chronologie, qu'ils disent que Job estoit Juge de la cour de Salomon, & qu'Alexandre le Grand estoit General de ses armées. Sunt, inquit D. Ricotus, *Hist. de Imperio Turcico Lib. I. Cap. 3. Historiarum & chronologia sic imperiti, & ita eas confundunt, ut dicant Jobum judicem fuisse in aulâ Salomonis, & Alexandrum Magnum ducem exercituum ipsius.* Si cum quibusdam metempsychosin statuerent, non dubito, quin crederent animam Alexandri in suis Imperatoribus habitare. Hoc de se Julianus credidit, de quo *Historia Miscella cap. 41.* sic habet: *Putabat enim secundum Pythagoream Platonisque sententiam, ex mutatione corporum Alexandri animam possidere, aut esse potius in alio corpore alium Alexandrum.* Ob hanc itaque causam Persarum Regis noluit admittere preces. Mirum est, quod ex *Chrysostomo* docet *Balduinus de Calceo cap. 17. pag. 186.* quosdam aurea veterum regum numismata, utpote Alexandri Magni, calceis ad pretiosiore

orna.

ornatum adjunxisse: nempe aureum illud os *Hom. ad Pop. Antiochenum* per interpretem hæc ait: *Quid vero diceret aliquis de circumligantibus aurea Alexandri Macedonis numismata pedibus? Dic mihi, hanc sunt spes nostra, ut post crucem Domini, gentilis Regis in imagine spem salutis habeamus?* Ex quibus verbis patet non ornatus tantum causa, sed etiam ad bonum prosperi eventus omen, hoc factitatum fuisse, ut recte *Baldwinus* monet pag. 222. Plura de Alexandro subtexere, cuius facile esset; sed omnibus in rebus modus est optimus: imprimis in descriptionibus. Autores, qui de Alexandro & ejus gestis scripserunt, enumerat *Freinshemius Proleg. in Curtium*. Quosdam ab illo omissos recenset *Reinesius Epist. ad Rupertum* pag. 311. Vide etiam ipsum *Rupertum* pag. 320. Et rursus *Reinesium* pag. 384. & 409.

CAP. XX.

Urna Severi osculis excepta. Adorare. Heraldus, Lipsius, & Henricus Salmuth notati. Martyrum vulnera olim osculabantur. Ante celebrationem sacræ cænæ Christiani olim sibi invicem oscula figebant: recens baptizatis non item. Imperator Pontificis Romani pedes osculabatur, & Pontifex Imperatoris. Theodoræ Augustæ pedes etiam patricii osculo prosequi solebant. Nonnihil de Theodora & duabus auri-garum factionibus Venetis atque Pra-sinis.

PRodiit nuper non inelegans libellus Jacobi Lydii, quem vocat *Florum sparsionem ad Historiam Passionis Jesu Christi*. Ibi occasione osculi, quo Judas Salvatorem nostrum prodidit, multa colligit de osculis, & qui de iis scripserunt, autores enumerat. His potuisset addere *Dissertatorem anonymum*, cujus opusculum existat in *Fasciculo Joco-Seriores*, & imprimis *Jacobum Herrenschmidium*, qui anno hujus seculi trigesimo, edidit *Osculologiam Theologo-Philologicam*. Nos quæ de hac materia promamus, hodie habemus admodum pauca. Juvat tamen non
nulla

nulla addere, omnibus haud ita nota. Moribundis, quin & jam mortuis oscula fixisse veteres, à viris doctissimis est traditum. Vide *Kirchmannum de Funeribus Roman. lib. I. cap. 5. Quenstedt de Sepultura Veterum cap. 5. Alexandrum ab Alexandro lib. III. cap. 7. & ibi Tiraquel- lum*. Sed urnam, quâ mortuorum reliquiæ condebantur, osculo exceptam nemo præter *Herodianum*, quod scio, hæcenus narravit. Is *lib. IV. cap. I.* sic habet: Εἰποντο δ' ὁπιδὲν αὐτοῖς οἱ τῶν ὑπατῶν ἀρχὴν τίτι διέποντες, καὶ πῶς φέροντες, ἴδθα ἢ τὰ Σεβήρια λείψανα. Οἷτιι προσκυνοῦντες τὰς εἰκας αὐτοκράτορας, πα-
 εῖοντες ἐ τῶν καὶ πῶς προσκυνοῦν. *Post sequebantur con- sules, urnam cum Severi reliquiis gestantes. Qui autem novos Imperatores consalutaverant, urnam quoque ipsam supplices adorabant. Recte vertit Politianus supplices adorabant. nam προσκυνοῦν est manu ori admotâ Diis supplicare, quod Latini adorare dicunt. Contra quam Heraldus statuit ad Arnobium pag. 33. qui putat adorare idem esse, quod orare ad, sicut dicimus adire ad Deos. De adoratione multi multa scripserunt, inter quos Brissonus de form. lib. I. Petrus Pitheus Advers. lib. I. cap. 3. & imprimis Lipsius Elæct. lib. II. cap. 6. Qui tamen in eo fallitur, quod existimat adorantes manum prius porrigere, deinde statim ad os referre solitos: nam contrâ faciebant. Quippe manum osculari, deinde eam adversus illum, quem adorabant, protendere consueverant. Clare hoc docet Salmasius, & ex*

eo Onzelius ad Minucium Felicem pag. 6. nec non Servatius Gallus ad Lactantium lib. II. cap. 4. Adorationem ipse Minucius pag. 2. sic describit : *Cacilius, simulacro Serapidis denotato, ut vulgus superstitiosus solet, manum ori admo-vens, labiis osculum pressit. Lipsii errorem multi sequuntur, decepti auctoritate viri in literis præclari. Ipse sequutus videtur Turnebum, si verum est, quod Salmuth refert ad Pancirollum de Rebus deperdit : Tit. 46. ipse enim Turnebus non est mihi hodie ad manum. Præjudicio autem Salmuth laborat, cum putat idem à Mureto fuisse dictum Var. Leët. lib. X. cap. 1. nam contrarium ex ipsis Mureti verbis patet. Cum ex eo quæsitum esset, num illa in salutandis potentibus consuetudo, quâ nostram ipsi manum ori admo-vere solemus, veteribus æque ac recentioribus esset usitata, hunc in modum respondit : Solebant & illi, cum aut fanum aliquod præterirent, aut lignum lapidemve aliquem aspicerent, in quo divinitatis aliquid esse opinarentur, (neque enim vilior illis temporibus ullius rei, quam Deorum, annona erat) manum ad os referre, & tenui murmure illos lapideos aut ligneos Deos, ut sibi faverent, præcari. Ne quid addit de protensione manus, quæ fiebat prius, quam manum ori admovissent. Fateor nos apud veteres non nunquam legere, bucculam, aut aliam corporis partem manu prius tactam, dein manum ad os relata fuisse; sed id animo amatorio potius, quam reli-*

religioso fiebat. *Suetonius* narrat *Vit. Aug. cap. 94.* *Quintum Catulum* somniasse, quasi *Jupiter* compluribus pretextatis tutorem à se poscentibus, unum ex iis demonstrasset, ad quem omnia desideria sua referrent: ejusque osculum delibatum dignitis ad os suum retulisset. Quæ verba nollem viri doctissimi de adorationis ritu interpretati essent. De *Jove* itidem apud *Apulejum Metam. lib. III.* legimus: *Tunc Jupiter, prehensâ Cupidinis bucculâ, manuque ad os suum relatâ, consaviat.* Vide *Præcæum* notis ad h. l. Diximus urnam *Severi* osculis fuisse honoratam. Jam notandus est mos *Christianorum*, qui martyrum vulnera olim exosculabantur. In *Martyrologio Romano A. D. XIII. Cal. Martii* sic habes: *S. Julianus Cappadox, exosculans necatorum martyrum corpora, ut Christianus delatus, & ad præsidem ductus, lento igne jussus est comburi.* Ad quem locum *Baronius* hæc verba ex *Prudentio* adfert *μετ' ἑπὶ. Hym. V.*

*Ille unguarum duplices
Sulcos pererrat osculis:
Hic purpurantem corporis
Gaudet cruorem lambere.*

De *Constantino Imperatore* apud *Theodoretum Hist. Eccl. lib. I. cap. II.* legitur: *Θιασώδης τινὰς τὰς δεξιὰς ὀφθαλμοὺς ἐκκακομένους, & μαρὰν ὡς τὸ πρὸς τῷ εὐσεβείᾳ ἰδεαῖον πῶ παθὺς ἐγγύιστο πρὸς ἑαυτὸν, τὰ χεῖρα τοῖς τραύμασι περιεσπῶν, ἐλκύσκειν ἐκείνῃ τῇ φιλήματι τῷ εὐλο-*

ἰαν πικρίων. Videns autem aliquos, quibus dexter oculus erat excussus, & edoctus pietatis causâ, cui firmiter adharebant, hoc esse perperas, vulneribus labra admovit: persuasus se benedictionem inde per osculum exsucturum. Nihil igitur mirum est, consuevisse olim Christianos in mutui amoris signum, invicem se osculari, antequam sacram Eucharistiam celebrarent: quâ de re vide *Iacobum Lydium de Sacra Cœna Literat. pag. 97.* & *Danielem Fesselum Advers. Sacrorum lib. III. cap. 7. pag. 283.* Hoc postea ab Innocentio est mutatum, qui instituit, ut post celebrationem fideles mutuò sibi oscula darent. Nihil est fidelibus inter se magis unitum, qui spirituali quadam cognatione omnes connectuntur. Cognationem osculo olim probatam fuisse, ostendit *Petrus Arodius Decretorum lib. V. Tit. 12. §. 1.* Apud Romanos autem Græcosque præter necessarios nemini mulieres osculari licuit. *Propertius* eò respexit ad Cynthiam scribens *lib. II. Eleg. 5.*

*Quin etiam falsos fingis tibi saepe propinquos,
Oscula nec desunt, qui tibi jure ferant.*

Idem apud Hebræos obtinuisse ostendunt exempla à *Fesselio l. c.* allata. Volunt quidam (quos inter in primis est Bellarminus) recens baptizatis osculum dari fuisse solitum, non quidem in ore, ut moris est; sed in imo baptizati pede à ministro, qui eum tinxerat: verum illos solide refellit insignis Theologus, *Ioannes Dallaus de cult.*

cult. Rilig. Latinorum lib. I. pag. 13. Quæ de pedum osculis traduntur, ea sunt omnibus notissima. Hoc servile se colendi genus admiserunt Romani Principes : cujus primum inventorem esse ferunt Cajum Caligulam. Romani Pontifices hoc postea imitati sunt, quos non puduit ipsis Imperatoribus humi prostratis pedes deosculandos porrigere. Ferunt in castello Sancti Angeli, ubi habitare solet Papa Romanus, de Carolo V. Cæsare, & Paulo III. Pontifice, hosce versus marmori incisos legi :

*E Lybia advenit Romanas victor ad arces
Cæsar, & in niveis aureus ivit equis.
Ille triumphavit; sed tu plus Paule, triumphas:
Victor namque tuis oscula dat pedibus.*

Non possum, quin addam, quæ hac de re occurrunt apud *Polydorum Virgilium*, hominem Papistam, de rerum invent : lib. IV. cap. 13. *Romani Pontifices*, inquit, *deosculandos pedes exhibendi morem à Christo se accepisse contendunt. At Christus non Magdalena osculandos pedes obtulit ; sed sponte peccata fœrentem, & suam misericordiam non solo amplexu genuum, ut ethnici, sed etiam osculo pedum implorantem, ejus consolande causâ admisit : hoc ipsum honoris genus alioquin non minus repudiaturus, etsi sibi reverâ debitum, quam appellationem Magistri boni. Sic quoque Petrus Cornelium centurionem ad genua procidentem manu sua sublevavit, S U R-
G E,*

GE, inquit, HOMO SUM TIBI SIMILIS: tantum abfuit ut osculandos pedes exhibuerit. Decipimur specie recti, & saepe cum Caligula pedes protendimus, dum Christi humilitatem vel spernimus, vel fucato conservanda Apostolicae auctoritatis titulo exornare laboramus. Nihilo secius tamen ex iis, quæ Alemannus citat ad Hist: Arc. Procopii Pag. 115. clare patet ipsos ecclesiasticos, quin & Pontificem Romanum deosculatos fuisse pedes Justiniani, licet illa aliorum ab Alemanno accipiantur. Neque obstat, quod alibi legimus Justinianum à Pontifice filium dictum: & hunc ipsum Imperatorem Constantini Papæ pedibus oscula fixisse. Oscula sunt subjectionis & obedientiæ signa. Exempla vide Genes. xli. 40. 1 Sam. x. 1. Huc referendum est, quod Tacitus ait Lib. I. Hist. Ruere cuncti in castra, laudare militum iudicium, exosculari Othonis manum. Igitur ut suam obedientiam Pontifex testaretur Imperatoris pedes osculatus est: Imperator autem Pontificis, ut filium se ecclesiæ ostenderet, cujus veluti caput Pontifex erat. Non dum enim hic in Imperatores ipsos sibi imperium arrogaverat. Non est hoc loco prætereundum quod Casaubonus scribit Exercit: XIV. ad Annal. Baronii Num 5. Mos osculandi pedes, inquit, olim genus fuit reverentiæ, & Episcopis & Abbatibus, & aliis sanctimoniâ claris viris passim exhiberi solita; ut sexcentis exemplis alibi probamus: postea is ritus ad cultum Romani Pontificis proprie est.

est translatus. Ubi autem *Casaubonus* multis exemplis hoc probet, juxta scio cum ignarissimis. De Imperatorum uxoribus eodem hoc honore cultis non temere alibi, quam apud *Procopium* exemplum legas. Is *Hist. Arcan. Pag. 68.* narrat quosdam ex patriciis Theodoram Justiniani uxorem

σερσκιυήσασθαι, & παρὰ ἐκατέρῃ ποδὸς ἀκροῦ χεὶρ ἀψάσθαι. *adorasse, summisque labiis utriusque pedis plantam osculatos fuisse.* Huc etiam respicit *Pag. seq.* dicens aliquem ex patriciis

σερσκιυήσασθαι τὴν Θεοδώραν, ἀπὸ αὐτῇ σερσκιυήν εἶθιστο. *Theodoram adorasse, quo pacto eam adorare moris est.* Ante Theodoram hunc morem non obtinuisse, ex eodem *Procopio*

Pag. 133. discimus: Βασιλίσσα μὲν τοι σερσκιυήν οὐδαμῶν εἶθιστο. Παρὰ δὲ Ἰουστινιανῷ, & Θεοδώραν τὰς εἰσιόδους ποιεῖ μὲν οἷτι ἀλλοὶ ἄπαντες, καὶ ὅσοι τὸ παλαιὸν ἀξίωμα εἶχον ἐπιπτόν μὲν εἰς τὸ ἰδεῖν, ἐνθὺς δὲ τὸ σῶμα χειρῶν, & ποδῶν ἐς ἀγασσιπταυροῦσαν, τὴν χεὶρ ποδὸς ἐκατέρῃ ἀψάμενοι, ἰξαιέσαντο.

Augusta nullus adoranda mos fuit. Verum cum in conspectum Justiniani, Theodoraque venirent tum alii, tum qui patricia dignitatis essent, statim in faciem procumbebant, pedibusque ac manibus tensis utrumque principis pedem osculo prosequuebantur, ac tum abscedebant. Hoc minus mirum videbitur iis, qui sciunt Magistratus & præfides provinciarum, Theodoræ æque ac Justiniano fidem, juramenti religione, publice professos suam utriusque acceptam retulisse dignitatem, & utriusque servos sese appellasse. Hæc est, de qua ipse Imperator ait *Nov. VIII. Cap. I. Hæc omnia apud*

nos cogitantes, & hic quoque participem consilii sumentes eam, quæ à Deo data est nobis reverendissimam conjugem, ad hanc sacram venimus legem. In hac Theodora verum apparuit, quod est apud *Æschylum* Poëtam *Prometh. Vincit.*

Ἄπας ὁ τευχὺς, ὅστις ἀντίον κεκτῆ.

Quippe qui humili genere nati ad imperium evahuntur, truces plerumque sunt & feroces, ac pro vera majestate crudelitate se atque sævitia induunt. Quantum veræ gloriæ deest, tantum mutuari conantur ab externâ pompâ, & splendidis titulis. Erat Theodora patre nata ursario, bestiis ad amphitheatrales Praefinorum venationes alendis præfecto. Post Acacii patris obitum corpore quæstum publicè fecit, omnium se libidini exponens. Transiit quoque ad Venetos, & ab his cum matre sororibusque munus alendi bestias accepit. Hæc monere me poterant, ut de circo & aurigarum factionibus aliquid adderem; nisi *Onuphrius Panvinius*, & *Julius Caesar Bulengerus*, singulari industriâ Viri, de circo & ludis circensibus abunde conscripsissent. Præter hos quoque adi *Alexandrum ab Alexandro Lib. V. Cap. 8. Hier. Mercurialem de Arte Gymnasticâ Lib. III. Cap. 9. Rosinum Lib. V. Cap. 5. ibi Dempsterum.* Pauca de Praefinis & Venetis ex *Alemanno* hæc addam. Is *Pag. 65. Not. ad Procopium* sic scribit: *De origine Praefinorum ac Venetorum sic in antiquis historiæ Collectaneis Cod. Vat. 96. legebam.*

Οὐνόμα[Ⓢ] σπορ[Ⓢ]τ[Ⓢ] ἰσθμῶς τὰ τῷ ἰπποδρόμῳ χρώματα, ἀγωνίζο-
 υν[Ⓢ] γῆς ἑ θαλάσσης. ἰσάλλοντο κλῆροι, ἑ ὅς ἔπαχες ὑπὲρ τῆς
 γῆς ἀγωνίζεσθαι, ἰσθμῶς χλοανόν, ὅς ἑ ὑπὲρ τῆς θαλάσσης κυ-
 νείν, ἑ ἰποῖδ' τὸν ἀγῶνα Μάρτυ εἰκε[Ⓢ] τινάρεται. Καὶ εἰ μὲν τὸ
 χλοανόν εἶχε τῆς γῆς ὁμορφίας ἡλπιζον, εἰδὲ τὸ κυνείον τῆς θα-
 λάσσης ἰσπλε[Ⓢ]δε. Καὶ ἡύχοντο οἱ μὲν γιγαστὲς τὸν χλοανόν νικᾶν,
 οἱ ἑ αὖ πάλιν ναυίλοι τῷ κυνείῳ ἰσάλλοντο πῶς νικᾶν. O Eno-
 mans primus adinvenit Circensium colores, quibus
 terra ac maris quasi certamen representavit. Mit-
 tebantur sortes: quem vero contigisset terra vicem
 agere certando, ille vestem viridem inducibat; ca-
 ruleam vero, qui vices maris agebat. Hoc certa-
 men vigesima quarta die Martii Oenomanus insti-
 tuit. Quod si color viridis vicisset, terra fertilita-
 tem omnes sperabant; si caruleus tranquillam ma-
 ris navigationem. Quare agricola optabant victo-
 riam viridi colori: nauta caruleo. Quantas &
 quam multas aurigarum factiones, Prasina impri-
 mis & Veneta, turbas in ipsa Republicâ dederint,
 ex historiis Romanis patet. Notum est illud de
 Vitellio qui, referente Suetonio Vitâ Vitel. Cap. 14.
 quosdam & de plebe obid ipsum, quod Veneta
 factioni clare maledixerant, interemit: contem-
 ptu sui & nova specie id ausos opinatus. Quanto
 melius, Marcus Antoninus Lib. I. ἑ εἰς αὐτὸν §. 2.
 Παρὰ τῷ τερσίῳ, inquit, (ἱμαθῶν) τὸ μὴ σπερσιασὲς, μήτε
 βενιτιωδὲς, μήτε παλμυλάει[Ⓢ] ἢ σκυτάει[Ⓢ] (legendum est
 σκυτάει[Ⓢ], ut viri doctissimi censent) γινώσκει. Ab
 educatore [dedici] ne spectator fantorque Pra-
 sianus, aut Venetianus; neve palmularius, aut
 se-

sequentarius merito audirem. Credo sapientissimum Principem hæc *Epicteti* legisse *Ench. Cap. 49.*

Εἰς τὰ διάτρεχ τὸ πολὺ παρὶναι ἐκ ἀναγκῆς. εἰ δὲ ποτε χωρὶς εἴη, μὴδὲν οὐκ ἐκείναι φαίρη ἢ σιαντῶ. *Τετίσι,* θίλει γίνεσθαι μόνον τὰ γινώσκειν, & νικᾶν μόνον τὸν νικῶντα. *Theatra frequentare non est necesse: sed si quando tempus tulerit, te nulli nisi tibi ipsi studere appareat, hoc est, ea duntaxat fieri velis, quæ fiunt; & eum solum vincere, qui vincit.* Habes hic, mi Lector, *Variarum* nostrarum *Lectio- num* viginti capita. Constitueramus & altera viginti addere; sed differendum istud est certis fonticisque de causis. Sumus etiam lassī quodam modo & defatigati.

Scribere plura libet; sed vox mihi fessa loquendo

Deficit, & laeso pollice sistit opus.

F I N I S.

I N D E X

Rerum & Verborum.

A.

A Dagium de memoria.	Pag. 16
Adamus.	pag. 215
Adorandi mos.	pag. 263. 264. 265
Æsculapius.	pag. 187
Affectatus.	pag. 116
Alemannus.	pag. 122
Alexander genitus serpente Deo & cornutus.	235. 243
—— pag. in magno honore semper habitus.	257
Ammon.	pag. 236
Animæ sepulcris condita.	pag. 133
Antonius Musa.	pag. 189
Arabica lingua locupletissima.	pag. 103
Astra filia Iovis.	pag. 43
Athenienses quomodo sepeliverint mortuos in bello.	pag. 81
Augustus quomodo corpus Alexandri Magni veneratus sit.	pag. 257

B.

B Acchus cornutus.	pag. 247
Belisarius non occæcatus.	pag. 1
Bembi impium dictum.	pag. 126
Beronicius.	pag. 58
Bezæ memoria & oblitio.	pag. 14
Biblia sacra quomodo vertenda.	pag. 124
—— ab Ethnicis lecta.	pag. 129
Bucephalus unde dictus.	pag. 254
B _u particula <u>augens</u> .	pag. 256

S

C. C. Jul.

I N D E X

C.

<i>Jul. Cæsar visa Alexandri imagine ingemuit ; &</i>	pag. 2	58
<i>quare.</i>	pag. 32	
<i>Canicularius.</i>	pag. 76	
<i>Canis nomen inter convitia.</i>	pag. 80	
<i>Canes sepulcrales.</i>	pag. 84	
<i>— janus alligati.</i>	pag. 51	
<i>Canonizatio.</i>	pag. 149	
<i>Caphtoræi.</i>	pag. 136	
<i>Castellionis versio S. Bibl.</i>	pag. 99	
<i>Cestus.</i>	pag. 105	
<i>Chinensium lingua.</i>	pag. 199	
<i>Christiani falso accusati.</i>	pag. 266	
<i>— — ante sacram cœnam sibi invicem oscula fi-</i>	pag. 219	
<i>gebant.</i>	pag. 26	
<i>Clepsydra.</i>	pag. 49	
<i>Ciceronianus Erasmi.</i>	pag. 245	
<i>Consecratio.</i>	pag. 7	
<i>Cornua.</i>	pag. 8	
<i>Consules alter Romæ , alter Byzantii.</i>	pag. 157	
<i>— Ordinarii & honorarii.</i>	pag. 172	
<i>Convivarum numerus.</i>		
<i>Corpora pro servis.</i>		

D.

<i>Dædalus pro perturbatore.</i>	pag. 78
<i>Diana eadem quæ Juno.</i>	pag. 210
<i>Dii apud Romanos mares simul & feminae.</i>	pag. 43
<i>— ex senatus auctoritate recepti.</i>	pag. 54
<i>Δαλδ.</i>	pag. 180

E. et

E.

τὸ Ἡ' γαμοιαικήν.	pag. <u>173</u>
Ἡ' εἰλείθυα.	pag. <u>212</u>
<i>Embolaria mulier.</i>	pag. <u>100</u>
<i>Encaustum.</i>	pag. <u>22</u>
<i>Epigramma in Hasium.</i>	pag. <u>60</u>
<i>Epistola.</i>	pag. <u>18</u>
<i>Equi inusto signo notati.</i>	pag. <u>255</u>
<i>Erasmus.</i>	pag. <u>25</u>
<i>Exercitationes.</i>	pag. <u>193</u>

F.

F <i>Lora non fuit meretrix.</i>	pag. <u>92</u>
<i>Fluvii cornuti.</i>	pag. <u>245</u>
<i>Fœdera duorum generum.</i>	pag. <u>194</u>
— <i>quomodo sancita.</i>	pag. <u>198</u>
<i>Fœderatæ male dicuntur septem Belgii provinciæ.</i>	
pag.	<u>197</u>
<i>Fœderati quinam dicti.</i>	pag. <u>196</u>
<i>Fœminæ Medicæ.</i>	pag. <u>183</u>

G.

G <i>Alli plurima in linguam suam converterunt.</i>	
pag.	<u>107</u>
<i>Græci literas in Italiam inferunt.</i>	pag. <u>69</u>
<i>Grotii insignis memoria.</i>	pag. <u>11</u>
<i>Gymnasia.</i>	pag. <u>193</u>

H.

H <i>Ebræa lingua.</i>	pag. <u>104</u>
<i>Hebraismi.</i>	pag. <u>127</u>

— Unde in ethnisis scriptoribus.
Herodianus à Politiano versus.

pag. 129

pag. 121

I.

J Anua.

pag. 85

Janitores.

pag. 18

Ignis apud Persas sacer.

pag. 37

— Imperatoribus praelatus.

pag. 34

Imperatores pro Diis habiti.

pag. 49

Insepulorum animæ.

pag. 133

Interpres.

pag. 106

Interpretandi tres modi.

pag. 110

Ismarus.

pag. 205

Judæi an sanguinem bibant.

pag. 200

Julianus se Alexandri Magni animam possidere credidit.

pag. 260

Juno Lucina.

pag. 208

Jupiter & mas & fœmina.

pag. 41

— Ammon cornutus.

pag. 237

— Casius.

pag. 149

— Minianus.

pag. 29

Justinianus imperator.

pag. 2, 269

K.

K

On πικρία.

256

L.

L

Acedæmonii mortuos sepeliebant in urbe.

pag. 83

Larentia, quæ & Tarrutia.

pag. 92

Laurentia, Romuli nutrix.

pag. 91

Leæna.

pag. 91

Lex Hebræorum.

pag. 23

Liberi obscænus cultus.

pag. 93

Liberi

RERUM & VERBORUM.

<i>Liberi homines non torti.</i>	pag. 167
<i>Liberti ingrati.</i>	pag. 174
<i>Lingua Arabica.</i>	pag. 103
— <i>Hebræa.</i>	pag. 104
— <i>Chinensium.</i>	pag. 105
<i>Literæ renatæ.</i>	pag. 66
<i>Lilith Adami uxor.</i>	pag. 214
<i>Longævorum exempla.</i>	pag. 229
<i>Λοζίας.</i>	pag. 238
<i>Longolii maxima memoria.</i>	pag. 15
<i>Lucifer.</i>	pag. 216
<i>Lucina.</i>	pag. 208
<i>Ludi sacri in Græcia.</i>	pag. 145
— <i>Circenses.</i>	pag. 270. 271
<i>Luna eadem quæ Juno.</i>	pag. 210

M.

M <i>Alum Veneri sacrum.</i>	pag. 142
<i>Martyrum vulnera Christiani olim osculabantur.</i>	pag. 265
<i>Medici.</i>	pag. 176
<i>Medicina.</i>	pag. 178
<i>Μῆλον.</i>	pag. 148
<i>Memoria aliquorum valde insignis.</i>	pag. 11. 64
<i>Μνίσκη.</i>	pag. 252
<i>Mensa.</i>	pag. 156
<i>Meretrices cultæ divino honore.</i>	pag. 91
— <i>floridis vestibus indutæ.</i>	pag. 94
<i>Μεγίς, μέγας, μεγάλος.</i>	pag. 153
<i>Minii varius usus.</i>	pag. 24
<i>Mirandulani magna memoria.</i>	pag. 12
<i>Mithræ cultus.</i>	pag. 45
<i>Mortui canibus obiecti.</i>	pag. 80
— <i>in bello quomodo sepulti.</i>	pag. 81
<i>Moses Propheta.</i>	pag. 250
	<i>Μόσῃ.</i>

I N D E X

Muretus

laudatus.

pag. 198

pag. 10

N.

N *Imbus.*

pag. 252

Nocturnus.

pag. 215

Numismata veterum regum calceis adjuncta, & qua-
re.

pag. 260. 261

O.

O *Oratores.*

pag. 180

Oratores quales interpretes.

pag. 138

— dicebant ad clepsydram.

pag. 221

— coronati.

pag. 227

Oscula mortuis veteres figebant.

pag. 263

Osculandi pedes mos.

pag. 267. 268. 269

P.

P *Artes cuique in conviviis.*

pag. 153

Pasiphae.

pag. 90

Nic. Perottus.

pag. 117

Sam Petitus.

pag. 175

Philosophi expulsi.

pag. 228

Picturae inhonestae.

pag. 87

Plato.

pag. 130

Plutarchus.

pag. 162

Poetae quales interpretes.

pag. 138

Politianus.

pag. 71. 121

Pomum.

pag. 148

Præfecti honorarii.

pag. 8

Personarum quid.

pag. 263

Provinciae septem Belgii perperam fœderatae di-
stae.

pag. 197

Yuxh.

RERUM & VERBORUM.

Ψυχῶν.	pag. 133
Putidum.	pag. 115
Pythii certaminis præmia.	pag. 147

R.

R Hetores.	pag. 226
Rubrica.	pag. 23
Ruffinus qualis interpres.	pag. 123

S.

S Almasii stupenda memoria.	pag. 11
Sanguis.	pag. 201
Σαυρόδες.	pag. 256
Sedere ad pedes.	pag. 154
Seneca accusatus de luxu.	pag. 158
—— qualis scriptor.	pag. 160
Senatores honorarii.	pag. 8
Sepelire.	pag. 80
Septerium.	pag. 151
Sepultura servorum.	pag. 176
Serpentes divini habiti.	pag. 57
Servitus unde primitus nata.	pag. 171
Servus.	pag. 165
Servorum sepultura.	pag. 176
Servi Medici.	pag. 178
Severi urna osculis excepta & adorata.	pag. 263
Simeon Pontif. Max. quales Pacis conditiones iniverit cum Alexandro Magno.	pag. 259
Sol maxime cultus, & idem qui Iupiter.	pag. 39
—— cornutus.	pag. 247
Σάματα pro servis.	pag. 172
Subscriptio Imperatorum.	pag. 20

T.

T <i>Acitus conversus ab Hoofdio.</i>	pag. 109
<i>Taurus.</i>	pag. 90
<i>Taurinus sanguis.</i>	pag. 202
<i>Theodoræ Augustæ pedes patricii osculo prosequi solebant.</i>	pag. 269
— <i>Pater qualis fuerit.</i>	pag. 270
<i>Tmarus.</i>	205
<i>Triumphantes miniati.</i>	pag. 30
<i>Tremellii & Junii versio Sa. Bibliorum.</i>	pag. 134
<i>Turcarum de Jobo & Alexandro Magno error.</i>	pag. 260
<i>Tzetzæ chiliades.</i>	pag. 5

V.

V <i>Ariorum notæ.</i>	pag. 73
<i>T'opia.</i>	pag. 220
<i>Vertere pro pervertere.</i>	pag. 145
<i>Vesperus, Vesperugo.</i>	pag. 216
<i>Umbella.</i>	pag. 251
<i>Umbriculus.</i>	pag. 240
<i>Unguenta cibis addita.</i>	pag. 31
<i>Vossii præclara memoria.</i>	pag. 11

LECTORI.

A Udi, quæso, humanissime Lector, meam querelam? Libellum nec bonum satis, nec magni momenti multo pejorem reddidit is, cui Bibliopolæ provinciam errata typothetarum corrigendi commiserant. An deditâ opera hoc tegerit, an verò per incuriam, non dixero. Multa eum corrupisse, certum est: dum ipse procul dego à loco, ubi libellus excuditur. Videbis interpunctiones vel omisas plane, vel loco non suo positas: diphtongos in simplices, simplices in diphtongos mutatas: majusculas adhibitâs, ubi minime oportuit; neglectas, ubi adhibere decuit. Nulla fere Græca vox est bene, & accentu suo notata. Hæc volui ut scires, ne forte meæ negligentia imputares. Est tamen ubi & ipse cespitaverim. Bis terve particulas *aut* & *vel* pro *sive*, & vice versa, posui. Nam licet multi hæc promiscue usurpent, tamen quid intersit eruditi non ignorant. Graviora errata notavi, cætera ut tute corrigas iterum iterumque te rogo: omnia enim enumerare nec volui, nec potui. Ultimæ philyræ sunt tamen sic satis accuratæ, quarum correctioni Frater præfuit.

ERRATA.

P Ag. 8. lin. 3. *paucas* pro *paucos*. l. penul. *absone* pro *absque*. pag. 11. l. 9. *a pueris* pro *a puero*. pag. 13. l. 9. *an* pro *une*. pag. 16. l. 24. *esset* pro *esset*. pag. 17. l. 12. *non sumptum* pro *hoc sumptum*. pag. 18. l. 16. *ea in* pro *eam*. pag. 21. l. 7. *consuevit* pro *consuluit*. — l. 10. *τῶν ὁλοκαυστῶν* pro *τῶν ὀνομασίων* & *ὁλοκαυστῶν*. — l. ult. *Lib.* pro *Leg.* pag. 22. l. 27. *cinnabatum* pro *cinnabarin*. pag. 25. lin. 22. *miniatus* pro *miniatus*. pag. 27. l. 27. *maxum* pro *magnum*. pag. 31. l. 19. *minuta* pro *miniata*. pag. 36. l. 24. *cogitarent* pro *cogitaverit*. pag. 39. l. 11. *Misfram*, pro *Muhram*. pag. 41. lin. 21. *ne quod* pro *non quod*. pag. 49. lin. 25. *sequitur* pro *loquitur*. pag. 52. lin. 14. *in provincia* dele in. pag. 54. l. 13. *tulerit* pro *retulerit*. pag. 55. l. 19. *si essent* pro *si esset*. pag. 58. l. 21. *carebimus* pro *cavebimus*. pag. 67. l. 10. *Hoc* pro *Hos*. pag. 70. l. 15. *θιρίων* pro *θιρίων*. pag. 72. l. 6. *prodierunt* pro *prodeunt*. pag. 92. l. 24. *Laurentia* pro *Larentia*. pag. 94. l. 12. *lo* pro *loco*. pag. 96. l. 14. *refectam* pro *perfectam*. pag. 98. l. 6. *obsolet* pro *obsoleti*. pag. 99. l. 11. *ἱματισα* pro *ἱματίνα*. — l. 12. *θιληθρητα* pro *θιληθρητα*. pag. 105. l. 11. *vocabulo* pro *vocabulario*. pag. 108. lin. 15.

E R R A T A.

lin. 15. *Marolis* pro *Marollesit*. pag. 119. lin. 14. *incerta* pro *atque incerta*. pag. 120. lin. 16. *quam de* pro *quam scripsit de*. pag. 124. l. 23. *sacris* pro *sacri*. pag. 127. l. 1. *Esaia* pro *de Esaia*. pag. 128. l. 21. *pure* pro *pureque*. pag. 134. lin. 27. *Bibliopolis* pro *Bibliopoliis*; pag. 138. l. 15. *Hoc* pro *Hos*. pag. 140. l. penul. *præfertim fors* pro *præfertim fors*. pag. 143. l. 7. *Quia* pro *quin*. — l. 13. *don* pro *non*. pag. 147. l. 23. *catæve* pro *rotæve*. pag. 149. l. 26. Locus ex Hebræo *Motis citatus omnino est transpositus*, ut & alter, qui subsequitur. — l. 28. & *Caphtor* pro *e Caphtor*. pag. 152. l. 9. *Tolétay* pro *Tolétay*, & *tiégay* pro *itiégay*. pag. 153. l. 18. *cua* pro *sua*. pag. 171. l. 22. *locaruna* pro *locarunt*. pag. 172. l. 11. *Quod &* pro *quos &* pag. 180. lin. 10. *Paraleg.* pro *Paralip.* pag. 183. l. 19. *intererant* pro *interierant*. pag. 187. l. 29. *manibus* pro *in manibus*. pag. 205. lin. 16. *Thraica* pro *Thracia*. pag. 230. l. 17. *Phelgonte* pro *Phlegonte*. pag. 234. l. ult. *terram* pro *terras*. pag. 239. l. 2. *ut fulmina* pro *aut fulmina*. pag. 241. lin. 15. *gerit cornua* pro *gerit fulmina*.

F I N I S.





